

ব্রজেন্দ্রবাবুর কৃত বিশ্ববিজয়ী নূতন নূতন নাটক

## রাজলক্ষ্মী

শ্রীযুক্ত ব্রজেন্দ্রকুমার দে, এম-এ, প্রণীত  
বিশ্ববিজয়ী নাটক। গণেশ অপেরায়  
মহা যশের সহিত অভিনয় হইতেছে।

সীতার বনবাসের সেই চিরকল্প কাহিনী অবলম্বনে লিখিত। বাহার অভিনয় দেখিয়াছেন, তাঁহারা শতমুখে প্রশংসা করিতেছেন। ইহা পাঠ করিলে অশ্রমস্বরূপ করা সুকঠিন। অল্প লোকে অভিনয় হয়। মূল্য ১১০ টাকা।

## বঙ্গবীর

শ্রীব্রজেন্দ্রকুমার দে এম,এ কৃত, গণেশ-  
অপেরায় যশের অভিনয়। একদিন যে  
বাংলার নির্বাসিত রাজপুত্র মাত্র সাত

শত অনুচর লইয়া লক্ষ্য জয় করিয়াছিলেন, সেই বিজয়সিংহের কীর্তি-কাহিনী পাঠ করুন। সেই পুত্রবৎসল সিংহবাহু, কুটচক্রী ইন্দ্রনিল, রাজ্যহারা শালিবাহন, প্রতিহিংসাপরায়ণ অগ্নিমিত্র প্রভৃতি সবই আছে। মূল্য ১১০ টাকা।

## লীলাঙ্গন

শ্রীব্রজেন্দ্রকুমার দে এম, এ, প্রণীত ;  
গণেশ-অপেরা-পাটির যশের অভিনয়।  
শ্রীকৃষ্ণের প্রতি গান্ধারীর অভিষাপ,

বলরামের তীর্থযাত্রা, শাস্ত্রের উচ্ছৃঙ্খলতা, বালখিল্য মুনির অভিষাপ, শাস্ত্র-পত্নী লক্ষণার বিখোদারগণ, অনার্য্যরাজ জরার দ্বারকা আক্রমণ, যতবংশধবংস, শ্রীকৃষ্ণের দেহত্যাগ, সাত্যকির আভিজাত্য-গর্ক প্রভৃতি। মূল্য ১১০ টাকা।

## প্রবীরার্জুন

শ্রীব্রজেন্দ্রকুমার দে এম, এ, প্রণীত ;  
গণেশ-অপেরায় অভিনীত। প্রবীর  
কর্তৃক যুধিষ্ঠিরের যজ্ঞাশ্ব ধ্বংসকরণ, ভীম

অর্জুন কর্তৃক মাহিষমতী-অভিযান, গন্ধার জালাময়ী উদ্দীপনা, নীলধ্বজের নৈরাশ্য, অগ্নির মহাপ্রাণতা, বৃষকেতুর আত্মগতানি, প্রবীরের আত্মদান, জনার অনলোদ্গারী শোকগাথা প্রভৃতি পাঠ করুন। মূল্য ১১০ টাকা।

## স্বর্ণলক্ষা

শ্রীযুক্ত ব্রজেন্দ্রকুমার দে, এম,এ প্রণীত,  
বাগী-নাট্য-সমাজ কর্তৃক মহা যশের  
অভিনয়। শ্রীরামচন্দ্রের সীতা-অন্বেষণ,

বিভীষণ সহ মিত্রতা, রাবণসভায় অঙ্গদের বীরত্ব, শ্রীরামচন্দ্রের সমুদ্রযাত্রা, মহাসমরে বীরবাহু ও তুরগীর পতন, নিকুন্ডিলা যজ্ঞাগারে ইন্দ্রজিৎ-বধ, প্রেমী-লার চিতারোহণ, রাবণবধ, সীতার অগ্নিপরীক্ষা প্রভৃতি, মূল্য ১১০ টাকা।



পরম স্নেহাস্পদ ছাত্র

শ্রীমান্ অমূল্যচন্দ্র দেব

❖ কর-কমলে ❖

অমূল্য !

প্রাণাবিক ছাত্র তুমি, বন্ধু তুমি প্রিয়বর,  
হয় তো বা কোন্ যুগে ছিলে মোর সহোদর ।  
দেহ তব প'ড়ে থাকে স্মদূর আবাসে হায়,  
প্রাণখানি ঘোরে নিতি আমারি এ আউনায় ।  
আমার আখরগুলি হোক না সে কদাকার,  
তোমার আঁখির আগে সুষমার পারাবার ।  
প্রাণটা উজাড় ক'রে আমারে দিয়েছ প্রিয়,  
তুচ্ছ এই প্রতিদান আদরে তুলিয়া নিও ।

শ্রীঅজিতকুমার দে

# ভূমিকা



নাট্যবসিকগণের বহুদিনের প্রতীক্ষিত “চাঁদের মেয়ে” আজ প্রকাশিত হইল। চাঁদ রাঘবের আদবের ছলনায় সোনারমন্মথদ কাহিনী লইয়া নাটক-খানি বচিত। যাহারা “চাঁদের মেয়ে” পড়িতে গিয়া মানসিংহ ও কার্ভালোকে খুঁজিবেন, তাঁহাদের কাছে আমার বক্তব্য এই, আমি সোনার জীবন-নাট্য লিখিয়াছি, চাঁদ-কেদারের কাহিনী লিখি নাই। সমাজের শানিত খড়্গাঘাতে হিন্দুনার ঘে অসহায় কান্না আমাদের ধ্বংসের পথ রচনা করিয়া চলিয়াছে, তাহাকেই আমি রূপ দিতে চাহিয়াছি। অভিনয় দেখিয়া হাজার হাজার দর্শক চোখেব জল ফেলিয়াছে, গ্রন্থকারকে বাহবা দিয়াছে, কিন্তু ঐ পর্য্যন্তই —নারীর বুকের উপব হিন্দুসমাজের জগদল পাঁহাড় তেমনি চাপিয়া আছে। অপবাজের কণাশিল্পী শবচন্দ্র সাবিত্রী, রাজলক্ষী, পার্বতীর বেদনাত্ত ছবি কতবার নিপুণ তুলিকায় আঁকিয়া গিয়াছেন, তবু সেই *tradition* এক ভাবেই চলিয়াছে ; আমি তো তুচ্ছ শিল্পী। তবে কি এ চেষ্টার কোন মূল্য নাই ? নিশ্চয়ই আছে, যদি এ চেষ্টায় আন্তরিকতা থাকে। বঙ্কিমচন্দ্র যখন “বন্দে মাতরম্” গান লিখিয়াছিলেন, তখন তিনি ভাবেন নাই, এই শ্রোতেই এক দিন ভারতে বগা আনিবে। আমি বঙ্কিমচন্দ্র নই, জয়যাত্রার পুরোভাগে সঙ্গীন লইয়া দাঁড়াইতে পারিব না, কিন্তু পিছন হইতে জয়ধ্বনি দিতে আমারও অধিকার আছে।

কোন কোন ঐতিহাসিক সোনাতে চাঁদের ভগিনী বলিয়া বর্ণনা করিয়াছেন, আবার কেহ কেহ চাঁদ রায়কে কেদার রায়ের পিতা বলিতেও ছাড়েন নাই। সেদিনকার কথা ; আজও কেশার মার দীঘিতে, কাচকীর দরোজায়, কেদারবাড়ীর ধূলিকণায় কেদার রায়ের কীৰ্ত্তি বিজড়িত, তবু ঐতিহাসিকেরা এঁদের পরিচয় অনুসন্ধান করেন ম্যাকমিলানের পুস্তকালয়ে। বাঙ্গালী এমনি করিয়াই এতদিন ঘরের ঠাকুরটীকে ফেলিয়া পরের কুকুটীকে পূজা করিয়াছে। হায়, কবে এই জাতি পরের ঐশ্বর্য্য ভুলিয়া ঘরের দিকে মুখ ফিরাইবে ? কবে দূর হইবে এই আত্মকলহ, এই নেতৃত্বের মোহ, আর সমাজের অনাবশ্যক অনুশাসন ? বাঙ্গালীর যে কি ছিল, কি নাই, কেন গেল,

আর কি করিয়াই বা ফিরিয়া পাওয়া যায়, এই কথাটাই আজ বুঝানো দরকার—বন্ধুতাম্ভ হইতে নয়, কর্দমাক্ত পথে নামিয়া বুঝাইতে হইবে। আমরা যাত্রা-লেখকেরা সেই পথটাই বাছিরা লইয়াছি। তুমি নাট্যাচার্য্য, নাট্যরথী—ঐশ্বর্য্যের সোনার মঞ্চ হইতে বহুবার আবেগময়কণ্ঠে জাগরণের গান গাহিয়াছ, প্রেক্ষাগৃহ করতালিতে মুখরিত হইয়াছে, কিন্তু তোমার গান শুনিয়াছে কয়জন? যেখানে রামা মুচি আর দীলু খানসামা মাথার ঘাম পায়ে ফেলিয়া কাজ করিতেছে, তোমার গান সেখানে তো পৌছায় নাই; সমাজের বোঝা যাহারা বাসুকির মত মাথায় করিয়া আছে, তারা তো তোমার জাগরণী শুনিল না! আমরা অপাংক্ত্যের, আমাদের লেখা অপাঠ্য, কিন্তু আমাদের কথা—হোক সে অমার্জিত, তবু কান পাতিয়া শোনে দেশের পনর আনা লোক, যারা মাথার ঘাম পায়ে ফেলিয়া জীবিকার্জন করে। যদি তোমার জাগরণী শুনাইতে চাও, এদেরই মধ্যে তোমাকে নামিয়া আসিতে হইবে—অধিকাংশ বাঙ্গালীর প্রাণ যে সুরে বাঁধা, সেই সুরেই তোমার গাহিতে হইবে।

“চাঁদের মেয়ে” নাটকের একটা নিজস্ব নাটকীয় ইতিহাস আছে। এ নাটকের অভিনয়ে অমৃত অনেক উঠিয়াছে সত্য, কিন্তু বিষও উঠিয়াছে অনেক। নাটকখানি প্রথমতঃ কলিকাতার প্রসিদ্ধ গণেশ অপেরা পাটিতে দেওয়ার প্রস্তাব হয়। তাঁহাদের সাময়িক প্রত্যাখানের পর ক্রমে ক্রমে আর্য্য অপেরা, জয়ন্তী অপেরা ও ভোলানাথ অপেরার দৃষ্টি ইহার উপর পতিত হয়। আশ্চর্য্যের বিষয়, বই না পড়িয়াই ইঁহার শেষ পর্য্যন্ত পিছাইয়া গেলেন। অবশেষে বরিশালের নট্ট কোং বুক ঠুকিয়া ইহাকে গ্রহণ করিলেন। আট মাস পরে চাঁদের ছগালী যেদিন ঘোমটা খুলিল, সে দিন সত্যি স্মরণীয়। দীর্ঘ দুই বৎসরকাল “চাঁদের মেয়ে” যে অর্থ ও যশ অর্জন করিয়াছে, যাত্রার নাটকের পক্ষে তাহা দুর্লভ।

নাটকখানিকে সর্ব্বাঙ্গসুন্দর করার জন্ত নট্ট কোং যে অর্থব্যয় ও আগ্রাস-স্বীকার করিয়াছেন, সে জন্য আমি কৃতজ্ঞ। ইতি—

**গ্রন্থকার**

## কুশীলবগণ :

### পুরুষ ।

চাঁদ রায়	...	...	শ্রীপুরাধিপতি ।
কেদার রায়	...	...	ঐ সহোদর ।
কাঞ্চন ও চম্পক	...	...	কেদার রায়ের পুত্র ।
শ্রীমন্ত	...	...	রাজগুরু ।
দেবল	...	...	শ্রীমন্তের জ্যতি ভ্রাতা ।
ঈশা খাঁ	...	...	সোনারগাঁর দুর্গাধিপতি ।
এনায়েৎ	...	...	ঈশা খাঁর বিশ্বস্ত বন্ধু ।

কেশরী, বান্দা, দিলপিয়া, সনাতন, চাষা, রক্ষী, মাঝি,  
রাখালবালক, কুমকবালকগণ, লাঠিয়ালগণ,  
নাগরিকগণ ইত্যাদি ।

### স্ত্রী ।

ভবানী	...	...	চাঁদ রায়ের স্ত্রী ।
স্বর্ণময়ী	...	...	চাঁদ রায়ের কন্যা ।
কেশার মা	...	...	চাঁদ-কেদারের ধাত্রী ।
আলিয়া	...	...	ঈশা খাঁর ভগ্নী ।

জগদম্বা, গুলবাহার, দাসী, বাইজিগণ, নাগরিকাগণ,  
দেবদাসীগণ ইত্যাদি ।

# ভাঁদের মেয়ে



## প্রথম অঙ্ক ।

### প্রথম দৃশ্য :

কালীগঙ্গার উপকূলস্থ হাওয়াখানা ।

### স্বর্ণময়ীর প্রবেশ ।

স্বর্ণময়ী । বিয়ের নামে মেয়েদের প্রাণ না কি আনন্দে নেচে ওঠে !  
তবে আমার মনটা এমন কেঁদে কেঁদে উঠছে কেন ? কেন এমন  
স্বপ্ন দেখলুম ? কে যেন আমার হাত দু'টি ধ'রে বল্লে,—“স্বর্ণ, আমার  
কি ভুলে গেছ ?” সে চোখে কি করুণ দৃষ্টি ! সে যেন আমার বহু  
দিনের পরিচিত ! তাই তো, কি হ'লো—কি হ'লো আমার কোটীশ্বর ?

### গীতকণ্ঠে সহচরীগণের প্রবেশ ।

সহচরীগণ ।—

### গীত ।

সখি, ফুটলো বুঝি বিয়ের ফুল !

থাবি খাওয়ার শেষ হয়েছে, মিলেছে আজ নদীর কূল ॥

অকালে তাই বইছে মলয়, কোকিল ডাকে “কু”

দোরেল ভাঙ্গা পাগল হ'লো বাঁশীতে দিয়ে ফুঁ,

আজকে শুধু হাসির ছড়া, বুকের ব্যথা বাসি মড়া,

আজকে শুধু স্বপ্ন দেখা, পদে পদে বেজায় ভুল ।

স্বর্ণময়ী । না বোন, তোরা যা মনে করছিল, তা নয় ; আমার মন এ বিবাহে কিছুতেই সায় দিচ্ছে না ।

১ম সহচরী । ঠমক্ দেখে বাঁচি নে ! আয় লো আয়, নাগরীকে একটু একলা থাকতে দে । [ সহচরীগণের প্রস্থান ।

স্বর্ণময়ী । কোটীশ্বর ! বুকে বল দাও, মনটা শান্ত কর প্রভু !

নেপথ্যে শ্রীমন্ত । স্বর্ণময়ী !

স্বর্ণময়ী । কে—গুরুদেব নয় ? [ অগ্রসর হইয়া ] আসুন—আসুন গুরুদেব !

### শ্রীমন্তের প্রবেশ ।

স্বর্ণময়ী । [ প্রণাম করিয়া ] এ কি অভাবনীয় সৌভাগ্য আমার ! সমস্ত মন প্রাণ দিয়ে আমি আজ আপনারই দর্শন কামনা করছিলুম । গুরুদেব ! আমি তো বেশ স্নহ হয়েছি, তবে কাকা আমার এখনও এই হাওয়াখানায় রেখেছেন কেন ?

শ্রীমন্ত । কারণ আছে,—তোমার বিবাহের সম্বন্ধ হ'চ্ছে ।

স্বর্ণময়ী । তার জন্ত আমার এই নির্জনবাস প্রয়োজন ? বাক্—কাকা যা ভাল বোঝেন, তাতেই আমার মঙ্গল । কিন্তু গুরুদেব ! বিবাহের নামে কেন আমার মনটা এমন কঁদে উঠছে ?

শ্রীমন্ত । ওঠ'বারই কথা ।

স্বর্ণময়ী । পর পর তিন রাত্রি একই স্বপ্ন দেখছি । এক সুন্দর যুবু আমার হাত ধ'রে যেন সকাতরে বলছে,—“স্বর্ণ, আমার কি তুমি জ্বলে গেছ ?”

শ্রীমন্ত। হ'তেই হবে,—এ হিন্দুর শাস্ত্র। তারপর তুমি কি স্থির করেছ মা?

স্বর্ণময়ী। আমি আর কি স্থির করবো গুরুদেব? নারী হ'য়ে জন্মেছি, বিবাহ করতেই হবে; তার উপর গুরুজনের এ বিধান আমার মঙ্গলেরই জন্ত।

শ্রীমন্ত। না স্বর্ণ, এতে তোমার ঘোর অমঙ্গল।

স্বর্ণময়ী। গুরুদেব—

শ্রীমন্ত। তোমার যদি বিবাহ হয়, তোমার পিতৃকুল অনন্ত কালের জন্ত নরকস্থ হবে, আমারও পূর্বপুরুষগণ স্বর্গের শান্তির আশ্রয় হ'তে রৌরব-নরকে নিষ্কিপ্ত হবে।

স্বর্ণময়ী। আমার জন্য? কেন ব্রাহ্মণ, আমি কি এমনি অভাগিনী?

শ্রীমন্ত। হ্যাঁ মা, এমনি অভাগিনী। তোমার রূপ আত্মীয়-স্বজনের অভিষাপ—তোমার যৌবন আতঙ্কের স্থল। স্বর্ণ! তুই বিবাহ করিস্ নে, জগতের উপর চিরকাল এমনি ক'রে মমতার জাহ্নবীধারার মত ব'য়ে যা। কি প্রয়োজন মা বিবাহের? আয়, তোকে আমি কোটীস্বরের পায়ে উৎসর্গ ক'রে দিই! সে বিবাহে বৈধব্য নেই, দাম্পত্য-কলহ নেই; সে স্বামী মরে না, বৃদ্ধ হয় না, জরায় তার দেহে একটা রেখাও পড়ে না।

স্বর্ণময়ী। গুরুদেব! কেন আপনি আজ এত চঞ্চল হ'য়ে উঠেছেন?

শ্রীমন্ত। চঞ্চল হবো না? চাঁদকে তবু রাজি করিয়েছিলুম, কিন্তু কেদারকে কিছুতেই বোঝাতে পারলুম না; তাই তোমার কাছে ছুটে এসেছি।

স্বর্ণময়ী। আমি তো তাঁদের বিরুদ্ধে কথা কইতে পারবো না গুরুদেব!



শ্রীমন্ত । পারবে না ? তবে চতুর্দশ পুরুষ নরকস্থ হোক ?

কেশার মা । প্রবেশ ।

কেশার মা । হ'লোই বা, তাতে তোমার কি বামুন ? তোমার পাওনা-গণ্ডা পেলেই তো হ'লো ! আরে ম'লো, কথা নেই বাত্ৰা নেই, অম্নি এসে দাপাদাপি করতে লেগেছে ! মেয়েটার মুখখানা ভয়ে আমসী হ'য়ে গেছে গা !

শ্রীমন্ত । কেশার মা !

কেশার মা । যাও—যাও, পথ দেখ । রাজার হুকুম মনে আছে ?

স্বর্ণময়ী । কি বল্ছিস কেশার মা ?

কেশার মা । না দিদি, কিছু না । ভয় কি ? ও মিন্সে পাগল । কি গো, এখনও দাঁড়িয়ে যে ? তবে আয় দিদি, আমরাই এখান থেকে যাই ।

শ্রীমন্ত । না—দাঁড়াও ; স্বর্ণ ! আমি তোমার বিবাই হ'তে দেবো না ।

কেশার মা । কেন গা ঠাকুর—কেন ? তোমার বাড়া ভাতে ছাই পড়েছে না কি ?

স্বর্ণময়ী । ছিঃ-ছিঃ, কেশার-মা ! গুরুদেব—

কেশার মা । আমি গুরু-হুরু মানি না । খবরদার বামুন ! যাও বল্ছি ; আর একটা কথা বল্বে তো তোমারই একদিন কি আমারই একদিন !

স্বর্ণময়ী । আমি যে কিছুই বুঝতে পারছি না । গুরুদেব ! আপনি কি বল্তে চান—বলুন, উৎকর্ষায় আমার বুক ফেটে যাচ্ছে !

শ্রীমন্ত । মা স্বর্ণময়ী ! তুমি শুধু চাঁদ রায় কেদার রায়ের স্নেহের

প্রতিমা নও, সমস্ত রাজ্যেরই আদরের ছালা তুমি। তোমার বুকে বজ্রাঘাত করবার পূর্বে আমার নিজেরই মরতে ইচ্ছা হয়। কিন্তু উপায় নেই; তোমার নিজের মঙ্গলের জন্য, দেশের মঙ্গলের জন্য এ আঘাত আজ তোমায় সহিতেই হবে। স্বর্ণময়ী! তুমি—

কেশার মা। [ শ্রীমন্তের পায়ে আছড়াইয়া পড়িয়া ] ব'লো না— ব'লো না ঠাকুর! আমার আগে গলা টিপে মার, তারপর যা খুসী ব'লে যাও। দিদি! পালাই চল, এ বামুন নয়—রাক্ষস!

স্বর্ণময়ী। দোহাই গুরুদেব! যা বলবার, শীঘ্র বলুন। আমি কি, বলুন ব্রাহ্মণ, আমি কি?

কেশার মা। না—না ব'লো না।

শ্রীমন্ত। স্বর্ণ! তুমি—তুমি বিধবা।

স্বর্ণময়ী। গুরুদেব!—[ শ্রীমন্তের পদতলে আছড়াইয়া পড়িলেন। ]

কেশার মা। ওঃ! ওরে, একটা বাজ পড়ে না, একটা বাঘ লাফিয়ে আসে না? বামুন! তুই মুখে রক্ত উঠে মর, তোর ছেলে মেয়ে সব ম'রে হেজে ছাই হ'য়ে যাক! আমি এখন কাকে ডাকি? কি করি? নচ্ছার! তোর তিন কুল নরকে যাচ্ছে, তাই এ কচি মেয়েটার মাথায় পাহাড় ছুঁড়ে মারলি? [ হাউ-হাউ করিয়া কাঁদিয়া উঠিল। ] যা—যা, পালা বলছি, নইলে আমি তোর মাথাটা চিবিয়ে খাবো। ওঠ্ দিদি, কাঁদিস্ নে। সে কোন্ কালের কথা, কারও মনেও নেই। আবার তোর বর আসবে, তোকে মাথায় ক'রে রাখবে।

স্বর্ণময়ী। কোথায় আমার বিবাহ হয়েছিল? কার সঙ্গে?

শ্রীমন্ত। চন্দ্রদ্বীপের রাজার সঙ্গে।

কেশার মা। [ হাত নাড়িয়া ] ওঃ—ভারী বড়মুখ ক'রে বলতে এলেন! গুরু!—মুয়ে আগুন অমন গুরু!

শ্রীমন্ত । কেশার মা !

কেশার মা । দাঁড়াও, রাজবাড়ী গিয়ে তোমার ছরাদের জোগাড় করছি ।

শ্রীমন্ত । মা !

স্বর্ণময়ী । যান গুরুদেব, এ অণ্ডটি অবস্থায় আজ আব প্রণাম করবো না । ভয় নেই, মৃত স্বামীর অবমাননা আমি করবো না ।

শ্রীমন্ত । তোমার কল্যাণ হোক ।

[ প্রস্থান ।

কেশার মা । দিদি ! কথা ক' ; কেন চোখের জলে বুক ভাসাচ্ছি ? ওরে, আমার যে বুকটা ফেটে যাচ্ছে !

স্বর্ণময়ী । আমায় এতদিন এ কথা কেউ বলে নি কেন ?

কেশার মা । রাজার বারণ ছিল ; তা ছাড়া দেশের লোক সবাই যে তোমায় ভালবাসে, কে তোমার মাথায় বজ্র হান্বে দিদি ?

স্বর্ণময়ী । ভগবান—ভগবান ! আমি একটা তুচ্ছ নারী, আমার নিজে একি লীলা তোমার ? আব কত বজ্র আছে—এক সঙ্গে হানো, আমি সব সহিবো—সব সহিবো ! ওঃ—এই কুমারীর বেশ আমার কাছে আজ বিশ্বের ভার ব'লে মনে হ'চ্ছে । কেশার মা ! আমি তাঁকে দেখেছি ; সে সুন্দর মুখ আমি যেন জন্ম জন্ম বৃকের মধ্যে লুকিয়ে নিয়ে বেড়িয়েছি ! এ দেহটাই অণ্ডটি হ'য়ে গেছে । এতদিন তিনি আমার কাছছাড়া, তবু একদিনও আমি তাঁর স্মৃতির তর্পণ করি নি ; বৈধব্যের অপমান ক'রে হয় তো আমি তাঁকে নরকস্থ করেছি ! প্রায়শ্চিত্ত করবো ; ওই যে অলিন্দের নিচে কালীগঙ্গার জলকল্লোল আমায় ডাকছে ! কালীগঙ্গা ! বাছ বাড়িয়ে আয়, আমি তোকে আলিঙ্গন করি !

[ উন্মাদিনীর মত প্রস্থান ।

কেশার মা । সোনা—সোনা—[ প্রস্থানোত্তত ]

### কাঞ্চনের প্রবেশ ।

কাঞ্চন । কেশার মা—কেশার মা !

কেশার মা । দাছ এয়েছ ? ভালই হ'লো । দেখ তো দাদা, আমি কি বিপদেই পড়েছি !

কাঞ্চন । চুলোয় যাক্ তোর বিপদ । সোনা কোথায় ?

কেশার মা । ওই যে বারান্দায় দাঁড়িয়ে । হ্যাঁ দাদা, বারান্দার নীচে দিয়ে কার বজরা যাচ্ছে ?

কাঞ্চন । ঈশা খাঁর ; শ্রীপুরে এসেছিল, ফিরে যাচ্ছে । তাকে তুলে দিয়েই আমি এখানে আসছি । ডাক্—ডাক্, সোনাকে ডাক্—

কেশার মা । ঈশা খাঁ ? সে তো মস্ত লোক । তা পোড়ামুখো মিন্‌সে সোনার দিকে অমন হাঁ ক'রে তাকাচ্ছিল কেন ?

কাঞ্চন । তাই না কি ? তা তাকাবে না ? বোনটী আমার যে ভুবনমোহিনী ।

কেশার মা । ওরে, তাই তো ছুখে বুক ফেটে যায় । এমন লক্ষ্মী-পিতামের কপালে পোড়ারমুখো ভগবান্ কি এই নিখেছিল ?

কাঞ্চন । আ মর মাগী, প্যান্‌প্যানাতে সুরু করলে দেখ ! সোনা—সোনা !

### স্বর্ণময়ীর পুনঃ প্রবেশ ।

কাঞ্চন । বা রে বাদরী, মুখখানা যে তোলা হাঁড়ী ক'রে ফেলেছি ! বাঃ—আবার কাঁদছে দেখ ! আরে হ'লো কি তোর ?

কেশার মা । হবে আমার মাথা ; ও আজ সব জানুতে পেরেছে ।

কাঞ্চন । সব মানে ?

কেশার মা । তোদের গুরুঠাকুর আজ ওকে ব'লে গেছে, ও বিধবা ।

কাঞ্চন । ব্যাটা আবার এখানে এসেছিল ? যাক্, তাতে আর হয়েছে কি ? তুই তা ব'লে কাঁদিস্ কেন সোনা ? কাঁদিস্ নি—কাঁদিস্ নি, চল্, বাবা তোকে নিয়ে যেতে আমায় পাঠিয়েছেন ।

স্বর্ণময়ী । তবে আমার মৃতদেহটাই নিয়ে যাও ; এ অশুচি দেহ আমি কালীগঙ্গার জলে বিসর্জন দেবো ।

কাঞ্চন । অশুচি মানে ? তোর কি তাকে মনে আছে, না তার ঘর করেছিচ্ছ ?

স্বর্ণময়ী । তুমিও তা হ'লে সব জান দাদা ? আমায় এতদিন বল নি কেন ?

কাঞ্চন । আরে বলবো আবার কি ? সে কোন্ সত্যযুগে তোর বিয়ে হয়েছিল, ছ'মাসের মধ্যে সে শালা পটল তুললে । দেখা নেই—শোনা নেই—ঘরকন্নার নামগন্ধও নেই ; তাকে কি আর বিয়ে বলে ? কি বলিস্ কেশার মা ? অমন বিয়ে তো তোর সঙ্গে আমার দিনে দশবার হয় ।

কেশার মা । তাই তো বলছি দাদা, কিন্তু ও কিছুতেই বোঝে না ।

কাঞ্চন । সে যা হয় হবে, এখন বাড়ী চল্ ।

স্বর্ণময়ী । আমি যাবো না ।

কাঞ্চন । বাবার অবাধ্য হ'বি ? তবে থাক্, আমি চল্লুম—

স্বর্ণময়ী । দাদা !—আচ্ছা চল—

[ সকলের প্রস্থান ।

## দ্বিতীয় দৃশ্য :

প্রাসাদের একাংশ ।

চাঁদ রায় ও কেদার রায় ।

চাঁদ । না কেদার, তুমি এ সঙ্কল্প ত্যাগ কর ; বিধবার বিবাহে আমার মন কিছুতেই সায় দিচ্ছে না ।

কেদার । বিধবা তুমি কাকে বলছো দাদা ? শৈশবের এক অশুভ মুহূর্তে তার কচি হাত ছুটি অশ্রুর হাতে তুলে দিয়েছিলে ; স্বামীকে সে চিন্লে না—জান্লে না—ছুটো দিন স্ত্রীর কর্তব্যপালন কর্লে না, তবুও তারই অকালমৃত্যুতে এই বালিকার জীবন ব্যর্থ হ'য়ে যাবে ?

চাঁদ । হিন্দুশাস্ত্রের এই-ই যে নিয়ম ভাই !

কেদার । শাস্ত্র তো তোমার আমার গড়া, বিধাতার গড়া তো নয় দাদা ! মানুষের প্রয়োজনে যে শাস্ত্র গ'ড়ে উঠেছে, আজ মানুষেরই প্রয়োজনে সে শাস্ত্র ভাঙতে হবে ।

চাঁদ । না কেদার, হিন্দুর বিবাহের মন্ত্র অত ভঙ্গুর নয় ।

কেদার । বিবাহের মন্ত্র ? দাদা ! তুমি যখন কন্যা সম্প্রদান করছিলে, তখন বিবাহের মন্ত্র পাঠ করেছিলে তুমি,—তোমার কন্যা তার জন্য দায়ী নয় ।

চাঁদ । কেদার ! আমরা মাটির পৃথিবীতে বাস করি ; স্বপ্ন-রাজ্যের কল্পনা নিয়ে আমাদের বাস করা চলবে না । তুমি শাস্ত্রকে অন্যথা করতে পার, কিন্তু মানুষের বুকের উপর জগদল পাহাড়ের মত যে গুরুভার চেপে আছে, সে যুক্তি বোঝে না—ন্যায়-অন্যায়ের ধার ধারে না, তার নাম সমাজ ।

কেদার। সমাজ তুমি, সমাজ আমি। রূপের চাক্তি ছ'হাতে বিলিয়ে দাও, সমাজ এসে তোমার পায়ের তলায় গড়িয়ে পড়বে। আর সমাজ যদি আমাদের ত্যাগই করে, করুক। দাদা! শৈশবে কন্যার বিবাহ দিয়ে যে মহাপাপ করেছ, তার শাস্তি একটুও ভোগ করবে না? তুমি পুরুষ ব'লে চিরদিন সোনার থালায় রাজভোগ খাবে, আর তার অদৃষ্টে পর্ণপুটে ভিক্ষান্নও জুটবে না? ভাবতে লজ্জা হয়, কামিনী-কাঞ্চনের মহিমায় আজও আমাদের ভোগের থালা ষোড়শোপচারে সাজানো, আর আমাদেরই এক ননীর পুতুল উপবাসে অর্দ্ধাসনে—

চাঁদ। কেদার!—কেদার!

কেদার। না দাদা, আমার বোঝাতে পারবে না; আমি বুঝবো না—কিছুতেই বুঝবো না। অনেক দূর এগিয়েছি, আমি সোনার বিবাহ দেবোই; তারপর যদি ইচ্ছা হয়, তুমি আমার দণ্ড দিও।

চাঁদ। কেদার! তরুণী কন্যার বৈধব্য পিতার বক্ষে যে দাবানল জ্বলে দেয়, তুমিও তা ঠিক বুঝতে পারবে না। ঐশ্বর্যের শত আড়ম্বরের মধ্যে সে আমার চির-উপবাসী র'য়ে যাবে, ভোগের সহস্র অগ্নিশিখার মাঝখানে আমার সে লক্ষ্মী-প্রতিমা কঠোর বৈরাগ্যের কশা-ঘাত সহ ক'রে তিলে তিলে ক্ষয় হ'য়ে যাবে, উদ্বেলিত মহাসাগর তার বুকের মধ্যে দিবানিশি ত্যাগের বাড়বানল জ্বলে রাখবে, এ যে কি দুঃসহ জ্বালা, আমি তোমায় তা বোঝাতে পারবো না। রক্তমাংসের আবরণ দিয়ে এখানে কি যে সাহাবাব মরু লুকিয়ে রেখেছি, ভাষা তাকে রূপ দিতে পারে না।

কেদার। তবে আর সমাজের দোহাই দিও না দাদা! অবশ্য তুমি সমাজপতি, ঠিক এই অপরাধেই অপরকে তুমি দণ্ড দিয়েছ।

চাঁদ । ওইখানেই যত বাধা কেদার ! যার জন্য প্রজাদের দণ্ড দিয়েছি, নিজে তা কেমন ক'রে করবো ?

কেদার । কিন্তু আমি তো সমাজ মানি না ; আমি যদি বিবাহ দিই ?

চাঁদ । পারিস্ ভাই, পারিস্ ? আমার ইচ্ছার বিরুদ্ধে—জোর ক'রে সমাজ যদি দণ্ড দেয়, সহিতে পাবি ?

কেদার । দাদা ! সোনার সুখের জন্য আমি মৃত্যুদণ্ডও সহিতে পারবো ।

চাঁদ । ভাই ! ভাই ! আমার রামেব লক্ষণ ! তবে নিয়ে যা—চুরি ক'রে নিয়ে যা এমন স্থানে, যেখানে চাঁদের আলোক পৌছায় না । সমাজপতিটা এখনি ঘুমিয়ে পড়েছে কেদার, এই বেলা চুরি ক'রে নিয়ে যা—

## গীতকণ্ঠে সনাতনের প্রবেশ ।

গীত ।

খবরদার—খবরদার—খবরদার ।

ওই দেখ্ চেয়ে ইঁ। ক'রে আছে সাম্নে নরকদ্বার ॥

চাঁদ । কে তুমি ?

## পূর্ব গীতাংশ ।

আমি বেদবিবি, আমি যে সমাজ, আমি সনাতন ধর্ম,

রয়েছে ঘিরিয়া সদাই তোদের আমারি লৌহবর্ষ,

আমি রতনের খনি গিরি হিমালয়, সাহারার মরু আমি জ্বালাময়,

আমারি দণ্ডে রয়েছে মিশিয়া মঙ্গল সবাকার ।



কেদার। আবার এসেছ ? না—আজ আর আমি তোমায় ক্ষমা করবো না।

[ উন্মুক্ত তরবারিহস্তে প্রস্থান।

চাঁদ। কোটীশ্বর ! উপায় কব দেব, অকূল পাথারে পথ দেখিয়ে দাও—[ প্রস্থানোত্তত ]

“বাবা—বাবা !” বলিতে বলিতে স্বর্ণময়ী ছুটিয়া আসিয়া  
টাদের বুকে ঝাঁপাইয়া পড়িলেন।

চাঁদ। সোনা আমাব—লক্ষ্মী আমার ! কেন মা, এমন ক’বে এলি ?  
স্বর্ণময়ী। বাবা ! কেন আমায় এতদিন বল নি ?

চাঁদ। কি মা ? কি হয়েছে মা ?

স্বর্ণময়ী। কেন আমায় বল নি যে আমি বিধবা ?

চাঁদ। এ্যা ! কি—কি ? কার কাছে কি শুনেছিস ? কে তোকে  
এমন কথা—না—না, কে বল্লে ? এ মিছে কথা—মিছে কথা—[ চঞ্চল  
হইয়া উঠিলেন। ]

স্বর্ণময়ী। বাবা ! তুমি না সত্যবাদী ? তবে আমার জীবনটাকে  
এমন মিথ্যার জাল দিয়ে জড়িয়ে বেখেছ কেন ?

চাঁদ। ওরে, কে এমন নিষ্ঠুর যে তোর বুকে এমন বাজ হান্লে ?  
আমি যে এতদিন লোকের কুটিল দৃষ্টি থেকে তোকে গোপন ক’রে  
রেখেছিলুম। আমি নিজে উপবাসী থেকে ছ’হাত পুরে ভোগৈশ্বর্য্য  
রাজ্যময় বিলিয়ে দিয়েছি, আর আমায় এতটুকু শাস্তি তোদের সহিলো  
না ? তারা তোর কচি মুখখানার দিকে চাইলে না ? তোর প্রাণঢালা  
সেবার কথা ভাব্লে না ? এই ত্রীপুরের বুকে দাঁড়িয়ে অনায়াসে  
বল্লে, তুই বিধবা ?

কেদার রায়ের প্রবেশ ।

কেদার । [ থমকিয়া দাঁড়াইলেন, তাঁহার দুই চক্ষু বহিয়া শ্রাবণের ধারা বহিতে লাগিল, কখনও ক্রোধে হস্ত মুষ্টিবদ্ধ হইল ।]

স্বর্ণময়ী । বাবা ! আমার বিদায় দাও ; এ দেহটা আমার বড় অপবিত্র মনে হ'চ্ছে । হিন্দু বিধবা আমি, এতদিন বৈধব্য আচরণ না ক'রে যে মহাপাপ করেছি, কালীগঙ্গার জলে প্রাণ বিসর্জন দিয়ে তার প্রায়শ্চিত্ত করবো ।

চাঁদ । শুন্ছো কেদার, শুন্ছো ? এত ভ্রুখ কি মানুষ সইতে পারে ?

কেদার । সোনা—

[ স্বর্ণময়ী ছুটিয়া কেদারের কাছে গেলেন, কেদার পরম স্নেহে

তাঁহার মুখখানা বক্ষে চাপিয়া ধরিলেন, তাঁহার চোখের

অজস্র অশ্রুধারা স্বর্ণময়ীর মাথায় পতিত হইল ।]

চাঁদ । দেখ—দেখ কেদার, একদিনে সোনার প্রতিমা কালি হ'য়ে গিয়েছে । কি করবে কর, আমি আর ভাবতে পারছি না—আমার মাথা ঘুরছে—পায়ের তলা থেকে পৃথিবী স'রে যাচ্ছে !

কেদার । দাদা—

চাঁদ । আর কি বোঝাবে কেদার ? তোমার সমস্ত যুক্তি-তর্কের কর্তরোধ ক'রে দিয়েছে ঐ এক ফোঁটা মেয়ে ।

কেদার । কিছুই হয় নি দাদা ! কুমারী ব'লে বিবাহ দেবো ভেবেছিলুম, তা যখন হ'লো না, বিধবা ব'লেই বিবাহ দেবো ।

স্বর্ণময়ী । কাকা ! বা বলেছ—বলেছ, আর ব'লো না ; ও কথা শোনাও মহাপাপ ।

কেদার। যত পাপ আমরা ছাপ মেরে নেবো, নরকে যাই—আমরা যাবো, তবু তোর জীবন সার্থক হোক।

স্বর্ণময়ী। কিসে আমার জীবন সার্থক হবে কাকা?

কেদার। বিবাহে—মাতৃত্বে।

স্বর্ণময়ী। ছিঃ-ছিঃ-ছিঃ! কাকা! আমার বৈধব্যের অপমান ক'রো না।

কেদার। ভুলে যা—ভুলে যা! যা শুনেছি, সে অতীতের স্বপ্ন। নির্দম পুরাতনকে মাটিচাপা দিয়ে মধুর বর্তমানের উপর কুক্ষিত-কেশে সীমন্তের গরিমায় লহর তুলে ঝাঁপিয়ে আয়। শাস্ত্র মিথ্যা—সমাজ মিথ্যা, সবার উপরে সত্য শুধু তোর ঐ হাসিমাখা ঢলঢল মুখখানি। সারা জীবনের অশান্ত চেষ্টায় আমরা ছ'ভাই যে রাজ্য গ'ড়ে তুলেছি, সব পথের ধুলোয় ছড়িয়ে দিয়ে বৃক্ষতলে বাস করবো, তবু তুই স্থায়ী হ'।

স্বর্ণময়ী। না কাকা, তা হয় না। আজ প্রথম আমি তোমাদের অবাধ্য হবো। হয় আমাকে মরতে দাও, না হয় বিধাতার সাজে সাজিয়ে দাও—

চাঁদ। না-না-না! আমরা যে ক'দিন আছি, সে কটা দিন এই ভাবেই থাক্; আমরা ম'রে গেলে যা ইচ্ছা করিস্।

স্বর্ণময়ী। না বাবা, এ বিবের বোঝা আর এক মুহূর্তও বইতে পারবো না। [একে একে সমস্ত আভরণ ত্যাগ করিলেন, চাঁদ রান্না ছুঁখে ভাঙ্গিয়া পড়িলেন, কেদার রায় স্তম্ভিত হইয়া স্থানগুর মত দাঁড়াইয়া রহিলেন।]

[ স্বর্ণময়ী নিঃশব্দে প্রস্থান করিলেন। ]

চাঁদ। কেদার!—

কেদার । দাদা ! চাঁদ রায় কেদার রায়ের আদেশ অমান্য করে,  
এ বিক্রমপুরে এমন সাহস কার ? কে বললে সোনাকে যে, সে বিধবা ?

### কাঞ্চনের প্রবেশ ।

কাঞ্চন । শ্রীমন্ত ।

চাঁদ । গুরুদেব ?

কেদার । বেঁধে নিয়ে এস—

কাঞ্চন । আসছে ; জানি তার খোঁজ পড়বে, তাই আমি তাকে  
ডেকে এনেছি । বাবা ! আমি ঐ বামুনের ঘরে আগুন ধরিয়ে দেবো,  
তার ছেলে-মেয়েগুলোকে গলা টিপে ঠাণ্ডা ক'রে দেবো । মহারাজ !  
আপনার চোখে জল ? ছিঃ-ছিঃ ! মহাবীর চাঁদ রায়ের চোখে জল  
দেখলে লোকে বলবে কি ? ভয় কি মহারাজ ? আবার সোনার  
বিয়ে দিন ; কেউ যদি কোন কথা বলে, আমি তার টুঁটি ছিঁড়ে  
ফেলবো ।

চাঁদ । কাঞ্চন ! আমার বুকটা চেপে ধর তো, বুঝি এখনি ফেটে  
যাবে ।

### শ্রীমন্তের প্রবেশ ।

শ্রীমন্ত । মহারাজ চাঁদ রায়ের জয় হোক !

চাঁদ । গুরুদেব ! আপনি কি করলেন ?

শ্রীমন্ত । কি করেছি চাঁদ ?

কেদার । কি করেছেন ? ব্রাহ্মণ ! চাঁদ রায়ের আদেশের মূল্য  
আপনি জানেন ; তবে কিসের স্পর্দ্ধায় তাঁর আদেশ অমান্য ক'রে  
আপনি তাঁর তরুণী কন্যার মাথায় এ বজ্রাঘাত করলেন ?

টাদ। আপনাব বুকে একটু বাজলো না?

কাঞ্চন। কি? জবাব দিন—

শ্রীমন্ত। থাম্ রে বাপু! রাজা! এ ছাড়া অন্য উপায় ছিল না। আমি তোমাদেব কুলগুরু; সাত পুরুষ ধ'বে আমরা তোমাদের বংশেব শুভাশুভেব দায় গ্রহণ ক'বে আস্ছি। চোখের উপর যখন দেখ্লাম, তোমাদের মমতাব মোহে চতুর্দশ পুরুষ নিরয়গামী হ'তে চলেছে, অথচ তোমাদের তা বোঝাতে পাব্ছি না, তখন নিরুপায় হ'য়ে স্বর্ণময়ীকে বলেছি—

কেদার। যে তুমি বিধবা। উচ্চারণ কব্তে পাবলেন? জিহ্বাটা আড়ষ্ট হ'য়ে গেল না? চতুর্দশ পুরুষ নিরয়গামী হবে?

কাঞ্চন। তাতে তোমাব কি ঠাকুব?

কেদাররায়। যাক্, এ পাপেব শাস্তি আপনাকে নিতে হবে।

শ্রীমন্ত। পাপ! পাপ কর্ছিলে তোমরা, আমি তোমাদের সে পাপ থেকে রক্ষা করেছি। টাদ!—

কেদার। ওদিকে নয় ব্রাহ্মণ, ওখানে আছে অনন্ত দয়া; বিচার সভা এইখানে—[ নিজের বুকে হাত দিলেন। ] ব্রাহ্মণ! আমি টাদ রায় নই, আমি মাটির মানুষ; আমি তোমার বিচার করবো।

শ্রীমন্ত। আমার বিচাব?

টাদ। না কেদার, যেতে দাও।

কেদার। আমি কোন কথা শুনবো না দাদা! সব সইতে পারি আমি, কিন্তু সোনার জীবনটাকে ব্যর্থ ক'রে দিতে যে একটা নিঃশ্বাসও ফেল্বে, গুরু হ'লেও তাকে আমি ক্ষমা করবো না।

কাঞ্চন। হত্যা কর—নৃশংস হত্যা!

টাদ। কেদার—কেদার! এ ব্রাহ্মণ।

কেদার। ব্রাহ্মণ!—অচ্ছা, রাজার অনুরোধে তোমায় অল্প কোন দণ্ড দিলুম না; কিন্তু আজ হ'তে আমরা গুরুত্যাগ করলুম।

শ্রীমন্ত। গুরুত্যাগ! বিনা অপরাধে—! রাজা! তোমারও কি এই মত?

চাঁদ। কেদার—কেদার—

কেদার। দোহাই দাদা, পায়ে ধরি তোমার, প্রতিবাদ ক'রো না। কেদার রায়ের হাতে এমন গুরু পাপে এমন লঘু দণ্ড কেউ পায় নি।

চাঁদ। তবে আর কি করবো ব্রাহ্মণ? আমি নিরুপায়।

শ্রীমন্ত। রাজা! আমি আজীবন একান্তমনে তোমার গৃহ-দেবতার পূজা ক'রে আসছি, তার এই ফল? একটা তুচ্ছ দেবমন্দিরের পোরো-হিত্য ক'রে কত ব্রাহ্মণ ধনরত্নে গৃহ পূর্ণ করেছে, আর আমি চাঁদ রায়ের গুরু, আমার ভাঙ্গা ঘরে আষাঢ়ের জল গড়িয়ে পড়ে। তার কি এই ফল? কত দিন গৃহে অগ্ন্যভাবে আমার স্ত্রী-পুত্র উপবাসে ছটফট করেছে, আর আমি কোটীখরের পূজায় আত্মহারা হ'য়ে সন্ধ্যায় গৃহে ফিরেছি। তুমি ছ'হাতে দান করতে চেয়েছ, আমি নিই নি; তার কি এই ফল?

ব্রাহ্মণ। কথা ক'রো না ঠাকুর! যাও—এখনি দূর হও!

শ্রীমন্ত। রাজা—

কেদার। যাও—যাও!

শ্রীমন্ত। যাচ্ছি; যাবার সময় একটা দীর্ঘনিঃশ্বাস তোমাদের উপহার দিয়ে যাচ্ছি। এই গুরুত্যাগ ধর্মে সহিবে না। যদি আমি মনে প্রাণে এতদিন তোমাদের মঙ্গল কামনা ক'রে থাকি, তা হ'লে আজ আমার এই দীর্ঘনিঃশ্বাসে তোমাদের জীবনের সুখ-শান্তি পুড়ে ছাই হ'য়ে যাবে। [ প্রস্থান।

## টাদের মেয়ে

[ প্রথম অঙ্ক ।

টাদ। কাজটা ভাল হ'লো না কেদার! সপ্ত পুরুষের গুরু—  
কেদার। না দাদা, এমন শাস্ত্রবিৎ গুরু আমাদের সহিবে না।  
একজন নিরক্ষর গুরু চাই, যার প্রাণ আছে।

কাঞ্চন। এই শ্রীপুরেই তেমন লোক আছে বাবা! আমি খবর  
পাঠাচ্ছি। আব একটা কথা বাবা! ও বামুনটাকে একঘরে করতে হবে,  
নইলে ওর বিষ-দাঁত ভাঙ্গবে না।

[ প্রস্থান ।

টাদ। এক দিনে একটা সোনার সংসারের উপর দিয়ে কি প্রলয়ের  
জলোচ্ছ্বাস ব'য়ে গেল, জগৎ তার সন্ধান রাখে না। কেদার! কি  
করলুম এত দিন? ভুল—সব ভুল! কি দুর্বল এই মাটির মানুষ  
কেদার!

কেদার। ও কে? দাদা! চোখ বুজে থাকো, তুমি সহিতে পারবে  
না!

ধীরে ধীরে শুভ্রবাস-পরিহিতা শুচিস্নাতা স্বর্ণময়ীর  
প্রবেশ, পশ্চাতে চম্পক।

স্বর্ণময়ী। বাবা! আমার নবজীবনের প্রভাতে তোমাদের প্রণাম  
করছি।

কেদার। সোনা—সোনা! ওঃ—

টাদ। চুপ—চুপ, কেদার! কথা ক'ন্ নে; এ বড় পবিত্র দৃশ্য!  
শান্তি এসে বিষাদের হাত ধরেছে, বৈরাগ্যের গুহ মরুভূমির উপর  
সঙ্গীতের জাহ্নবীধারা ব'য়ে যাচ্ছে, যজ্ঞের হোমায়ির মধ্যে চন্দনচর্চিত  
বিশ্বপত্র এসে ঝাঁপ দিয়ে পড়েছে। কেদার! এ মহাতীর্থ, এখানে একটা  
নিঃশ্বাসও ফেলিস নে।

স্বর্ণময়ী । এইবার গাও ভাই তোমার সেই গান ; তোমার দেবতার  
পায়ে আমাকে উৎসর্গ কর ।

চম্পক ।—

## গীত :

ওগো, প্রেমায় বনমালি !

তোমারি চরণে আমার এ জীবন আসিয়াছি দিতে ডালি ।

আলোয়ার পিছে বুণা আখ্যাসে ঘুরেছি কত যে হয়, ৫

মিটে নাই আশা, কণ্টক শত ফুটিয়াছে পায় পায় ;

সকলি হারিয়ে আজি লাভে মূলে, আসিয়াছি প্রিয় তব পদমূলে,

আঁধার এ পথ, দেখাও আলোক নয়ন-প্রদীপ ছালি ।

[ স্বর্ণময়ীর হাত ধরিয়া চম্পকের প্রস্থান, তৎপরে নীরবে

চাঁদ রায় ও কেদার রায়ের প্রস্থান । ]

## তৃতীয় দৃশ্য :

সোনার গাঁ—ঈশা খাঁর প্রাসাদ ।

ঈশা খাঁ ও এনায়েৎ ।

ঈশা খাঁ । না এনায়েৎ, আমার প্রলোভন দেখিয়ে না । চাঁদ রায়ের  
সঙ্গে আমার স্নেহের সম্বন্ধ তুমি বোধ হয় জান'না এনায়েৎ ! অমন  
নিষ্ঠাবান হিন্দু—তঁার অন্তঃপুরে আমার অবাধে প্রবেশাধিকার দিয়েছেন,  
আমি যখনই তাঁর কাছে গিয়েছি, তিনি নির্ঝিঁচারে আমার আলিঙ্গন  
করেছেন ; তাঁর কন্ঠার সম্বন্ধে এ কথা মনে করাও আমার মহাপাপ ।



এনায়েৎ । কিসের পাপ বন্ধু ? আবহমান কাল হ'তে মানুষ রূপের পূজা ক'রে আসছে—

ঈশা খাঁ । কিন্তু আমি তা করবো না ; ঈশা খাঁ রূপের পূজার চেয়ে তরবারির পূজা বেশী ভালবাসে ।

এনায়েৎ । কিন্তু তোমার চোখের ভাষা তো তা নয় ঈশা খাঁ ! ত্রিপুর থেকে এসে তুমি যেন সম্পূর্ণ বদলে গিয়েছ । তোমার হৃদয়-সিংহাসন জুড়ে কে ব'সে আছে, আমি তা দেখতে পাচ্ছি ; সে চাঁদ রায়ের কন্যা স্বর্ণময়ী ।

ঈশা খাঁ । কে বললে ? না—না, মিথ্যা কথা ! এ হ'তে পারে না । খোদা—খোদা ! বুকে পাখাণ চাপিয়ে দাও—হৃদয়টাকে পুড়িয়ে মকভূমি ক'রে ফেল ! এনায়েৎ ! কোন যুদ্ধের সংবাদ আছে ? আমি একবার ছুটতে চাই—রণভেরীর তালে তালে একবার নৃত্য করতে চাই !

এনায়েৎ । আপাততঃ কোন যুদ্ধের সংবাদ নেই ।

ঈশা খাঁ । নেই ? একটা যুদ্ধ বাধিয়ে দাও, যার সঙ্গে হোক—যে কারণে হোক । জয় চাই না—পরাজয় চাই, লাভ চাই না—লোকসান চাই ; মাথা নেবো না এনায়েৎ, মাথা দেবো ।

এনায়েৎ । ছিঃ ঈশা খাঁ ! স্বয়ং সম্রাট আকবর যাকে বীরত্বে মুগ্ধ হ'য়ে আলিঙ্গন দিয়েছেন, সেই তুমি, নারীর মত এত দুর্বল ? আমি বলছি, চাঁদ রায়ের কন্যাকে খোদা তোমারি জন্য সৃষ্টি করেছেন । তুমি দেখ নি সে চক্ষের বিলোল কটাক্ষ ? মনে নেই, তোমার দিকে চেয়ে তার সেই দরবিগলিত অশ্রুধার ?

ঈশা খাঁ । কে বললে ? না—না, সে তো আমার দিকে চায় নি !

এনায়েৎ । তুমি ভুল বুঝেছ । আমি বেশ বুঝতে পেরেছি, তার সেই অশ্রুজল তোমারি জন্য ।

ঈশা খাঁ। এনায়েৎ—এনায়েৎ ! আমার পাগল ক'রো না।

এনায়েৎ। তুমিই যে আমার পাগল করছো ঈশা খাঁ ! তুমি বীর—তুমি যোদ্ধা ; এক তরুণী তোমার পায়ে সর্বস্ব বিলিয়ে দিতে চায়, তুমি তাকে গ্রহণ করবে না ? এতটুকু সাহস নেই তোমার ? এই বীরত্ব নিয়ে তুমি স্বাধীন রাজা হ'তে চাও ?

ঈশা খাঁ। তাই তো এনায়েৎ, এ যে বিষম সমস্যা !

এনায়েৎ। সমস্যা কিছুই নয় বন্ধু ! তুমি শুধু চাঁদ রায়ের কন্যার পাণিপ্রার্থনা ক'রে একথানা পত্র লিখে দাও, আমি নিজে তাই নিয়ে ত্রীপুব যাত্রা করছি—

ঈশা খাঁ। হিন্দু মুসলমানে বিবাহ ?—না এনায়েৎ, চাঁদ রায় রাজী হবে না।

এনায়েৎ। সে ভার আমার।

ঈশা খাঁ। কিন্তু তোমার এতে স্বার্থ ?

এনায়েৎ। স্বার্থ ! [ একটু হাসিয়া ] শুধু তোমার মুখের হাসি।

ঈশা খাঁ। এনায়েৎ ! পূর্কজন্মে বোধ হয় তুমি আমার ভাই ছিলে ; নইলে এতখানি স্নেহ—

এনায়েৎ। ষাক্, পত্রখানা দাও

ঈশা খাঁ। পত্র আমি লিখে রেখেছিলুম বন্ধু ! এই নাও—[ পরিচ্ছদেব মধ্য হইতে পত্র বাহির করিয়া এনায়েতের হস্তে দিলেন ; পত্র পড়িয়া এনায়েৎ প্রস্থান করিলে ঈশা খাঁ পুনরায় ডাকিলেন ] এনায়েৎ !

এনায়েতের পুনঃ প্রবেশ ।

ঈশা খাঁ। না ষাক্, কাজ নেই বন্ধু ! আমি স্পষ্ট দেখতে পাচ্ছি, এ পত্র পাওয়ার সঙ্গে সঙ্গে চাঁদ রায়ের চিরবিখ্যাসী মনটা ভেঙ্গে

চুরমার হ'য়ে যাবে—কেদার রাগের ছ' চোখে অগ্নিশূলিঙ্গ ছুটবে—  
সমস্ত হিন্দুসমাজ ঈশা খাঁর নামে ঘৃণায় নাসিকা কুণ্ঠিত করবে। না  
এনায়েৎ, জগৎ জানে—ঈশা খাঁ বাংলার সুসন্তান, মুসলমান জানে—  
ঈশা খাঁ তাদের বাহুবল, হিন্দুরা জানে—আমি তাদের সুখ-দুঃখের সাথী ;  
এত বড় বিশ্বাসের মূলে কুঠারাঘাত ক'রে আমি রূপের পূজা করতে  
চাই না। অনন্ত কাল আমি স্মৃতির দাহে জ্বলে মরবো—সেও ভাল,  
তবু মাহুযের ঘৃণার পসরা তুলে নিতে পারবো না।

এনায়েৎ। [ পত্র ফেরৎ দিতে দিতে ] এই তোমার বীবত্ব? এক  
নারী তার সর্বস্ব তোমায় সমর্পণ ক'রে ব'সে আছে—

ঈশা খাঁ। এনায়েৎ!—আচ্ছা যাও, আর ভাবতে পারি না।  
[ এনায়েতের প্রস্থানোচ্ছোগ ] শোন, না—যাও !

[ এনায়েতের প্রস্থান ।

ঈশা খাঁ। এনায়েৎ—এনায়েৎ, চ'লে গেছে। খোদা! খোদা!  
কি করলুম? [ অবসন্নভাবে আসনে উপবেশন করিলেন। ] আমি কি  
সেই ঈশা খাঁ, সমস্ত বাঙলা দেশ যার নামে শ্রদ্ধায় শির নত করে,  
একদিন যে মানসিংহের জীবন রক্ষা করতে স্বেচ্ছায় বন্দি স্বীকার  
করেছিল? না, ম'রে গেছে সে ঈশা খাঁ—রমণীর রূপের জালায় পুড়ে  
ছাই হ'য়ে গেছে। হায় রমণীর রূপ !

গীতকণ্ঠে বাঁজজীগণের প্রবেশ ।

বাঁজজীগণ।—

গীত ।

বঁধু! এই রূপের জালে ।

কত যে কাংলা পোনা, যায় না গোপা, পড়েছে গালে পালে ।

রূপসীর রূপসাবরে কত রাজ্য তলিয়ে গেল,  
কত ককির ককিরি ছেড়ে আপন ঘরে কিয়ে এল,  
ঢেলে দাও—গা ঢেলে দাও, শ্রোতের টানে যাও ভেসে যাও,  
দোজাকের দরজা খোলা, যা থাকে কুলকপালে ।

[ প্রস্থান ।

ঈশা খাঁ । কপেব জাল ! জালই বটে !

আলেক্সান্দার প্রবেশ ।

আলেক্সান্দার । দাদা !—এনায়েৎ খাঁকে কোথায় পাঠাচ্ছ ?

ঈশা খাঁ । তোমায় কে বল্লে ?

আলেক্সান্দার । কেউ বলে নি, আমি শুণ্ণতে জানি । দাদা ! এ  
চাঁদ ধরবার আশা ত্যাগ কর ।

ঈশা খাঁ । চাঁদ ধরবার আশা ! কেন আলেক্সান্দার ?

আলেক্সান্দার । কেন ? সব বোঝ, আর এই সোজা কথাটা বোঝ না ?  
তুমি মনে করছো, তোমার মত সুপাত্র বাঙলায় নেই ! কিন্তু আমি  
বলছি, চাঁদ রায়ের কন্ঠার পক্ষে তুমি অতি কুপাত্র ।

ঈশা খাঁ । কুপাত্র ? আমি বাঙলার বীর ঈশা খাঁ—

আলেক্সান্দার । তুমি যদি ঈশা খাঁ, সেও চাঁদ রায় । কিসের লোভ  
তুমি তাকে দেখাবে দাদা ? ঐশ্বর্য্য, রূপ, বীরত্ব ? এ সবই চাঁদ  
রায়ের বংশে ভগবান অজস্র ঢেলে দিয়েছেন ; তুমি দর্পভরে দাবী  
করবে, সে ভিক্ষুকের প্রার্থনা ব'লে অটহাসি হেসে চ'লে যাবে ।

ঈশা খাঁ । না আলেক্সান্দার, চাঁদ রায়ের এত সাহস হবে না ।

আলেক্সান্দার । তুমি ভুল বুঝেছ দাদা ! চাঁদ রায় তো রাজা ; হিন্দু-  
সমাজের এমন ভীষণ অনুশাসন যে, তুমি আজ তোমার অনন্ত রূপ,

অনন্ত ঐশ্বর্যের প্রলোভন দেখিয়ে অতি দীন ভিক্ষুকের কাছে তার কণ্ঠার পাণিপ্রার্থনা কর, সে গোথ্রো সাপের মত গ'জ্জে উঠবে। কি ক'রে এ কামনা তোমার মনে এলো দাদা? তুমি বিবাহিত—  
তুমি বিধবী—

ঈশা খাঁ। ধর্ম নিয়ে তো জন্মাই নি আলেয়া! আমি ধর্মের প্রভেদ বুঝি না; আমি মানি এক ধর্ম—সে মানুষের ধর্ম।

আলেয়া। মিথ্যা কথা!

ঈশা খাঁ। আলেয়া!—

আলেয়া। তা যদি না হবে, পিতা মুসলমান ধর্ম গ্রহণ করার সঙ্গে আমাকে কেন স্বামীর কাছ থেকে ছিনিয়ে এনেছ? আমার স্বামী রাজপুত, কেন আমায় তার কাছে যেতে দিচ্ছ না?

ঈশা খাঁ। তোকে ছেড়ে কাকে নিয়ে থাকবো বোন্? [ স্নেহে আলেয়াকে বুকের কাছে টানিয়া লইলেন। ] আমায় বিশ্বাস কর্ দিদি! আমি বহুদিন তার সন্ধান করছি, কিন্তু সে নিরুদ্দেশ। দুর্ভাগ্যের বিষয়, সেও আমাদের জানে না—আমরাও তাকে চিনি না। তুই ভাবিস্ নে দিদি! যেমন ক'রে হোক, তাকে খুঁজে এনে তোদের এইখানেই প্রতিষ্ঠা করবো। এই প্রাসাদের অর্দেক হবে হিন্দুর, অর্দেক হবে মুসলমানের; মুসলমানের মসজিদের পার্শ্বে হিন্দুর মন্দির মাথা তুলে উঠবে, মুসলমানের কোরাণের সঙ্গে হিন্দুর গীতা সমন্বরে উচ্চারিত হবে, মুসলমানের তেজস্বিতার সঙ্গে হিন্দুর কোমলতা মিশে একটা নূতন জীবনের ধারা বাঙলার মাটিতে ব'য়ে যাবে,—এই আমার জাগ্রতের স্বপ্ন।

আলেয়া। দাদা!—

ঈশা খাঁ। একটা হীন জাতিভেদ এই বাঙলা দেশটাকে ছুঁই কীটের

মত জীর্ণ ক'রে ফেলছে। আমি এই জাতিভেদের মূলোচ্ছেদ ক'রে একটা মানুষের জাতি গ'ড়ে তুলবো।

আলেক্সা। তোমার স্বপ্ন সফল হবে না দাদা! এই জাতিভেদ বাঙলার মজ্জাগত সংস্কার,—এ বাঙলার কলঙ্ক—বাঙলার গোরব।

ঈশা খাঁ। গোরব আলেক্সা? ধ্বংস যাদের শিয়রে এসে দাঁড়িয়েছে, এক মহাশক্তি যাদের অধীনতার পাথর চাপা দিয়ে অথর্ব পশু ক'রে এসেছে, তাদের আবার, জাতি—তাদের আবার ধর্ম!

আলেক্সা। সে যাই হোক দাদা, তুমি এ বিবাহের সঙ্কল্প ত্যাগ কর।

ঈশা খাঁ। আলেক্সা! ঈশা খাঁ চিরদিন দুর্ব্বার। আজীবন সে রণক্ষেত্রে নরমুণ্ড নিয়ে খেলা করেছে—কপের সহস্র প্রলোভন চারিদিক থেকে তাকে আকর্ষণ করেছে, সে ফিরেও তাকায় নি; এই ঈশা খাঁ পরাজিত হয়েছে শুধু এইখানে। তুমি দেখ নাই সে রূপ; আমি দেখে বিষয়ে আত্মহারা হ'য়ে চেয়ে রইলুম।

আলেক্সা। কিন্তু দাদা! সে যে কুমারী, তা তুমি কি ক'রে জানলে? হয় তো তার স্বামী আছে!

ঈশা খাঁ। স্বামী আছে? না—না, কে বললে? এ কথা তো আমি একবারও ভাবি নি! তাই তো—তাই তো বোন, যদি তাই হয় —[একটু ভাবিয়া] তা হ'লে আমি চাঁদ রায়ের পায়ে ধ'রে ক্ষমা ভিক্ষা করবো; তিনি মহান্—নিশ্চয় আমার ক্ষমা করবেন। আর যদি তুমি স্ত্রী হও দিদি, আমি এ প্রস্তাব প্রত্যাহার করি।

আলেক্সা। হ্যাঁ দাদা, তাই কর; এমন বিবাহ স্ত্রের হয় না। তুমি তাকে ভালবাসবে, সে তোমায় ঘৃণা করবে; তুমি অনন্ত পিপাসায় তার কাছে ছুটে যাবে, সে তোমার সর্কাদে বিবের জালা

## চাঁদের মেয়ে

[ প্রথম অঙ্ক ।

ছড়িয়ে দেবে। আমার দিকপালের মত ভাই, আমি তাকে কারও ঘুণার দৃষ্টির সম্মুখে দাঁড়াতে দেবো না।

ঈশা খাঁ। তবে তাই হোক্ দিদি, আমি এনায়েৎ খাঁকে ফিরিয়ে আনতে লোক পাঠাচ্ছি। দিদি! আমায় ছেড়ে যাস্ নে। সংসারের দুর্গম পথে এমনি ক’রে আমায় পথ দেখিয়ে নিয়ে চল্—

[ প্রস্থান ।

আলেক্সা। এমন ভাই কার? বজ্রের মত কঠোর, আবার কুসুমের মত কোমল! [ প্রস্থানোত্তোগ ]

কলহ করিতে করিতে দিলপিয়ার ও

গুলবাহারের প্রবেশ ।

দিলপিয়ার। বিচার কর হুজুরাইন!

আলেক্সা। কি রে দিলবাহার, আবার তোদের কি হ’লো?

দিলপিয়ার। আর কও ক্যান্ হুজুরাইন, আমি হালা এক লম্বরের পোরা কপাইল্যা। কত কইর্যা বিয়া কল্লাম, জরুর লেইগ্যা জান-পরাণ থোয়াইলাম—নিজের পেটে ছালি দিয়া বউডারে রাজভোগ খাওয়াইলাম, কিন্তু মন পাইলাম না। মাগী আবার আমারে জবাব দিছে—তোর ঘর করুম না।

আলেক্সা। কেন রে বাহার? এই সেদিন ঝগড়া মিটিয়ে নিলি, আবার ও বেচারাকে জ্বালাচ্ছিস্?

দিলপিয়ার। কি চান্? চূপ্ কইর্যা ক্যান? জবাব দাও—

গুলবাহার। তুমি যাই বল দিদি, আমি ও বাঙ্গালের ঘর করবো না; ওর গায়ে বড় গন্ধ!

দিলপিয়ার। হুজুরাইন! আমারে এক বোতল সুগন্ধি ত্যাঁল দিচ্ছে

পার ? আমি এই মাথাটা ত্যাগে চুবাইয়া দেহি, হালার গন্ধ কোহানে  
থাছে ?

গুলবাহার । ওর ঘর করা অবধি একখানা গয়না গায়ে উঠলো না,  
একখানা ভাল কাপড় পরলুম না !

দিলপিয়ার । ক্যান্ ? তোরে আমি পাছাপাইরা কাপড় দিছি—  
মাজার ছন্দহার দিছি—পায়ে থারু পরাইছি—

গুলবাহার । তোর মাথা দিয়েছিষ্ বাঙ্গাল ভূত !

দিলপিয়ার । ছাথ্, থামাকো বাঙ্গাল—বাঙ্গাল করিছ না—

গুলবাহার । একশোবার বলবো ।

দিলপিয়ার । পিছা মারি তোর কপালে—

গুলবাহার । দূর হ' কাঁটাথেকে !

দিলপিয়ার । দিমু এক কাচির বারি—

আলিয়া । কি হ'চ্ছে তোদের দিল বাহার ?

দিলপিয়ার । আরে, আমারে বাঙ্গাল বুত কয় দিদি ! আমি যাই  
খসম, তাই ওর মুখে বাত দেই, আর কোন হালা ওর মুখে ছালিও  
দিত না ।

গুলবাহার । ওঃ—ভাতের বড়াই করছে ! বিয়ে হ'য়ে অবধি ছ'বেলা  
পেট ভ'রে খেতে পাই নি ।

দিলপিয়ার । কি, প্যাটু ভইর্যা থাইতে পাছ নাই ? আমি নিজে  
কাটা খাইয়া তোরে মাছের মুরা খাওয়াইছি, নিজে ফ্যান খাইয়া  
তোর বাত জোগাইছি । মিথুক ! যা—যা, চইল্যা যা,—যেহানে পারছ,  
গিয়া স্নুখে থাক্ । আমি হালা একলা থাকুম—হেই আমার ভাল । দে  
আমার পাছাপাইরা কাপড় দে—আমার চন্দ্রহার দে—

আলিয়া । শোন দিলবাহার ! আমি তোমাদের কিছু অর্থ দেবো,



## টান্দের মেয়ে

[ প্রথম অঙ্ক ।

যাতে তোমরা সুখে ঘর-সংসার করতে পারবে। এখন আমার একটা কাজ ক'রে দাও তো! হু'জনে ছদ্মবেশে শ্রীপুরে যাবে, টান্দ রায়ের মেয়ে সোনাকে বলবে—সোনার গাঁর একটা পিপীলিকাকেও যেন বিশ্বাস না করে; খুব সাবধান—খুব সাবধান! কেমন পারবে?

উভয়ে। খু—ব!

আলোয়া। আচ্ছা, তা হ'লে এখনি যাত্রা কর। খুব সাবধান!

[ প্রস্থান।

গুলবাহার। এই বাঙ্গাল ভূত!

দিলপিয়ার। আবার বাঙ্গাল বাঙ্গাল করবি?

গুলবাহার। আরে চটিস্ কেন? ওটা হ'লো আমার আদরের ডাক।

দিলপিয়ার। হাচাইও!

গুলবাহার। হ্যাঁ রে, তোকে আমি কত ভালবাসি—

## গীত :

গুলবাহার।— ও সোহাগের দিলপিয়ার!

দিলপিয়ার।— দিলুড! আমার গইল্যা গেল, ও পিয়ারী গুলবাহার॥

গুলবাহার।— গোসা আমার জল হয়েছে করবো রে তোর ঘর,

দিলপিয়ার।— আমি মাথার কইর্যা রাখুম তোরে, জানডা কবুল আটপহর,

গুলবাহার।— তোর সাথে মোর আর হবে না আড়ি,

দিলপিয়ার।— দিহু তবে পাছাপাইরা সারি,

গুলবাহার।— আমি গহনা প'রে বেগম হব, তুই হবি মোর কিল্লাদার।

দিলপিয়ার।— সবার উপর টেকা দিহু, বয় করি আর কোন্ হালার?

[ উভয়ের প্রস্থান।

## চতুর্থ দৃশ্য :

দেবলের বাটী ।

তামাক টানিতে টানিতে দেবলের প্রবেশ ।

দেবল । ভেবে দেখলুম, সংসারে খাঁটি জিনিষ যদি কিছু থাকে  
তো এই তামাক ; এব আগা পাছতলা সব মধু । আর এই ডা  
হুকো, আহা ভগবান কি জিনিষই সৃষ্টি করেছেন !

[ স্মব করিয়া ]

আমি ডাভা হুকো নিয়ে বনবাসী হবো, রবো না রবো না ঘরে ।

গৃহিণীর জ্বালা সহ্য না সহ্য না সদা মরি ভয়ে ডরে ।

[ তামাক সেবন ]

সখি রে । আমার প্রেম যে উঠিছে চলুকে,

আমি পটল তুলিতে কারে দিবে যাবো আমার এই রাম-কণ্ঠে ?

আমি পারিব না হে—

মরণের পর তামাক না গেলে স্বর্গে রহিতে পারিব না হে,

হুকোর বিরহ, জ্বালা দুঃসহ, সহিতে আমি পারিব না হে—

হার, নিয়ে যাবো সাপে ক'রে,

কহে জ্ঞানদাস, আমি হুকোদাস, হুকো নিয়ে আছি ম'রে ।

[ আসনে উবু হইয়া বসিয়া তামাক টানিতে লাগিল । ]

জগদম্বার প্রবেশ ।

জগদম্বা । বলি মিন্‌সে—

দেবল । [ সুরে ] কহে জ্ঞানদাস—

জগদম্বা । শুনছো?

দেবল । [ সুরে ] আমি হুকোদাস—

জগদম্বা । তোর হুকোর মাথায় বাডু, আর তোর জ্ঞানদাসের  
মুখে ছাই!

দেবল । অমন কথা ব'লো না গিন্নি! এই ডাবা হুকো যুধি-  
ষ্ঠির যখন দ্রোপদীকে নিয়ে বনে গেছলো, তখন আমার ঠাকুরদাদার  
বাবাকে দিয়ে যায়; আর এই রাম-কঙ্কে—মহাদেব যখন সতীকে  
কাঁধে ক'রে নাচছিল, তখন তার ঝুলি থেকে প'ড়ে যায়।

জগদম্বা । তোমার মাথা! যুধিষ্ঠির তোমার মত তামাকখোর ছিল  
কি না!

দেবল । নেই তো নেই—[ তামাক টানিতে লাগিল । ]

জগদম্বা । ব'সে ব'সে ছ'বেলা তামাক টানলেই চলবে? আজ  
কি রান্না হবে, শুনি?

দেবল । রুই মাছের কালিয়া, হাঁসের ডিমের তরকারী, ছানার  
পায়েরস—

জগদম্বা । ও—খাবার সখটা আছে, রোজগারের খুবদ নেই!

দেবল । আর মুগের ডালে একটুখানি বেশী ক'রে ঘি দিও;  
গরম গরম তোফা লাগবে।

জগদম্বা । আরে উত্তুনমুখে! ঘরে বে চাল নেই—

দেবল । চালিয়ে দাও গে একরকম ক'রে।

জগদম্বা । এক রকমটা কি, তাই শুনি?

দেবল । এই ধার-ধোর ক'রে—

জগদম্বা । ধার করতে কোথাও বাকী রেখেছি? কে দেবে আর?

দেবল । দাদার ওখানে একবার যাও না!

জগদম্বা । আর তুমি ব'সে ব'সে তামাক টান! না—আজ আমি কোথাও যাবো না। হতভাগা মিন্সে, বিয়ে হ'য়ে ইস্তক খেতে দিলে না—ঘরের ভেতর মাথা গুঁজে থাকবো, তারও উপায় নেই; একটু বর্ষা হ'লে ঘরের মেঝেয় নদী ব'য়ে যায়। হাত্তোর সংসারের মুখে আগুন! আমি আজই বাপের বাড়ী চ'লে যাবো।

দেবল । তবে তাই যাও; চিঠি-পত্র দিও—

জগদম্বা । বটে? আমি বাপের বাড়ী গেলে বড় সুবিধে হয় বুঝি? কথ'খনো যাবো না।

দেবল । তবে থাকো!

জগদম্বা । এই কষ্ট স'য়ে মানুহ থাকতে পাবে?

দেবল । তবে চ'লে যাও!

জগদম্বা । পোড়ামুখো মিন্সে! খেতে পরতেই যদি দিতে পারবে না, তবে বিয়ে করেছিলে কেন? হবে কি ক'রে? অবজ্ঞা সোয়ামী গুরুজন—অভক্তি ক'ব'ছি নে; তা ব'লে বামুনের ঘরে এমন গরুও তো ছুটি নেই!

দেবল । আরে কপালে থাকলে এতেই কাজ হয়।

জগদম্বা । আরে কপাল কি গাছ কুঁড়ে বেরবে, না ব'সে ব'সে তামাক টানলেই—

দেবল । খবরদার! তামাকের নিন্দে করিস্ নে—

জগদম্বা । কি? খেতে দিতে পারবি নি, আবার তস্বি রে ডাক্তার! দাঁড়া তো, পাড়ার লোক জড়ো করছি।

দেবল । দোহাই গিন্নী, আজকের মত—

জগদম্বা । না—আজ তোমারই একদিন কি আমারই একদিন!

## কেশরীর প্রবেশ ।

কেশরী । এই, আস্তে গোলমাল কর ।

জগদম্বা । তুমি আবার কে ?

কেশরী । আমি কেশরীচাঁদ—আমুছি রাজবাড়ী থেকে ।

দেবল । রাজবাড়ী ! কেন—কেন ? আমি তো কিছু করি নি—

কেশরী । তোমার নাম দেবল ঠাকুর ?

দেবল । আমার নাম ? তা—ই্যা—না—না, আমি কেন দেবল হ'তে যাবো ? সে আমার স্মৃতি ।

জগদম্বা । মরু পোড়ামুখে মিন্‌সে ! নিজের নাম ভাঁড়িয়ে—

দেবল । হাত্তোর মেয়ে মাহুঘের কাঁপায় আগুন—

কেশরী । তাই তো বাবা, এ তো আচ্ছা গেরো ! তুমি সিধু ঠাকুরের ছেলে নও ?

দেবল । আরে না—না, তুমি যাও—

জগদম্বা । ' না গো না, তুমি শোন ।

দেবল । মরবে—নির্ধাত মরবে । তা দেখ কেশরীচাঁদ ! তোমার খবর ভাল হয় তো, আমার নাম দেবল ; আর যদি মন্দ হয়, দেবল আমার শালা ।

জগদম্বা । সাধে কি বলি, বায়ুনের ঘরের গরু ! বাছা ! ওরই নাম ফল্‌না ঠাকুর ।

কেশরী । সং আর কি ! এই নাও দেওয়ানজীর চিঠি । খবর ভাল ; এখনি তোমাকে রাজবাড়ী যেতে হবে ।

দেবল । হেঃ-হেঃ-হেঃ ! দেখ, রাগ ক'রো না ; তামাক খাবে ?

কেশরী । তুমিই একটু বেশী ক'রে খাও ।

জগদম্বা । [ পত্র পড়িয়া ] ওরে মিন্সে, তোর যে সত্যি সত্যি  
বরাত খুলে গেল ! তুই যে রাজগুরু হ'বি রে—

দেবল । এঁ্যা—রাজগুরু ! দাদা যে রাজগুরু—

জগদম্বা । তাঁকে তাড়িয়ে দিয়েছে । এই দেখ্ চিঠি—

দেবল । [ পত্র পড়িয়া ] গিন্নী ! নাচো—নাচো—নাচো ; বরাত  
খুলে গেছে, নাচো—

জগদম্বা । নাচবো কেন ?

দেবল । একশোবার নাচবে । রাজগুরু,—ঠাট্টা কথা নয় বাবা !  
কত প্রাপ্তি—সোনা-কপো, কলা-মুলো, গামছা-কাপড়,—বাপু রে বাপু রে  
বাপু ! ম'রে যাবো—ম'রে যাবো ! এখন কি করা যায়—কি করা  
যায় ? ওগো, আমরা যে বেজায় হাসি পাচ্ছে—

জগদম্বা । আমার যে আনন্দে কান্না পাছে গো !

দেবল । ও গিন্নী, হাঃ-হাঃ-হাঃ-হাঃ-হাঃ !

জগদম্বা । ও মিন্সে, হায়-হায়-হায়-হায়-হায় !

দেবল । হোঃ-হোঃ-হোঃ-হোঃ-হোঃ !

জগদম্বা । ওগো আমার কি হ'লো গো ?

দেবল । হিঃ-হিঃ-হিঃ-হিঃ-হিঃ !

জগদম্বা । ওগো, আমার কপালে এত সুখ ছিল গো ? হায়—  
হায়—হায় !

কেশরী । এই—এই, আস্তে গোলমাল করো । এই—খবরদার !  
আঃ, চূপ কর না ! এ ঠাকুর ! ঠাকুর—

দেবল । এঁ্যা ?

জগদম্বা । কি বলছো ?

কেশরী । আমি কি সারাদিন দাঁড়িয়ে থাকবো ?

## টাদের মেয়ে

[ প্রথম অঙ্ক

দেবল। না—না, তোমাক খাও।

জগদম্বা। ব'সো।

কেশরী। আরে ঠাকুর, শীগগির রাজবাড়ী চল।

দেবল। রাজবাড়ী? এঁা—আমার যে কাঁপুনি ধরলো! ও গিন্নী, আমার যে—

কেশরী। এই, আস্তে গোলমাল করো—

দেবল। বাবা কেশরীচাঁদ! আমার বদলে গিন্নী যদি যায়?

কেশরী। না—না, তোমাকে যেতে হবে।

দেবল। তবে দাও গিন্নী, হুকোটা দাও—

জগদম্বা। হুকো নিয়ে যাবি কি রে মিন্সে? অমনি যা—

দেবল। আচ্ছা, চল—

[ কেশরী সহ প্রস্থান।

জগদম্বা। হুগ্গা—হুগ্গা! হবে না? বিদ্যোটা কি কম শিখেছে  
গা! পাড়ার পাঁচ পোড়াকপালীরা—ওদের ভাতার পুতের মাথা খাই  
—ওরাই শুধু বলে “গরু”। এবার যখন রাজগুরু হ'য়ে বসবে, হিংসেয়  
পেট ফেটে ম'রে যাবে। মর—মর চুলোমুখীরা, মুখে রক্ত উঠে মর—  
আমার বুকটা ঠাণ্ডা হোক।

[ প্রস্থান।

## পঞ্চম দৃশ্য :

মন্দিরপ্রাঙ্গণ।

দেবদাসীগণের আরতির পর চম্পকের প্রবেশ।

গীত :

চম্পক।— চাঁদবরণ জিনি মুক্তা-দশন রে, মেঘবরণ জিনি অঙ্গ,

দেব-গণ।— খঞ্জন-গঞ্জন বন্ধিগ ছ'নয়ন, নটবর শ্রাম ত্রিভঙ্গ।

চম্পক।— অলিদল-শুষ্কিত নুপূর্বশিখিত পদ্মচরণ মনোহাবী,

দেব-গণ।— শিরে শিখণ্ডক বনমালা কণ্ঠে, করযুগে মুরলীধারী।

চম্পক।— কটিতটে গীতবাস, অধরে মধুর হাস, অলকে সিন্ধুতরঙ্গ,

দেব-গণ।— মুগ্ধ ধরণী-জন, ভাবে দেব নিমগন, মুচ্ছিত পদে অনঙ্গ।

চম্পক।— অপরূপ দেহ-ছাঁদ, ভুবনে পেতেছে ফাঁদ, কালাচাঁদ এ কি তব রঙ্গ?

দেব-গণ।— রবি-শশী-তারাদল ঘোরে নিতি অবিরল, লভিতে ও চরণ-সঙ্গ।

[দেবদাসীগণের প্রস্থান।

চাঁদ রায়ের প্রবেশ।

চাঁদ। চম্পক!

চম্পক। কেন মহারাজ?

চাঁদ। ওই নামের মহিমায় আমাকেও ডুবিয়ে দিতে পারিস্? এ বুকে বড় জ্বালা রে, বড় জ্বালা! বাইরে এমন রুষ্টিপাত হ'চ্ছে— মন্দিরের মধ্যে এমন নামের স্রোত ব'য়ে যাচ্ছে, তবুও বুকের আগুন নেবে না কেন?

চম্পক। কোথায় ব্যথা তোমার মহারাজ?



টাদ। কোথায় ব্যথা? চারিদিকে ব্যথা;—দেহে-মনে, স্থখে-সমৃদ্ধিতে, জয়ে-পরাজয়ে, জাগরণে-নিদ্রায়। যা দেখি—সব কুৎসিত, যা কিছু ভাবি—সব আবছায়া। [ চুপি চুপি ] ই্যা রে চম্পক, তোর দিদি কোথায় রে?

চম্পক। ঐ যে মন্দিরের মধ্যে। দেখবে?

টাদ। না—না, পালাই চল! আমার ছুঃখিনী মা ধ্যান ভেঙ্গে শিউরে উঠবে। আয়—পালাই চ', সে একটু ভুলে থাক।

চম্পক। জ্যাঠামশায়! তুমি কাদছো? বড় ব্যথা পেয়েছ, না? এস, আমি তোমার বুকে হাত বুলিয়ে দিই—

টাদ। আঃ—এত শাস্তি তোর স্পর্শে? ভগবান্! আমায় তবে নিঃশ্ব কর নি। এই ছুঃখের মহাশ্মশানেও ফুটিয়ে রেখেছ এই একটা সুগন্ধি গোলাপ। চম্পক! একখানা গান গাও তো বাবা, এমন গান—যা শুন্লে শত ছুঃখ জল হ'য়ে যায়।

চম্পক। তবে শোন; এই গানটা আমায় গুরুদেব শিখিয়ে দিয়েছিলেন।

### গীত।

নিঠুর হে, আমার এ হৃদয়মাঝে।

তোমারি দেওয়া বাজেরি আঘাত বাশরীর স্বরে বাজে।

কণ্টক মোর কণ্ঠের হার, তোমারি সে প্রিয় স্নেহ-উপহার,

বেদনার মাঝে ওগো প্রিয়তম, তোমারি চরণ রাজে।

ধূপের মতন আমারে পোড়াও, দীপের মতন আমারে জ্বালাও,

বিস্ময়ে সারা ধরণী ভরিবে ( আমার ) চোখের জলের তাজে।

[ প্রস্থান ।

টাদ। কোটীশ্বর! ছুঃখ দিয়েছ যদি, সইবার শক্তি দাও!

### কাঞ্চনের প্রবেশ ।

কাঞ্চন । মহারাজ ! ঈশা খাঁর দূত এনায়েৎ খাঁ—

চাঁদ । কই—কোথায় ? যাও, তাঁকে এইখানে নিয়ে এস ।

### কেদার রায় ও এনায়েতের প্রবেশ ।

কেদার । এস বন্ধু—এস ; সোনারগাঁর কুশল তো ? বীরবর ঈশা খাঁ কুশলে আছেন ? সহসা কি প্রয়োজনে এসেছ এনায়েৎ ?

এনায়েৎ । একটা আনন্দ-সংবাদ নিয়ে এসেছি বীর ! ঈশা খাঁর সঙ্গে রায়বংশের স্নেহের সম্বন্ধ, সে সম্বন্ধ আরও দৃঢ় করবার জন্ত ঈশা খাঁ একটা প্রস্তাব ক'রে পাঠিয়েছেন । এই নিম্ন মহারাজ তাঁর পত্র—

চাঁদ । দেখ তো কাঞ্চন, কি লিখেছে ?

কাঞ্চন । [ পত্র পড়িয়া ] ওঃ—মহারাজ ! [ কম্পিত হস্ত হইতে পত্র পড়িয়া গেল । ]

চাঁদ ও কেদার । কি কাঞ্চন ?

কেদার । [ পত্র কুড়াইয়া পড়িলেন ও ক্রোধে দূরে নিক্ষেপ করিলেন ]

চাঁদ । কি লিখেছে, দেখি—

কেদার । না দাদা, ও তুমি স্পর্শ ক'রো না, ও পত্র অস্পৃশ্য । ওতে এমন তীব্র বিষ আছে যে, তার স্পর্শে তোমার রোমে রোমে জ্বালায় অগ্নিস্থূলিঙ্গ ছুটবে ।

চাঁদ । হিঃ কেদার ! [ পত্র কুড়াইয়া পড়িলেন, পরে হৃদয় দিয়া বলিয়া উঠিলেন ] ঈশা খাঁ !—

কাঞ্চন । বন্ধু—বন্ধু—বন্ধু ! [ পত্রখানা শতথণ্ডে ছিন্ন করিয়া ফেলিয়া দিল । ] এমন বন্ধু কে কবে পেয়েছে ?

এনায়েৎ । [ সক্রোধে ] কুমার !

কেদার । কথা ক'য়ো না ; এখনো তুমি মাথা নিয়ে দাঁড়িয়ে আছ, এই যথেষ্ট !

এনায়েৎ । কেন ?

চাঁদ । কেন ? জগৎ জানে, চাঁদ রায় নিষ্ঠাবান হিন্দু ; তার মন্দির-প্রাঙ্গণে, বিধর্মী তুমি, নিঃসঙ্কোচে প্রবেশের অধিকার পেয়েছ । এত-খানি তোমাদের বিশ্বাস কর্তুম ! জাতির বৈষম্য ভাবি নি, ধর্মের প্রভেদ গ্রাহ্য করি নি ; শুধু বীর ব'লে এই ঈশা খাঁকে আলিঙ্গন করেছি—নিজের মন্ত্রণাকক্ষে সাদরে আহ্বান করেছি । তার এই প্রতিদান ? চাঁদ রায়ের কণ্ঠকে বিবাহের প্রস্তাব ? বিশ্বাসঘাতক—

এনায়েৎ । খবরদার রাজা !

কাঞ্চন । কথা বলতে লজ্জা হ'চ্ছে না ? একটা ঘৃণ্য প্রস্তাব ব'য়ে এনেছ চাঁদ রায়ের কাছে ?

কেদার । তোমাকে আর কি বলবো এনায়েৎ ? এ প্রস্তাব যদি ঈশা খাঁ নিয়ে আস্তো, তা হ'লে তার জিহ্বাটা এতক্ষণ উপড়ে ফেলতুম ।

এনায়েৎ । আমাকেই বা দয়া করছো কেন ?

কেদার । দয়া ? দয়া আমার নেই ; যা ছিল, এইমাত্র তুমি তা পুড়িয়ে ছাই ক'রে ফেলেছ । ভালই করেছ ; বিশ্বাস আর কাউকে করবো না—কাউকে না ! সংসার এত হীন যে, দয়া করলে মনে করে দুর্বলতা, ক্ষমা করলে ভাবে কাপুরুষতা ।

এনায়েৎ । রাজা ! তা হ'লে আপনি এ প্রস্তাবে অসম্মত ?

চাঁদ । আবার জিজ্ঞাসা করছো ?

কেদার । হীনবুদ্ধি ঈশা খাঁর এ ঘৃণিত প্রস্তাবে আমরা সহস্রবার পদাঘাত করি ।

এনায়েৎ । সাবধান কেদার রায় !

কেদার । সাবধান হও তুমি এনায়েৎ খাঁ ! তোমায় যে কি করবো, আমি এখনও ভেবে ঠিক করতে পারছি না । তুমি যদি শুধু দূত হ'তে, আমবা তোমায় ক্ষমা করতে পারতুম ; কিন্তু তুমি ঈশা খাঁর বন্ধু—তার মন্ত্রী । তোমায় আকর্ষণ প্রোথিত ক'রে গোথ্রো সাপ দিয়ে দংশন কবালেও আমাব গায়ের জ্বালা মিটবে না ।

এনায়েৎ । রাজা ! ঈশা খাঁর সঙ্গে আপনার কন্ঠার বিবাহ হ'লে—  
[ একসঙ্গে চাঁদ, কেদার ও কাঞ্চন তরবারিতে হাত দিলেন । ]

### কেশার মার প্রবেশ ।

কেশার মা । কি বল্লি ? ঈশা খাঁর সাথে সোনার বে' ?

### ভবানীর প্রবেশ ।

ভবানী । প্রস্তাবটা কে এনেছে ?

কাঞ্চন । ঈশা খাঁর বন্ধু ।

কেশার মা । [ এনায়েতের সম্মুখে গিয়া ] তুই ? ও—মরবার পালক উঠেছে বুঝি ? তাই পোড়াযুথো সে দিন হাঁ ক'রে সোনার দিকে চেয়েছিল । চাঁদ ! কি ভাবছো ? হ্যাঁ কেদার ! তুমিও হাত গুটিয়ে ব'সে আছ ? ও দাদা—তুইই বা কি করছিস ? মিসের কাঁধে এখনও মাথাটা রয়েছে যে রে !

কাঞ্চন । বড্ড ছোট মাথা, মজুরি পোষাবে না ।

ভবানী । [ চাঁদের প্রতি ] কি ভাবছো ?

চাঁদ । ভাবছি, বিশ্বাসঘাতকের শাস্তি কত ভীষণ হ'তে পারে !

ভবানী । [ কেদারের প্রতি ] তুমি কি ভাবছো ?

কেদার। আমি ভাবছি, এই একটা মাথা নিয়ে প্রাণের জ্বালা কতটুকু মিটবে? ঈশা খাঁর বংশ নিশ্চল ক'রে মাটির সঙ্গে মিশিয়ে দিলেও এ অপমানের শোধ হবে না।

ভবানী। আর তুমি কাঞ্চন?

কাঞ্চন। আমি ভাবছি মা! কতক্ষণে ঈশা খাঁর কলাগাছিয়া হুর্গ ছাই ক'রে, সেই ছাই মুঠো-মুঠো ক'রে ঈশা খাঁর মুখে ছড়িয়ে দিয়ে আসবো! কত দিনে তার তপ্ত রক্ত গায়ে মেখে মহোপায়ে নৃত্য করবো! কবে সে শয়তান বুঝবে যে, চাঁদ রায়ের বংশের অপমান করলে মৃত্যু দিয়ে তার প্রায়শ্চিত্ত করতে হয়!

ভবানী। সাবাস্ পুত্র! এনায়েৎ খাঁ! আর তোমাকে আমাদের প্রয়োজন নেই। যাও—চ'লে যাও, আর কখনো শ্রীপুরের পথে পা বাড়িয়ে না।

চাঁদ। বল গিয়ে তোমার প্রভুকে, তার প্রস্তাবের উত্তর চাঁদ রায় রণক্ষেত্রে দেবে।

এনায়েৎ। রাজা—

কেদার। চুপ্, একটা কথাও নয়, নিঃশব্দে চ'লে যাও। বাঙ্গালী মায়ের প্রাণ বড় কোমল, তাই তুমি মাথা নিয়ে ফিরে যাচ্ছ।

এনায়েৎ। বুঝে দেখ চাঁদ রায়! যদি নিজের মঙ্গল চাও, ঈশা খাঁর সঙ্গে তোমার কন্যার বিবাহ দাও—

[ কাঞ্চন, চাঁদ ও কেদারের তরবারি একসঙ্গে নিক্ষেপিত হইল। ]

ভবানী। থাক্, ক্ষান্ত হও। মা! ওকে বের ক'রে দাও।

কেশর মা। চ'লে আয়! তবু ঠাঁড়িয়ে? আয় বলছি, নইলে তোর মাথাটা আমিই ছিঁড়ে ফেলবো।

এনায়েৎ। বেশ, তা হ'লে আমি ফিরে যাচ্ছি রাজা! কিন্তু

মনে রেখো, যে ভুল আজ তুমি করলে, সারা জীবন অমূল্যতার অশ্রুজলে সাগর বইয়ে দিলেও সে ভুলের সংশোধন হবে না। ঈশা খাঁ কি করবেন, জানি না; কিন্তু শোন রাজা! বর্তমানে আমি মুসলমান হ'লেও, আমার বুকের মধ্যে ঘুমিয়ে আছে একটা রাজপুত্র, সে নিয়তির মত ছুঁবার—মৃত্যুর মত করাল—বজ্রের চেয়ে কঠোর। [প্রস্থান।

কেশার মা। বন্ধু! মুখে আগুন অমন বন্ধুর—

[প্রস্থান।

ভবানী। রাজা! ঈশা খাঁ জানে যে, স্বর্ণময়ী বিবাহিতা—বিধবা? কাঞ্চন। জানে না? নিশ্চয়ই জানে। এতবার সে শ্রীপুরে এসেছে, আর এই খবরটা জানে না?

চাঁদ। আমি আশ্চর্য্য হ'চ্ছি তার স্পর্ধা দেখে। সে কি উন্মাদ? চাঁদ রায়কে সে চেনে না? চাঁদ রায় মরবে, তবু তার বংশে এতটুকু কলঙ্ক লেপন করবে না।

## গীতকণ্ঠে সনাতনের প্রবেশ।

সনাতন।—

### গীত।

শিরে তোর পুষ্পাট্টি হোক।

জয়-গানে তব চির নিশিদিন ভ'রে যাক্ তিন লোক।

সহিমা তোমার সবার স্মরণে, দেখাবে আলোক সাত কোটি জনে,

বাণী তব প্রিয়, বেদ-বাণী সনে হ'য়ে যাবে একবোগ।

এমনি বহিও আমার নিশান, বরপুত্র তুমি, তুমি গরীয়ান্,

আহুক্ ঝড় কালবৈশাখী, আহুক্ দুঃখ শোক।

[প্রস্থান।

ভবানী। এখন কি করবে ?

চাঁদ। যুদ্ধ।

কেদার। ধ্বংস।

কাঞ্চন। প্রতিশোধ।

ভবানী। কিন্তু—

চাঁদ। কিন্তু ? এর মধ্যে “কিন্তু” নেই রানী ! ঈশা খাঁ মরবে। সে জানে না, চাঁদ রায় দুঃখদীর্ণ হ’লেও চাঁদ রায়, তার একটা আহ্বানে শত সহস্র বাঙ্গালীর লাঠি মরণোৎসবে মেতে উঠবে, রাজার প্রাসাদ হ’তে দরিরদের পর্ণকুটীর পর্য্যন্ত সবাব গৃহে বিজয়ের দ্বন্দ্বিতি বেজে উঠবে। কেদার ! সৈন্ত সাজাও, মাত্র সাত দিন সময় দিলুম ; তারপব সন্দীপের ছুর্গ ধ্বংস করতে আমরা অভিযান করবো।

কাঞ্চন। আমি কিন্তু সাত দিন অপেক্ষা করতে পারবো না বাজা ! আজ এখনি আমি কলাগাছিয়া ছুর্গ ধ্বংস করতে ছুটবো।

কেদার। সৈন্ত ?

কাঞ্চন। পাই ভাল, না পাই, চাই না। রাজপথ দিয়ে যাবার সময় বলতে বলতে যাবো—“ঈশা খাঁ তোমাদের আদরের হুলালী সোনার বৈধব্যকে অপমান করেছে ; কে আছ বাঙ্গালী, প্রতিশোধ নেবে এস !” তাতে যে আসে আসবে, না আসে, একা আমি যমের সঙ্গে খেলবো। ভয় কি বাবা ? সিংহশাবক শিশু হ’লেও দুর্বল নয়।

কেদার। আবার বল—সিংহশাবক শিশু হ’লেও দুর্বল নয় ! কলাগাছিয়া ছুর্গ ধ্বংস ক’রে, অথবা মানের জন্ত শির দিয়ে প্রমাণ করা চাই—সিংহশাবক শিশু হ’লেও দুর্বল নয়। এই নাও পুত্র, আমার আশীর্বাদের সঙ্গে লক্ষ সৈন্ত। [ নিজের তরবারি প্রদান । ]

পঞ্চম দৃশ্য । ]

চাঁদের মেয়ে

ভবানী । কলাগাছিয়া দুর্গ ধ্বংস করতে এই বালককে পাঠাবে ?  
তাও সঙ্গে সৈন্ত নাই—

কাঞ্চন । কে বলে সৈন্ত নেই ? এই যে আমার লক্ষ সৈন্ত ।  
আজ আমার চেয়ে শক্তিমান কে ? জয় কোটীশ্বর—জয় কোটীশ্বর !  
[ আনন্দে লাফাইতে লাফাইতে প্রস্থানোদ্যোগ । ]

চাঁদ । কাঞ্চন !—কাঞ্চন ! [ বহু হরিণের মত একলাফে ফিরিয়া  
আসিয়া মুহূর্তে সকলের পদধূলি লইয়াই নিমেয়ে প্রস্থান করিল । ] ফেরাও  
—ফেরাও কেদার ! এখনও তো আমরা মনি নি ! আমরা থাকতে  
এই বালক যাবে দুর্গ জয় করতে ?

কেদার । শুনলে তো দাদা, “সিংহশাবক শিশু হ’লেও দুর্বল নয় !”

ভবানী । কিন্তু এর পরিণাম কি, ভেবেছ নিষ্ঠুর ?

কেদার । হয় জয়, না হয় মৃত্যু ।

[ প্রস্থান ।

ভবানী । যেমন বাপ, তেমনি ছেলে, যুদ্ধের নামে নেচে ওঠে ।

[ প্রস্থান ।

চাঁদ । তবে ত্রিবেণীর দুর্গটাই বা থাকে কেন ? কার্ভালোকে  
পাঠাই ত্রিবেণী ধ্বংস করতে । কোটীশ্বর ! বাঁশী ছেড়ে অসি ধর, বন-  
মালা ফেলে দিয়ে নরমুণ্ডমালা পরবে এসো । ধ্বংস—ধ্বংস—ধ্বংস !

[ প্রস্থান ।



## দ্বিতীয় অঙ্ক ।

### প্রথম দৃশ্য :

পথ ।

কেশরী ও গীতকণ্ঠে লাঠিয়ালগণের প্রবেশ ।

লাঠিয়ালগণ ।—

গীত :

চল রে চল রে চল ।

চুমুকে শুবিয়া সিন্ধুনীর, রক্ত তুলিব বঙ্গবীর,  
নিঃশ্বাসে মোরা নিভায়ে দিঘ রে সিন্ধু-বাড়বানল ।

ওরে ও বঙ্গবীর, বঙ্গসাগরতীর  
ধ্বনিয়া উঠিবে আনাদের নামে নামিবে লক্ষ শির ;  
মৃত্যুর বুকে হানিব বাজ, পরিব মাথার বিজয়-তাজ,  
আমি ব জয়, আনিব আজ নহে যাবো রসাতল ॥

কেশরী । চল—চল, ছুটে চল, কলাগাছিয়া দুর্গ ধ্বংস করা চাই !

বান্দার প্রবেশ ।

বান্দা । ই্যা হে মুকুবি, শ্রীপুরের রাজবাড়ীটা কোন্ দিকে বলতে পার ?

কেশরী । কোথা থেকে আসছে ?

বান্দা । সোনার গাঁ থেকে ।

কেশরী। তুমি কে?

বান্দা। জৈশা খাঁর চর।

কেশরী। জৈশা খাঁর চর? সেই জৈশা খাঁ, যে আমাদের রাজ-  
কুমারীকে অপমান করেছে? ওরে—

সকলে। মার্—মার্! [ লাঠি বাগাইল। ]

বান্দা। এ কি? তোমরা আমাকে—

সকলে। মার্—মার্!

বান্দা। দাঁড়াও—আমায় বিশ্বাস কর, আমি তোমাদের কোন  
অনিষ্ট করতে আসি নি। প্রাসাদের পথটা একবার দেখিয়ে দাও,  
বড় জরুরি খবর!

কেশরী। জরুরি খবর? সে বুঝতেই পারছি। খবরদার! রাজ-  
বাড়ীর দিকে পা বাড়াস্ নে—খুন করবো।

বান্দা। কেন বাধা দিচ্ছ হিন্দু? আমি কোন কুমতলবে আসি  
নি। জাঁহাপনার হুকুম, চাঁদ রায়ের সঙ্গে আমার দেখা করতেই হবে।  
ছেড়ে দাও—পথ ছেড়ে দাও, আমি আজ তিন দিন না খেয়ে ছুটে  
আসছি, আমায় যেতে দাও—

লাঠিঝালগণ। খুন করবো—

কেশরী। ফিরে যা বলছি! যা করেছিস্ তোরা, তাতেই আমাদের  
মাথা হেঁট হ'য়ে গেছে, আবার খবর! যা বলছি! আর একটু  
এখানে দাঁড়িয়ে থাকলে লাঠির ঘায়ে তোর মাথাটা ঝুড়িয়ে দেবো।

বান্দা। তবু জাঁহাপনার হুকুম আমায় তামিল করতেই হবে।

[ প্রস্থান।

কেশরী। দাঁড়া, আমি ওর মাথাটা ভেঙ্গে দিগ্নে আসছি—

[ প্রস্থান।

১ম লাঠিয়াল। এই চন্, কুমার এগিয়ে গেছে, আর দেবী করা চন্বে না। জয় কোটীশ্বর—জয় কোটীশ্বর !

[ লাঠিয়ালগণের প্রস্থানোদ্যোগ ]

## শ্রীমন্তের প্রবেশ।

শ্রীমন্ত। টাকা চাই—খাবার চাই—ওষুধ চাই! এ কি অত্যাচার! শ্রীপূব আজ শ্রীমন্তকে একঘরে করেছে; দোকানদার জিনিষ বেচতে চায় না—বৈদ্য ওষুধ দিতে চায় না—শ্রীপূবের দোরে দোরে মাথা খুঁড়ে মর্লেও একটা পরসা কেউ ভিক্ষা দেয় না। এই যে এরা কারা? ওহে, আমায় একটা টাকা দিতে পার?

লাঠিয়ালগণ। টাকা—

শ্রীমন্ত। হ্যাঁ, টাকা—রূপোর চাক্তি, একদিন যা আমি ছ'পায়েরে মাড়িয়েছি। দাও—আমার বড় অভাব। টাকা না দাও, শুধু ছাটি পরসা দাও; আমার ছেলেটা না খেতে পেয়ে রোগে শুকিয়ে কুঁকড়ে ম'রে বাচ্ছে। বৈদ্যদের দোরে দোরে ঘুরলুম, কেউ এক কোঁটা ওষুধ দিলে না; আজ তিন দিন তার পেটে দানাটা পড়ে নি! দাও, ছাটি পরসা দাও—

১ম লাঠিয়াল। তুমি না আমাদের রাজকুমারীর জীবনটা মাটি করেছে? পরসা দেবো—তোমাকে? হুঃ—

[ শ্রীমন্ত ব্যতীত সকলের প্রস্থান।

শ্রীমন্ত। দিলে না—সবাই উপহাস করছে; অথচ একদিন আমার দেখলে, এরা পায়ের শূলো নেবার জন্য কাড়াকাড়ি করতো। কি করি? কোথায় যাই? কেমন ক'রে ছেলেটাকে বাঁচাই? কোটীশ্বর! তোমার পায়েরে আমার দেওয়া পুষ্পাঞ্জলি এখনও বোধ হয় শুকিয়ে যায়

প্রথম দৃশ্য । ]

চাঁদের মেরে

নি ! দয়া কর—দয়া কর—আমার মা-হারা সন্তানটাকে বাঁচতে দাও !  
কেউ শোনে না, দেবতারাও বধির ! হা ভগবান ! তোমার দেওয়া  
ফল-শস্য আমার অভাগা ছেলের জন্য নয় ! [ শ্রান্তভাবে উপবেশন ]

গীতকণ্ঠে জনৈক চাষার প্রবেশ ।

চাষা ।—

গীত ।

আমার মনটা গেছে চুরি—

ঘুমিয়েছিলাম নিখুম রাতে, চাঁদেব আলোয় নিরালাতে,

সকালবেলা ভাগিয়ে দিলে বেলোয়াড়ি চুড়ি গো ।

কথায় কথায় কখন পিয়া, পালিয়ে গেল প্রাণটী নিয়া,

খুঁজে খুঁজে পাই নে দিশে ( আমি ) হাওয়ার সাপে উড়ি গো ।

জানি না নে কোথায় আছে, দুবে না কি কাছে কাছে,

হা রে আমার কব্লে পাগল নোলকপরা ছুড়ি গো ।

দিনের বেলা তবু হাসি, রাতে চোখের ওলে ভাসি,

মুখ দেখে মোর কৈদে মরে রামগোপালের খুড়ী গো ।

[ প্রস্থানোদ্যত ]

শ্রীমন্ত । [ উঠিয়া ] ওহে—ওহে ! আমার একটা পয়সা দিতে  
পার ?

চাষা । [ বিশেষরূপে নিরীক্ষণ করিয়া ] ঠাকুর না ?

শ্রীমন্ত । ভিথিরী—ভিথিরী ! একটা পয়সা দাও তো—

চাষা । উঁহঁ ; তোমাকে ঠাকুর একটা কাণাকড়িও কেউ দেবে না ।

[ স্তব্ধ ভাঁজিতে ভাঁজিতে প্রস্থান ।

শ্রীমন্ত । একটা চাষা, সেও ঘুণায় মুখ ফিরিয়ে চ'লে গেল ।  
বুঝেছি, শ্রীপুরে বাস করা আর চলবে না । কিন্তু ঘরে বাস্তুদেবতা !

দুব হোক বাস্তবদেবতা, কালীগঙ্গার জলে ফেলে দেবো। দেবতা নেই !  
কিন্তু রোগা ছেলেটাকে নিয়ে কোথায় যাবো ? ভগবান ! আহাৰ্য্য  
দেবে না যদি, বাপের প্রাণটা এমন মায়ায় ভরিয়ে দিয়েছ কেন ?

মস্তকে নানা দ্রব্যসম্ভার লইয়া তামাক টানিতে  
টানিতে দেবলের প্রবেশ ।

শ্রীমন্ত । দেবল ? কি আছে ওতে ভাই ? বাঃ-বাঃ-বাঃ, এ যে  
অনেক খাবার ! আমায় দিবি ?

দেবল । দেবো তো, কিন্তু—

শ্রীমন্ত । দেবল ! বরাতের গুণে তুমি আজ আমার আসনে বসেছ,  
আর আমি আজ এই শ্রীপূবে পথের ধূলোর চেয়েও অধম । তুমি রাজ-  
রাজেশ্বর হও—তুমি দীর্ঘজীবী হও ! এমন দান তুমি অনেক পাবে  
দেবল ! শুধু এই একদিনের উপার্জন আমায় দাও । আমার ঘরে  
আজ তিন দিন কিছু নেই, ছেলেটা না খেয়ে—

দেবল । এঁ্যা, তাই না কি ? আগে বলতে হয় ! আচ্ছা, তুমি  
নিয়ে যাও । কিন্তু দেখো দাদা ! আমি তোমায় দিয়েছি, এ কথা যেন  
কেউ না জানে ; তা হ'লে আমাকেও—বুঝেছ ? আচ্ছা—আমি চল্লুম,  
কে আবার হয় তো দেখতে পাবে—[ প্রস্থানোদ্যত ]

শ্রীমন্ত । দেবল ! না, আমি তোমার দান নেবো না । আমি  
হাজার হ'লেও ভাই, নিজের জ্ঞাত তোমায় বিপন্ন করবো না । কি,  
হাঁ ক'রে দাঁড়িয়ে রইলে যে ? নিয়ে যাও—এখনি নিয়ে যাও, এ  
প্রলোভনের ডালি আমার সাম্নে আর রাখতে পাবে না । নেবে  
না ? তা হ'লে আমি সব রাস্তায় ছড়িয়ে দেবো—

[ ভয়ে ভয়ে পুটলি লইয়া দেবলের প্রস্থান ।

শ্রীমন্ত। চুরি করবো—ডাকাতি করবো, যা হয় হবে। কিসের ধর্ম? আমার ছেলে না খেয়ে শুকিয়ে মরবে, আর পণ্যশালার থরে থবে খাওয়া সাজানো থাকবে? একটা পয়সার অভাবে আমার রোগা ছেলের পথ্য জুটবে না, আর বড় মানুষেরা টাকার গদীতে শুয়ে থাকবে? না—সইবো না, লুট করবো। লুট—লুট! বোম্ ভোলা! [ প্রস্থানোদ্যত ]

রণসাজে সজ্জিত চাঁদ রায় ও কেদার রায়ের প্রবেশ ।

শ্রীমন্ত। কে—চাঁদ? যুদ্ধে চলেছ? দাঁড়াও, যাবার আগে আমার একটা কথা আছে।

কেদার। শোনবার সময় নেই।

শ্রীমন্ত। তা হ'লেও শুনতে হবে। চাঁদ! এ কি অত্যাচার? শ্রীপুরে আমি একঘ'রে? [ হুঃখে, ক্রোধে কণ্ঠ বিকৃত হইল ] এ তোমার হুকুম?

কেদার। না, আমার। তুমি সমাজের দোহাই দিয়ে স্বর্ণময়ীর জীবনটা ব্যর্থ করেছ, তাই সমাজ তোমায় ত্যাগ করেছে। অভাবে, হুঃখে, জালায় দগ্ধ হ'য়ে তুমি মর্মে মর্মে অনুভব কর, সম্ভানের মলিন মুখ পিতার বক্ষে কতখানি বাজে, সম্ভানের স্নেহের কাছে সমাজের শাসন কি তুচ্ছ!

শ্রীমন্ত। আমি বুঝবো না। আমি শ্রীপুরের প্রজা, আমার এ দাবী; ভগবানের দেওয়া ফল-শস্য, ভগবানের দেওয়া স্বথ-শাস্তি তোমরা যদি হু'হাতে ভোগ করতে পার, আমি কেন উপবাসী র'য়ে যাবো? তোমাদের ছেলে-মেয়েরা যদি পেট ভ'রে খেতে পায়, আমার ছেলে-মেয়ে কেন না খেয়ে শুকিয়ে মরবে? কেন—কেন?

কেদার। তোমার দোষে।

টান্দ। ঠাকুর! আপনার পুত্র উপবাসী?

শ্রীমন্ত। মুহূঁ! [ কণ্ঠ অশ্রুবিকৃত হইল ] টাকা দাও—খাণ্ড দাও, নইলে আমি যেতে দেবো না। দাও—দাও রাজা!

কেদার। দেবো—ভাণ্ডার খুলে খাদ্য দেবো—তোমার পর্ণকুটির সোনা দিয়ে বাঁধিয়ে দেবো ঠাকুর! একটা কথা শুধু বল, বিধবা-বিবাহের ব্যবস্থা দিতে পারবে?

শ্রীমন্ত। আমি পারবো না।

কেদার। তবে ঐ কালীগঙ্গার জল আছে, তোমার পুত্রের জন্য নিয়ে যাও। আর্তনাদে আকাশ বিদীর্ণ করলেও এই শ্রীপুরে কেউ তোমায় এক কণা খাদ্য দেবে না।

টান্দ। অত নিষ্ঠুর হোস্‌নে কেদার! একদিন যাঁ হাতে রাজত্ব ভুলে দিলেও যিনি প্রত্যাখ্যান করেছেন, সেই ব্রাহ্মণ আজ প্রার্থী—গৃহে তার পুত্র-কন্যা উপবাসী। এখানে অভিমান সাজে না কেদার! ভুলে যা—ভুলে যা সে অতীতের কথা! আমাদের ঘরেও পুত্র-কন্যা আছে, তারা যদি এমনি ক’রে উপবাসে আর্তনাদ কর্তো, না—না, এ ভাবা যায় না। ঠাকুর!—

কেদার। দাদা—

টান্দ। না কেদার, শুভযাত্রার পূর্বক্ষণে এমন নিষ্ঠুরতা করিস্‌নে ভাই! আশ্রন ব্রাহ্মণ, আমি আদেশ দিচ্ছি—

জনৈক কৃষাণের দ্রুত প্রবেশ।

কৃষাণ। বাবাঠাকুর! বাবাঠাকুর! খোকা নেই—

শ্রীমন্ত। নেই—নেই? সব শেষ? নিষ্ঠুর! পালিয়ে গেলি? এত

প্রথম দৃশ্য । ]

চাঁদের মেয়ে

দিন পাখীর মত পালকঢাকা দিয়ে ঝেঁথেছিলুম, না ব'লে পালিয়ে গেলি ?  
যাবে না ? খেতে দিতে পারি নি ! রাজার ঐশ্বর্য যে ছ'পায়ে মাড়িয়ে  
গেছে, তার ছেলে না খেয়ে মরে ! কোটীখর !—[ক্রোধে সর্বাঙ্গ  
কাঁপিয়া উঠিল ।]

[ চাঁদ রায়ের ইঙ্গিতে কৃষাণের প্রস্থান ।

চাঁদ । ব্রাহ্মণ !—

শ্রীমন্ত । কি বলছো ? বলবে তো এই যে, সংসারের এমনি নিয়ম ;  
যম যখন টানে, মানুষ রাখতে পারে না । মানি ; কিন্তু এমন ক'রে  
কার ছেলে মরে ? যে দেশে মাঠভরা ধান, পুকুরভরা জল, ঘরে ঘরে  
লক্ষী সোনা ঢেলে দিয়েছে, সে দেশে একটা শিশু—বামুনের ছেলে  
এমনি ক'রে মাটি কামড়ে মরে কেন ?

কেদার । পিতার অপরাধে ।

চাঁদ । ঠাকুর ! মুক্ত হ'তে ফিরে এসে ছ'ভাই অশ্রুজলে তোমার  
চরণ ধুয়ে দেবো । আপাততঃ আমি আদেশ দিয়ে যাচ্ছি, তোমার  
গ্রাসাচ্ছাদনের জন্ত—

শ্রীমন্ত । চুপ—চুপ ! আমার গ্রাসাচ্ছাদন ? একথা শুনলে পর-  
লোকে সে আমার ডুক্রে কেঁদে উঠবে । আমি খাবো ? আমি খাবো ?  
মু'মু' ছেলের মুখে এক কোঁটা ছুধ দিতে পারি নি, ওঃ—রাজা !  
কাটা ঘায়ে প্রলেপ দিতে এসেছ ? না—অনেক সয়েছি, আর সহিবো  
না । যে সয়, তারই বুকে বাজের ঘা পড়ে—তাকেই দেখে সংসারটা  
স্বপ্নায় স'রে যায়—তারই ছেলের বুকে যম এসে হাঁটু দিয়ে বসে । আমি  
সহিবো না । আমি যা হারিয়েছি, তোমাদের তা ভোগ করতে দেবো  
না । আমার এই উপবীতট। আমি কালীগঙ্গার জলে ফেলে দিয়ে  
যাচ্ছি ; যে দিন তোমাদের বুকে এমনি হাহাকারের আগুন জালিয়ে



চাঁদের মেয়ে "

[ দ্বিতীয় অঙ্ক ।

দিতে পারবো, সেদিন আবার ব্রাহ্মণ হবো, নইলে এই শেষ—এই শেষ—  
[ প্রস্থান ।

চাঁদ । কেদার ! কি করলে তুমি কেদার ?

কেদার । কিছুই করিনি দাদা ! এ প্রকৃতির প্রতিশোধ । শ্রীমন্তের পুত্র অনাহারে মরে নি, মরেছে সোনার দীর্ঘনিঃশ্বাসে ।

চাঁদ । কিন্তু এ ব্রাহ্মণ নীরবে এই শোক সহবে না ; হয় তো এমন দংশন করবে যে, আমাদের অন্তরাঙ্গা যন্ত্রণায় ত্রাহিরবে আর্ন্ত-নাদ ক'রে উঠবে ।

কেদার । চাঁদ রায় কেদার রায় সর্পদংশন মাথা পেতে নিতে পারে, মানুষের দংশনকে তারা ভয় করে না । চল দাদা ! জয় কোটীশ্বর—  
[ উভয়ের প্রস্থান ।

## দ্বিতীয় দৃশ্য :

সোনারগাঁ প্রাসাদ—ঈশা খাঁর কক্ষ ।

আলোয়া ।

আলোয়া । কেন এই এনায়েৎ খাঁকে দেখলে আমার মনটা তোল-পাড় ক'রে ওঠে ? সে বীর, কিন্তু নির্ভর ; সে সুন্দর, কিন্তু তার অন্তরটা কুষ্ঠরোগীর মত কুৎসিত । তবে কেন এমন হয় ? এনায়েৎ আমার কে ? না—না, আমার স্বামীকে আমি না পাই, সারা জীবন তাঁর জন্ত তপস্তা করবো, তবুও অস্ত্রের রূপ মনের মধ্যে লুকিয়ে

রেখে তাঁর কাছে অবিস্থাসিনী হবো না। আমি এনায়েৎকে ঘৃণা করি—হ্যাঁ, আমি এনায়েৎকে ঘৃণা করি।

### এনায়েতের প্রবেশ।

এনায়েৎ। কেন ?

আলেয়া। কে—তুমি ? কোথা থেকে এলে ?

এনায়েৎ। শ্রীপুর থেকে।

আলেয়া। ওঃ—তা দাদা তো এখানে নেই ! তুমি শ্রীপুর পর্য্যন্ত গিয়েছিলে ? বান্দার সঙ্গে তোমার দেখা হয় নি ?

এনায়েৎ। কই—না।

আলেয়া। তারপব, শ্রীপুর গিয়ে কি করলে ?

এনায়েৎ। ঈশা খাঁর পত্র চাঁদ রায়কে দিলুম।

আলেয়া। আর দেখতে দেখতে চাঁদ রায়ের মুখখানা আঘাতের মত মেঘাচ্ছন্ন হ'য়ে উঠলো, কেদার রায়ের চোখ ছুঁটোতে অগ্নিশুল্লিঙ্গ ছুটলো, আর কেদার রায়ের পুত্র কাঞ্চন বাঘের মত লাফিয়ে উঠলো—কেমন ? তারপর কি হ'লো ?

এনায়েৎ। তারা আমায় অপমান ক'রে তাড়িয়ে দিলে।

আলেয়া। বেশ করেছে। চাঁদ রায় দয়ালু, তাই তোমাকে শুধু অপমান ক'রেই ফিরিয়ে দিয়েছে, কেদার রায় রাজা হ'লে তোমার মাথাটা ছিঁড়ে কালীগঙ্গার জলে ফেলে দিত।

এনায়েৎ। [ হাসিয়া ] কেদার রায় ?

আলেয়া। হ্যাঁ, কেদার রায়। হাসলে যে এনায়েৎ খাঁ ? পেয়েছ তাঁর শক্তির পরিচয় ? তাঁকে রণক্ষেত্রে কখনও দেখেছ ? আমি এক-দিন প্রাসাদের চূড়া থেকে তাঁর যুদ্ধ দেখেছি। বাঙ্গালী যে এমন

বীর হ'তে পারে, কেদার রায়কে না দেখলে আমি বুঝতে পারতুম না। যাক্, এখন কি করবে?

এনায়েৎ। এ অপমানের প্রতিশোধ নেবো।

আলেয়া। অপমান যে তুমি কুড়িয়ে আনতেই গিয়েছিলে এনায়েৎ খাঁ! তুমি কি আশা করেছিলে, এই পত্র পেয়ে চাঁদ বায় তোমার সোনার পালঙ্কে বসিয়ে রাজভোগ খাওয়াবে?

এনায়েৎ। আমি স্বপ্নেও ভাবিনি যে, এ প্রস্তাব চাঁদ রায় এমনি ক'রে প্রত্যাখ্যান করবে!

আলেয়া। আমি কিন্তু স্বপ্নেও ভাবি নি এনায়েৎ খাঁ যে, তুমি সত্যই মাথা নিয়ে ফিবে আসবে। তারা বোধ হয় তোমায় দুর্বল ব'লে ক্ষমা কবেছে। এখন আমি বলি এনায়েৎ খাঁ—

এনায়েৎ। থাক্, তুমি অনেক বলেছ সাহাজাদি! এবার আমি একটা কথা বলছি শোন। যেখানে একটা রাজ্যের উত্থান-পতন নির্ভর করছে, সে সব বিষয়ে নারীর সঙ্গে একটা কথা বলতেও এনায়েৎ খাঁ ঘৃণা বোধ করে। গুরুতর রাজকার্য্যে তোমার সঙ্গে পরামর্শ করবেন ঈশা খাঁ, এনায়েৎ নয়। তুমি ঈশা খাঁর কাছে পীর পরগম্বর হ'তে পার, কিন্তু আমার কাছে একটা তুচ্ছ নারী মাত্র!

আলেয়া। নারী চেনো এনায়েৎ খাঁ?

এনায়েৎ। চিনি না? নারী অসার—অপদার্থ—সৃষ্টিপ্রবাহ অকুণ্ঠ রাখবার যন্ত্র মাত্র!

আলেয়া। কি?

এনায়েৎ। জগতের যত বিষ নারীই উগ্রে দিয়েছে। চিরদিন দেখে এলুম, পুরুষ যন্ত্র করতে নেমেছে, নারী করেছে পণ্ড; পুরুষ বেহেশ্তের পথে চলেছে, নারী তাকে দোজাকের পথে টেনে এনেছে;

পুরুষের মাথা থেকে বিজয়-মুকুট কেড়ে নিয়ে এই নারী পরাজয়ের পুরীষ-কর্দম ঢেলে দিয়েছে। নারী চিনি না সাহাজাদি? আমার জীবনের এই মধু-বসন্তে বুকের মধ্যে সাহারার মরুভূমি রচনা কবেছে এই নারী।

আলেক্সা। তবে এই নারীর জন্ত ক্ষেপে উঠেছ কেন? কেন আমার দেবতার মত ভাইকে এমনি ক'রে ক্ষেপিয়ে তুলেছ?

এনায়েৎ। কেন তুলবো না? বলেছি তো, নারীর রূপ শুধু পুরুষের ভোগের উপাদান।

### ঈশা খাঁর প্রবেশ।

ঈশা খাঁ। না—না, তা তো নয়; সংসাব ছঃখ-জালাময়, নারী তার মধ্যে শীতল সরোবর। মাতৃরূপে যার অফুরন্ত স্নেহ সম্ভানের মুখে অমৃতধারায় ব'য়ে যায়, পত্নীরূপে যে নারী নিজেকে নিঃস্ব ক'রে স্বামীর মধ্যে হারিয়ে ফেলে ধন্ত হয়, ভগ্নীরূপে এমনি ক'রে মুর্তিমতী সেবার মত যে ভাইকে ঘিরে ব'সে থাকে, স্মৃতি চায় না—ভোগ চায় না, চায় শুধু পুরুষের সদয় দৃষ্টি, সেই নারী যদি অসার, তবে সার কে এনায়েৎ?

আলেক্সা। [ উল্লাসে ] এই তো মামুষ—এই তো মামুষ! দাদা! তোমায় সৃষ্টি করেছেন খোদা, আর ঐ এনায়েৎ খাঁকে সৃষ্টি করেছে—

এনায়েৎ। শয়তান নিজে—[ হাসিয়া ] না?

ঈশা খাঁ। এনায়েৎ! তুমি ফিরে এসেছ? তা হ'লে বান্ধা তোমাকে ঠিক ধরেছিল?

এনায়েৎ। না, এখানে এসে শুন্ছি যে তুমি আমাকে ফিরিয়ে আনতে লোক পাঠিয়েছিলে। আমি শ্রীপুরে গিয়ে তোমায় পত্র চাঁদ

রায়কে দিলুম ; তারপর কি বলবো ঈশা খাঁ ! এমন অপমান আমার জীবনে কখনও পাই নি ।

ঈশা খাঁ । ভুলে যাও বন্ধু, আমার মুখ চেয়ে সব ভুলে যাও । অপমান তারা যতই ক'রে থাকুক, সে তোমার নয়—আমার ।

এনায়েৎ । তাই যদি হয়, সে অপমান তুমি ভুলে যাবে ?

ঈশা খাঁ । হাঁ এনায়েৎ ! ভুলে যাবো, কারণ এ অপমান আমার প্রাপ্য ।

এনায়েৎ । কিসে ?

ঈশা খাঁ । তুমি তো জান এনায়েৎ ! আমি বীরত্বের অহঙ্কারে চাঁদ রায়ের কণ্ঠকে চেয়েছিলুম ; জানি না, সে কুমারী কি বিবাহিতা ; বুঝতে পারি নি যে, হিন্দুরা বন্ধুত্বের অনুরোধে সব করতে পারে, কিন্তু সমাজ ত্যাগ করতে পারে না ।

এনায়েৎ । তা হ'লে এখন কি করবে ?

ঈশা খাঁ । আমি নিজে গিয়ে চাঁদ রায়ের কাছে ক্ষমা চাইবো ।

আলেক্সা ! [ সোপ্লাসে ] দাদা ! তুমি মহান্—

এনায়েৎ । কিন্তু আমি বলছি, তুমি ভীক ।

আলেক্সা । আর বীর বুঝি তুমি ? তোমার অস্ত্র বাহুবল, দাদার অস্ত্র দয়া ।

[ প্রস্থান ।

এনায়েৎ । জাঁহাপনা, এই তোমার শেষ কথা ? তুমি এর প্রতিশোধ নেবে না ?

ঈশা খাঁ । কিসের প্রতিশোধ বন্ধু ? চাঁদ রায় কোন অন্যায় করেন নি ; তোমাকে অপমান করেছি আমি, প্রতিশোধ নেবে তো আমার উপর নাও !

এনায়েৎ । ওঃ ! এই ঈশা খাঁ বাঙলার বিখ্যাত বীর ; এমন নারীর মত কোমল, এমন শিশুর মত দুর্বল ! যাক্, তুমি চুপ্ ক'রে ব'সে থাকতে পার, কিন্তু আমি এর প্রতিশোধ নেবোই ! আমি যুদ্ধ করবো—  
ঈশা খাঁ । আমি তোমার বিরুদ্ধে দাঁড়াবো ।

### বান্দার প্রবেশ ।

বান্দা । জাঁহাপনা ! হুকুম তামিল হ'লো না ।

ঈশা খাঁ । কি হয়েছে বান্দা ? তোমায় বড় আহত দেখছি !

বান্দা । জাঁহাপনা ! শ্রীপুরের লাঠিয়ালরা লাঠির ঘায়ে আমার হাড় গুঁড়ো ক'রে দিয়েছে, আমাকে রাজবাড়ীতে যেতে দেয় নি ।

ঈশা খাঁ । শ্রীপুরের অধিবাসীরা এত নিষ্ঠুর ? ওঃ—চাঁদ রায় ! চাঁদ রায় ! আমার মনের মধ্যে তোমার গৌরবের সিংহাসন আর বুঝি থাকে না ! বান্দা ! চাঁদ রায় বা কেদার রায় এ কথা জানেন ?

বান্দা । না, তাঁরা জানেন না ।

ঈশা খাঁ । তবু আমি কৈফিয়ৎ চাইবো । বান্দা ! তোমার কাছে আমি অপরাধী, আমায় ক্ষমা কর—

বান্দা । জাঁহাপনা—[ ঈশা খাঁর পায়ে মাথা নোয়াইল । ]

ঈশা খাঁ । বান্দা ! তারা তোমায় প্রহার করলে, তুমি প্রতিরোধ করতে পারলে না ?

বান্দা । জনাবের হুকুম ছিল না ।

এনায়েৎ । তাই পিঠ পেতে লাঠির ঘা নিয়ে এসেছ ? কালীগঙ্গার জলে ডুবে মরতে পারলে না ? কাপুরুষ !

বান্দা । কাপুরুষ ? হুজুরালি ! জাহাপনার হুকুম থাকলে এমন বিশটা লাঠিয়ালকে আমি মাটিতে গুইয়ে দিতে পারতুম ।

ঈশা খাঁ। বান্দা! তারা তোমাকে মারে নি, মেরেছে আমাকে। তোমার দেহের ক্ষত মিলিয়ে যাবে, কিন্তু আমার অন্তরের ক্ষত শুখাবে না। যাও, আমি তোমার গুপ্তস্বামীর ব্যাবস্থা করছি। তুমি সুস্থ হ'লে তোমার নিয়ে আমি শ্রীপুর যাবো। যারা তোমার গায়ে লাঠি চালিয়েছে, তারাই আবার অশ্রুজলে তোমার পা ধুইয়ে দেবে।

[ বান্দার প্রস্থান ।

এনায়েৎ। সে তো পরের কথা; এখন কি করতে চাও?

ঈশা খাঁ। কিছু না।

এনায়েৎ। তা হ'লে মনে ক'রো না ঈশা খাঁ, যে চাঁদ রায় কেদার রায় এতেই ক্রান্ত হবে! তারা একদিন অতর্কিত আক্রমণে তোমার এই সোনারগাঁ-দুর্গ ছারখার ক'রে দেবে।

ঈশা খাঁ। তুমি ভুল বুঝেছ এনায়েৎ! তারা যোদ্ধা, কিন্তু উন্মাদ নয়।

### দূতের প্রবেশ।

দূত। জাঁহাপনা! কেদার রায়ের পুত্র কাঞ্চন রায় কলাগাছিয়া দুর্গ ভস্মীভূত করেছে।

ঈশা খাঁ। কি? কি? ভস্মীভূত করেছে? কেদার রায়ের পুত্র কাঞ্চন? তারপর দুর্গাধিপ? তাঁর পত্নী, পুত্র?

দূত। সব পুড়ে মরেছে; কেউ বেঁচে নেই জাঁহাপনা—কেউ বেঁচে নেই!

ঈশা খাঁ। যাও—যাও, প্রতিকার করবো। [ দূতের প্রস্থান ] ওঃ, চাঁদ রায়! কি করলে তুমি চাঁদ রায়? একেই অপরাধে সহস্রের প্রাণ নিলে? কি করবো—কি করবো? কার মাথা নেবো? ঈশা

দ্বিতীয় দৃশ্য।]

চাঁদের মেয়ে

খাঁর অধিকাবে হস্তক্ষেপ! এতই অপরাধী ঈশা খাঁ! চাঁদ রায় ঈশা  
খাঁকে চেনে না। তিনিয়ে দেবো—একবার তিনিয়ে দেবো চাঁদ রায়?  
এনায়েৎ। এখনও দ্বিধা?

ঈশা খাঁ। না—দ্বিধা নেই। চল, চাঁদ রায়ের সাধেব শ্রীপুর উপড়ে  
ফেলে কালীগঙ্গার জলে ফেলে দেবো। না, চাঁদ রায়ের চেয়েও বেশী  
অপরাধী আমি; আগে নিজের উপর প্রতিশোধ নেবো, তারপর  
চাঁদ রায়।

দূতের প্রবেশ।

দূত। জাঁহাপনা! চাঁদ রায়ের সৈন্তাধ্যক্ষ কার্ভালো ত্রিবেণীর দুর্গ  
অধিকার করেছে।

ঈশা খাঁ। কি? ত্রিবেণীব দুর্গ অধিকার কবেছে? চাঁদ রায়ের  
সৈন্তাধ্যক্ষ? ওঃ, চাঁদ রায়! তোমাব গায়ের চামড়া উপড়ে নিলেও  
এর প্রতিশোধ হয় না। যাও দূত! [দূতের প্রস্থান।] এনায়েৎ!  
আমি যুদ্ধ করবো; এমন যুদ্ধ, যা কেউ দেখে নি। চাঁদ রায়ের  
রক্ত চাই—কেদাব রায়ের মাথা চাই—কাঞ্চনের কবন্ধ চাই!

এনায়েৎ। হ্যাঁ—এইবার সাধ হ'চ্ছে, তোমায় বীর ব'লে আলিঙ্গন  
দিতে।

ঈশা খাঁ। আগে কোন্ দিকে যাবো? শ্রীপুর না ত্রিবেণী, না  
কলাগাছিয়া? কোন্ পথে, বল কোন্ পথে?

শ্রীমন্তের প্রবেশ।

শ্রীমন্ত। স্বর্গদ্বীপের পথে।

এনায়েৎ। কে?



শ্রীমন্ত। ছিলুম একদিন চাঁদ রায়ের গুরু, আজ তার পরম শত্রু।

ঈশা খাঁ। কি বলতে এসেছ? বল, আর কি হুঃসংবাদ আছে?  
তুমিও কি একবার দংশন করতে চাও?

এনায়েৎ। চাঁদ রায় কেদার রায় কোথায়?

শ্রীমন্ত। স্বর্ণদ্বীপ ধ্বংস করতে গেছে।

ঈশা খাঁ। স্বর্ণদ্বীপ? উত্তম, আমি যাচ্ছি। চাঁদ রায়! তুমি  
ঈশা খাঁর আসল রূপ দেখ নি, এইবার দেখবে। এনায়েৎ! প্রস্তুত  
হও, এখনি আমরা স্বর্ণদ্বীপ যাত্রা করবো। চাঁদ রায়কে দেখিয়ে দিতে  
হবে যে, ঈশা খাঁ মরে নি; বুঝিয়ে দিতে হবে যে, ঈশা খাঁর বুকটা  
পাথর দিয়ে গড়া নয়, আগুন তাকে জালিয়ে তোলে—মানুষের বিশ্বাস-  
ঘাতকতায় তার মধ্যে তীব্র অনুভূতি জাগে। চল—চল!

শ্রীমন্ত। সোনাকে চাই?

ঈশা খাঁ। সোনা—সোনা? গুরুজী! আমার বুকটা ছিঁড়ে যদি  
দেখাতে পারতুম, দেখতে, তার নাম প্রস্তরফলকে আঁকা; কিন্তু তাকে  
পাবার নয়—

শ্রীমন্ত। আমি যদি এনে দিই?

ঈশা খাঁ। বিশ্বাসঘাতক! [ তরবারি নিক্ষেপন ] না—কিসের  
বিশ্বাস? সংসার অবিশ্বাসে ভরা। চাঁদ রায়ের বিশ্বাস আমি ভঙ্গ  
করেছি, আমার বিশ্বাসের মূলে চাঁদ রায় কুঠারঘাত করেছে; তুমি  
তার গুরু—অথচ বিশ্বাসের পাত্র, তুমিই বা বাদ যাবে কেন? জলুক  
আগুন—জলুক আগুন! ব্রাহ্মণ! আমি সোনাকে চাই। চাঁদ রায়ের  
বুকে এমন বাজ হানবো যে, তার গর্বিবত অন্তর দিবানিশি ত্রাহি-  
ত্রাহিরবে আর্তনাদ করবে!

[ প্রস্থান।

এনায়েৎ । চাঁদ রায় ! এইবার দেখ্‌বো তুমি কত বড় বীর !

[ প্রস্থান ।

শ্রীমন্ত । খোকা ! দাঁড়া, এইবার তোব মৃত্যুর প্রতিশোধ নেবো—

গীতকণ্ঠে সনাতনের প্রবেশ ।

সনাতন ।—

গীত ।

তুই উণ্টা বুঝিলি বাম ।

পবেষ পীষিতে আপনা বাঁধিয়া যাযে কুল যাযে গ্রাম ।

শ্রীমন্ত । কে তুই ?

সনাতন ।—

পূর্ব গীতাংশ ।

আমি আদিম কালের ঠিব-পুবাঁতন,

আপনার চেয়ে আমি যে আপন,

তোর জনক-জননী জপ ক'বে গেছে আমারি এ হুধা নাম ।

শ্রীমন্ত । জনক-জননী জপ ক'বে গেছেন, আমি জপ কববো না ।

সনাতন ।—

পূর্ব গীতাংশ ।

তুই বাঘনের ঘরে ছুরন্ত গরু, শামল ভূমিতে সাহারার মরু,

আপনার হাতে আপনি ভাঙ্গিছ হুথের স্বরগধাম ॥

[ প্রস্থান ।

শ্রীমন্ত । না—না, প্রতিশোধ—প্রতিশোধ !

[ প্রস্থান ।

## তৃতীয় দৃশ্য :

দেবলের বাটী ।

একটী মোহরের থলি লইয়া দেবলের প্রবেশ ।

দেবল । এঁ্যা—দাদা বল্লে কি ক’রে ? সোনাকে ভুলিয়ে আনতে হবে, তার জন্তে এই ঘুষ ? দেখি—[ থলির বাঁধন খুলিতে খুলিতে ] গিন্নীকে বলা হবে না, বল্লেই সব মাটি করবে । মেয়েমানুষের পেটে কথা থাকে না ; উঁহু—কিছুতেই বলা হবে না । আচ্ছা, থলেটা ফেরৎ দেবো ? তাই দিই । টাকা খেয়ে সোনাকে ভুলিয়ে আনবো, সে আমি পারবো না বাবা ! তা একবার খুলেই দেখি—[ থলি খুলিয়া ] এঁ্যা—এ যে বিলকুল মোহর ! দাদা এই মোহরগুলো আমার দিলে ? বাপু রে—বাপু রে—বাপু রে বাপু ! এ যে যত দেখছি, তত আমার নাচ পাচ্ছে ।

জগদম্বার প্রবেশ ।

জগদম্বা । কি গা ? তোমার হাতে ও কি ?

দেবল । উঁহু, বলা হবে না, মেয়েমানুষের পেটে কথা থাকে না ।

জগদম্বা । লুকোচ্ছ কেন ? কি ও ?

দেবল । আরে, সে খোঁজে তোমার দরকার কি ? গোটা কতক ইঁহুরবাচ্ছা ধ’রে এনেছি, অম্বল খাবো ব’লে ।

জগদম্বা । আ ম’লো যা, ইঁহরের অম্বল কেউ খায় ?

দেবল । আরে অম্বল না—অম্বল না, ইঁহরের আচার হবে । তোমার

এই অরুচির সময় না? একটু একটু আচার থাকবে—তোফা লাগবে  
[ প্রস্থানোত্তত ]

জগদম্বা । দূর মুখপোড়া, আমি কচি খুকী না কি? আমার বোক  
বোঝাচ্ছ? বলি, পালাচ্ছ কোথায়? দেখি না, কি আছে?

দেবল । কিছু না—কিছু না ।

জগদম্বা । কিছু না তো, লুকোচ্ছ কেন?

দেবল । [ স্বগত ] তাও তো বটে! এখন বলিই বা কি?

জগদম্বা । দাও না দেখি; এক ছিলাম তামাক সেজে থাওয়ানো'খন!

দেবল । [ সহাস্তে থলিটা জগদম্বার হাতে দিয়া ] সাবধান, কেউ  
না জানে!

জগদম্বা । উঁহু, কাক-পক্ষী জানবে না । [ খুলিয়া দেখিয়া ] ওগো,  
এ যে মোহর—

দেবল । চুপ্—চুপ্!

জগদম্বা । ওগো, এ যে অনেক মোহর—

দেবল । চুপ্—চুপ্!

জগদম্বা । এত মোহর তুমি কোথায় পেলে গো?

দেবল । আরে, চুপ্ কর না!

জগদম্বা । কেন চুপ্ করবো? কথখনো চুপ্ করবো না । আমি  
কারও থাই না পরি? ওগো, আমার যে কান্না পাচ্ছে! এত মোহর  
নিষে আমি কি করবো গো—

দেবল । মাটি করলে! আঃ—আরে চুপ্, কেউ শুনলে বিপদ  
হবে।

জগদম্বা । তাই না কি? তা এ সব দিলে কে?

দেবল । বলা হবে না, সে ভয়ানক কথা।

জগদম্বা । কি রকম ? কি রকম ?

দেবল । না—না, অমনি কুড়িয়ে পেয়েছি । তোমরা মেয়েমানুষ,  
তোমাদের কি সব কথা বলতে আছে ? 'সে ভয়ানক কথা—

জগদম্বা । কি রকম ভয়ানক ?

দেবল । সাংঘাতিক ভয়ানক ।

জগদম্বা । কেমন সাংঘাতিক গা ?

দেবল । ভীষণ সাংঘাতিক ।

জগদম্বা । দুর্ মুখপোড়া ! কথাটা কি, তাই শুনি না ! আমার  
যে প্রাণ বেরিয়ে যাচ্ছে শোন্বার জন্তে !

দেবল । আরে আমারও যে পেটে মোচড় দিয়ে উঠছে বল্‌বার

জগদম্বা । তবে ব'লে খালাস হও না !

দেবল ! বল্‌বো ? আচ্ছা, শোন ; কিন্তু কাউকে ব'লো না যেন !  
তা হ'লে আমার গর্দান যাবে ।

জগদম্বা । বাপু রে, তা হ'লে কি বলতে পারি ! তোমার গর্দান  
গেলে আমি যে গয়না পরতে পাবো না—মাছ খেতে পাবো না !

দেবল । ওঃ—ওঁর মাছের শোক উথলে উঠলো ! যাও—আমি  
বল্‌বো না ।

জগদম্বা । বল—বল, নইলে আমার প্রাণ গেল—

দেবল । তবে শোন ; টাকা দিয়েছে দাদা—সে আবার পেয়েছে  
ঈশা খাঁর কাছে ।

জগদম্বা । ঈশা খাঁ ? সে দেখতে কেমন ?

দেবল । হাত্তোর গোষ্ঠীর পিণ্ডি ! আমি কি তাকে দেখেছি ?

জগদম্বা । তারপর ? তোমার দাদা তোমাকে টাকা দিলে কেন ?

দেবল। আরে সেইটেই তো আসল কথা ! ওই যে রাজবাড়ীর—উঁহু, বলা হবে না, মেয়েমানুষেব পেটে কথা থাকে না।

জগদম্বা। প্রাণ গেল—প্রাণ গেল, শীগ্গির বল—

দেবল। ওই যে রাজবাড়ীর সোনা না? ওই সোনাকে ভুলিয়ে দাদার হাতে এনে দিতে হবে; দাদা আবাব তাকে—বুঝেছ?

জগদম্বা। তাই না কি? ও মিন্‌সে আমাকে পছন্দ করে না? সোনা না গিয়ে আমি যদি যাই?

দেবল। আবে তা হ'লে তো গোলই ছিল না! এই সোনাকে নিয়েই তো বিপদে পড়েছি। নাঃ—থলে দাও, ফেরৎ দেবো—

জগদম্বা। ফেরৎ দেবে কি গো? আমি যে মনে মনে গয়না গড়িয়ে রেখেছি।

দেবল। ম'বে বাই আর কি! দাও—দাও, শীগ্গির দাও! আমি হ'চ্ছি গুরু, এ কাজ কব্‌তে আছে? গর্দান যাবে।

জগদম্বা। গেলই বা! এ যে অনেক মোহর! তোমার গর্দানের কি এর চেয়ে বেশী দর উঠবে না কি?

দেবল। এঁ্যা! এ বলে কি? সোয়ামীর চেয়ে টাকা বড়? ও বাবা, টাকা এমন শত্রু? হাত্তোর টাকার গোষ্ঠীর মুখে আগুন! দাও—দাও, থলে দাও—

জগদম্বা। এই—এই—খবরদার মিন্‌সে! চাঁচিয়ে পাড়া মাং করবো বলছি।

দেবল। ওরে বাবা, এ কি সাংঘাতিক মেয়েমানুষ! আমার গর্দান যাবে যে!

জগদম্বা। কেন গর্দান যাবে? ভোল্‌ বদলে পালাই চল। দিন কতক গা ঢাকা দিয়ে আবার আসবো। আর গর্দান যদি যায়ই,

## টানদের মেয়ে

[ দ্বিতীয় অঙ্ক ।

হুঃখ্যু কি? আমি বেশ ক'রে পা ছড়িয়ে কাদবো'খন। যাও—  
যাও, তামাক খাও গে যাও, তারপর পরামর্শ করা যাবে।

দেবল। মেয়েমানুষকে যে বিয়ে করে, সে শালা।

[ প্রস্থান।

জগদম্বা। সোনা বড়ঠাকুরকে নিয়ে উড়বে! সাথে কি আর  
সোনার বিয়ে হবে ব'লে ওর গা চিড়বিড়িয়ে উঠেছিল? যাক্ গো,  
বড় ঘরের বড় কথা; আমার ও সব আলোচনার দরকার কি?  
কিন্তু পেট যে কথার ভারে ফেঁপে উঠছে। ইস্, চোয়া ঢেকুর উঠছে  
আবার—হে-উ! যার যা খুসী করুক—হে-উ! না, এ যে নাড়ী-ভুঁড়ি  
কচলাতে স্নরু করলে—হে-উ! আমি কারও সাথেও নেই, পাচেও  
নেই—হে-উ! কি হ'লো? আমার যে ডাক্ ছেড়ে চাঁচাতে ইচ্ছে  
করছে! ওগো, আমার এ কি হ'লো গো—

## দাসীর প্রবেশ।

দাসী। কি গা?

জগদম্বা। কিছু শুনেছিন্ না কি? শুনিন্ নে—শুনিন্ নে, ও সব  
বড় ঘরের কথায় আমাদের দরকার কি—হে-উ! আবার না কি  
বললে, কর্তার গর্দান যাবে। হে-উ—

দাসী। কথাটা কি গা?

জগদম্বা। আরে, না—না, ও সব না শোনাই ভাল; বললে  
আবার কর্তার গর্দান যাবে। দরকার কি? হে-উ! সোনা যদি  
বড়ঠাকুরকে নিয়ে বেরিয়ে যায়—হে-উ—তা তোরই বা কি, আমারই  
বা কি? থ'লে ভরা মোহর দিয়েছে ব'লেই কি উনি রাজকণ্ঠকে ভুলিয়ে  
আনতে পারেন না কি? হে-উ! ও সব শুনিন্ নে, ভয়ানক কথা।

দাসী। মা গো মা—অবাক কাণ্ড! [ প্রস্থান।

জগদম্বা। বাক, অনেকটা হাল্কা হ'লো। কে যায়? [ সম্মুখস্থ  
পথে ফকির-ফকিরণীকে দেখিয়া ডাকিল ] ও ফকির! ও ফকির!  
একটা গান গেয়ে যাও না—

ফকির-ফকিরণীর বেশে দিলপিয়ার ও

গুলবাহারের প্রবেশ।

জগদম্বা। তোমাদেব ঘর কোথায় গা? ওই ওপারে বুঝি?

দিলপিয়ার। হ'—হ' মা-ঠাবাইন, আমাগ বাড়ী হেই ওপার।

জগদম্বা। তা তোমাদেব ওপারের লোক সব ভাল। এ পারের  
লোক—মুয়ে আগুন তুই হ'লি গিয়ে রাজকন্তে—না--না, ও সব  
কথায় তোমাদের কান দেবার দরকার নেই। ছিঃ-ছিঃ-ছিঃ, মুয়ে আগুন!  
শেষকালে কি না গুরুঠাকুবকে নিয়ে—

গুলবাহার। কি গা মা ঠাকুরণ? রাজকন্তা কি বল্ছো?

দিলপিয়ার। তর্ হেই কথার দরকার কি?

জগদম্বা। ছেড়ে দাও না, বড় ঘরের বড় কথা! তোমাদের  
নাম কি গা?

দিলপিয়ার। আইজা মা-ঠারাগ, আমার নাম দিলপিয়ার বট্টাচার্য্য,  
আর ওর নাম গিয়া বাহারমুন্দরী দাইজা।

জগদম্বা। এ কি রকম নাম গো?

গুলবাহার। কি জান মা-ঠাকুরণ! থাকি মোছলমানের পাড়ায়,  
নামও তেমনি হয়েছে।

জগদম্বা। যাই হোক বাছা, পরের কথায় থেকো না। রাজ-  
কন্তা বেরিয়ে থাক্ কি থাক্, তোমাদের কি?



দিলপিয়ার। হ'—হ' মা-ঠারাইন্, আমিও হেই বুজি।

গুলবাহার। থাম্ বাঙ্গাল! [জগদম্বার প্রতি] কোন্ রাজকন্যা  
গা?—সোনা?

দিলপিয়ার। এঁয়া? কও কি ঠারাইন্?

জগদম্বা। দরকার কি বাছা, আমাদের ও সব কথায়? গুরু-  
ঠাকুরের সঙ্গে বেরিয়ে যাক্, কি যার সঙ্গে খুসী, না—না, এ সব  
ভাল কথা নয়; বল্লে আবার কর্তার গর্দান যাবে। ঘুষ দিয়ে  
মুখ মেয়ে দিয়েছে কি না!

গুলবাহার। গুরুঠাকুরের সঙ্গে বেরিয়ে যাবে?

দিলপিয়ার। এঁয়া—?

জগদম্বা। বেরিয়ে যাবে কি গো? গেছে।

দিলপিয়ার। এঁয়া! বাহার! মারছে কপালে পিছার বারি। আর  
কি? এইবার—[তুড়িলাফ]

জগদম্বা। তা এসেছ, একখানা গান গাও।

দিলপিয়ার। আর ছালি গাইম্ ঠারাইন্!

উভয়ে।—

গীত।

হায় রে সব এক গোয়ালের গরু।

এক খোয়ারে পড়লো বাধা চোড়ু আর ঐ বড়ু।

এক দরে যায় মিশ্রী মুড়ি, নূর বেগম আর রামার খুড়ি,

পচা খালে মরলো ডুবে বাদশাজাদার জরু।

এ পিঠ ও পিঠ মতই দেখি, দুনিয়াদারির সবই মেকি,

সব শোয়ালের একই বুলি মোটা কিশা সক্রু।

[ সকলের প্রস্থান ।

## চতুর্থ দৃশ্য :

শ্রীপুর প্রাসাদ ।

গীতকণ্ঠে চম্পকের প্রবেশ ।

গীত :

চম্পক ।— ব্রজের কানু, ব্রজের কানু, তুমি দেখে চরাও কোন্ বনে ?

গীতকণ্ঠে সনাতনের প্রবেশ ।

সনাতন ।— নিত্য যেথায় আমার পূজা পুষ্প-তুলসী বর্ষণে ।

চম্পক ।— আমি বনমালা হাতে সদা দিনে রাতে খুঁজি হে তোমারে প্রিয়,

সনাতন ।— সে যে আছে কাছে কাছে আকাশে বাতাসে, দোলে তার উত্তরীয় ;

চম্পক ।— আমায় কে বোঝাবে তব মর্শ্ব ?

সনাতন ।— ওরে শুধু সনাতন ধর্ম,

চম্পক ।— আনি নামের পাগল রূপের পিয়াসী চমকি' ভ্রমরগুঞ্জে ।

সনাতন ।— চোখ মেলে চাও এই গোষ্ঠে তার নাচে দেখু পদশিঞ্জে ।

[ সনাতনের প্রস্থান ।

কাঞ্চনের প্রবেশ ।

কাঞ্চন । চম্পক !

চম্পক । দাদা—[ কাঞ্চনের কোলে ঝাঁপাইয়া পড়িল । ]

কাঞ্চন । [ চম্পকের হুই গণ্ডে চুষন করিয়া ] চোখে জল কেন রে ? আবার বুঝি 'বনমালী' 'বনমালী' করছিলি ? ওই বনমালীই তোকে মাটি করবে ।

চম্পক। [কোল হইতে নামিয়া] তুমি ভারী বোঝ! বনমালী কাউকে মাটি করে বুঝি? তাকে যে ভালবাসে—

কাঞ্চন। তার ভিটেয় বাতি জলে না।

চম্পক। দাদা! আমার রাগিও না বল্ছি!

কাঞ্চন। আরে ছোড়া, ‘বনমালী’ ‘বনমালী’ ক’রে তুই কি পাগল হ’বি? ও তো শুনি মানুষকে খালি কাঁদায়। ওর পিসী যশোদা ওকে মানুষ করেছিল—

চম্পক। যশোদা বুঝি কৃষ্ণের পিসী?

কাঞ্চন। নেই তো নেই! তুই মোটের উপর এ পাগলামি আর করতে পারি নে—বুঝলি?

চম্পক। কেন দাদা, তুমি দিনের মধ্যে একশোবার এই কথা বল?

কাঞ্চন। আরে ছোড়া, বলি কি সাধে? তুই হ’লি কেদার রায়ের ছেলে, যার নামে বাঘে গরুতে এক ঘাটে জল খায়। তোকে তো ঠাকুরপূজো করতে হবে না, করতে হবে যুদ্ধ। তাজা তাজা মানুষের মাথা ভাঙ্গ’বি, কাটা মুণ্ড থেকে ফিন্‌কি দিয়ে রক্ত ছুটবে—আশ মিটিয়ে স্নান কর’বি, রাতের বেলা যুদ্ধক্ষেত্রে মড়া শিয়রে রেখে শুয়ে থাক’বি। তা তুই ভাবিস্‌ নি চম্পক! আমি তোকে শিখিয়ে দেবো, কেমন ক’রে মানুষের মাথা ভাঙ্গতে হয়।

চম্পক। আমি শিখবো না।

কাঞ্চন। আলবৎ শিখ’বি। চাঁদ রায়ের ভাইপো আমরা—কেদার রায়ের ছেলে, আমাদের কি ঘরের কোণে ব’সে প্যান্‌-প্যান্‌ করা সাজে? ছিঃ ভাই, ছিঃ! দেশে এত অত্যাচার, ঘরে এত অশান্তি, দেশের লোকের পেটে ভাত নেই, পরণে কাপড় জোটে না, রোগে শোকে অনাহারে দেশের পাজর খ’সে যাচ্ছে, এই কি আমাদের

পুতুলখেলার সময়? গরীবের পেটে ভাত দিতে হবে—অত্যাচারীর টুটি কামড়ে ধরতে হবে; দেশে কেউ গরীব থাকবে না—কেউ অকালে মরবে না—কারও জিনিষ কেউ চুরি করবে না—

চম্পক। মানুষের মাথায় লাঠি চালিয়ে দেশে শান্তি আনবে দাদা? তা তো হয় না। গুরুদেব বলেছেন—

কাঞ্চন। খবরদার! গুরুদেব শালার নাম আর আমার কাছে করিস্ নি।

চম্পক। ছিঃ-ছিঃ, তুমি হ'লে কি দাদা?

কাঞ্চন। তলোয়ার নিয়ে আয়, আমি তোকে যুদ্ধ শেখাবো।

চম্পক। আমি শিখবো না।

কাঞ্চন। নিশ্চয়ই শিখবি। কেদার রায়ের ছেলে যুদ্ধ শিখবি না, চালাকি?

চম্পক। কথনো শিখবো না।

কাঞ্চন। তবে দূর হ'য়ে যা—[কান ধরিয়া বাহির করিয়া দিল।]  
যুদ্ধ করবে না! ভারী আব্দার!

### স্বর্ণময়ীর প্রবেশ।

স্বর্ণময়ী। সবাই কি যোদ্ধা হয় দাদা? একজন আঘাত করবে, আর একজন প্রলেপ দেবে; একজন ধরবে অগ্নি, আর একজন বাজাবে বাঁশী; একজন তার সবল বাহু দিয়ে দেশের পর দেশ জয় করে আসবে, আর একজন ফল জল শস্য দিয়ে তার লগাটে লক্ষ্মীর রাজ-টীকা পরিয়ে দেবে। সংসারে দু'জনেরই সমান প্রয়োজন দাদা!

কাঞ্চন। বা রে বাদরমুখী, তুই যে মস্ত পণ্ডিত হ'য়ে উঠেছিস্! তুইও বনমাণীর নামে পাগল হ'য়ে উঠেছিস্ না কি?

স্বৰ্ণময়ী । আমার এমন কি পুণ্য আছে দাদা, যে তাঁর নামে পাগল হবো ?

কাঞ্চন । তবে তোর চোখ ছল্-ছল্ করছে কেন ?

স্বৰ্ণময়ী । একটা কথা শুন্‌লুম । দাদা ! আমায় লুকিয়ে না ! বল, সহসা তোমরা এমন যুদ্ধ-যুদ্ধ ক'রে ক্ষেপে উঠেছো কেন ? এ কি আমার জগ্ন ?

কাঞ্চন । কে বললে ? না—না, তোর জগ্ন তো নয় !

স্বৰ্ণময়ী । তবে ? সহসা কি এমন কারণ ঘটলো যে, বাবা কাকাকে নিয়ে স্বৰ্ণদ্বীপ জয় করতে ছুটলেন, তুমি কলাগাছিয়া দুর্গটা ছাই ক'রে দিয়ে এলে, কাৰ্ভালো ত্রিবেণীর দুর্গ জয় ক'রে শত শত নরনারীর মাথা নিয়ে ফিরে এলো ? আমি যে কিছুই বুঝতে পারছি না দাদা ! আমায় বল, আমার মন বড় চঞ্চল হ'য়ে উঠেছে ।

কাঞ্চন । আরে দূৰ্ ! মন চঞ্চল হবে আমার, তোর হ'তে গেল কেন ? কি হয়েছে, জানিস্ না বুঝি ? ঐ দ্রুশা খাঁ তার বোনকে আমার সঙ্গে বিয়ে দিতে চেয়েছিল । আমিও বিয়ে করবো না—সেও ছাড়বে না ; এই আর কি !

### কেশার মার প্রবেশ ।

কেশার মা । হ্যাঁ রে কাঞ্চন, চম্পককে মেরেছিস্ ?

কাঞ্চন । এই নাও ! ও বুঝি লাগিয়েছে, আর তুই অমনি কৌদল করতে এলি ?

কেশার মা । মেরেছিস্ কি না, তাই বল—

কাঞ্চন । হ্যাঁ—মেরেছি, আবার মারবো ।

কেশার মা । খবরদার ! কচি ছেলের গায়ে হাত তুলবি নি। ওঃ

চতুর্থ দৃশ্য ।

চাঁদের মেয়ে

—ভারী যুদ্ধ শিখেছে ! গোটা কতক মড়ার খুলি ভাঙ্গলেই যুদ্ধ হ'য়ে গেল ! আমার সঙ্গে লড়তে পারিস্ ? আয় না, দেখি তুই কত বড় মবদ, আর আমিই বা কেমন মেয়েমানুষ !

কাঞ্চন । কে তোকে মেয়েমানুষ বলে ? তুই মেয়েমানুষের বাবা ।  
তোর যদি একটা কাচা আর এক জোড়া গৌফ থাকতো, তা হ'লে  
ঈশা খাঁর বিরুদ্ধে তোকেই পাঠাতুম ।

দেবলের প্রবেশ ।

দেবল । সোনা—সোনা—

সকলে । কি ঠাকুর ?

দেবল । আমি একটা কথা বলতে—মানে একটা কথা—এই  
তোমাকে—না—না, আমি বলতে পারবো না—আমার মাথা ঘুরছে—  
কেশার মা । খুব তামাক খেয়েছ বুঝি ?

দেবল । না—না, আজ আমি সারাদিন কিছু খাই নি । সোনা !  
এই তোমাকে একটা কথা—তাই তো, আমার মাথার ভেতর সব  
গোলমাল হ'য়ে যাচ্ছে ; আমি কি বলবো, বুঝতে পারছি না—

স্বর্ণময়ী । ঠাকুর ! আপনার কি কোন অসুখ করেছে ?

দেবল । না—না, অসুখ ক'রে নি, শুধু আমার জিভটা জড়িয়ে  
আসছে—

কাঞ্চন । যাও ঠাকুর—যাও, পাগলামি ক'রো না ।

দেবল । পাগলামি নয়—ওরে, পাগলামি নয় ; আমি বলতে পারছি  
না—বোঝাতে পারছি না—

কাঞ্চন । আর বোঝাতে হবে না ঠাকুর ! তুমি পথ দেখ ।

স্বর্ণময়ী । বলতে দাও না দাদা ! দেখছে না ওর চোখ ছ'টো ?

কাঞ্চন। গাঁজা খেয়েছে।

দেবল। না-না-না; কোটীশ্বর! আমি বলতে পারছি না, তুমি বুঝিয়ে দিও। সোনা! কাউকে বিশ্বাস ক'রো না—কাউকে বিশ্বাস ক'রো না— [প্রস্থান।

স্বর্ণময়ী। কেশার মা! দেখ্ তো—দেখ্ তো, ঠাকুর কোথায় যাচ্ছেন! উনি যেন কি একটা ভ্রুংসংবাদ নিয়ে এসেছেন, কিন্তু বলতে পারছেন না।

কেশার মা। তাই তো! আচ্ছা দেখি—

[প্রস্থান।

স্বর্ণময়ী। কেন আমার দক্ষিণ চক্ষু স্পন্দিত হ'চ্ছে? দাদা! কি যেন একটা অমঙ্গলের মেঘ আমাদের ভাগ্যাকাশে ঘনিজে আসছে! কাঞ্চন। আসুক্ অমঙ্গল, অমঙ্গলকে চিরকাল অঙ্গভূষণ করবো।

### কেশরীর প্রবেশ।

কেশরী। কুমার—কুমার!

কাঞ্চন। কি কাকা?

কেশরী। দশা খাঁ পঞ্চাশ হাজার সৈন্য নিয়ে স্বর্ণদ্বীপের দিকে ছুটেছে।

কাঞ্চন। পঞ্চাশ হাজার? তাই তো কাকা! আমাদের যে মোটে দশ হাজার, তাও শিক্ষিত নয়। তা হ'লে এখন কি করা যায়?

কেশরী। চল, আর একবার কতকগুলো মানুষের মাথা ভেঙ্গে আসি। আমি একবার লাঠি ধ'রে দাঁড়ালে হাজার সৈন্যকে ঘায়েল করবো।

কাঞ্চন। আমারও আর এমনি হাত পা গুটিয়ে থাকতে ভাল

লাগছে না। ঈশা খাঁর মাথাটা ছিঁড়ে আনতে না পারলে এ জীবনে স্মৃতি নেই। কাকা—

স্বর্ণময়ী। শুধু ধবংসের কল্লনা নিয়েই ব্যস্ত। ভগবান্! কেন মানুষের প্রাণে এমন নিষ্ঠুরতা দিয়েছ?

কেশবী। তা হ'লে আব দেবী নয় কুমার! আজই যাওয়া চাই—

কাকুন। আজ কেন—এখন!

স্বর্ণময়ী। দাদা! আবার তোমরা যুদ্ধে যাচ্ছ? এই সে দিন কতকগুলো নবনাবীকে বিনাদোষে জল্লাদের মত হত্যা করে এলে, তাতেও সাধ মিটলো না? ওঃ—তোমরা কি নিষ্ঠুর!

কাকুন। না—বা, বুড়োমি করিস্ নে বাদরী!

স্বর্ণময়ী। দাদা! মানুষের মাথা ভেঙ্গে তুমি কি এতই নিষ্ঠুর হ'য়ে উঠেছ? ভাই-বোনকেও একটা মিষ্টি কথাও বলতে জান না? [ফুপাইয়া কাঁদিতে লাগিল।]

কাকুন। আরে, কাঁদে দেখ! যাঃ—সব গোলমাল করে দিলে। এই, কাঁদিস্ নি বলছি। দেখ্ দেখি, আমি এখন কি করি? সোনা—সোনা! দেবো মাথাটা হুঁকে?

কেশবী। কুমার—

কাকুন। হ্যাঁ—চল, কিন্তু এ ভাবে নয়। আমি সোজা পথে স্বর্ণদ্বীপে চ'লে যাই, আর তুমি ছদ্মবেশে গিয়ে ঈশা খাঁর বজরা ভুলিয়ে অস্ত্র পথে নিয়ে যাও। মাত্র সাত দিন যদি দেবী করিয়ে দিতে পার—বাস্!

কেশবী। তা হ'লে আমি একবার মাকে ব'লে আসি—

[প্রস্থান।]

কাকুন। ঈশা খাঁর মাথাটা অনেক দামে বিকাবে, একবার ছিঁড়ে



আন্তে পারলে হয়। সোনা! তা হ'লে তুই মুখ ফিরিয়ে থাক্,  
আমি চল্লুম—

### ভবানীর প্রবেশ।

ভবানী। আবার কোথায় চলেছ বাবা?

কাঞ্চন। স্বর্ণদ্বীপে।

ভবানী। যেতে হবে না।

কাঞ্চন। না গেলে চল্বে না তো!

ভবানী। খুব চল্বে। এই সেদিন কলাগাছিয়া থেকে ফিবে এসেছ,  
এখনও দেহের ক্ষত মিলিয়ে যায়নি, আবার যুদ্ধ? তোমরা কি শুধু  
যুদ্ধই চিনেছ? 'না—তোমাকে আমি এমন ক'রে যমের সঙ্গে খেলা  
করতে দেবো না।

কাঞ্চন। আমি যে মা চাঁদ রায়ের ভাইপো—কেদার রায়ের ছেলে,  
যমের সঙ্গে খেলা করাই যাদের ধর্ম্ম।

ভবানী। তাঁদের ধর্ম্ম নিয়ে তাঁরা থাকুন; তোমাকে আমি আজ  
আর যুদ্ধে যেতে দেবো না কাঞ্চন!

কাঞ্চন। মা! আমার মন বড় চঞ্চল হ'য়ে উঠেছে। দোহাই মা  
তোমার, আমায় শুধু এক পক্ষের ছুটি দাও। তুমি আমার জন্মোৎ-  
সবের আয়োজন কর; আমি যেখানেই থাকি, সে দিন নিশ্চয়ই এসে  
তোমার পায়ের ধুলো নেবো।

ভবানী। মনে থাক্বে? আচ্ছা যাও, কোটীশ্বরকে প্রণাম ক'রে  
যাত্রা কর।

কাঞ্চন। কোটীশ্বর মাথায় থাক্ মা, আমি তোমাকেই একটা  
প্রণাম ক'রে যাচ্ছি। [প্রণাম] সোনা—সোনা! কথা বলি নি

চতুর্থ দৃশ্য ।]

চাঁদের মেয়ে

পোড়ামুখী? যাবার সময় মুখ ফিরিয়ে রইলি? যদি আর দেখা না হয়, কেঁদে ম'রে যাবি— [প্রস্থান।

ভবানী। কাঞ্চনকে একটা কথাও বল্‌লি নি সোনা?

স্বর্ণময়ী। না মা, দাদা আমাকে ছ'চক্ষে দেখতে পারে না।

ভবানী। তাই বটে! কি ক'রে বল্‌লি সোনা? মুখের ভাষাটাই বড়, অন্তরের কথাটা কিছুই নয়? এমন ভাই কে কবে পেয়েছে? শ্রীকৃষ্ণ বোধ হয় স্তম্ভদ্রাকে এর চেয়ে বেশী ভালবাসতো না।

স্বর্ণময়ী। মা! তুমি কি বল্‌ছো?

ভবানী। কার জগ্ন অতটুকু ছেলে কলাগাছিয়া হুর্গ ধ্বংস ক'রে সর্বাস্ত্র ক্ষত-বিক্ষত ক'রে এলো? 'কার জগ্ন আজ আবার নাচতে নাচতে যমের মুখে ছুটে গেল?

স্বর্ণময়ী। কার জগ্ন মা?

ভবানী। তোমার জগ্ন।

স্বর্ণময়ী। মা! কি হয়েছে মা, আমার খুলে বল। লোকে আমার দেখে কানাকানি করে, আমি কিছুই বুঝতে পারি না। আমার যেন মনে হ'চ্ছে, আমার নিয়ে চারিদিকে একটা ষড়যন্ত্র চলছে! তোমার পারে পড়ি মা, আমার বল; না শুনে আমি কিছুতেই স্থির থাকতে পারছি না। মা—মা—

ভবানী। বেঁচে থাকলে একদিন গুন্তে পাবে; আজ নয় মা, আর একদিন বলবো। এস মা, কোটীশ্বরের পূজার বেলা ব'য়ে যাচ্ছে— [প্রস্থান।

স্বর্ণময়ী। কোটীশ্বর! মনের চঞ্চলতা দূর কর দয়াময়!

[প্রস্থান।

## পঞ্চম দৃশ্য :

স্বর্ণদ্বীপ-দুর্গের সম্মুখস্থ পথ ।

গভীর রাত্রি ।

গীতকণ্ঠে পলায়নপর নাগরিক ও নাগরিকাগণের  
তল্লা-তল্লা লইয়া প্রবেশ ।

সকলে ।—

গীত ।

হায় বে খোদাতালা ।

উলুখড়ের জান নিতে কি রাজায় রাজায় পালা ?

জরু গরু সয মরেছে, আমরা কেন রইনু বেঁচে,

সব হারিয়ে নিয়েছি আজ ককিরী আলখালা ।

হায় রে হায় সোনার দেশে কে এল সর্ব্বনেশে,

কবর দেছে পীড় হ'তে হায় কুষণ মাঝি মালা ।

[ সকলের প্রস্থান ।

সশস্ত্র জঁশা খাঁ ও এনায়েতের প্রবেশ ।

জঁশা খাঁ । নীরব—নিরব—কোথাও একটা সাড়াশব্দ নেই ; যে দিকে  
চাই, শুধু শবের উপর শব ! রক্তে নদী ব'য়ে যাচ্ছে ! কি দুর্গন্ধ—  
নিঃশ্বাস আটকে আসছে ! দেখছো এনায়েৎ, সমস্ত স্বর্ণদ্বীপ যেন  
মৃত্যুর মত নিথর হ'য়ে পড়ে আছে । কেউ কি বেঁচে নেই ? কেউ  
কি বেঁচে নেই এনায়েৎ ? চাঁদ রায়, কেদার রায় কি সবাইকে বধ

করেছে? ওঃ—কেন ছ’দিন আগে আস্তে পারি নি? কুচক্রীর কথায় ভুলে কেন বিপথে চ’লে গেলুম? খোদা—খোদা! তুমিও কি মুখ ফিরিয়েছ?

এনায়েৎ! আস্তে—আস্তে বন্ধু, হয় তো তারা কোথাও লুকিয়ে আছে। নগর তো গেছেই, তোমাকেও আর বাঁচাতে পারবো না।

ঈশা খাঁ। আরও বাঁচতে হবে এনায়েৎ? কলাগাছিয়া গেল, ত্রিবেণী গেল, তবুও আমায় বেঁচে থাকত্নে হবে এনায়েৎ? না—না, আমি মরবো; সবই তো গেছে, এই বুকটাও চাঁদ রায়ের সম্মুখে উন্মুক্ত ক’রে বলবো—নিষ্ঠুর ঘাতক, আমার প্রাণাধিক প্রজাদের যে পথে পাঠিয়েছ, আমাকেও সেই পথে যেতে দাও।

এনায়েৎ। উন্মাদ হ’য়ো না বন্ধু! আমরা এর ভীষণ প্রতিশোধ নেবো

ঈশা খাঁ। প্রতিশোধ নেবো—প্রতিশোধ নেবো এনায়েৎ! চাঁদ রায় কেদার রায়কে মাটির সঙ্গে পিষে ফেলতে পারি, কিন্তু যাদের হারিয়েছি, তারা তো আর ফিরবে না!

এনায়েৎ। তবু তারা বেহেস্ত থেকে দেখে স্মৃথী হবে যে, তুমি তাদের মৃত্যুর প্রতিশোধ নিয়েছ। স্থির হও বন্ধু! এ দৌর্ভাগ্য তোমার সাজে না।

ঈশা খাঁ। তুমি বুঝবে না—তুমি বুঝবে না এনায়েৎ, কি জালা এ অন্তরের মাঝখানে! কত জাতির ইতিহাস মছন ক’রে, কত যুগের আদর্শ দিয়ে আমি এই তিনটে নগর ফলে ফুলে সাজিয়েছিলুম! তারা দুর্গ অধিকার করেছে, তাতে দুঃখ ছিল না—যদি বেঁচে থাকতো আমার প্রজারা।

এনায়েৎ। ঈশা খাঁ! তোমার চোখে জল দেখছি। ছিঃ-ছিঃ-ছিঃ,

## চাঁদের মেয়ে

[ দ্বিতীয় অঙ্ক ।

এই নারীমূলভ দুর্বলতা নিয়ে তুমি চাঁদ রায়ের বিপক্ষে দাঁড়াবে ?  
ফুৎকারে উড়ে যাবে ঈশা খাঁ !

[ প্রস্থান ।

ঈশা খাঁ । ও কি ? দুর্গচূড়ায় ও কার পতাকা উড়ছে ?

### সশস্ত্র কেদার রায়ের প্রবেশ ।

কেদার । হিন্দুর পতাকা—চাঁদ রায়ের পতাকা—

ঈশা খাঁ । কে—কেদার রায় ?

কেদার । ‘বন্ধু’ বলবে না ? বিশ্বাসঘাতক—

ঈশা খাঁ । আমি বিশ্বাসঘাতক, আর তুমি বড় সাধু ! পুত্রকে  
লেলিয়ে দিয়ে নিশীথ রাত্রে আমার কলাগাছিয়া দুর্গ ভস্মে পরিণত করেছ  
—সে বড় সাধুতার পরিচয় ? আমার অজ্ঞাতসাবে নিবীহ প্রজাদের  
রক্তে স্বর্গদ্বীপের শ্রামল ভূমি রঞ্জিত করেছ, এও বড় সাধুতার পরিচয় ?  
কি করবো তোমায় কেদার রায় ? আমার বৃকে এমন আগুন জালিয়েছ  
তোমরা যে, তোমাদের শ্রীপুরের সহস্র বিধবা যদি অশ্রুজলে নদী  
বইয়ে দেয়, তবুও এ আগুন নির্দাপিত হবে না ।

কেদার । আর তুমি কি করেছ মনে আছে ঈশা খাঁ ? তোমাকে  
আমরা মাথায় ক’রে রেখেছিলুম । তুমি না কেদার রায়ের বন্ধু ব’লে  
গর্ব কর ? তবে এ ঘৃণিত প্রস্তাব কোন্ মুখে পাঠিয়েছিলে ?

ঈশা খাঁ । ঘৃণিত কিসে ?

কেদার । রূপ কি মানুষকে এমনি পাগল করে যে, সম্পর্ক বিচার  
করতে দেয় না ? সংসারে রক্তের সম্বন্ধটাই সব ? মানুষের গড়া  
সম্পর্কটা এমনি তুচ্ছ ? ছিঃ-ছিঃ-ছিঃ, বীর ব’লে না তোমার খুব অহ-  
কার ঈশা খাঁ ? বীরের হৃদয় রূপ চেনে না, চেনে তরবারি ।

ঈশা খাঁ। তুমিও তো বীর ব'লে বড় আশ্ফালন কর, তবে এ নৃশংস হত্যাকাণ্ড কেমন ক'রে করলে কেদার রায়? কেন হান্লে নির্দোষের বুকে এ মৃত্যুশেল?

কেদার। তুমিই শিখিয়েছ ঈশা খাঁ যে, সংসারে দয়া-মায়্যা বন্ধুত্বের কোন স্থান নেই। শিখিয়েছ যে, যারা ধর্মের দোহাই দিয়ে আপামর সাধারণকে স্নেহের বন্ধনে বেঁধে রাখতে চায়, তাদেরই মাথায় বজ্রাঘাত হয়।

ঈশা খাঁ। একটা প্রস্তাব পাঠিয়েছি, তাতেই তোমাদের এত অপমান কেদার রায়?

কেদার। হ্যাঁ—এত অপমান। তুমি তা বুঝতে পারবে না ঈশা খাঁ! বুঝতে পারতো, যদি বেঁচে থাকতো তোমার পিতা কালিদাস গজদানী। তুমি আমাদের বিশ্বাসের মূলে যে কুঠারাঘাত করেছ, তার শাস্তি এখনও হয় নি ঈশা খাঁ! এখনও তোমার সোনারগাঁর দুর্গে তোমার বিজয়-নিশান পং-পং ক'রে উড়ছে; আমি সে নিশান টেনে ছিঁড়ে ফেলে তার স্থানে চাঁদ রায়ের জয়-পতাকা উড়িয়ে দেবো।

ঈশা খাঁ। তার পূর্বেই যে তুমি মরবে কেদার রায়!

কেদার। বেশ, এস—আমি তোমারই অপেক্ষা করছি—

[ উভয়ের যুদ্ধ করিতে করিতে প্রস্থান।

[ নেপথ্যে কোলাহল—“আগুন—আগুন—আগুন!” ]

### এনায়েতের প্রবেশ।

এনায়েৎ। পুড়ে মর, পুড়ে মর ওরে দর্পী! যেমন ক'রে কলাগাছিয়া-দুর্গের নিরীহ অধিবাসীরা প্রাণ দিয়েছে, তোরা তেমনি ক'রে মর, আমি আনন্দে নৃত্য করি।

[ নেপথ্যে পুনরায় কোলাহল—“আগুন—আগুন—আগুন !” ]

ঈশা খাঁর পুনঃ প্রবেশ ।

ঈশা খাঁ । এনায়েৎ—এনায়েৎ ! ছিঃ-ছিঃ, করলে কি কাপুরুষ ?  
এনায়েৎ । কেন ? ওরা আমাদের কলাগাছিয়া-দুর্গ ঠিক এমনি  
ক’রে পোড়ায় নি ?

ঈশা খাঁ । মুর্থ ! এ যে আমার দুর্গ—আমার বক্ষপঞ্জর !

এনায়েৎ । কিন্তু চাঁদ রায়ের অধিকারে ।

ঈশা খাঁ । তা হ’লেও এ আমার । নির্বাণ কর—অগ্নি নির্বাণ  
কর । কাঞ্চন বালক, কিন্তু তুমি তো বালক নও এনায়েৎ !

এনায়েৎ । কেন দুঃখিত হ’চ্ছে বন্ধু ? শঠের সঙ্গে এই শাঠ্যই ধর্ম ।

[ প্রস্থান ।

ঈশা খাঁ । ওরে, আকাশে এত মেঘ, একটু বৃষ্টিপাত হয় না ?  
খোদা ! আকাশ ভেঙ্গে ফেল, মুমলধারে বর্ষণ কর—বর্ষণ কর ! দুর্গ-  
বাসিগণ ! জাগো—জাগো—জাগো—

[ প্রস্থান ।

নেপথ্যে কেদার । জাগো—জাগো হিন্দুগণ ! দাদা—দাদা—

চাঁদ রায় ও কেদার রায়ের প্রবেশ ।

চাঁদ । কেন আমরা জাগিয়ে দিলি কেদার ? মরবার এই তো  
সুযোগ ! এমন দুঃখদীর্ণ জীবন আমার—ওরে কাঞ্চন কই ? কাঞ্চন ?  
কেদার । বোধ হয় নিদ্রিত ।

চাঁদ । জাগাতে পারলি নে ? আমার প্রাণটাই কি এত মূল্যবান ?

[ প্রস্থানোত্তত ]

কেদার । কোথায় যাচ্ছ দাদা ? মরবে যে !

চাঁদ । স'রে যা—কাঞ্চনকে নিয়ে আসি—

কেদার । না—যেতে পাবে না ।

চাঁদ । সর্—সর্ কেদার ! আমায় পাগল করিস্ নি । ওরে, এ কি নিষ্ঠুর প্রাণ ! কেদার—কেদার—ওঃ, এমন পাষণ তোমরা কেউ দেখেছ ? সে তোর ছেলে না ? তুই তাকে এম্নি ক'রে মেরে ফেলবি ?

কেদার । সবাই যদি মরতে পারে, সে কেন মরবে না দাদা ?

চাঁদ । তবে আমাকে জাগালি কেন ? সবার সঙ্গে আমি কি মরতে পাবতুম না ?

কেদার । দাদা ! একটা কাঞ্চন গেলে সহস্র কাঞ্চন জন্মাবে, কিন্তু এক চাঁদ গেলে বাঙলায় আর চাঁদ উঠবে না ।

চাঁদ । দু' হ—দু' হ' নিষ্ঠুর ! বাজ পড়ুক্ তোর মাথায়—

[ প্রস্থান ।

কেদার । বাঃ-বাঃ-বাঃ, আকাশ ভেঙ্গে মুঘলধারে বৃষ্টি নেমে এলো\* । আয়—আয়—আয়, শ্রাবণের ধারায় নেমে আয় । কোটীশ্বর ! কোটীশ্বর ! তোমার এত দয়া ! কিন্তু এনায়েৎ খাঁ, তোমাকে আমি যদি বন্দী করতে না পারি, তবে বুথাই আমার নাম কেদার রায় ।

[ প্রস্থান ।

অর্দ্ধমুচ্ছিত কাঞ্চনকে লইয়া চাঁদ রায়ের প্রবেশ ।

চাঁদ । কাঞ্চন—কাঞ্চন—

কাঞ্চন । [ তন্দ্রাচ্ছন্নের মত ] রাত্রি কি ভোর হয়েছে ?

চাঁদ । ই্যা বাবা, ভোর হয়েছে ।

কাঞ্চন । এ্যা—ভোর হয়েছে ? জ্যাঠামশায় ! জ্যাঠামশায় ! আমায় তুলে ধর—



চাঁদ । [ ধীরে ধীরে কাঞ্চনকে উঠাইয়া বক্ষের কাছে টানিয়া লইলেন, পরে বলিলেন ] কোথায় লেগেছে বাবা ?

কাঞ্চন । কি জানি, বলতে পারছি না । জ্যাঠামশায় ! আমার পা ছ'টো টলছে । আমার একটা লাঠির ঘা দিয়ে চান্দা ক'রে তুলতে পার ?

চাঁদ । ভয় কি বাবা ? তুমি আমার কাছে রয়েছ ।

কাঞ্চন । সে জন্ত নয় । জ্যাঠামশায় ! আজ আমার জন্মতিথি, আমাকে আজ শ্রীপুরে যেতেই হবে ।

চাঁদ । আজ ? অমন কল্পনা মনে স্থান দিস্‌নে বালক ! আমি যেতে দেবো না ।

কাঞ্চন । দিতে হবে মহারাজ ! আমি মার পা ছুঁয়ে শপথ ক'রে এসেছি,—যেখানেই থাকি, আজ নিশ্চয়ই তাঁর পায়ের ধূলো নেবো । আঃ, কি মধুর বৃষ্টি ! জ্যাঠামশায় ! আমি সুস্থ হয়েছি, আমার যেতে দাও—

চাঁদ । না—না—কিছুতেই না ।

কাঞ্চন । আমি যাবো—আমি যাবো ; মায়ের প্রসাদ না পেলে আমি আজ জলগ্রহণ করবো না । জ্যাঠামশায় ! পায়ের ধরি তোমার, আমার যেতে দাও ! মার কাছে আমি কখনও মিথ্যাবাদী হই নি । আমি না গেলে মা বড় কাঁদবে । আমাকে একা বিশ্বাস না হয়, কেশরী কাকাকে সঙ্গে দাও—

চাঁদ । না ।

কাঞ্চন । তোমার মরা মায়ের দোহাই, আমার আটকে রেখো না । এখন তো আমি সুস্থ হয়েছি ! আরও ভেবে দেখ, আমার মাথাটার উপর সবার দৃষ্টি । জিশা খাঁ আমাকে দেখতে পেলে—

ষষ্ঠ দৃশ্য ।]

টানদের মেয়ে

টান। ঠিক—ঠিক বলেছ। যাও—চ'লে যাও; দ্রুতগামী বজরা  
দিচ্ছি, তীরের মত ছুটে যাও। এস—এস—

[ উভয়ের প্রস্থান ।

[ নেপথ্যে “আল্লা—আল্লা—আল্লা-হো” ধ্বনি ও কামানগর্জ্জন ।]

নেপথ্যে। জয় কোটীশ্বর !

[ ঘন ঘন কামানগর্জ্জন । ]

## ষষ্ঠ দৃশ্য :

ত্রিপুর-রাজপ্রাসাদ ।

স্বর্ণময়ীর কক্ষের সম্মুখস্থ দারদালান ।

গীতকণ্ঠে নর্তকীগণের প্রবেশ ।

নর্তকীগণ ।—

## গীত ।

এমন নিখুঁত রাতে ।

এমন চমকিমাচালা কুঞ্জকূটর মোর,

ভবু ঘুম নাহি ঋণিপাতে ।

বার তরে পরিয়াছি আজি এ মোহন বেশ,

কিরিমা তো চাহিল না আমার সে স্বদয়েশ,

বুধা ঘরে দীপ জালা, পাঁধা কুহ্মের মালা,

আঁকিয়াছি আলপনা বুধা আঙিনাতে ।

## ভবানীর প্রবেশ ।

ভবানী । বন্ধ কর তোদের নাচ-গান । যা—[ নর্তকীগণের প্রস্থান ]  
যার জন্মতিথি, যার জন্ম এত উৎসব, এখনও তার দেখা নেই । সন্ধ্যা  
হ'য়ে এল, আকাশ ভেঙ্গে মুষলধারে বৃষ্টি হ'চ্ছে ; আজ আর আসবে  
না । কি হ'লো, কে জানে ? মন বড় কু গাইছে । সে যে ব'লে  
গেল, আজ সে আসবেই ! আমার কাছে সে মিথ্যাবাদী হবে ?  
কাঞ্চন—কাঞ্চন ! এলি নে নিষ্ঠুর ?

## কেশার মার প্রবেশ ।

কেশার মা । হ্যাঁ গা বৌমা, তুমি যে কিছু বলছো না ?

ভবানী । কি মা ? তোমার চোখে জল কেন ? তুমি কি কোন  
দুঃসংবাদ এনেছ ? বল—বল, আমার মন বড় ব্যাকুল হয়েছে ! মা !  
কাঞ্চন এখনও এলো না—

কেশার মা । সেই দুঃখে তুমি হা-ছতাশ করতে থাক, আর মেয়েটা  
এদিকে না খেয়ে ম'রে যাক !

ভবানী । কার কথা বলছো মা ?

কেশার মা । অা আমার পোড়া কপাল ! তোমার হ'লই নেই ?  
সোনা যে আজ গারাদিন না খেয়ে প'ড়ে আছে ।

ভবানী । কেন ?

কেশার মা । একাদশী গো—একাদশী ।

ভবানী । তার আবার একাদশী কি ? কই, আমাকে তো এ  
কথা কেউ বলে নি !

কেশার মা । বলি নি ? দশবার বলেছি । তোমার কি মাথার

ষষ্ঠ দৃশ্য । ]

টানদের মেয়ে

ঠিক আছে? ‘কাঞ্চন’ ‘কাঞ্চন’ ক’রেই তুমি পাগল! কাঞ্চন তোমার স্বর্গে বাতি দেবে!

ভবানী। এট মেয়েটাই যত অনর্থের মূল! সোনা—সোনা!

নেপথ্যে স্বর্ণময়ী। কেন?

কেশার মা। দোর গোল্ নছার মেয়ে কোণাকার! হাড়-মাস জালিয়ে গেলে!

সজলনয়নে স্বর্ণময়ীর প্রবেশ।

কেশাব মা। দেখেছ বোমা—দেখেছ, মুখখানা শুকিয়ে কালি হ’য়ে গেছে। [রাগিয়া] তুমি যে কিছু বল্ছো না বাছা? মেয়েটা এমনি দাঁত ছিরকুটে মরুক্ তবে?

ভবানী। সোনা! আজ কাঞ্চনের জন্মতিথি; সারাদিন এই উৎসব গেল, তার মাঝে তুই উপবাসী র’য়ে গেলি? ক্ষিপের জালায় তোর প্রাণটা ছটকট করবে—তুষার তোর বুকটা শুকিয়ে যাবে, আর আমরা ছ’হাত পুরে থাকবো? কাঞ্চন এলো না—ভাবনায় সর্বান্ন অসাড় হ’য়ে আস্ছে, তুই আর আমার জালাস্ নি সোনা!

স্বর্ণময়ী। আজ যে একাদশী মা!

কেশার মা। আমি আগে মরি, তারপর তুই একাদশী করিস্।

স্বর্ণময়ী। [স্বগত] ভগবান! কত স্নেহ ঢেলে দিয়েছ ধাত্রীর বৃকে। [প্রকাশ্যে] কেশার মা! আর আমার অনুরোধ করিস্ নে, আমি কিছুতেই রাখতে পারবো না।

ভবানী। একে একে সবাইকে পাগল করেছিল, আমার আর পাগল করিস্ নি!

স্বর্ণময়ী। মা! আমার স্বপ্নরবাড়ী পাঠিয়ে দাও,—তোমার হুঁটি

পায়ে পড়ি, আর আমায় এখানে বেঁধে রেখো না। আমি বেশ বুঝতে পারছি, বয়স্থা মেয়ে বাপের বাড়ীতে থাকলেই তার চারিদিকে লোকের কুৎসার জঞ্জাল জ'মে ওঠে, তার উপর সহস্র পশুর লুক্ক দৃষ্টি ছুটে আসে। আমার জন্য দেশে অশান্তি, তোমাদের চোখে ঘুম নেই, আমার জন্ত আত্মীয় স্বজন বিপন্ন; আর আমি তোমাদের বিপন্ন করবো না। মা! তোমাদের সব অশান্তির কণ্ঠরোধ ক'রে আমি আমার নিজের ঘরে চ'লে যাই। সেখানে আমার এই দন্ধ ললাট আমরণ অবগুণ্ঠনের অন্তরালে লুকিয়ে রাখবো; শত ঈশা খাঁ সহস্র বৎসর চেষ্টা করলেও আমার মুখ দেখতে পাবে না।

কেশার মা। দিদি—দিদি!

স্বর্ণময়ী। আমার মুখটা পুড়িয়ে দিতে পারিস্? এ মুখ যে কাউকে দেখাতে লজ্জা হ'চ্ছে কেশার মা! একটা বিধর্মী—ছিঃ-ছিঃ-ছিঃ! যত ভাবি, ততই আমার মরতে ইচ্ছা হয়।

ভবানী। সোনা!—

স্বর্ণময়ী। মা! আমায় স্বস্তুরবাড়ী পাঠিয়ে দাও—[ ভবানীর পায়ের উপর লুটাইয়া পড়িল। ]

কেশার মা। আমায় আগে মরতে দে,—ওরে, আমি আগে মরি, তারপর তুই যেখানে ইচ্ছা, চ'লে যাস্। [ হাউ-হাউ করিয়া কাঁদিয়া উঠিল। ]

ভবানী। কোটীশ্বর! তুমি এত নির্ভর! তোমার পায়ে একদিনও ফুল-জল দিই নি? একদিনও কি চোখের জলে তোমার পা ধুইয়ে দিই নি পাষণ? তবে আমার এ ননীর পুতুলের মাথায় এমন বাজ হান্লে কেন?

[ তিনটি নারীর অবিরল অশ্রুধারে হর্ষাতল সিক্ত হইল। ]

## গীতকণ্ঠে চম্পকের প্রবেশ ।

চম্পক ।—

### গীত ।

আমার দুঃখ তাহে নাই ।  
তুমি বাজ হেনেছ আমার বৃকে  
আমি সহিতে যেন পাই ।  
যদি পরাণ আমার টলে,  
জ্বালিও আমায় জ্বালিও প্রিয় অশেষ দুঃখানলে ;  
দিও আমায় শক্তি দিও, বইতে তোমার উত্তরীয়,  
নামটী তোমার নিয়ে বৃকে হবো অশানচিত্তার ছাই ॥

স্বর্ণময়ী । [ বাহ বাড়াইয়া চম্পককে কোলে তুলিয়া লইলেন । ]  
ভগবান ! মরুভূমির মধ্যে এ কি শীতল প্রস্রবণ !

ভবানী । দেখ্ছো মা, দেখ্ছো ? এ কি সর্ব্বনেশে রূপ ! আমি  
এ রূপ কোথায় লুকিয়ে রাখি বল ?

কেশর মা । মরু আবাদের বেটী, কথার ছিরি দেখ !

স্বর্ণময়ী । আমি খণ্ডরবাড়ী গেলে কার কোলে উঠ'বি চম্পক ?

চম্পক । আমি যেতে দেবো না ।

স্বর্ণময়ী । যদি ম'রে যাই ?

চম্পক । যাঃ—বলতে নেই ।

স্বর্ণময়ী । তোর জন্যই আমার যত ভাবনা ।

### দেবলের প্রবেশ ।

দেবল । রাণী মা ! রাণী মা ! দাদা এসেছিল ?

ভবানী । কই না ! কেন ঠাকুর ?

দেবল । বলতে পারবো না, আমার মুখে কথা আটকে আসছে !  
তাই তো, আমি কি করি ? রাণী মা ! না—না, আমি যাই—আমি  
যাই—

ভবানী । ঠাকুর ! আপনার সর্বাস্ব কাঁপছে কেন ? কি হয়েছে  
ঠাকুর ? আমার প্রাণ বড় কাঁদছে ; বলুন—বলুন, আপনি কি হুঃসংবাদ  
এনেছেন ?

দেবল । আমার মুখ চেপে ধরেছে—দাদা বারণ করেছে, আমি  
বলতে পারবো না—

কেশার মা । গাঁজাখোর মিন্‌সে ! তবে বারবার জ্বালাতে আসিস্  
কেন ?

স্বর্ণময়ী । ঠাকুর ! আপনি শিশুর মত সরল, আপনি তো ছলনা  
জানেন না ! কি বলতে এসেছেন, বলুন—

শ্রীমন্তের প্রবেশ ।

শ্রীমন্ত । আমি বলছি, শোন ।

দেবল । ওঃ—[ আর্তনাদ করিয়া উঠিল । ]

শ্রীমন্ত । দেবল !

দেবল । ব'লো না দাদা—ব'লো না—[ পদধারণ ]

শ্রীমন্ত । দূর হও মুর্থ !

[ নিতান্ত অনিচ্ছায় দেবলের প্রস্থান ।

স্বর্ণময়ী । গুরুদেব—[ প্রণাম ]

শ্রীমন্ত । [ কায়েক পদ পিছাইয়া ] স্পর্শ ক'রো না—আমার অশৌচ ।

ভবানী । ঠাকুর ! ভয়ে আমার কথা আসছে না । আজ এক

ষষ্ঠ দৃশ্য।]

চাঁদের মেয়ে

মাস আমবা আপনার পদদুলি পাই নি। এই রাতে চুর্যোগ মাগায় ক'রে আপনি যখন এসেছেন, নিশ্চয়ই কোন ছঃসংবাদ আছে?

শ্রীমন্ত। [ দীর্ঘনিঃশ্বাস ফেলিয়া ] হ্যাঁ,—ছঃসংবাদ আছে।

স্বর্ণময়ী। চুপ ক'বে বইলেন যে? আপনি কোথা থেকে আসছেন?

শ্রীমন্ত। স্বর্ণদীপ থেকে।

স্বর্ণময়ী। বাবা, কাকা, এঁবা সব ভাল আছেন? দাদা কেন এলো না?

ভবানী। যুদ্ধের সংবাদ কি ঠাকুর?

শ্রীমন্ত। সংবাদ অন্তত; চাঁদ কেদার বন্দী।

ভবানী, স্বর্ণময়ী ও চম্পক। বন্দী?

স্বর্ণময়ী। আমার জ্ঞাত—আমার জ্ঞাত তাঁরা বন্দী? ঠাকুর—ঠাকুর! সংসার যা কখনও কল্পনা কব্বে পাবে নি, আমার অদৃষ্টে তাই সম্ভব হ'লো? চাঁদ বায়, কেদার রায় বন্দী? আর সে আমার জন্য? কোথাও মুখ লুকাবো? চম্পক! চম্পক! একটু বিষ আন্তে পারিস্? না হয় আমার গলাটা টিপে ধর! ওরে, আমার জন্য বাঙলার সিংহ আজ পিঞ্জবাবদ্ধ! ওঃ—

ভবানী। মা! কি করি মা?

কেশার মা। [ এতক্ষণ শ্রীমন্তের আপাদ-মস্তক নিরীক্ষণ করিতে ছিল; এইবার তাহার সম্মুখে আগাইয়া আসিল। ] নষ্টামি করতে এয়েছ? চাঁদ কেদার কখনও বন্দী হয়? বাঙলা দেশে এমন মরদের বাচ্ছা আছে, যে তাঁদের বাঁধে?

ভবানী। আজ অসম্ভব সম্ভব হয়েছে মা! বুঝতে পারছি, দেবল ঠাকুরও এই কথাই বল্বে এসেছিল। সে তো প্রাণ গেলেও মিথ্যা কথা বল্বে না!



## টাঁদের মেসে

[ দ্বিতীয় অঙ্ক ।

কেশার মা । তা বটে ! বোমা ! আমি একবার যাবো ? দেখে আসি, কোন্ মার ছুধ খেয়েছিল তারা, যারা আমার টাঁদ কেদারকে বেঁধে রাখে ।

চম্পক । গুরুদেব ! আমার দাদা কেমন আছে ?

ভবানী । কথা বলছেন না যে ? ঠাকুর ! আমি ভয়ে জিজ্ঞাসা করতে পারছি না । বলুন, আমার কাঞ্চন কেমন আছে ?

শ্রীমন্ত । কাঞ্চন নেই—

সকলে । নেই ?

স্বর্ণময়ী । গুরুদেব—

চম্পক । দাদা নেই ?

কেশার মা । বোমা—বোমা ! ও কি মা ? অমন করছো কেন মা ?

[ ভবানী বুকে চাপিয়া ধরিলেন, তাঁহার মুর্ছিত দেহ শ্রীমন্তের

পায়ের উপর লুটাইয়া পড়িল । ]

চম্পক । মা—ও মা ! মা গো—[ ভবানীর বুকের উপর কাঁপাইয়া পড়িল । ]

কেশার মা । দেখ্—দেখ্, মরেছে না কি দেখ্ ! যদি না ম'রে থাকে, গলা টিপে মার । এত ছুঁথ কি সহিতে পারে ? ঠাকুর ! স্নেহের সময় আস্তে পার না, ছুঁথের খবরটা তো খুব নিয়ে আস্তে পার ! বল, আর কি বলবার আছে ? কেশা মরে নি ?

শ্রীমন্ত । না ।

কেশার মা । ও—ভারী আমার স্নেহের খবরটা দিলেন ! কাঞ্চন ম'লো, টাঁদকে কেদারকে বেঁধে নিয়ে গেল সে অভাগা বেঁচে থাকতে ? তারপর, আর কিছু বলবার আছে ?

শ্রীমন্ত । ঈশা খাঁ সসৈন্যে ত্রীপুরে আসছে । কাল প্রভাতেই

শ্রীপুরে তার কামামের গোলা গ'জ্জ উঠবে। রাজ্যটাকে অশান ক'রে সে সগৌরবে ফিরে যাবে, সঙ্গে নিয়ে যাবে—

স্বর্ণময়ী ! কি গুরুদেব ?

শ্রীমন্ত । বলতে পারছি না স্বর্ণ ! চাঁদ কেদার বন্দী, কাঞ্চন পর-লোকে, সৈন্যগণ কেউ বেঁচে নেই। দুর্বল আমরা, আমাদের চোখের উপর ঈশা খাঁ শ্রীপুর ধ্বংস ক'রে বিজয়লক্ষ্মীর মত সঙ্গে নিয়ে যাবে তোমাকে।

স্বর্ণময়ী । [ কানে হাত দিল । ]

কেশার মা । ভয় কি দিদি ? আমি বেঁচে থাকতে কেউ তোর গায়ে কাঁটার আঁচড়ও দিতে পারবে না। ঈশা খাঁর মত সাত শো মরদকে আমি লাঠির ঘায়ে ঠাণ্ডা ক'রে দেবো।

স্বর্ণময়ী । গুরুদেব ! বাবা এ কথা শুনেছেন ?

শ্রীমন্ত । শুনেছেন বৈ কি মা ? তাই যাবার সময় আমাকে চুপি-চুপি ব'লে গেলেন, “ঠাকুর ! আমরা তো বন্দী, সোনাকে রক্ষা করতে কেউ নেই ; তাকে চন্দ্রদ্বীপে পাঠিয়ে দাও, এক মুহূর্ত্ত বিলম্ব ক'রো না।” আমি এখন কি করি ? তারা যে এসে পড়লো ব'লে !

কেশার মা । আহুক ; আর কেউ না থাকে, আমি আছি। আগে ওদের হটিয়ে দিই, তারপর দেখবো, চাঁদ কেদারকে কে বেঁধে রাখে ?

স্বর্ণময়ী । না-না-না, তুই পারবি না। এমন দুর্ভাগ্য নিয়ে জন্মেছি যে, আমার স্পর্শে সবাই জ'লে যাবে। বাবা কাকা বন্দী হয়েছেন, দাদা প্রাণ দিয়েছেন, তাদের আর বিপন্ন করবো না। এখনও আমার পিতৃকুলে একটি ক্ষীণ প্রদীপ জ্বলছে ; আমি এখানে থাকলে, এও নিভে যাবে। মা—মা—মা গো ! ও মা—ওঠ্ মা—

ভবানী । [ মুচ্ছাভঙ্গে ] কেন ডাকলি সোনা ? আমার মরতেও

দিবি নে? কাঞ্চন! কাঞ্চন! আমার কাঞ্চন! তাই তুমি আসতে পার নি বাবা? আমি যে তোর উপর বড় অভিমান করেছিলুম!

স্বর্ণময়ী। তুমি যদি এত আকুল হও, তা হ'লে আমি কি করবো মা? যাবার সময় আমি তার সঙ্গে একটা কথাও বলি নি।  
দাদা—দাদা—

শ্রীমন্ত। কাঁদ্বার সময় অনেক পাবে মা! এখন রায়বংশের সুনাম রক্ষা কর। ঈশা খাঁ রাত্রি ভোরেই সসৈন্তে শ্রীপুরে আসবে—শ্রীপুর ধ্বংস ক'রে সোনাকে নিয়ে চ'লে যাবে।

ভবানী। সোনাকে নিয়ে চ'লে যাবে? ওঃ—ঠাকুর! কেউ নেই আর; কে রক্ষা করবে এই অভাগিনীকে? ঠাকুর! আমার ছেলে গেল, স্বামী দেবর কারাগারে, আবার বংশের সুনাম—তাও যাবে? কোটীশ্বর! তুমি এমনি নিষ্ঠুর?

কেশার মা। কেন ভয় পাচ্ছো মা? আমি আছি, দেখি না কার কত ক্ষামতা!

ভবানী। অমন ছোটো সিংহ বাঘ যেখানে বন্দী, তুমি সেখানে কি করবে মা? গুরুদেব! উপায় করুন—

শ্রীমন্ত। উপায় তো মা চাঁদ নিজেই ক'রে দিয়েছেন। সোনাকে আমার সঙ্গে চন্দ্রবীপে পাঠিয়ে দাও—এই তাঁর আদেশ। আমি বজরা ঘাটে রেখে এসেছি। যদি পাঠাতে হয়, এখনি।

ভবানী। এখনি? এই রাত্রি—এই ছুর্যোগ, তার উপর ঠাকুর! সোনার মুখের দিকে একবার চেয়ে দেখুন! সারাদিন উপবাসে মুখখানা কালি হ'য়ে গিয়েছে। আমি যে মা, এমন কান্ডালের মত ওকে আমি কেমন ক'রে বিদায় দেবো?

স্বর্ণময়ী। আমার তাতে কোন কষ্ট হবে না মা, কেন কঁাদছো?

আবার আস্বে, আবার তোমার পায়ের ধূলো নেবো। বাবা আর কাকা যদি আসেন, আমায় নিয়ে এসো। কেশার মা ! দাদার দেহটা এই শ্রীপুরে এনে সৎকার করিস্। মা ! দাদার চিত্তার উপর একটা মন্দির গ'ড়ে তার গায়ে দাদার নামের সঙ্গে আমার নামটা লিখে দিও।

ভবানী। সোনা ! না থাক্, যেতে হবে না। তোকে রক্ষা করতে পারবো না জানি, কিন্তু সবাই মিলে এক সঙ্গে মরতে তো পারবো ?

কেশার মা। ঠিক বলেছে মা ! যদি তাদের হটাতে না পারি, এক সঙ্গে সবাই মরবো।

স্বর্ণময়ী। অবুঝ হ'য়ে না মা, তাতে কোন ফল হবে না ; এত বড় একটা বংশের এই একটু স্মৃতিচিহ্ন, তাও থাক্বে না। মা ! মা ! বল, আমি যাই ? তোমাদের ছেড়ে যেতে আমার কি কষ্ট হ'চ্ছে না ? কি করবো, উপায় নেই।

শ্রীমন্ত। সোনা ঠিকই বলেছে মা ! তুমি কেন কাতর হ'চ্ছে ? আবার কত আস্বে, কত যাবে।

ভবানী। ঠাকুর ! মেয়ে স্বপ্নরবাড়ী যায়, মায়ের চোখে আনন্দাশ্রু গড়িয়ে পড়ে। আর আমার অদৃষ্ট দেখ ! সারাদিন উপবাসের পর এই জল-ঝড়ের মধ্যে এমন দীন-দুঃখীর মত মেয়েটাকে কোথায় পাঠাচ্ছি !

কেশার মা। আমি বলছি বোমা, ওকে পাঠিও না। হয় তো এ সবই মিথ্যে !

ভবানী। রাজার আদেশ !—না মা, মেয়ে চিরকালই পর। যাক্—একদিন তো যাবেই ! গুরুদেব ! অভাগিনী মেয়েটাকে আপনার হাতে সঁপে দিলুম ; বুঝতে পারছি না, এতে ওর মঙ্গল কি অমঙ্গল ! যাও মা, তোমার ঘরে তুমি যাও।

স্বর্ণময়ী । [ সাশ্রুনেত্রে ভবানীকে প্রণাম করিয়া পদধূলি লইল, পরে রুদ্ধকণ্ঠে বলিল ] মা ! তবে যাই ? কেশার মা ! মুখ ফিরিয়ে রইলি কেন ? আসি দিদি, একটা কথা ক' ! ওরে, দাদা যাবার সময় আমিও এমন মুখ ফিরিয়ে ছিলাম ; সে কথা মনে ক'রে আজ আমার বুক ফেটে যাচ্ছে !

কেশার মা । দিদি ! তুই যাস্ নে, ওরে যাস্ নে ! কি জানি, কেন মনে হ'চ্ছে, তোকে আর দেখতে পাবো না ।

শ্রীমন্ত । ও কি কথা কেশার মা ? ছিঃ ! এস মা স্বর্ণ, আর দেরী ক'রো না ।

স্বর্ণময়ী । [ নিদ্রিত চম্পকের কাছে গিয়া ] ঘুমিয়ে পড়েছে । কোটী-শ্বর ! আমার ভাইটিকে তুমি দেখো । চম্পক—চম্পক ! না—উঠলে আর যেতে পারবো না । থাক্—[ কাঁদিতে কাঁদিতে লুপ্তিত অঞ্চলে প্রস্থানোত্ততা হইল । ]

চম্পক । [ সহসা উঠিয়া ] দিদি—

স্বর্ণময়ী । [ ফিরিয়া ] ভাই ! আমি স্বপ্নুরবাড়ী যাচ্ছি ; তোর বিয়ের সময় আবার আসবো—

[ স্বর্ণময়ী প্রস্থানোত্ততা হইলে, চম্পক তাহার লুপ্তিত অঞ্চল চাপিয়া ধরিল ; স্বর্ণ অঞ্চল ছাড়াইতে বহু চেষ্টা করিল, চম্পকের দুই গণ্ডে অজস্র চুষন করিল, তারপর এক রকম জোর করিয়াই চলিয়া গেল ।

চম্পক আছড়াইয়া পড়িল, কেশার মা তাকে কোলে করিয়া

চলিয়া গেল ; ভবানী পাষণ-প্রতিমার মত দাঁড়াইয়া

চোথের জলে বুক ভাসাইতে লাগিলেন । ]

নেপথ্যে শ্রীমন্ত । থোকা—থোকা ! হাঃ-হাঃ-হাঃ—

ভবানী । [ চমকিয়া উঠিয়া ] কাঞ্চন—কাঞ্চন !

ঝড়ের বেগে কাঞ্চনের প্রবেশ ।

কাঞ্চন । মা—মা—মা ! আমি এসেছি মা !

ভবানী । স্বপ্ন নয়—স্বপ্ন নয় ; এই তো আমার যশোদার গোপাল !

কাঞ্চন । মা ! আমাদের জয় হয়েছে ।

ভবানী । তবে তাঁরা বন্দী নন ?

কাঞ্চন । না, আমাদের কেউ বন্দী নয় তো মা !

ভবানী । প্রতারণায় ভুলেছি । কাঞ্চন !—ওবে, গুরু শ্রীমন্ত এসে সোনাকে নিয়ে গেছে ।

কাঞ্চন । কোথায় ?

ভবানী । চন্দ্রদ্বীপে । বল্লে, মহারাজের আদেশ ।

কাঞ্চন । তবে আবার আমায় ছুটতে হ'লো—[ প্রস্থানোত্ত ]

ভবানী । কাঞ্চন—

কাঞ্চন । [ ফিরিয়া আসিয়া ভবানীকে প্রণাম করিল ] মা ! যদি সোনাকে নিয়ে ফিরতে পারি, তবেই ফিরবো, নইলে এই যাত্রাই আমার শেষ যাত্রা ।

[ দ্রুত প্রস্থান ।

ভবানী । কোটীশ্বর ! ছিনিয়ে নিলে ? সব ছিনিয়ে নিলে ?

[ প্রস্থান ।

# তৃতীয় অঙ্ক ।

## প্রথম দৃশ্য ।

স্বর্ণদ্বীপ—দুর্গাভ্যন্তর ।

কাল—রাত্রি ।

কেদার রায় পদচারণা করিতেছিলেন ।

কেদার । স্বর্ণদ্বীপ চাঁদ রায়ের অধিকারে, এনায়েৎ খাঁ বন্দী, স্বর্ণ-  
দ্বীপের প্রজাগণ আর স্বপ্নেও চাঁদ রায়ের বিরুদ্ধে মাথা তুলতে সাহস  
করবে না । সব বুঝতে পারি, কিন্তু ঈশা খার এই আকস্মিক অন্তদ্বন্দ্ব  
কিছুতেই বুঝতে পারছি না । বন্ধু এনায়েৎ খাঁকে বন্দী অবস্থায় ফেলে  
ঈশা খাঁ পালিয়ে যাবে, এত বড় কাপুরুষ তো সে নয় ! তাই তো—

চাঁদ রায়ের প্রবেশ ।

চাঁদ কেদার—কেদার—

কেদার । কি দাদা ! এমন অসময়ে জেগে উঠলে যে ?

চাঁদ । কে আমায় ডাকলে কেদার ?

কেদার । সে কি ? কই না, আমি তো কারও কোন সাড়া-শব্দ  
পাই নি দাদা !

চাঁদ । পাও নি ? তা হবে । কিন্তু—না কেদার, একবার নয়,  
বহুবার কাতরকণ্ঠে কে আমায় ‘বাবা’ ‘বাবা’ বলে ডাকলে । আমি  
স্পষ্ট শুনেছি, এ মিথ্যা হ’তে পারে না । এ সোনার কণ্ঠস্বর ।

কেদার। দাদা! ডিঃ-ডিঃ! এই মাত্র যে ছ'হাতে নরমুণ্ড গণনা ক'রে এসেছে, বারুদের স্তুপের উপর যাকে অষ্টপ্রহর ব'সে থাকতে হয়, তার এ নারীমূলভ দুর্বলতা সাজে না।

চাঁদ। না কেদার! এ স্বপ্ন নয়, তুমি অনুসন্ধান কর।

কেদার। কি আর অনুসন্ধান করবো দাদা? তোমাকে নিদ্রিত রেখে আমি এখানে সহস্র চক্ষু মিলে ব'সে আছি। যাও দাদা, বিশ্রাম কর গে; আমি থাকতে তুমি কেন জেগে থাকবে? আমি বলছি, কেউ তোমাকে ডাকে নি, কারও কোন অমঙ্গল হয় নি।

চাঁদ। না হ'লেই ভাল; কিন্তু মনের যে একটা কান আছে কেদার! সে দ্বন্দ্ব মানে না, শত যোজন দূরের ডাক সে স্পষ্ট শুনতে পায়। কেদার! তুই এখানে ব'সে স্বর্ণদ্বীপ পাহারা দে, আমি একবার শ্রীপুরে গিয়ে দেখে আসি, কেমন আছে আমার অভাগিনী সোনা। আম্ভার সময় মেয়েটা কাছে এলো না, পাছে শুভ কাজে বিঘ্ন হয়। মনটা বড় কাঁদছে কেদার!

কেদার। না দাদা, তোমার এখন যাওয়া হয় না। একটা রাজ্য অধিকার করেছ, এর স্বেশাসনের ব্যবস্থা করতে হবে না?

চাঁদ। যা হয় তুমি কর, আমি রাজ্য চাই না।

কেদার। তুমি রাজ্য না চাইলেও, রাজ্য তোমাকে চায়।

### রক্ষীর প্রবেশ।

রক্ষী। মহারাজ—[ চাঁদ রায়ের পদতলে পতন। ]

চাঁদ। কি রক্ষী?

রক্ষী। [ সভয়ে ] ব—ন্দী কারাগারে নেই।

কেদার। এঁা—নেই? কোন্ বন্দী? এনায়েৎ খাঁ? পালিয়েছে?



## চাঁদের মেয়ে

[তৃতীয় অঙ্ক।

আর তুমি মহানন্দে নিদ্রা দিচ্ছিলে, কেমন? ওঃ—এই এনায়েৎ খাঁকে বন্দী করতে আমি কত সৈন্ত হারিয়েছি! দাদা! কি করা যায়?

চাঁদ। সন্ধান কর রক্ষী, এখনও সে বহু দূর যায় নি।

কেদার। কাল সূর্যাস্তের পূর্বে যদি তার সন্ধান না পাই, তা হ'লে কেদার রায়কে তুমি জান—[তরবারিতে হাত দিলেন।]

[রক্ষীর সভয়ে প্রস্থান।

কেদার। এনায়েৎ খাঁ! না—তোমাকে বন্দী করাই আমার ভুল হয়েছিল। এবার যদি তোমাকে পাই, হত্যা—হত্যা—নিশ্চয় হত্যা!

[প্রস্থান।

চাঁদ। তাই তো, কেন মনটা এমন কেঁদে উঠছে? কি যেন একটা পরম সম্পদ হারিয়ে গেছে! কাঞ্চন সেই যে গেছে, আজও কোন সংবাদ নেই। না জানি, কেমন আছে আমার অভাগিনী সোনা!

## গীতকণ্ঠে সনাতনের প্রবেশ।

সনাতন।—

### গীত ১

হায়, পশেছে কীট কুলকুলে।

সোনা যে তোর নাই রে সোনা, বিকিয়ে গেছে কাঁচের মূলে।

চাঁদ। কি বলছো' তুমি উন্মাদ?

সনাতন।—

### পূর্ব গীতাংশ।

বলি যাহা কান পেতে শোন, পুত্র কন্যা মিছে ভাই বোন,

চিন্তামণির চিন্তা কর মিছে মায়ার কাদন ভুলে।

চাঁদ। পুত্র কণ্ঠা ভাই বোন মিথ্যা? হোক; এই মিথ্যাকে আশ্রয় ক’রে এতখানি জীবনের পথে চ’লে এসেছি, এই মিথ্যাকে নিয়েই বেঁচে থাকতে চাই।

সনাতন।—

## পূর্ব গীতাংশ ।

হেমন্ বাঁচা নয় রে বাঁচা, ভাঙবে যে দিন সোনার গাঁও,  
পাবি নে তার পদ-তরী, কাঁদবি ব’সে নদীর কূলে।

[ প্রস্থান ।

চাঁদ। ভগবান! ভগবান! তোমারি দান পুত্র-কণ্ঠা, তোমারি দান ভাই-বোন। তোমার সাজানো এই সংসার পায়ে ঠেলে চ’লে যাবো, এ কখনও তোমার বিধান হ’তে পারে না। আমি এদেব নিয়ে উঠেছি, এদেব নিয়েই চলবো। পাপ যদি হয়, সে পাপ তোমার— আমার নয়।

## বালকবেশে আলেয়ার প্রবেশ ।

আলেয়া। মহারাজ চাঁদ রায়!

চাঁদ। কে তুমি বালক, এই নিশীথ রাত্রে আমার দুর্গাভাস্তরে প্রবেশ করেছ?

আলেয়া। তোমার দুর্গ? মহারাজ! ছ’ দিন পূর্বে এ দুর্গ আমাদের ছিল, অদৃষ্টের এমনি পরিহাস যে, আজ নিজের ঘরে আমরা চোরের মত প্রবেশ করতে হয়।

চাঁদ। কে তুমি বালক? জীশা খাঁ কি তোমার কেউ হয়?

আলেয়া। আমার ভাই।

চাঁদ । ভাই ? ওঃ—নিশীথ রাত্রে অতর্কিতে প্রতিশোধ নিতে এসেছ ?

আলেক্সা । না মহারাজ, মানুষের গায়ে অস্বাভাবিক করতে আমি জানি না । আমি স্বীকার করছি, আপনি ঈশা খাঁর যে ক্ষতিসাধন করেছেন, এ তার প্রাপ্য ; কিন্তু মহারাজ ! যত কিছু শত্রুতাব এই থানেই অবসান হোক ।

চাঁদ । শত্রুতার অবসান ? তুমি জান না বালক, তোমার ভাই আমার কোন্‌খানে আঘাত দিয়েছে । সে যদি আমার একটা বংশ-ধরকেও হত্যা করতো, সে বিরোধ ছ' কথায় মিটে যেতো । কিন্তু এ যে সহ্য করা যায় না বালক !

আলেক্সা । মহারাজ ! আমার ভাই এক মুহূর্তের ভুলে যে অপরাধ করেছে, তাব প্রতিদানে আপনি তাকে সর্বস্বান্ত করেছেন, তার সম্বন্ধ ছ'পায়ে দ'লে আপনি তাকে ধূলোর মিশিয়ে দিয়েছেন । তবু আমি বলছি, এর প্রতিবাদে সে একটা অঙ্গুলিহেলনও করবে না । আপনি শ্রীপুরে যান, ঈশা খাঁকে নিয়ে আমি আপনাদের সবার কাছে গিয়ে দাঁড়াবো ; ইচ্ছা হয়, আপনি স্বহস্তে তার প্রাণবধ করবেন । তবু দোহাই মহারাজ ! বাঙলার ছ'টো মহান্‌ জাতি হিন্দু মুসলমানে বিরোধ ক'রে সোনার দেশটাকে রসাতলে দেবেন না ।

চাঁদ । তুমি যা বলছো বালক, আমি এ কথা সহস্রবার ভেবেছি ; কিন্তু তা হবার নয় । চাঁদ রায় আর ঈশা খাঁ, এ দু'জনের মধ্যে সন্ধি আর হ'তে পারে না ; পৃথিবীর আলো বাতাস হ'তে একজনকে বিচ্ছিন্ন হ'তেই হবে ।

আলেক্সা । কেন ? একটা বৃক্ষতলে দশজন ফকির বাস করতে পারে, আর এত বড় বাঙলা দেশে দু'জন বীরের স্থান হবে না ?

চাঁদ । না—হবে না ।

আলেয়া । তা হ'লে আমি আর সোনারগাঁয়ে ফিরে যাবো না । সোনারগাঁ থেকে আমি উদ্ধ্বাসে ছুটে এসেছি, বিমুগ্ধ হ'য়ে কিছুতেই ফিরবো না । এই আমি আপনাব পায়েব তলায় বসেছি ; হয় সন্ধি করুন, না হয় আমাকে হত্যা করুন !

চাঁদ । বালক !

আলেয়া । কি ব'লে বোঝাবো মহারাজ ? কত দঃখ আমার এই বুকটাব মধো ! হিন্দ মুসলমান উভয়েই আমাব পবমাদ্বীয়, আমার চোপের উপবে তারা আত্মকলহে শক্তি ক্ষয় করবে, এ যে অসহ !

চাঁদ । কে তুমি এই পঙ্কিল সংঘর্ষের মাঝখানে শক্তির দীপ-শিখা নিয়ে দাঁড়িয়েছ ? এস নবীন ! এস উজ্জল ভবিষ্যতের অগ্রদূত ! আমি তোমাব আবেদন মাগায় ক'বে নিলুম । জ্ঞেশা খা যদি সন্ধির জন্ত এগিয়ে আসে, আমি আবার তাকে বন্ধ ব'লে আলিঙ্গন করবো ।

আলেয়া । মহাবাজেব জয় হোক ! এইবার আমি বিচারপ্রার্থী রাজা !

চাঁদ । কিসের বিচার ?

আলেয়া । বন্দীশালা হ'তে আমিই এনায়েৎ খাঁকে মুক্ত করেছি ।

চাঁদ । তুমি ? সে কি ? কি ক'রে ?

আলেয়া । বলে নয় মহারাজ, ছলে ।

চাঁদ । ওঃ—করেছ কি বালক ? কেদার যদি একবার শোনে—

আলেয়া । আমি নিজেই তাঁকে বলতে যাচ্ছি ।

চাঁদ । না-না-না, তুমি যাও—তুমি পালাও, এখনি—এই মুহূর্তে ! জানি না, কেন তোমায় দেখে কেবলি আমার মেয়েটার কথা মনে হ'চ্ছে । এই কুসুমিত যৌবনে পৃথিবীর স্মৃতিভোগ থেকে তোমাকে বঞ্চিত করতে চাই না । যাও—যাও—

আলোয়া । রাজা !

চাঁদ । আঃ—রুতজ্ঞতা প্রকাশের বহু সময় পাবে । যাও বালক,  
—যাও, ভগবান তোমার সহায় হোন্ ।

আলোয়া । সেলাম—সেলাম !

[ প্রস্থান ।

চাঁদ । কেন এমন হয় ? একই আকরে জন্ম এদের ; তবু এক  
জন দেবতা, আর একজন পশু ।

### কেদার রায়ের পুনঃ প্রবেশ ।

কেদার । নাঃ—কোথাও বন্দীর চিহ্ন মাত্র নেই ।

চাঁদ । যেতে দাও—যেতে দাও । আমি বলি, ঈশা খাঁর সঙ্গে  
সন্ধি করি এসো !

কেদার । সন্ধি ? দাদা ! তুমি কি বল্ছো ?

চাঁদ । কেন কেদার ? ঈশা খাঁ অপরাধী সত্য ; কিন্তু আমরা  
তার উপর যে প্রতিশোধ নিয়েছি, বাঙলা দেশ চিরদিন তা স্মরণ  
করবে । এর উপর সে যদি অহুতপ্ত হ'য়ে ক্ষমা ভিক্ষা করে, আমরা  
কি তাকে ক্ষমা করতে পারি না ?

কেদার । না—পারি না ।

চাঁদ । তবে রথাই আমরা হিন্দু !

কেদার । দাদা ! তুমি কি সেই চাঁদ রায়, যার ভয়ে একদিন  
গোটা বাঙলা দেশ কঁপে উঠতো ? ছিঃ-ছিঃ-ছিঃ, এত দুর্বল তোমায়  
কে করলে রাজা ?

চাঁদ । কে করেছে ? কানে সব শুন্ছো, চোখে সব দেখ্ছো,  
তবু জিজ্ঞাসা কর্ছো কেদার ? ঘরে বার শিশুকণ্ঠা এমনি ক'রে

ভোগেব জগৎ থেকে বিচ্ছিন্ন হ'য়ে যায়, সে কি আর পারে ভর দিয়ে দাঁড়াতে পারে ?

কেশরীর প্রবেশ ।

কেশরী । মহারাজ—

কেদার । কেশরী ? শ্রীপুর থেকে আস্‌ছো ?

টাদ । কেমন আছে সব ? শ্রীপুরেব কুশল তো ?

কেশরী । মহারাজ—

টাদ । মাথা হেঁট করলে যে ? কি হয়েছে বল ? কাঞ্চন, চম্পক, সোনা, এরা সব ভাল আছে তো ?

কেশরী । সোনা নিরুদ্দেশ ।

টাদ । নিরুদ্দেশ ?

কেদার । সে কি ? কবে ? কখন ? কার সঙ্গে ?

কেশরী । গুপ্ত শ্রীমন্তের সঙ্গে ।

কেদার । শ্রীমন্ত ? ওঃ, দাদা—

টাদ । না—না, এ হ'তে পারে না ; সপ্তপুরুষের কুলগুরু বংশধর এমন নিষ্ঠুর হ'তে পারে না । এমন সরল সুন্দর দেবমূর্তি—কেশা ! তুই বল্‌ছিস কি ? তার মধ্যে এমন পিশাচ লুকিয়ে থাক্‌বে ? মিথ্যা—মিথ্যা, না হয় এ তোর ছলনা !

কেশরী । ছলনা কখনো শিখি নি দাদা ! এ সত্য ! কাঞ্চনের জন্মোৎসবের মধ্যে শ্রীমন্ত তাকে চন্দ্রবীপের নাম ক'রে ভুলিয়ে নিয়ে কোথায় চ'লে গেছে । মহারাজীকে বলেছে, কাঞ্চন যুদ্ধে নিহত—আপনারা বন্দী—মহারাজের আদেশ, তার সঙ্গে সোনাকে চন্দ্রবীপে পাঠিয়ে দিতে ।

টাদ । তারপর ? চন্দ্রবীপে সংবাদ নিয়েছ ?

কেশরী। আমি চন্দ্রদীপ থেকেই আসছি ; সোনা সেখানে নেই।

কেদার। বুঝেছি—বুঝেছি, ঈশা খাঁর আকস্মিক অন্তর্ধানের কারণ এই। দাদা! সন্ধি করবে বল্ছিলে না? কর সন্ধি, এমন সন্ধির সূত্র আর পাবে না। ওঃ—এই মেয়েটাকে আজ দশ বছর পক্ষিশাবকের মত পালক ঢাকা দিয়ে রেখেছিলুম, যেন সংসারের কুটিল বাতাস তার গায়ে না লাগে ; আজ এক দিনে শেষ—এক দিনে শেষ! না জানি, সে অভাগিনী আমাদের নাম ধরে কত ডাকছে, পাখও শ্রীমন্ত হয় তো তাকে কত নির্যাতন করছে! আজ সাত দিন, নাঃ—দুশাশা, সে সোনা আর সোনা নেই।

চাঁদ। এত বড় বংশ—পিতৃ পিতামহের এই দেশজোড়া সুনাম—ওঃ, একটা মেয়ে হ’তে সব রসাতলে গেল! ঈশা খাঁর মাথাটা ছিঁড়ে আন্তে পারি, তার সোনারগাঁ সমূলে উপড়ে ফেলতে পারি, কিন্তু এ হাবানো মর্যাদা তো ফিরে পাবো না!

কেশরী। কাঞ্চন সোনারগাঁর দিকে গেছে ; আমিও চল্লুম দাদা! যদি সোনাকে ফিরিয়ে আন্তে পারি, তবেই ফিরবো ; নইলে এই শেষ—  
[ প্রস্থান।

কেদার। দাদা! চল যাই শ্রীপুরে ; হয় তো শ্রীমন্ত তাকে শ্রীপুরেই কোথাও লুকিয়ে রেখেছে। আগে তার সন্ধান করি, তারপর ঈশা খাঁ আর শ্রীমন্তকে দেখবো।

চাঁদ। কি দেখবে? দেখার আর কি আছে কেদার? সাত সমুদ্র মন্থন ক’রেও যদি হারানিধি ফিরিয়ে নিয়ে এসো, তবুও এ নষ্ট গৌরব আর ফিরে পাবো না। ভয়ে সবাই নীরব থাকতে পারে, কিন্তু দেশশুদ্ধ লোকের মুখে যে ব্যঙ্গ-হাসি খেলবে, কি দিয়ে তা নিবারণ করবে কেদার?

কেদার । তরবারি দিয়ে—শ্রীমন্ত আর ঈশা খাঁর রক্ত দিয়ে । শৈশবে যখন মেয়েটার বিবাহ দিয়েছিলে, তখন তো এ কথা ভেবে দেখ নি ! যখন তার আবাব বিবাহ দিতে সমাজের দোহাই দিয়েছিলে, তখন তো এ অবটন কল্পনায় আন নি ! দোষ তোমার, এর জন্ত সারা জীবন অনুতাপ করতে হবে । কাঁদবার অনেক সময় পাবে । এসো, অথর্ক পঙ্গুর মত হাহাকাব না ক’রে শত্রুর বুকে বাঘের মত লাফিয়ে পড়ি এসো । ঈশা খাঁব তাজা রক্ত চাই—শ্রীমন্তের ডিম্বমুণ্ড চাই—

[ প্রস্থান ।

টাদ । কোটীশ্বব ! দাড়িয়ে মজা দেখছো ? র’সো ; যদি আমার বংশে একটু কলঙ্কের ছাপ পড়ে, তোমাকে সোনার সিংহাসনে বসিয়ে আর পূজা করবো না, সিংহাসনশুদ্ধ তুলে এনে কালীগঙ্গায় বিসর্জন দেবো—

[ প্রস্থান ।



## দ্বিতীয় দৃশ্য :

নদীতীর।

এনায়েৎ।

এনায়েৎ। কোন্ দিকে যাই? সোনারগাঁ না শ্রীপুর? বন্ধু আমার শত্রুর কারাগারে আবদ্ধ দেখে অনায়াসে পালিয়ে গেল। আবার তারই দ্বারস্থ হবো? নাঃ—শ্রীপুরের দিকেই যাই। শ্রীপুরের অরক্ষিত প্রাসাদ ধূলিসাৎ ক'রে কেদার রায়ের দর্প চূর্ণ করি, তার পর অগ্নি চিন্তা।

আলেক্সার প্রবেশ।

আলেক্সা। কি খাঁ সাহেব, কার সর্বনাশের চিন্তা করছো?

এনায়েৎ। কে তুমি?

আলেক্সা। চিন্তেই পারলে না? বাঃ, স্মরণশক্তির তায়িফ করতে হবে।

এনায়েৎ। ক্ষমা কর বালক! সে দিন অন্ধকারে তোমায় লক্ষ্য করি নি। তুমি আমার কারাগার থেকে উদ্ধার করেছ; আমার জীবন তোমার কাছে বিক্রীত।

আলেক্সা। মুখের কথা না অন্তরের কথা?

এনায়েৎ। সত্য বালক! এ আমার অন্তরের কথা। আমার মনে হ'চ্ছে, তোমার দেওয়া জীবনটা তোমাকেই দান করতে পারলে আমি ধৃত হই। তুমি এমন সুন্দর! যদি তুমি নারী হ'তে, আমি তোমায় বিবাহ করতুম।

আলিয়া । তাই না কি ? এঃ, আগে জান্লে না হয় মেয়ে হ'য়েই জন্মাতুম । কি জানেন, আমারও আপনার উপর বেজায় টান পড়েছে ।

এনায়েৎ । কিন্তু কেন ? আমি তো তোমার কেউ নই, কখনও তোমার সঙ্গে পরিচয়ও ছিল না ; তবে কিসের জ্ঞান নিজের প্রাণ তুচ্ছ ক'রে আমার উদ্ধার করলে বালক ?

আলিয়া । ঐ যে বল্লুম, একটা বিষম টান পড়েছে ।

এনায়েৎ । বালক ! তোমাকে দেখে কেবলি আমার মনে হ'চ্ছে, এমনি একটা আপনার জন যদি আমার থাকতো—

আলিয়া । কেন, খাঁ সাহেবের কি আপনার জন কেউ নেই ? বলি, বিবাহ করেছেন তো ?

এনায়েৎ । বিবাহ ? ই্যা, তা ক'রেছিলুম ; কিন্তু সে একটা অতীতের স্বপ্ন ! সে কথা আর তুলো না ভাই ! অতীতের সে দুঃখময় ইতিহাস রাজপুতনার পথে ফেলে এসেছি ।

আলিয়া । রাজপুতনা ? আপনি তা হ'লে মুসলমান নন ?

এনায়েৎ । ই্যা—আমি মুসলমান । কিন্তু এক দিন আমি হিন্দু ছিলাম ; ত্রিসন্ধ্যা গায়ত্রী জপ করতুম—সন্ধ্যা-সকাল মন্দিরে মন্দিরে যখন কাঁশর-ঘণ্টা বেজে উঠতো, আমার সমস্ত মন-প্রাণ ভগবানের উদ্দেশে লুটিয়ে পড়তো । আরাবল্লীর শিখরে শিখরে রাজপুত-বাগকেরা যখন পাথর ছোঁড়াছুঁড়ি করতো, আমি তখন ভাবতুম—কতদূরে ঐ বৈকুণ্ঠের স্বপ্নপুরী, কতদিনে যাবো আমি সেই আনন্দধামে !

আলিয়া । এমন নিষ্ঠাবান্ হিন্দু আপনি, আজ এমন গোঁড়া মুসলমান হ'লেন কি ক'রে ?

এনায়েৎ । সেই আমার জীবনের সব চেয়ে করুণ ইতিহাস । শৈশবে

এক রাজপুত্রের কন্যার সঙ্গে আমার বিবাহ হয়েছিল ; বহু দিন সে পিত্রালয়ে ছিল । একদিন শুন্লুম, তার পিতা মুসলমান হ'য়ে গিয়েছে । বাপ-মা নিষ্ঠাবান্ ব্রাহ্মণ, স্ত্রীকে ত্যাগ করতে বল্লেন ; আমি বিদ্রোহ করলুম, সাত দিন সাত রাত্রি চোথের জলে মাটি ভিজিয়ে ফেললুম অভাগিনী স্ত্রীর জন্ত, কিন্তু মাতা-পিতার মন ভিজলো না ; সমাজ আমার উপর অমানুষিক নির্যাতন করলে । মনে ঘৃণা হ'লো—এই সনাতন ধর্ম ! পাগল হ'য়ে ছুটে এলুম,—দেখলুম, অগ্নিদাহে শবুদের ভিটে ছাই হ'য়ে গেছে । সেই হ'তে আমি মুসলমান ।

আলোয়া । কি নাম ছিল আপনার ?

এনায়েৎ । কি হবে বালক, সে কথা শুনে ?

আলোয়া । আপনার স্ত্রীর নাম কি ?

এনায়েৎ । থাক—থাক—ও কথা তুলো না । মাথায় খুন চাপে, হিন্দু সমাজটাকে সমুলে ধ্বংস করতে প্রাণটা নেচে ওঠে ।

### কাঞ্চনের প্রবেশ ।

কাঞ্চন । সোনা—সোনা ! কই সোনা—কোথা সোনা ? কেউ সাড়া দেয় না রে ! দিনের পর দিন অনাহারে অনিদ্রায় ছুটে এলুম, কেউ বললে না যে, তাকে দেখেছি । আর তো চলতে পারি না, মাথার উপর যেন বিশ্বের বোঝা চাপিয়ে দিয়েছে । ফিরিয়ে দে—ফিরিয়ে দে নিষ্ঠুর দেবতা !

আলোয়া । কে গা তুমি উন্মাদের মত নদীর দিকে ছুটছো ? দেখছো না নদীর ভীষণ জলস্রোত ? মরবে যে !

কাঞ্চন । মরবো—মরবো, মরতেই আমি চাই । বেঁচে আর কি হবে আমার ? বংশের স্মৃতি গেলো—উঁচু মাথা হেঁট হয়েছে । হয়

তো নদীর ঐ জলতলে সে আমায় ডুবে যবেছে ! সোনা—সোনা !  
ভয় নেই, আমি যাবো তোর সঙ্গে—

আলোয়া । তুমি কি তবে বীরবর কেদার রায়ের পুত্র কাঞ্চন ?  
এনায়েৎ । কে—কে ?

কাঞ্চন । তুমি--তুমি কে ? বালক ! তোমায় দেখে আমাব মনটা  
আশায় আন্দোলিত হ'চ্ছে । বল, তুমি কি আমার সোনার সন্ধান  
জান ?

আলোয়া । না তাই, জানি না । তবে এ কথা সত্য যে, সোনাকে  
সে নিষে গেছে ঈশা খাঁর কামানলে আছতি দিতে ।

কাঞ্চন । ঈশা খাঁ ? ইঁ্যা—ইঁ্যা, ঠিক বলেছ । আমি তা হ'লে  
সোনার গাঁর দিকে চলুম । ঈশা খাঁ ! ঈশা খাঁ ! তোমার চুলের  
মুঠি ধ'বে টেনে শ্রীপুরে এনে জীবন্ত সমাধি দেবো ।

এনায়েৎ । দাঁড়াও, একটা কথা আছে ।

কাঞ্চন । কি ?

এনায়েৎ । তুমি সেই কাঞ্চন না, যে কলাগাছিয়া দুর্গ ভস্মীভূত  
করেছ ?

কাঞ্চন । হাঁ—আমি ।

এনায়েৎ । ঈশা খাঁর পত্র হ'পায়ে মাড়িয়েছিলে, তুমি নও ?

কাঞ্চন । হাঁ—আমিই সেই ।

এনায়েৎ । তবে দাঁড়াও, আজ সে ঔদ্ধত্যের ঋণ কড়ায় গণ্ডায়  
শোধ ক'রে যেতে হবে ।

কাঞ্চন । তুমি কে ?

এনায়েৎ । আমি এনায়েৎ খাঁ ।

কাঞ্চন ! এনায়েৎ খাঁ ?—ঈশা খাঁর বন্ধু ?

এনায়েৎ । শুধু তাই নয়, সোনাকে চুরি ক'রে আনবার জন্য শ্রীমন্তকে বশীভূত করেছি আমি ।

আলেক্সা । তুমি ?

কাঞ্চন । এনায়েৎ ! এনায়েৎ ! কি কর্বো তোমায় এনায়েৎ খাঁ ? তুমি যা করেছ, সপ্তপুরুষ ধ'রে এ কলঙ্ক আমাদের গায়ে ছাপ মারা থাকবে । তোমার মাথাটা ছাতু ক'রে আকাশে উড়িয়ে দিলেও এ পাপের প্রায়শ্চিত্ত হয় না ।

আলেক্সা । কোথায় রেখেছ তুমি সোনাকে ?

কাঞ্চন । বল—বল, কোথায় সোনা—কোন্ পথে গেছে সোনা ? এনায়েৎ । সোনারগাঁর পথে ।

কাঞ্চন । কোন্ দিকে পথ—কোন্ দিকে ? ওই যে একটা বজরা যাচ্ছে না ? কারা ও ? সোনা—সোনা—

নেপথ্যে স্বর্ণময়ী । দাদা—

কাঞ্চন । ঐ যে ! পেয়েছি—পেয়েছি—

এনায়েৎ । চুপ্ ! এক পাও এগিয়ে না ; তা হ'লে এই তরবারি তোমার শিরশ্ছেদ করবে ।

কাঞ্চন । এনায়েৎ খাঁ ! ছাড়—ছাড় ! তোমার ধর্মের দোহাই ! দেখ, অসহায়্য নারী জগতের করুণার পাত্রী ! দয়া কর ! আমি সব শত্রুতা ভুলে যাবো—তোমার গোলাম হ'য়ে থাকবো । নিষ্প্রে গেল ! এনায়েৎ !. ওঃ—কি কর্বো ?

এনায়েৎ । কি করবে ? এই তরবারির নিচে মাথা বাড়িয়ে দাও ।

আলেক্সা । খবরদার এনায়েৎ খাঁ ! এই তরবারিখানা আমি তোমায় দিয়েছি আত্মরক্ষা করতে, দুর্বলের উপর অত্যাচার করতে নয় ।

এনায়েৎ । যাও—যাও, বিরক্ত ক'রো না ।

কাঞ্চন । এনায়েৎ ! আমি দীর্ঘ অনশনে দুর্বল, নইলে তোমার মত একটা মুখিক আমার স্পর্শ করতে পারতো না । আচ্ছা এসো, দেখি কার কত শক্তি ! [ এনায়েৎ ও কাঞ্চনে সংঘর্ষ । ]

আলেয়া । সোনা—সোনা ! রাজকুমারী !

নেপথ্যে স্বর্ণময়ী । দাদা—দাদা !

আলেয়া । শ্রীমন্ত ! নোকো রাখ ।

এনায়েৎ । চালাও—চালাও, ঈশা খাঁর আদেশ ।

কাঞ্চন । [ অবসন্নদেহে উপবেশন । ]

এনায়েৎ । থাকো এইখানে মৃত্যুর প্রতীক্ষায় । না—তোমায় বাঁচিয়ে রাখবো না ; তা হ'লে একদিন অতর্কিত আক্রমণে সোনারগাঁ চুর্গটাও ভস্মীভূত হবে । [ তরবারি উত্তোলন ]

আলেয়া । সাবধান এনায়েৎ খাঁ ! নিরস্ত্রের উপর আত্মাঘাত অধর্ম ।

এনায়েৎ । আমার ধর্ম্মাধর্ম্ম আমি বুঝবো, তুমি বাধা দেবার কে ?

আলেয়া । আমি বাধা দেবার কে ? আমি প্রভু, তুমি গোলাম ; আমি পা বাড়িয়ে দেবো, তুমি লেহন করবে । [ উক্ষীষ উঠাইয়া অনাবৃত মস্তক দেখাইল । ] চিন্তে পার ?

এনায়েৎ । সাহাজাদি ?—সেলাম—সেলাম ! [ প্রস্থান ।

কাঞ্চন । সোনা !—সোনা ! নিয়ে গেছে—জন্মের মত নিয়ে গেছে । দেহে এমন শক্তি নেই যে, ছুটে গিয়ে ধরি । উঃ—কোটাশ্বর ! শেষে এই করলে, হাতের মুঠোয় এনে ছিনিয়ে নিলে ?

আলেয়া । কি করি ? সোনাকে রক্ষা করবো, না এই মুমূর্ষুর গুপ্তপ্রাণ করবো ? ভাই ! আমার কোলে মাথা রেখে একটু স্নান হও । দেখ, আমি সজ্ঞানে কখনও মিথ্যা কথা বলি নি, আমি বলছি সোনাকে তুমি নিশ্চয়ই ফিরে পাবে ।

কাঞ্চন । পাবো ? পাবো ? কে তুমি বান্ধব, আমার এমন অভয়-  
বাণী শোনাতে ? আমার মনে হ'চ্ছে, তোমার কথা মিথ্যা হবে না ।  
পাবো—নিশ্চয় পাবো, নইলে সংসার মিথ্যা—দেবতা মিথ্যা—ধর্ম মিথ্যা ।  
ঐ যে জলশ্রোতে তীরবেগে ছুটেছে ; দিই বাঁপ ! জয় কোটীশ্বর—

[ প্রস্থান ।

আলেক্সা । সর্বনাশ ! জলে বাঁপ দিলে যে ! কুমার—কুমার !

[ প্রস্থান ।

নেপথ্যে কাঞ্চন । সোনা—সোনা—



## তৃতীয় দৃশ্য :

সোনারগাঁ—ঈশা খাঁর কক্ষ ।

পত্রহস্তে ঈশা খাঁর প্রবেশ ।

ঈশা খাঁ । বান্দা—বান্দা !

বান্দার প্রবেশ ।

বান্দা । জাঁহাপনা—

ঈশা খাঁ । কি বলছিলে তুমি ? শ্রীমন্ত সোনাকে নিয়ে আসছে ?  
তুমি দেখেছ ?

বান্দা । না জাঁহাপনা, আমি দেখি নি ; উজীর সাহেবের কাছে  
সংবাদ এসেছে, আমি সে সংবাদ আপনাকে জানানো গিয়েছিলুম ।

ঈশা খাঁ । বটে—বটে ! তুমি এ কথা অনেকবার বলেছ । কিন্তু

বান্দা, সোনা কে, জান ? চাঁদ রায়ের কন্যা—নিষ্ঠাবান্ হিন্দু চাঁদ রায়ের একমাত্র সন্তান। শ্রীমন্ত তাকে নিয়ে আস্ছে আমার সঙ্গে বিবাহ দেবাব জন্ত।

বান্দা। বিবাহ ! চাঁদ রায়ের মত আছে ?

ঈশা খাঁ। না—না, চুরি ক'বে নিয়ে আস্ছে।

বান্দা। আপনি তাকে বিবাহ করবেন ?

ঈশা খাঁ। তোমার কি মনে হয় ?

বান্দা। আমার মনে হয়, আমার প্রভু এমন পশু নন্ যে, এক হিন্দু নারীকে চুরি ক'রে এনে বিবাহ করবেন। সত্য বটে, আপনার সঙ্গে চাঁদ রায়ের মর্যাস্তিক শত্রুতা, কিন্তু তার মেয়ে তো কোন অপরাধ করে নি ? অসহায় দুর্বল নারীর উপর এই অত্যাচার আর যেই করুক, বীরবর ঈশা খাঁ কখনও করতে পারেন না। যদি করেন, বুঝবো, তিনি ইসলামের শত্রু—তিনি এই গরীব বান্দার চেয়েও হীন।

ঈশা খাঁ। কিন্তু বিবাহ তো অত্যাচার নন্ !

বান্দা। বিবাহ কথাটা তো ছলনার মুখোস মাত্র জাঁহাপনা ! আপনি একে যে নামই দিন, এ নারীনির্যাতন ছাড়া আর কিছুই নন্।

ঈশা খাঁ। তাই তো বান্দা, তুমি যা বল্ছো, এনায়েৎ খাঁ তো তা বল্ছে না !

বান্দা। আমি গরীব বান্দা,—এনায়েৎ খাঁর মত রাজনীতি কোথায় পাবো জনাব ? কিন্তু একটা কথা বল্তে পারি, ছনিয়ায় ইসলামের দুটো শত্রু যদি থাকে, এনায়েৎ খাঁ তার একজন।

ঈশা খাঁ। এনায়েৎ খাঁ ইসলামের শত্রু ?

বান্দা। সহস্রবার ! সে না হিন্দু, না মুসলমান ! হিন্দুর মাংস সে কামুড়ে খায়, আর উগরে ফেলে মুসলমানের গায়ে।



ঈশা খাঁ। তুমি তা হ'লে কি করতে বল?

বান্দা। ক্ষমা করবেন জনাব! সুলতান ঈশা খাঁকে পরামর্শ দিই, এত বড় স্পর্ধা আমার নেই। কিন্তু আপনি চাঁদ রায়ের অমতে, তার কণ্ঠার হাহাকারের মধ্যে যদি তাকে বিবাহই করেন, জানবো, এই অধর্মের রাজ্য আর বেশী দিন নয়, আর সেই দিন বাঙলার সব মুসলমান যদি আপনাকে বাহবা দেয়, এই গরীব দুর্বল বান্দা একাই আপনার বিপক্ষে লাঠি ধ'রে দাঁড়াষে।

ঈশা খাঁ। এনায়েৎ! এনায়েৎ! দেখে যাও, এক দীন দরিদ্র বান্দা—তার প্রাণ কত মহৎ, আর তুমি আমার দশহাজারি মনসবদার, তোমার প্রাণটা কি পশুত্বে ভরা! ঠিক বলেছ বান্দা! লোকের তোষামোদ শুন্তে শুন্তে মনটা বিযাক্ত হ'য়ে উঠেছে; এমনি একটা বন্ধু আমি চাই, যে আমার চোখ রাঙিয়ে শাসন করতে পারে।

## গীতকণ্ঠে বাঈজীগণের প্রবেশ।

বাঈজীগণ।—

### গীত।

ভাবনা কি আর, আসবে বঁধু, মনিব তোমার চোখ রাঙাতে,

গলায় দিতে প্রেমের দড়ি, শীতের রাতে ঘুম ভাঙাতে।

নতই তুমি এগিয়ে যাবে, বলবে বঁধু, “চাই নে”,

বাঁয়ে যদি চলতে বল, চ'লে যাবে ডাইনে,

যদি না সইতে পার, মিছে কেন বচন ঝাড,

পুরণো চাল বাড়বে ভাতে, কাজ কি নতুন সাঙাতে?

ঈশা খাঁ। আলেয়া কোথায় গেছে, বলতে পার?

১ম বাঈজী। না জনাব!

ঈশা খাঁ। কোথায় গেল, কেউ জানে না! এ কি একটা পাখী যে অলক্ষ্যে উড়ে গেছে? আচ্ছা—যাও তোমরা, চাঁদ রায়ের কণ্ঠা এলে তাকে সংবর্দ্ধনা করবে। [ বান্ধিজীগণের প্রস্থান। ] সোনা—হৃদয়ের আনন্দদায়িনী সোনা—জাগ্রতের চিন্তা—নিশীথের স্বপ্ন আজ আমার দ্বারদেশে উপস্থিত। যে স্মৃতির সন্ধানে দিশেহারা পথিকের মত উর্দ্ধ্বাসে ছুটেছি, আজ সে স্মৃতির ভাণ্ড আমার করতলগত। কি করবো—কি করবো?

### শ্রীমন্তের প্রবেশ।

শ্রীমন্ত। আকণ্ঠ পান কর।

ঈশা খাঁ। গুরুজী—এসেছ? সোনাকে নিয়ে এসেছ?

শ্রীমন্ত। হ্যাঁ জাঁহাপনা, হুকুম করলেই সে আপনার সম্মুখে উপস্থিত হবে।

ঈশা খাঁ। না-না না, নিয়ে যাও—ফিরিয়ে নিয়ে যাও!

শ্রীমন্ত। ফিরিয়ে নিয়ে যাবো? ঈশা খাঁ! তুমি সোনাকে চাও না?

ঈশা খাঁ। গুরুজী! কেমন ক'রে বোঝাবো তোমায়, আমার প্রাণটা সোনার জন্তু কতখানি পাগল? যে দিন অস্তোন্মুখ সূর্য্যের রক্তিম কিরণে তার সেই অতুল রূপরাশি দেখেছি, সেই দিন হ'তে সংসারের সব চিন্তা বিসর্জন দিয়ে আমি শুধু তারই রূপ ধ্যান করেছি। বৃকটা চিরে যদি দেখাতে পারতুম গুরুজী, দেখতে—আমার অস্থি-পঞ্জরে তারই নাম লেখা। তবু এ হয় না ব্রাহ্মণ! নারীর দরবিগলিত অশ্রুধারার মধ্যে তাকে জোর ক'রে আমি বিবাহ করতে পারবো না।

শ্রীমন্ত। বিবাহ ছাড়াও অস্ত্র উপায় আছে।

ঈশা খাঁ। ছিঃ-ছিঃ, ব্রাহ্মণ ! ঈশা খাঁর সহস্র অপরাধ থাকতে পারে, কিন্তু সে লম্পট নয়।

শ্রীমন্ত। তুমি কি মনে করেছ ঈশা খাঁ, বিবাহ না করলেই লোকে তোমাকে সাধু ব'লে বাহবা দেবে ? তা নয় জাঁহাপনা ! যে মুহূর্তে তুমি সোনাকে ঘরের বাইরে এনেছ, সে মুহূর্তেই তুমি লম্পট সেজেছ।

ঈশা খাঁ। বল কি ব্রাহ্মণ ?

শ্রীমন্ত। ঠিকই বলছি জাঁহাপনা ! বল, এখন কি করতে চাও ?

ঈশা খাঁ। গুরুজী ! আমি দোজাকের পথে অনেক দূর এগিয়ে এসেছি, তবু বিনা অপরাধে একটা নারীর সর্বনাশ করতে আমার হাত উঠবে না। বলুক লোকে আমায় লম্পট, তবু চাঁদ রায়ের নামে এত বড় কলঙ্ক আমি দিতে পারবো না।

শ্রীমন্ত। চাঁদ রায় তো তোমাকে এতটুকু দয়া করে নি জাঁহাপনা ! তুমি অসীম অনুগ্রহে তার সঙ্গে আত্মীয়তা করতে গিয়েছিলে, সে তোমায় কুকুরের মত তাড়িয়ে দিয়েছে। তোমার ক্রিবেণী দুর্গ অধিকার করেছে—কলাগাছিয়া দুর্গে নিশীথ অন্ধকারে অগ্নিসংযোগ ক'রে সবাইকে পুড়িয়ে মেরেছে—

ঈশা খাঁ। গুরুজী ! গুরুজী ! আমায় আর পাগল ক'রো না।

শ্রীমন্ত। স্বর্ণদ্বীপের নিরীহ প্রজাগুলোর রক্তে শ্রামল ভূমি রঞ্জিত করেছে তারা, তুমি দুর্বল—তার প্রতিশোধ নিতে পার নি ; মনে করেছ কি তাদের উদ্ধৃত গতির এইখানেই শেষ হবে ? না জাঁহাপনা ! হু'দিনের পরে তারা তোমার সোনারগাঁ-প্রাসাদ ধূলিসাৎ ক'রে, তোমায় বন্দী ক'রে—

ঈশা খাঁ। ব্রাহ্মণ ! ব্রাহ্মণ ! নাঃ, কিসের দয়া ? চাঁদ রায় পরম শত্রু আমার ; তার উপর এমন প্রতিশোধ নেবো যে, সে কথা

তৃতীয় দৃশ্য । ]

চাঁদের মেয়ে

স্মরণ ক'রে তার অন্তরাত্মা মৃত্যুর পরও শিউরে উঠবে। যাও ব্রাহ্মণ,  
নিরে এস চাঁদ রায়ের কণ্ঠাকে, পিতার অপরাধ কণ্ঠার লাজ্জনায়  
ধোত হোক ।

[ প্রস্থান ।

শ্রীমন্ত । চাঁদ রায় ! কেদার রায় ! এইবার দেখ্‌বো, তোমরা কত  
সহিতে পার !

গীতকণ্ঠে সনাতনের প্রবেশ ।

সনাতন ।—

গীত ।

ওরে পিছন ফিরে চা' ।

রাগের বশে মারিস্‌ নে রে নিজের বুক বাজের ঘা ।

বনের বাঘা থাক্‌ রে বনে, নিস্‌ নে ডেকে ঘবে,

সে যে তোর বুকো মারবে খাবা, চাট্‌বে না গা আদর ক'রে ;

ঘরের ঠাকুর কেলে ভুলে, পরের কুকুর নিস্‌নে তুলে,

আপন মায়ের মাথার পরে রাগে তুলে দিস্‌ নে পা ।

হোক না সে তোর দুঃখভূমি, তবু জন্মভূমি মা ॥

[ প্রস্থান ।

শ্রীমন্ত । সোনা—সোনা—

স্বর্ণময়ীর প্রবেশ ।

স্বর্ণময়ী । এ কোথায় এলুম গুরুদেব ? এই কি চন্দ্রদ্বীপ ?

শ্রীমন্ত । না, সোনারগাঁ ।

স্বর্ণময়ী । সোনারগাঁ ? দীশা খাঁর সোনারগাঁ ?

শ্রীমন্ত । হ্যাঁ,—এই তার প্রাসাদ ।

স্বর্ণময়ী । তবে এ চন্দ্রদ্বীপ নয় ? আমার স্বপুত্রালয় নয় ? এখানে আমার নিজে আসার উদ্দেশ্য ?

শ্রীমন্ত । উদ্দেশ্য, ঈশা খাঁর সঙ্গে তোমার বিবাহ দেওয়া ।

স্বর্ণময়ী । গুরুদেব ! গুরুদেব ! না—না, এ কি হ'তে পারে ? সাতপুরুষ ধ'রে এই দুই বংশের গুরু শিষ্য সম্বন্ধ, জ্ঞান হবার পর থেকে পিতাকে যে চোখে দেখেছি, আপনাকেও সেই চোখে দেখে আসছি !

শ্রীমন্ত । সে, দিন আর নেই বালিকা ! চাঁদ কেদার আমার ত্যাগ করেছে ।

স্বর্ণময়ী । সে তো ত্যাগ নয় গুরুদেব, গুরুর উপর শিষ্যের অভিমান ।

শ্রীমন্ত । এই অভিমানের যুপকার্ঠে আমার নিষ্পাপ শিশু প্রাণ দিয়েছে—ওঃ, সে কি শোচনীয় মৃত্যু ! সোনা ! তোমাদের সবাইকে এক সঙ্গে বলি দিলেও এর শোধ হবে না ।

স্বর্ণময়ী । এ আপনি কি বলছেন গুরুদেব ? আমার বড় ভয় হ'চ্ছে । চলুন, চন্দ্রদ্বীপে যাবার জন্ত আমার মনটা বড় ব্যাকুল হ'য়ে উঠেছে ; না হয় শ্রীপুরেই ফিরে চলুন, এখানে আর এক মুহূর্তও আমি থাকতে পারবো না ।

শ্রীমন্ত । পারতে হবে নারী, এই তোমার ভবিষ্যতের আশ্রয় ।

স্বর্ণময়ী । ঠাকুর ! দেখি তোমার মুখখানা ! চিরদিন যে পবিত্র মুখ দেখে অনন্ত দুঃখ ভুলে গিয়েছি, দেখি সে মুখে আজ পশুত্বের ছাপ পড়েছে কি না ? গুরু ! পিতা গড়েছেন দেহ, তুমি গড়বে মন ; পিতা দেখিয়ে দিয়েছেন পৃথিবীর আলো বাতাস, তুমি দেখাবে ধর্মের পথ ; সেই তুমি আমার হাত ধ'রে অধর্মের পথে টেনে আনবে ? আমি

নারী—বিধবা, নিঃসংশয়ে নিশীথ রাতে তোমার হাত ধ'রে চ'লে এসেছি ;  
এত বড় বিশ্বাসের এই কি প্রতিদান ? তা হ'লে আজ হ'তে কোন  
কথা পিতাকেও আর বিশ্বাস করবে না ।

শ্রীমন্ত । বাচালতা রাখ বালিকা, ও সব স্নেহের আবদার আজ আর  
চলবে না ।

স্বর্ণময়ী । গুরু ! তোমার ছেলে মেয়েরা বোধ হয় কোন দিন  
তোমায় 'বাবা' ব'লে ডাকে নি ? তা যদি হ'তো, তা হ'লে আজ আমার  
মুখের দিকে চেয়ে তোমার হৃদয়ের কোমল তন্ত্রীগুলো সমস্তরে বেজে  
উঠতো ।

শ্রীমন্ত । সোনা ! বেশী উত্কণ্ট ক'রো না আমার ; আমি ও  
সব অনেক দেখেছি ।

স্বর্ণময়ী । দেখবার চোখ তোমার আছে ? যদি থাকতো, আমার  
এই উপবাসক্লিষ্ট মুখ দেখে তোমার চোখ ফেটে জল বেরোতো ঠাকুর !  
আমি এখনও একাদশীর পারণ করি নি, আজ চার দিন এক ফোঁটা  
জলও মুখে দিই নি, ক্ষুধা-তৃষ্ণায় আমার সর্বাঙ্গ থর-থর ক'রে কাঁপছে !  
দয়া কর—আমায় শ্রীপুরে নিয়ে চল !

শ্রীমন্ত । বটে ! তোমায় শ্রীপুরে নিয়ে যাই, আর চাঁদ কেদার  
আমার টুঁটি কামড়ে ধরুক !

স্বর্ণময়ী । তাঁরা তো বন্দী !

শ্রীমন্ত । মিথ্যা কথা ; চাঁদ কেদার বন্দী নয়, কাঞ্চনও মরে নি ।

স্বর্ণময়ী । গুরু !—যাক্, তবু একটা সুসংবাদ শোনালে গুরু, দাদা  
বেঁচে আছে । তবে কি নদীর পার থেকে দাদাই আমার ডাকছিল ?  
ওঃ—আগে যদি এ কথা জানতুম, আমি নদীতে বাঁপ দিয়ে তোমার  
সব শত্রুতার কণ্ঠরোধ করতুম । আর কোন উপায় নেই । চারিদিকে

কঠিন পাবাণ-প্রাচীর বাঘের মত থাবা পেতে দাঁড়িয়ে আছে, মাঝখানে আমি এক অসহায় ছুঁইয়া নারী ! কি করবো—কোন দিকে যাবো ? কোটীশ্বর—কোটীশ্বর ! পথ দেখিয়ে দাও—[ প্রস্থানোত্তত ]

শ্রীমন্ত । পথ নেই নারী—[ হাত ধরিয়া আকর্ষণ । ]

স্বর্ণময়ী । ঠাকুর ! দোহাই তোমার, আমি তোমার কথা । দয়া কর—[ পদধারণ ]

শ্রীমন্ত । দয়া নেই—[ পা ছাড়াইয়া লইল । ]

স্বর্ণময়ী । উঃ—মাগো ! তুমি বাধা দিয়েছিলে, তোমার কথা শুনি নি ; আমার লাঞ্ছনা হবে না ? ব্রাহ্মণ ! তোমাকে আর কি বলবো ? আমি বিধবা—আজীবন ব্রহ্মচারিণী—একাদশীর পর এখনও মুখে জল দিই নি ; আমি তোমায় এই অভিশাপ দিচ্ছি, যার অনুগ্রহের আশায় তুমি আমার সর্বনাশ করতে চলেছ, সে যেন একদিন তোমায় হু'পায়ে মাড়িয়ে যায়—যেন কুষ্ঠব্যাদিতে তোমার গায়ের মাংস প'চে গ'লে থ'সে পড়ে—হাহাকাহে, আর্তনাদে, অমৃতাপে জর্জরিত হ'য়ে যেন তোমার এই ঘৃণিত জীবন শেষ হ'য়ে যায়—[ অবসাদে উত্তেজনার মুচ্ছিত হইয়া পড়িয়া গেল । ]

শ্রীমন্ত । সোনা—সোনা—

### ঈশা খাঁ ও বান্দার প্রবেশ ।

ঈশা খাঁ । কই সোনা ? আমার বছরদিনের বাঞ্ছিত রত্ন, চাঁদ রায়ের কথা কই গুরুজী ? [ অগ্রসর হইয়া ] এ কি, বিধবা ?

বান্দা । হিন্দুর বিধবা । ওঃ—জাঁহাপনা ! আপনি কি করলেন ?

ঈশা খাঁ । ভুল করেছি—ভুল করেছি ! কেউ তো আমাকে বলে নি যে, সোনা বিধবা !

শ্রীমন্ত । বিধবা হ'লেই বা তোমার কি যায় আসে ঈশা খাঁ?

ঈশা খাঁ । তা বটে গুরুজী ! শত্রু—শত্রু, তার আবার জাত কি? দেখ তো ব্রাহ্মণ, মুচ্ছিত না মৃত? কাষ্ঠ-পুত্তলিকার মত দাঁড়িয়ে আছ কি ব্রাহ্মণ? ব্যজন কর । বান্দা! দেখ—দেখ, চাঁদ রায়ের কত্যা ধূলিশয্যায়! সূর্য্য যার মুখ দেখতে পায় নি, সে আজ দশের সমক্ষে অনাবৃত ।

বান্দা । তুমি চাঁদ রায়ের গুরু না? তুমি ব্রাহ্মণ না চণ্ডাল?

শ্রীমন্ত । সোনা! ওঠো—সম্মুখে তোমার ঈশা খাঁ ।

স্বর্ণময়ী । এঁ্যা—এঁ্যা—ঈশা খাঁ! কে—তুমি? দেখ, আমি হিন্দু-বিধবা, পবপুকষের ছায়া মাড়ানও আমার পাপ । তুমি রাজরাজেশ্বর—তুমি জ্ঞানী, আমার মান-সম্মানের দায় আমি তোমার হাতে সমর্পণ করলুম । বল—আমায় রক্ষা কববে, না বলি দেবে?

ঈশা খাঁ । নির্ভর রাজকুমারী! আমি তোমায় রক্ষা করলুম । বান্দা! রাজকুমারীকে শ্রীপুরে রেখে এস ।

স্বর্ণময়ী । এত মহান্ তুমি ঈশা খাঁ? কি ব'লে তোমায় কৃতজ্ঞতা জানানো? তুমি দীর্ঘজীবী হও—তুমি সম্রাট হও—বিশ্বজগৎ তোমার নামে চির-মুখরিত হোক ।

ঈশা খাঁ । যদি প্রয়োজন হয়, আমি নিজে বজরা নিয়ে তোমার সঙ্গে যেতে পারি ।

স্বর্ণময়ী । না জাঁহাপনা, আমি একাই যেতে পারবো, আর বজরার প্রয়োজন নেই । বজরা চলতে পারবে না, আমি ছুটতে ছুটতে যাবো ।  
বিদায় জাঁহাপনা— [প্রস্থান ।

ঈশা খাঁ । বান্দা! রাজ্যে ঘোষণা করে দাও, যদি পথে কেউ এই নারীর কেশাগ্রও স্পর্শ করে, তার কাঁধে মাথা থাকবে না ।



## চাঁদের মেয়ে

[ তৃতীয় অঙ্ক ।

বান্দা। কি ঠাকুর! দাঁড়িয়ে দেখলে মুসলমানের বিচার? তুমি গুরু হ'য়ে যাকে বলি দিতে গিয়েছিলে, জাঁহাপনা শত্রু হ'য়ে তাকে রক্ষা করলেন। হাস্বে, না কাঁদবে? ধন্যবাদ দেবে, না অভিশাপ দেবে? হাঃ-হাঃ-হাঃ!

[ প্রস্থান ।

শ্রীমন্ত। এ কি করলে ঈশা খাঁ?

ঈশা খাঁ। পাগলের খেয়াল ঠাকুর!

শ্রীমন্ত। তোমার খেয়ালের দায়ে আমার যে প্রাণটা যাবে, তা ভেবেছ?

ঈশা খাঁ। ভেবেছি ঠাকুর, তোমার ও কুকুরের প্রাণ যাওয়াই ভাল।

শ্রীমন্ত। ভণ্ড! শঠ! মিথ্যাবাদী! তোমার ধ্বংস হোক!

[ প্রস্থানোত্তত ]

ঈশা খাঁ। দাঁড়াও ঠাকুর! আপাততঃ তুমি আমার প্রাসাদে অতিথি; পালাবার চেষ্টা যদি কর, এই তরবারি তোমার শিরশ্ছেদ করবে।

শ্রীমন্ত। কোটীশ্বর! ঠিক বিচার করেছে,—এই আমার প্রাপ্য।

[ প্রস্থান ।

ঈশা খাঁ। প্রতিশোধ নিয়েছি চাঁদ রায়, তোমার এতখানি অত্যাচারের চরম প্রতিশোধ নিয়েছি।

## এনায়েতের প্রবেশ ।

এনায়েৎ। সোনা কই—স্নোনা?

ঈশা খাঁ। ফিরিয়ে দিয়েছি।

এনায়েৎ। ফিরিয়ে দিয়েছ? কেন?

ঈশা খাঁ। বিনা অপরাধে নারীর উপর এ অত্যাচার আমি করতে পারলুম না এনায়েৎ !

এনায়েৎ। পারলে না ? তোমার ভগ্নী আলেয়া যে কাঞ্চনের কবলে, সংবাদ রাখ ?

ঈশা খাঁ। কি—কি ? আলেয়া কাঞ্চনের কবলে ? সত্য ? সত্য বল্ছো এনায়েৎ ? কোথায় তারা ?

এনায়েৎ। এতক্ষণে বোধ হয় শ্রীপুরের অন্তঃপুরে।

ঈশা খাঁ। ওঃ ! চাঁদ রায়—চাঁদ রায় ! না—মিত্রতা হবে না। কি করবো, বল তো এনায়েৎ ?

এনায়েৎ। সোনাকে ফেরাও—

ঈশা খাঁ। তা হয় না এনায়েৎ ! ঈশা খাঁ যাকে একবার অভয় দিয়েছে, তার কেশাগ্রও সে স্পর্শ করবে না। এনায়েৎ ! সৈন্ত সাজাও ; আমার যেখানে যত সৈন্ত আছে, সবাইকে একত্রিত কর ; শ্রীপুর ধ্বংস করবো—শ্রীপুর ধ্বংস করবো ! বান্দা—

এনায়েৎ। আলেয়া ! বড় দর্প তোমার, এই এক আঘাতেই তোমার সব দর্প চূর্ণ করবো।

[ প্রস্থান।

ঈশা খাঁ। বান্দা !

বান্দার পুনঃ প্রবেশ।

বান্দা। জাঁহাপনা—

ঈশা খাঁ। আমি শ্রীপুর ধ্বংস করতে যাচ্ছি ; দুর্গের ভার তোমার উপর রইলো। রক্ষা করতে পারবে ?

বান্দা। আমি ? জাঁহাপনা ! আমি গরীব বান্দা—

## টাদের মেয়ে

[ তৃতীয় অঙ্ক ।

ঈশা খাঁ। তবু তুমি মানুষ, তুমি ছাড়া আমি আর কাউকে বিশ্বাস করি না। বল, রক্ষা করতে পারবে?

বান্দা। পারবো কি না জানি না, তবে প্রয়োজন হ'লে প্রাণটা দিতে পারবো।

ঈশা খাঁ। বাস্। এনায়েৎ খাঁ! সাজাও বাহিনী—ওড়াও ধ্বংস-নিশান—

[ প্রস্থান ।

বান্দা। খোদা! শক্তি দাও—

[ প্রস্থান ।

## চতুর্থ দৃশ্য :

পথ ।

দিলপিয়ার ও গুলবাহারের প্রবেশ ।

গুলবাহার । এঃ—জাঁহাপানা শেষকালে একটা হিন্দুর মেয়েকে কুসলে আন্লে? তোবা—তোবা! তারা গরুগুলোকে দেবতা ব'লে পূজা করে—তাদের বিধবাগুলো এক বেলা খায়, খামকা একাদশী ক'রে দাঁত ছিরকুটে প'ড়ে থাকে।

দিলপিয়ার । থাহে—থাহে, তবু কি?

গুলবাহার । না, আমার আর কি? তবে কথাটা হ'চ্ছে এই, জাঁহাপনা ত্রীপুরে গেল মেয়ে খুঁজতে, আর আমি যে এমন রূপের খনি চোখের কাছে ঘুরে বেড়াই, আমাকে মিলে একবার দেখলে না!

দিলপিয়ার। বাহার! তুই ব্যাগম অবি?

গুলবাহার। ইচ্ছে তো খুব, কিন্তু তুই যে ছাড়িস্ নে!

দিলপিয়ার। ছাড়ু—ছাড়ু—এইবার ঠিক ছাড়ু, খোদার কসম!

গুলবাহার। বলিস্ কি? এত দয়া?

দিলপিয়ার। আরে, দয়া না—দয়া না। সত্য বাহার, তোর যে রূপ, তোব ব্যাগম হওয়াই সাজে। আমি গরীব, তোরে প্যাট ভইয়া খাইতে দিতে পারি না, বালো একখানা কাপড় দিতে পারি না, দুঃখে আমাব কইলজা ফাটে। আমার গন্ নাই—ছয়র নাই, তোরে আমি রাখি কই?

গুলবাহার। তবে এতদিনে বুঝেছিস্?

দিলপিয়ার। খুব বুঝি রে, খুব বুঝি! তুই যা। তোর 'যে রূপ, একবার কইলেই খায়ের পো তোরে ব্যাগম কইয়া দিব। তুই সারা গায় গয়না পরবি, পাছা পাইরা কাপোর পড়বি, রূপের জলুসে ঘরবারী আলো করবি। না থাকলি তুই আমার, তবু তোরে একবার দেখলেও চোখ দুইটা জুড়াইয়া যাইব।

গুলবাহার। তারপর তুই যদি দাবী করিস্?

দিলপিয়ার। ককুম না—ককুম না; তোর স্নুথের জন্তে তোরে আমি তালাক দিতে পারি।

গুলবাহার। পিয়ার!—

দিলপিয়ার। তারাতারি চইল্যা যা; তোরে পাইলে খায়ের পো সোনারে ছাইড্যা দিব। আহা রে, হিন্দুর মাইয়া—তার উপর রারী, না জানি কত কান্তে আছে। দেখ্, তারে যদি নাই ছারে, তুই ব্যাগম হইয়া তারে ছাইড্যা দিস্!

গুলবাহার। তুই তাকে বিয়ে করবি?

দিলপিয়ান। [ জিভ কাটিয়া, কান মলিয়া ] হিঃ, পরের বৌ মায়ে  
সামিল ।

গুলবাহার। তা হ'লে আমি যাই। সত্যি পিয়ান, তোর উপর  
আজ আমার ভক্তি হ'চ্ছে। [ নতজানু হইয়া ] অনেক দোষ করেছি,  
মাফ করিস্ ।

দিলপিয়ান। না—না, তুই কোন দোষ করিস্ নাই ; দোষ আমার,  
আনেক দোষ। যা তবে, যা—

গুলবাহার। তুই এখন কোথায় যাবি ?

দিলপিয়ান। যামু না কোন হানে ; একটা মজিদে পইর্যা থাকুম,  
আর দিনরাত আল্লারে ডাকুম। এই ফকিরিই এখন থিহা আমার  
সম্বল ।

গুলবাহার। আচ্ছা, তা হ'লে আমি যাই—[ প্রস্থানোত্তত ]

দিলপিয়ান। বাহার ! [ বাহার ফিরিল ] পাঁচ বছর ঘর করলাম,  
আমার জন্তে এক ফোটা চ'হের জলও পর্লো না তোর ? একটু দারা,  
আর একবার তোরে দেহি ।

## গীত ।

দিলপিয়ান।— বাহার ! একটুখানি দারা ।

গুলবাহার।— পথ ছেড়ে দে, বাঁধিস্ না রে, আমার আখের বাবে মারা ।

দিলপিয়ান।— দুইডা কথা যা কইয়া যা, রাঙা ঠোটে হাসি,

গুলবাহার।— খুলে যদি ফেলেছিস্ রে পরাস্ নে আর গলার কাঁসী,

দিলপিয়ান।— কি পাষণ কইলপ্রাডা তোর, চ'খে জল ঝরতেছে মোর,

গুলবাহার।— মুহে কেল্ ও মেরিজান [ তোর ] দুই নয়নের ধারা ।

[ গুলবাহারের প্রস্থান ।

দিলপিয়ার । খাঁয়ের পো, তোমাকে ব্যাবাক দিলাম । [ চোখে জল আসিল ।] আল্লা ! হুনিয়ার মঙ্গল কর,—হুনিয়ার মঙ্গল কর ।

[ প্রস্থানোত্তত ]

### আলেক্সার প্রবেশ ।

আলেক্সা । হজরৎ ! একটু আশ্রয় দিতে পারেন ?

দিলপিয়ার । কে—হুজুবাইন্ না ? আরে, এ ব্যাশে কোহানে যাবা হুজুবাইন্ ?

আলেক্সা । চিন্তে পেরেছ দিলপিয়ার ?

দিলপিয়ার । চিন্তাম না ? এ কি এক দিনের দেহা ? সোনার থপর সব জান তো হুজুবাইন্ ?

আলেক্সা । জানি । বাহার কই ?

দিলপিয়ার । জাঁহাপানার কাছে পাঠাইয়া দিছি ; দেহি, তারে পাইয়া সোনাকে যদি ছাড়ে ।

আলেক্সা । আর তুমি ?

দিলপিয়ার । আমার এই ফকিরি ।

আলেক্সা । ঈশা খাঁ ! ঈশা খাঁ ! দেখে যাও—তোমার একটা ভৃত্য, তার প্রাণটা কত মহান্ ! আর তুমি—ওঃ ! যাও হজরৎ, যাও ; তোমার ফকিরিই সার্থক ! সংসারের বন্ধন খুলেছ যদি, আর সে বন্ধনে ধরা দিও না । সেলাম—সেলাম !

দিলপিয়ার । খোদা ! হুনিয়ার মঙ্গল কর—হুনিয়ার মঙ্গল কর—

[ প্রস্থান ।

আলেক্সা । ভাই ! ভাই ! কি করলে তুমি ? আমার বে লজ্জায় মাথা হুয়ে পড়ছে । ভগবান ! তোমার সৃষ্টির মধ্যে কেন এত অশান্তি,

কেন একজন আর এক জনের স্মৃতির সংসারে দাবানল জ্বলে দেয় ?  
শান্তি দাও—শান্তি দাও ঈশ্বর !

### কাঞ্চনের প্রবেশ ।

আলোয়া । এসো কুমার ! এখন কোথায় যেতে চাও ?

কাঞ্চন । সোনারগাঁয়ে ।

আলোয়া । গিয়ে লাভ ? তুমি নিরস্ত্র—অসহায় ; অত বড় প্রবল  
শক্তির বিরুদ্ধে কি করবে তুমি কুমার ?

কাঞ্চন । কি করবো, বলতে পারছি না । দেহের শেষ রক্তবিন্দু  
দিবে এ অত্যাচারের প্রতিরোধ করবো ; তারপর মরতে যদি হয়, সোনাকেও  
সঙ্গে নিয়ে যাবো ।

আলোয়া । তার চেয়ে তুমি শ্রীপুরে ফিরে যাও কুমার !

কাঞ্চন । কেমন ক'রে ফিরবো বালক ? গিয়ে কি বলবো ? তারা  
যে আমার আশাপথ চেয়ে ব'সে আছে । না—তা হয় না ; দেহে  
এখনও অনেক শক্তি আছে, চেষ্টা করলে হয় তো সোনাকে উদ্ধার  
করতে পারি !

আলোয়া । তবে চল, আমি তোমার সঙ্গে যাচ্ছি ।

কাঞ্চন । তুমি যাবে ? এসো অবাচিত বান্ধব ! এসো দীনের বন্ধু !  
তুমি আমার অনেক করেছে ; শত্রুর কবল থেকে তুমিই আমার রক্ষা  
করেছ । আমি অচেতন হ'য়ে শ্রোতের বেগে ভেসে যাচ্ছিলুম, তোমারই  
দয়ালু তীরে উঠেছি । তুমি কে, জানি না ; বোধ হয় পূর্বজন্মে তুমি  
আমার ভাই ছিলে । বন্ধু ! শ্রীপুরে যে কখনও ফিরে যাবো, এমন  
আশা করি না । যদি যাই—যদি দিন পাই, তোমার এ উপকার  
ভুলবো না ।

আলোয়া। এখনও তুমি সোজা হ'য়ে দাঁড়াতে পারছো না; কি ক'রে যে যাবে, তাই ভাবছি।

কাঞ্চন। আমার কথা ভেবেই অধীর হ'চ্ছে বন্ধু! আমার বোন্টীর অবস্থা যদি দেখতে, তোমার প্রাণ হাহাকার ক'রে কেঁদে উঠতো। একাদশীর নিরক্ষু উপবাসের মধ্যে বেরিয়ে গৈছে, বোধ হয় এখনও জল-স্পর্শ করে নি; তার উপর ঈশা খাঁর নির্যাতন—ওঃ! ঈশা খাঁ—  
পাষণ্ড—

### স্বর্ণময়ীর প্রবেশ।

স্বর্ণময়ী। কে গো, কে ঈশা খাঁকে পাষণ্ড বলছে? একি! দাদা—

কাঞ্চন। সোনা—সোনা! বোন্টা আমার! কোথা থেকে এলি? কেমন ক'রে এলি? ঈশা খাঁ বাধা দিলে না?

স্বর্ণময়ী। না দাদা, সসম্মানে ফিরিয়ে দিলে।

আলোয়া। [স্বগত] ভগবান্! তুমি আছ—তুমি আছ।

কাঞ্চন। ঈশা খাঁ! তোমার তিন তিনটে দুর্গ হস্তগত করেছি আমরা—তোমার অসংখ্য প্রজা, অগণিত অনুচর আমাদের হাতে প্রাণ দিয়েছে, এতখানি শত্রুতার চরম প্রতিশোধ নিয়েছ তুমি আজ সোনাকে ফিরিয়ে দিয়ে। আয় সোনা—আয়, এই প্রশান্ত সন্ধ্যায় আমরা ভাই বোন্ ভগবানের কাছে প্রার্থনা করি, ঈশা খাঁর মঙ্গল হোক।

স্বর্ণময়ী। ঈশা খাঁর মঙ্গল হোক।

আলোয়া। এইবার তবে আমার পরিচয় গ্রহণ কর কুমার! যে ঈশা খাঁকে নিয়ে তোমাদের এত অশান্তি—এত হাহাকার, সে আমারই সহোদর।

কাঞ্চন ও স্বর্ণময়ী। সহোদর?



কাঞ্চন । তুমি ঈশা খাঁর ভাই? কেমন ক'রে তুমি আমার উপর এমন সদয় হ'লে বন্ধু? আমি যে তোমাদের অসংখ্য পরিজনকে নিশীথ রাত্রে পুড়িয়ে মেরেছি!

আলেক্সা । আমি যদি কেদার রায়ের ছেলে হ'তুম, আমিও বোধ হয় এই করতুম; আর এতে যদি তোমার অপরাধ হ'য়ে থাকে, তার বিচার করবেন ঈশ্বর, আমি নই।

কাঞ্চন । ওরে মুসলমান! যদি সব মুসলমান এমনি হ'তো, তা হ'লে এ জাতির পায়ে বিশ্বজগৎ মাথা নত করতো।

আলেক্সা । তুমি সোনা? আহা, বড় দুঃখ পেয়েছ বোন! চল, আমি নিজে তোমায় সঙ্গে ক'রে শ্রীপুরে পৌছে দিয়ে আসছি। তোমার পিতা যদি আমার ভাইকে দণ্ড দিতে চান, সে দণ্ড আমি মাথা পেতে নেবো। এসো বোন! তুমি মাঝখানে থাক, আগে পিছে আমরা দুই ভাই আছি; জগতের কোন শত্রু তোমার ছায়াও স্পর্শ করবে না।

## গীতকণ্ঠে মাঝির প্রবেশ।

মাঝি।—

## গীত।

ও মন-মাঝি রে, ভর দরিয়ায় নৌকা রাখা দায়।

(কেমনে) দিব পাড়ি, তুফান ভারি, ভাঙ্গা নৌকা ডুবে যার।

মাঝি। হাঁদে কর্তা! লোকা চাই?

কাঞ্চন। নৌকো আছে তোমার? বেশ—বেশ, তাই চল। কি গাইছিলে মাঝি, গাও তো!

মাকি । [ একটু হাসিয়া আবার গান ধরিল । ]

## পূর্ব গীতাংশ ।

কলকলিয়ে উঠছে পানি, কাঁপছে আমার পরাণখানি,  
চাঁদ ডুবেছে, তাবাপুলো মিটিব-মিটিব চায় ।  
না-ধাওয়া পথ অনেক বাকি, এসেছি যা কেবল ফাঁকি,  
পাতাল থেকে ডাকছে রে যম আর রে চ'লে আর ।  
রইলো কোথায় ছাপালা জব, পাতাব কুঁড়ে ছাগল গব,  
ডাক দিলে কেউ শোনে না বে, প্রাণ গেল এ দরিয়ায় ।

স্বর্ণময়ী । থামো মাকি—থামো ; তোমার গান শুনে মনটা আমার  
বড় কেঁদে কেঁদে উঠছে ; মনে হ'চ্ছে, যা হাবিয়েছি, বুঝি আর তা  
পাবো না । কোটীশ্বব ! তুমি আমাব আছ তো ? এই যে আমাদের  
অন্তরের মাঝখানে বাঁশী বাজাচ্ছে ! বাজাও—বাঁশী বাজাও—

মাকি । আহেন কর্তা, আহেন—

[ সকলের প্রস্থান ।

## পঞ্চম দৃশ্য :

দেবলের গৃহ ।

কোটিশ্বরের দারুমূর্তি বক্ষে লইয়া দেবলের প্রবেশ ।

দেবল । [ মূর্তি স্থাপন করিয়া ] বোস্ এইখানে, তারপব দেখাচ্ছি মজা ! ব্যাটাচ্ছেলে ! সাত পুঙ্খ ধ'রে বাজভোগ খেয়ে আস্ছে, আর একটা উপকার করতে পার না ? উণ্টে সোনাব মাথাটা খেয়ে ব'সে আছ ! ওরে হারামজাদা কাঠের কুঁদো, সে যে তোর পায়ে জল না দিয়ে জল খেতো না রে ! তার এই ফল ? র'সো ! গিল্লী—গিল্লী—  
নেপথ্যে জগদম্বা । কেন গা ?

দেবল । একটা কুড়ুল নিয়ে এসো তো, শীগ্গির—

কুঠারহস্তে জগদম্বার প্রবেশ ।

জগদম্বা । এই নাও—[ কুঠার প্রদান ] হ্যাঁ গা, এত রাতে কুড়ুল কি হবে ?

দেবল । এই কাঠের কুঁদোটা চালা করবো—[ কাপড় বাগাইতে লাগিল । ]

জগদম্বা । [ বিগ্রহ দেখিয়া ] ও মা, এ কে গো ? আহা-হা, কেমন হাস্ছে দেখ !

দেবল । স'রে যাও ! এটাকে চালা করবো, দিবি ভাত রাঁধা হবে ।

জগদম্বা । মিন্দের মাথা খারাপ হয়েছ না কি ?

দেবল। বল্ হারামজাদা! সোনাকে ফিরিয়ে দিবি কি না? হাস্লে চল্বে না! আজ এস্পার কি ওস্পার, যা থাকে কপালে! বল্, সোনাকে ফিরিয়ে দিবি কি না? দিবি নে তো? তবে আজ তোরই একদিন কি আমারই একদিন—[ কুঠার উত্তোলন। ]

জগদম্বা। [ বাধা দিয়া ] মর্ হতচ্ছাড়া মিন্সে! এমন সুন্দর পুতুলটী, তাকে চালা ক'রে ভাত রাঁধবি?

দেবল। আলবৎ রাঁধবো, আমার খুসী। স'রে যা বল্ছি, নইলে তোকেই চালা কব্বো।

জগদম্বা। কেন? ও কি করেছে?

দেবল। কি না করেছে? চাঁদ রায় এত ক'বে ব্যাটাকে পূজা দিচ্ছে, আর ও তারই মেয়ের সর্বনাশ করলে!

জগদম্বা। ও মা, এ কার মূর্ত্তি গো? এ কি রাজবাড়ীর কোটীশ্বর?

দেবল। ই্যা—ই্যা, ওরই নাম কোটীশ্বর।

জগদম্বা। [ বিগ্রহের সম্মুখে নতজানু হইয়া ] ঠাকুর—ঠাকুর! কি এমন পুণ্য করেছে যে তুমি আজ আমার ঘরে! আমার যে কিছু নেই; কি দিয়ে তোমার পূজো করবো? ওগো, দেখ তো—দেখ তো, বাগানে ছ'টো ফুল পাও যদি—

দেবল। মর্ মাগী! একটা কাঠের কুঁদো, তাকে ফুল দিয়ে পূজো করবি? অনেক পূজো ক'রে দেখেছি; ওর চোখ নেই—কান নেই—ও কিছুই করতে পারে না।

জগদম্বা। ওগো, দেখ—দেখ, দেখতে—দেখতে কুঁড়ে ঘরটা কোঠা বাড়ী হ'য়ে গেল যে!

দেবল। এ্যা—তাই তো! আমার কুঁড়ে ঘর? ও কি, শীতকালে শুকনো গাছে পদ্ম ফুল! শালা ভেকীবাজ! আমার কোঠা বাড়ী দেখিয়ে

## টান্দের মেয়ে

[ তৃতীয় অঙ্ক ।

তাক্ লাগিয়ে দেবে ! চাই নে আমি কোঠা বাড়ী—চাই নে আমি পদ্ম  
ফুল, আমি সোনাকে চাই ! বল, সোনাকে ফিরিয়ে দিবি কি না ?

জগদম্বা । মিন্সে কি ডাকাত গো ! রাজবাড়ীর বিগ্রহ চুরি ক'রে  
আনলে ! এখন উপায় ? ওরে মিন্সে, কাল সকালে যে গর্দান যাবে—  
দেবল । যায় যাক্, তবুও ওকে আমি একবার দেখবো ।

জগদম্বা । আরে, রাতারাতি ফিরিয়ে দিয়ে আয় মিন্সে ! এ  
কি সোজা দেবতা ! দেখুছিস না, ঘরে পা দিয়েছে, আর কুঁড়ে ঘর  
কোঠা বাড়ী হ'য়ে গেছে ! শীগগির যা—শীগগির যা মিন্সে !

দেবল । এই যে যাচ্ছি !

জগদম্বা । খবরদার মিন্সে ! ওর গায়ে একটা কাঁটার আচড়ও যদি  
লাগে, তোর মাথাটা আমি চিবিয়ে খাবো ।

দেবল । আরে, আমার মাথা তো গেছেই ; ওর মাথাটাও আমি  
ছ'ফাঁক ক'রে দেবো ।

জগদম্বা । মার্ দেখি হতচ্ছাড়া মিন্সে ! এই আমি ওকে জড়িয়ে  
ধরলুম ; দেখি, কে ওর কি করতে পারে !

দেবল । তবে তুই শুদ্ধ মর্—[ কুঠার উত্তোলন ]

## গীতকণ্ঠে জনৈক রাখালবালকের প্রবেশ ।

রাখালবালক ।—

### গীত ।

মারিস্ নে রে—মারিস্ নে রে, পাৰি রে তোর রতন কিরে ।

ডুবাস্ নে তোর সোনার ভরী অভিমানে দুঃখ-নীরে ।

দেবল । বেরো ডিংরে !

রাখালবালক ।—

## পূর্ব গীতাংশ ।

ঐ আঁধারে নামে যদি একটু অশ্রুজল,  
কৈঁদে কৈঁদে হবে সারা বিষ ধরাতল,  
ওরে পাগল, ও অভাগা, মুছবে বে তোর মনের দাগা,  
তোর আকুল ডাকে অকুল ব'য়ে ভিড়লো তরী সিন্ধুনীরে ।

রাখাল । ওগো—ওগো, তোমাদের রাজা আসছে যে ! দেখ্বে  
এসো—দেখ্বে এসো !

[ প্রস্থান ।

দেবল । ছাড়ো—ছাড়ো । ওরে, রাজা আসছে যে ! এসে দেখ্বে,  
সোনা নাই । রাজা মব্বে, রাণী মব্বে, সব কৈঁদে কৈঁদে ম'রে যাবে ;  
তবুও ও সর্বনেশেকে রাজভোগ থাওয়াতে হবে ? না—না, ও যেখানে  
থাক্বে, সেখানকার মাটি শুদ্ধ জ'লে যাবে । ফেলে দে—ফেলে দে  
বল্ছি ! আমি ওকে চালা করবো—

জগদম্বা । এই—এই মিন্সে ! খবরদার—

[ বিগ্রহ লইয়া প্রস্থান, পশ্চাৎ উত্তত কুঠারহস্তে দেবলের প্রস্থান ।

## অষ্ট দৃশ্য :

রাজপ্রাসাদ ।

ভবানী ।

ভবানী । সোনা ! সোনা ! আয়—ফিরে আয় ! মাগো, আর যে সহিতে পারি নে মা ! কোটীশ্বর ! নিষ্ঠুর ! শেষে এই কবলে ! আমার এতটুকু সুখ তোমার সহিলো না ? একটা বিধবা মেয়ে—বিয়ের পর ছ' মাস স্বামীর ঘর করলে না—পক্ষিশাবকের মত বুকে ক'রে রেখেছিলুম, তাকেও নিয়ে নিলে ! সে যে তোমার পূজা না দিয়ে কোন দিন জলগ্রহণ করতো না । রাজা এলে কি বলবো আমি ? কেমন ক'রে তার চোখের জল নিবারণ করবো ? ব'লে দাও—ব'লে দাও নিষ্ঠুর !

চম্পকের প্রবেশ ।

চম্পক । মা !—

ভবানী । চুপ্—চুপ্ ! কেউ তোরা 'মা' ব'লে ডাকিস্ নি আমায় । সব শত্রু—সব শত্রু ! ওঃ, এত বড় বংশ—এমন জগৎজোড়া সুনাম, একটা মেয়ের জন্ত সব গেল ! ছেলেটা কোথায় গিয়ে বেঘোরে প্রাণ দিলে, কে জানে ?

চম্পক । কোটীশ্বরকে কোথায় লুকিয়েছ মা ?

ভবানী । কি ?

চম্পক । শুনতে পাচ্ছে না ? কোটীশ্বর যে মন্দিরে নেই—

ভবানী । নেই ? বলিস্ কি চম্পক ?

## কেশার মার প্রবেশ ।

কেশার মা । হ্যাঁ গা বোমা, কোটীশ্বর কই ?

ভবানী । মা—

কেশার মা । মব্ আবাদের বেটী, হাঁ ক'রে আমার মুখের দিকে তাকালে কি হবে ? বলি, ঠাকুর কই ? মন্দির থালি প'ড়ে আছে যে ! তুমি কি বাছা তাকে ফেলে দিয়েছ ?

ভবানী । কোটীশ্বরকে ফেলে দেবো ? সপ্ত পুরুষের বিগ্রহ—কত স্নেহের অংশভাগী, কত দুঃখের সাথী—কত সাগর মন্থন করা সে মাণিক ! চ'লে গেছে—স্নেহের প্রদীপ নিভিয়ে দিয়ে চ'লে গেছে । মা ! ভাঙ্গন যখন ধরে, চারিদিক দিয়েই তার আগমনীর সাড়া প'ড়ে যায় । কেউ থাকবে না আর ! আমি বুঝতে পারছি মা, এ বংশে বাতি দিতে একটা প্রাণীও থাকবে না ! বিশ্বাসঘাতক ! শেষে পালিয়ে গেলে ? কেন নিষ্ঠুর ! সোনার হাতের ফুল জল না পেলে কি তোমার ভূষ্টি হয় না ?

কেশার মা । হাত্তোর গোষ্ঠীর নিকুচি করেছে ! বলি, খুঁজতে হবে, না এ সব ঢং করলেই চলবে ?

ভবানী । কাকে খুঁজবে মা ? কোথায় খুঁজবে ? সে জন্মের মত চ'লে গেছে । এস, তিনজনে মিলে আর্তনাদ করি—কেঁদে প্রাসাদটা ভাসিয়ে দিই, নইলে বুকটা ফেটে যাবে—মাথাটা ধড় ছেড়ে ছুটে পালাবে । কাঁদ চম্পক—কাঁদ, একটু শীতল হই—

চম্পক ।—

গীত ।

আমি কাঁদিব জীবন ভোর ।

আঁখিজলে ঘোর ধরণী ধোয়াবো, যদি নাহি মিলে চিতচোর ।



আমার এ হৃদয়-মন্দিরে তার, পা দু'খানি যদি নাহি পশে আর,

আঘাতে আঘাতে ভাঙ্গিয়া ফেলিব অসার এ হৃদয় মো'ব ।

কাননে কাননে মকপ্রাস্তরে, গৃহে গৃহে আর সাগরে অশ্বরে,

খুঁজিব রে আমি যত দিনে চোখে নামিবে আঁধার ঘোব ।

[ প্রস্থান ।

চাঁদ রায় ও কেশার রায়ের প্রবেশ ।

চাঁদ । রাণী—রাণী—

ভবানী । মহারাজ—[ চাঁদ রায়ের পায়ে আছড়াইয়া পড়িলেন । ]

তোমার সোনাকে ডালি দিয়েছি !

চাঁদ । সোনা—সোনা, আমার সোনা ? ছুঃখের সান্ত্বনা—রোগের ঔষধ—নিরানন্দ পুত্রীর কলকণ্ঠ বিহঙ্গম, নেই—নেই ? কোটীশ্বর ! এতই কি পাপ করেছিলুম যে, আমার নিষ্কলঙ্ক বংশে এমনি ক'রে কলঙ্ক লেপন করলে ?

কেশার মা । হ্যাঁ বাবা চাঁদ ! একটা মেয়ের জন্ত সগোষ্ঠি কেঁদে কেঁদে ম'রে যাবে ? ছুঃখ নেই কার ? তা ব'লে এমনি ক'রে হাত পা ভেঙ্গে ব'সে থাকতে হবে ? তার চেয়ে ছুটে যাও ; যেমন ক'রে হোক, তাকে ছিনিয়ে নিয়ে এসো ।

কেশার । হ্যাঁ—ছিনিয়ে নিয়ে আসবো দাদা ! কেন তুমি আমায় বাধা দিচ্ছ ? আদেশ দাও—আদেশ দাও, আমি সোনার অশ্বেষণে যাই—

চাঁদ । কোণায় পাবে তাকে কেশার ? সোনারগাঁ তন্ন-তন্ন করলেও তাকে খুঁজে পাবে না ।

কেশার । না পাই, গোটা সোনারগাঁ তুলে নিয়ে এসে কালী-গঙ্গার জলে ফেলে দেবো । দাদা ! আদেশ দাও, আমি যাই—

[ প্রস্থানোত্তত ]

ষষ্ঠ দৃশ্য।]

চাঁদের মেয়ে

চাঁদ। কেদার! ফিরে এসো, যেতে হবে না; দেখি, কোটীশ্বর কি করেন!

ভবানী। হায় মহারাজ, তোমার কোটীশ্বরও মন্দির ছেড়ে পালিয়ে গেছে!

কেদার। কি! কোটীশ্বর পালিয়ে গেছেন?

চাঁদ। যাবে—সব যাবে কেদার! আমি জানি, বর্ষার কূলে-কূলে ভাঙ্গন ধরেছে। বিনা দোষে গুরু ত্যাগ করেছি, কেদার! সে কি বৃথা যাবে ভেবেছ? ভাই—ভাই! সোনাকে হারিয়েও আমি খাড়া থাকতে পারতুম, কিন্তু কোটীশ্বরকে হারিয়ে কি নিয়ে বাঁচবো? ফিরে এসো কোটীশ্বর! যাক সোনা, তুমি এসে আমার বুকটা জুড়ে ব'সে থাকো।

[প্রস্থান।

স্বর্ণময়ী ও কাঞ্চনের প্রবেশ।

স্বর্ণময়ী। মা—মা—

কেদার, ভবানী ও কেশর মা। সোনা?

কেদার। [স্বর্ণময়ীর মাথাটা বৃকে চাপিয়া ধরিয়া] কেমন আছিন্ মা? কেমন আছিন্ মা আমার? [মন্তক চুষন]

কেশর মা। চাঁদ! ও চাঁদ! ওরে, আমি কাকে ডাকি? কেউ একবার শব্দ ঘণ্টা বাজায় না? সত্যি ফিরে এলি দিদি? আমার যে পেত্যয় হ'চ্ছে না রে! ওরে, আমার বরাতে এত সুখ ছিল?

কাঞ্চন। থাম্ বুড়ী!

ভবানী। এ কি স্বপ্ন, না সত্য? সোনা! এ দিকে আর তো, একটা কথা জিজ্ঞাসা করি—

কেদার । না—না, কোন কথা নয় ; স’রে যাও সব ! কেন মা, মুখথানা এমন মলিন ? চক্ষু কোটরে ঢুকেছে, কেশপাশ ধূলি-ধূসরিত ? ছ’দিনে এমন বিষাদের ছবি নিয়ে কোথা থেকে এলি মা ? কেউ কোন কটু কথা বলেছে ?

স্বর্ণময়ী । না কাকা, আমি সসম্মানে ফিরে এসেছি ।

চাঁদ রায়ের প্রবেশ ।

চাঁদ । কে ফিরে এসেছে ?

কেশার মা । সোনা—সোনা ; ঐ দেখ, মুখথানা শুকিয়ে কাঠ হ’য়ে গেছে । ও বোমা ! চুপ ক’রে দাড়িয়ে আছ কেন বাছা ? মেয়েটাকে কিছু খেতে দাও না ! আচ্ছা, আয় দিদি ! আমার সঙ্গে আয় তো ! আয়—আয়, শীগ্গির আয়—

[ সোনাকে লইয়া প্রস্থান ।

চাঁদ । কোথা থেকে আসছে সোনা ?

কাক্ষন । আমি বলছি মহারাজ ! শ্রীমন্ত সোনাকে ঈশা খাঁর রাজ-প্রাসাদে নিয়ে গিয়েছিল ; মহানুভব ঈশা খাঁ ওকে সসম্মানে ফিরিয়ে দিয়েছে, একটা কটু কথা ব’লে নি—ভুলেও একবার স্পর্শ করে নি । কেদার । তা হ’লেও সে অপরাধী ।

আলোয়ার প্রবেশ ।

আলোয়া । সে অপরাধের জন্ত তার হ’য়ে আমি ক্ষমা চাইতে এসেছি মহারাজ ! ক্ষমা করুন ! ঈশা খাঁ আমার ভাই, যদি মহানুভব চাঁদ রায়ের হাতে দণ্ডই তার প্রাপ্য হয়, সে দণ্ড আমাকে দিন—[ নতজানু ]

কেদার । ঈশা খাঁর ভাই তুমি ?

কেশার মা। বুকের পাটা তো খুব !

ভবানী। ওঠো বাবা, ওঠো !

চাঁদ। দণ্ড দেবো বালক ? বটে—বটে ! এমন কি দণ্ড আছে, যা ঈশা খাঁর পক্ষে যথেষ্ট ? বালক ! তুমি মুসলমান ; হিন্দুর বুকের ব্যথা তুমি ঠিক বুঝতে পারবে না। জান, তোমরা কি করেছো ? আমার বংশে যে কলঙ্কের বোঝা তোমরা চাপিয়ে দিয়েছ, এমন সহস্র সোনাকে ফিরিয়ে দিলেও তার লাঘব হবে না। যে মুহূর্তে আমার কণ্ঠা ঈশা খাঁর প্রাসাদে প্রবেশ করেছে—তার দেওয়া খাওয়া পানীয় গ্রহণ করেছে, সেই মুহূর্তেই সে আমার পর হ'য়ে গেছে।

কাঞ্চন, কেদার ও ভবানী। মহারাজ—

চাঁদ। নিয়ে যা কাঞ্চন, নিয়ে যা অপহৃত কণ্ঠাকে চাঁদ রায় গ্রহণ করে না।

কেদার। দাদা—দাদা ! দোহাই তোমার, একবার সোনার মুখের দিকে চাও ! নিজের অন্তরের মধ্যে একবার উঁকি দিয়ে দেখ, তারপর দিও এ কঠিন আদেশ

চাঁদ। কেদার ! আমার কণ্ঠাকে আমি চিনি না ? চাঁদ রায়ের কণ্ঠা মরবে, তবুও কলঙ্কিনী হবে না।

ভবানী। তবু তাকে গ্রহণ করা চলবে না ?

চাঁদ। না।

ভবানী। তবে আমাকে আগে হত্যা কর, তারপর সোনাকে বিদায় দিও।

চাঁদ। আমি সবাইকে ত্যাগ করতে পারি, কিন্তু হিন্দুধর্মের অমর্যাদা করতে পারি না।

আলেয়া। বুঝলুম না হিন্দু, তোমার ধর্মের মর্যাদা ! যে ধর্মের

## চাঁদের মেয়ে

[ তৃতীয় অঙ্ক ।

জ্ঞা একটা অবলা নারীকে অকারণ বিসর্জন দিতে হয়, সে ধর্ম কখনই ভগবানের সৃষ্ট নয়—সে ধর্ম মানুষের হাতে গড়া। তোমার অবস্থা যদি আমার হ'তো রাজা, আমি বরং ঈশা খাঁর উপর প্রতিশোধ নিতুম, তবু কতাব গায়ে একটা কাঁটার আঁচড়ও দিতুম না।

কাঞ্চন। মহারাজ—

চাঁদ। আমি কোন কথা শুনবো না কাঞ্চন! আমার এই শেষ কথা, অপহৃত কতাকে আমি গ্রহণ করবো না।

কেদার। দাদা! নিজের জ্ঞা আমি তোমার কাছে অনুরোধ করি নি; তোমার কন্যার জন্য তোমার পায়ে নতজানু হ'য়ে প্রার্থনা করছি, মহারাজ! দয়া কর—

ভবানী। রাজা! রাজা! এত অনুনয়ে ভগবানের আসন ট'লে যায়, তোমার প্রাণ কি একটুও টলবে না?

চাঁদ। ধর্মের সঙ্গে ছলনা! দোহাই তোমাদের, আমায় অনুরোধ ক'রো না, রাখতে পারবো না। আমার একই কথা—সোনা আমার কেউ নয়।

স্বর্ণময়ীর প্রবেশ, পশ্চাতে চম্পক।

স্বর্ণময়ী। সোনা তোমার কেউ নয়? বাবা—

ভবানী। এ দিকে আয়—এই বুকে; ও দিকে নয়—ও মরুভূমি, জ'লে যাবি! আয় তো—আয় তো মা, আমরা মা আর মেয়ে দু'জনে মিলে আকাশটা ফাটিয়ে একবার আর্তনাদ করি, দেখি ভগবান কতক্ষণ তার সিংহাসনে স্থির হ'য়ে ব'সে থাকেন!

কেদার। ওঃ, সোনা!—অভাগী! কেন তুই ফিরে এলি? কেন কালীগঙ্গায় ঝাঁপ দিলি নি? তোকে যে আর আমরা বেঁধে রাখতে

পারবো না মা ! বুঝতে পারছি তুই নিষ্পাপ, তবু এ প্রাসাদে তোর আর স্থান হবে না। উঃ—মহারাজ ! আমাদেরও ত্যাগ কর, এ যে আমি সহিতে পারছি নে !

স্বর্ণময়ী । বাবা !—

কেশার মা । এও তুমি সহিতে পারছো চাঁদ ? এমন পাষণ্ড তুমি ? ওঃ—কেন তোমায় ছোটবেলায় কোলে পিঠে ক’রে মাছুষ করেছিলুম ? কেন গলা টিপে মারি নি ?

কাঞ্চন । আয় তবে বোন্ ! দুঃখ করিস্ নে । কার জন্য কাঁদিস্ অভাগী ? এ সব শত্রু । আয় দিদি, আয় ! জগৎ-সংসার তোকে পায়ে ঠেলে দিলেও আমি তোকে ত্যাগ করবো না । এস বোন্, শৈশবে ছ’জনে মিলে যেমন ক’রে খেলাঘর সাজিয়ে সংসার পেতেছিলুম, আজ আবার তেমনি ক’রে আমরা নূতন সংসার রচনা করবো ।

স্বর্ণময়ী । বাবা ! আমি মেয়ে ব’লেই আমার উপর এ অবিচার করলে ; যদি আমি ছেলে হ’তুম, তা হ’লে আজ আমার আদরে বুকে তুলে নিতে । বাবা ! আমি স্বামী চিন্‌লুম না—সংসার চিন্‌লুম না, আজীবন তোমাদের আশ্রয় ক’রেই বেড়ে উঠেছি ; আজ বিনা-দোষে আমার সে আশ্রয় চূর্ণ করলে ? যাক্, কোন অভিযোগ নেই আমার ! তোমার চরণ স্পর্শ করবো না, দূর থেকেই তোমাদের প্রণাম ক’রে যাচ্ছি । কাকা ! বাবাকে দেখো । মা—মা—মা গো ! ঘাই মা, বিদায়—

চম্পক । দিদি—দিদি—

কাঞ্চন । খবরদার ! স’রে যা বলছি ; আমাদের জাত গেছে, স্পর্শ করিস্ নে ।

চম্পক । দিদি—

কাঞ্চন । দূর হ'—[ গলাধাক্কা দিয়া চম্পককে চাঁদ রায়ের কোলে ফেলিয়া দিল । ] আয় সোনা—

[ উভয়ের প্রস্থান ।

কেশার মা । সোনা—সোনা—

[ প্রস্থান ।

ভবানী । কোটীশ্বর ! কোটীশ্বর ! শেষে এই করলে ? মৃত্যু দাও—মৃত্যু দাও নিষ্ঠুর !

[ প্রস্থান ।

কেদার । দাদা ! কি আর বলবো তোমায় ? আমি তোমায় অভিশাপ দিচ্ছি, একদিন তোমাব এই নিষ্ঠুরতাব জন্য যেন তোমায় হাহাকার ক'রে কাঁদতে হয় ; এই সোনাকে ফিবে পাবার জন্য তোমার অন্তরাত্মা যেন আর্তনাদ ক'রে ওঠে ।

চাঁদ । অভিশাপ দে—জগৎগুরু সবাই আমার অভিশাপ দে, তবু আমি টলবো না । চম্পক ! বাবা ! সবাই যদি আমার বিরুদ্ধে দাঁড়ায়, তুই আমার ত্যাগ করিস্ নে ।

আলেয়া । মহারাজ চাঁদ রায় ! আমি এসেছিলুম ক্ষমা চাইতে ; কিন্তু বা দেখলুম, আর আমি ক্ষমা চাই না রাজা ! ঈশা খাঁর প্রাপ্য দণ্ড আমার দাও, মৃত্যুদণ্ড হ'লেও আমি তা হাস্তে হাস্তে বরণ করবো ।

কেদার । দণ্ড দেবো বালক ! ঈশা খাঁর জন্য আমাদের সোনার সংসার শ্মশান হয়েছে ; এর চরম প্রতিশোধ নেবো । এসো—আপাততঃ তুমি এই রাজপ্রাসাদে বন্দী । আসুক ঈশা খাঁ তোমার অন্তরে, তারপর—তারপর—

চাঁদ । কেদার ! এ ভাই—

কেদার । ভায়ের অপরাধে ভায়ের দণ্ড হবে না ? তবে তোমার এ অপরাধে আমার এ বুকটা কেন ভেঙ্গে গেল দাদা ?

ষষ্ঠ দৃশ্য । ]

চাঁদের মেয়ে

[ নেপথ্যে কামান গর্জন । ]

সকলে । ও কি ?

[ পুনঃ কামান গর্জন । ]

চাঁদ । এত কাছে শত্রু-সৈন্য ? ঙ্গীশা খাঁ ! এইবাব—এইবাব—

[ প্রস্থান ।

কেদার । প্রতিশোধ—প্রতিশোধ !

[ প্রস্থান ।

আলিয়া । ভাই ! ভাই ! এ আবার কি লীলা তোমার ?

[ প্রস্থান ।



## চতুর্থ অঙ্ক ।

### প্রথম দৃশ্য :

সোনারগাঁ প্রাসাদ ।

#### শ্রীমন্ত ।

শ্রীমন্ত । হ'লো না—হ'লো না, প্রতিশোধ নেওয়া হ'লো না ।  
খোকা ! তোর ভূষিত আত্মার তৃপ্তিসাধন করতে পারলুম মা । অদৃষ্টের  
এ কি নির্ভুর পরিহাস ! একদিন এই ব্রাহ্মণ চাঁদ রায় কেদার রায়ের  
মাথার মণি ছিল ; তাদের সহস্র শ্রদ্ধার দান এই দীন ব্রাহ্মণ পায়ে  
ঠেলে চ'লে গেছে । আজ সে বিধর্মীর প্রাসাদে বন্দী ; তার মর্মান্তিক  
দীর্ঘনিঃশ্বাস প্রাচীরে প্রতিহত হ'য়ে ফিরে আসে, তার অগ্নিদৃষ্টিতে  
একটা গুরু পত্রও দগ্ধ হয় না ।

#### গীতকণ্ঠে বাঈজীগণের প্রবেশ ।

বাঈজীগণ ।—

#### গীত :

দিন গেছে তোর পাগলা হাতী,  
আপন কান্দে পড়'লি বাঁধা, (এবার) চামচিকেও মা'বে লাথি ।  
পবকে বিষ দিয়ে তুই তুলে নিলি দুধের বাটি,  
সহসা কম্পঙ্করে লেগেছে দাঁতকণাটি ;  
ছাই দিতে পরের মুখে, বাজ পড়েছে নিজের বুকে,  
চোখে তোর ঘনিয়ে এলো, চেয়ে দেখে, আঁখার রাতি ।

১ম বান্ধজী। এস বঁধু, একটু মদ খাবে?

শ্রীমন্ত। দূর হও—দূর হও নরকের কুমিকীট!

১ম বান্ধজী। ওঃ—চোরের বড় গলা যে! ঘরের মেয়ে পরকে দিতে দোষ নেই, যত দোষ মদ খেলে, না? আমরা নরকের কুমিকীট, আর তুমি বড় সাধু! ফুঃ— [ বান্ধজীগণের প্রস্থান।

শ্রীমন্ত। [ বুক চাপড়াইয়া ] তুমি আছ? আছ তুমি ব্রহ্মণ্যদেব? একবার জ্বলে ওঠ দেখি, আগ্নেয়গিরির মত তরল অগ্নিনিঃস্রাবে এই প্রাসাদটাকে পুড়িয়ে ভস্মীভূত করে দাও

### বান্দার প্রবেশ।

বান্দা। কি ঠাকুর, আবার কার সর্বনাশের মৎবল আঁটছো?

শ্রীমন্ত। স'রে যাও; নইলে—

বান্দা। নইলে কি? ভয় ক'রে ফেলবে? সে ক্ষমতা কি আর তোমার আছে ঠাকুর? ছিল একদিন, যখন তোমার মহত্বের পায়ে চাঁদ রায়ের মাথা লুপ্তিত হ'তো—যখন সহস্র প্রলোভন চারিদিক দিয়ে তোমায় আকর্ষণ করলেও তুমি পাহাড়ের মত খাড়া দাঁড়িয়ে থাকতে। করলে কি ঠাকুর? এ দেশের হিন্দু মুসলমান তোমাকে যে দেবতার মত ভক্তি করতো; ক্ষণিকের উত্তেজনায় এমন উচ্চাসন তোমার নিজের হাতে চূর্ণ করলে!

শ্রীমন্ত। ক্ষণিকের উত্তেজনা? জান, চাঁদ রায় আমার কি করেছে? বিনা দোষে আমার গুরুর আসন থেকে ভিক্ষকের ধূলিশযায় নামিয়ে দিয়েছে; তার রাজ্যে আমার রোগা ছেলের জন্ত এক মুষ্টি অন্ন জোটে নি—এক কৌটা ওষুধ মেলে নি। তারই প্ররোচনায় আমার ছেলোটো তিলে তিলে শুকিয়ে মরেছে—

বান্দা। তুমি তার ছেলের গলা টিপে মারলে না কেন? তার মেয়েটাকে বিয় খাওয়ালে না কেন? এর জন্তু অসহায় নারীর উপর অত্যাচার?

শ্রীমন্ত। হ্যাঁ—নারীর উপর অত্যাচার! চাঁদ রায়কে তুমি চেনো না মুসলমান! তার যদি একশোটা ছেলে থাকতো, আর সবাই যদি আমার হাতে প্রাণ দিত, সে এক কৌটা চোখের জল ফেলে আবার খাড়া হ'য়ে দাঁড়াতো। এ জগতে তার সবার চেয়ে প্রিয় সমাজ, তার প্রাণপাখী এই সমাজের পিঞ্জরে আবদ্ধ; তাই তার মেয়েকে এনে তার বুকের পাঁজর ভেঙ্গে দিয়েছি।

বান্দা। চাঁদ রায়ের মেয়ে তোমার মেয়ে নয়? এত ভেদজ্ঞান যদি তোমার, কোন্ স্পর্ধায় গুরু হয়েছিলে?

শ্রীমন্ত। বান্দা—

বান্দা। কথা ক'য়ো না ঠাকুর! তোমার সৃষ্টিকর্তার ভুলে তুমি বামুন হ'য়ে জন্মেছ, আমরা সেই ভুল সংশোধন করবো।

শ্রীমন্ত। কি করবে?

বান্দা। তোমায় মুসলমান করবো।

শ্রীমন্ত। কি? কি বললে?

বান্দা। ঠিকই বলছি; জাত তোমার গেছেই। তুমি যখন ঘরের মেয়েকে মুসলমানের হাতে তুলে দিতে চাও, তখন হিন্দু আর তোমার মধ্যে নেই। পৈতেটা তো নিজেই ফেলে দিয়েছ, বাকীটুকু আমরাই ক'রে দিচ্ছি, দাঁড়াও!

শ্রীমন্ত। একটা তুচ্ছ বান্দার এখনও এত স্পর্ধা হয় নি যে, ব্রাহ্মণের ধর্ম নষ্ট করে!

বান্দা। ব্রাহ্মণ যদি ব্রাহ্মণ হয়, তাকে শুধু হিন্দুরাই শ্রদ্ধা করে

না, মুসলমানও তার কাছে মাথা নত করে। কিন্তু তুমি তো ব্রাহ্মণ  
নও, তুমি চণ্ডাল!

শ্রীমন্ত। সাবধান কুকুর!

বান্দা। সাবধান ভণ্ড!

## কেশরীর প্রবেশ।

কেশরী। সোনা কই—সোনা?

বান্দা। কে তুমি?

শ্রীমন্ত। কেশা?

কেশরী। আজ আর কেশা নই, কেশরী—সিংহ। বল ঠাকুর,  
সোনা কোথায়?

শ্রীমন্ত। এখানে নেই।

কেশরী। মিথ্যা কথা! দেখ ঠাকুর, আমার সঙ্গে চালাকি ক'রো  
না বলছি। আমি বন-জঙ্গল মাড়িয়ে, নদী-নালা সাঁতার কেটে উর্দ্ধ্বাসে  
ছুটে আসছি। কোন বাধা আমি মানবো না, সোনাকে আমি নিয়ে  
যাবোই; তাতে যদি তোমার মত ছ' দশটা মানুষের মাথা ছিঁড়ে  
ফেলতে হয়, তাতেও আমি কস্মর করবো না।

শ্রীমন্ত। যাও—যাও, বিরক্ত ক'রো না; আমি এখন অগ্নি কথা  
ভাবছি।

কেশরী। ভাবছো তো, কেমন ক'রে সোনার ধর্মটা ঈশা খাঁর  
পায়ে ডালি দিয়ে নিজের জগ্নু ইয়ারং গড়বে? ভাবছো তো, এই  
খবরটা যখন চাঁদ রায়ের কাছে পৌঁছবে, কেমন ক'রে তার পাঁজরভাঙ্গা  
কান্নায় বনের পাখী কেঁদে উঠবে? ওরে বামুন! এতদিন যার মুন  
খেয়েছে, তার এই সর্বনাশ করতে হাত উঠলো তোমার? না—তুমি

বামুন নও, বামুনের ঘরে তোমার জন্ম হয় নি ; তোমার মা বোধ হয় তোমাকে পথ থেকে কুড়িয়ে এনে পালন করেছিল !

শ্রীমন্ত। স্তব্ধ হও শূদ্র !

কেশরী। শূদ্র আমি না তুমি ? যার রক্ত খেয়েছি, তার গায়ে একটা কাঁটার আঁচড় দিতেও আমার হাত ওঠে না ঠাকুর ! আর তুমি—বোধ হয় তোমার মেয়ে থাকলে তাকেও ঈশা খাঁর পায়ে ডালি দিতে ! যাক, তোমার ব্যবস্থা পরে হবে, এখন সোনাকে পাবো কি না বল ?

শ্রীমন্ত। না, পাবে না।

কেশরী। পাবো না ? তবে আগে তোমার মাথার খুলিটা উড়িয়ে দিই, তারপর—[ যষ্টি উত্তোলন ]

বান্দা। থামো ; সতাই চাঁদ রায়ের কন্যা এখানে নেই ; জাঁহাপনা তাকে সম্মানে শ্রীপুরে পাঠিয়ে দিয়েছেন।

কেশরী। তুমি কে ?

বান্দা। আমি জাঁহাপনার গোলামের গোলাম।

কেশরী। তোমার জাঁহাপনা কোথায় ?

বান্দা। তিনি শ্রীপুর যাত্রা করেছেন।

কেশরী। কারণ ?

বান্দা। যুদ্ধ।

কেশরী। সোনাকে ফিরিয়ে দিয়ে যুদ্ধ ?

বান্দা। কেন নয় ? সোনার সঙ্গে তার শত্রুতা নেই সত্য, কিন্তু চাঁদ রায়ের সঙ্গে শত্রুতা তো মেটে নি হিন্দু !

কেশরী। শুনুছো—শুনুছো বামুন ? শত্রুতা করতে হয় তো এমনি মুখোমুখী—পুরুষে পুরুষে। পুরুষের সঙ্গে না পেরে যারা তোমাদের

মত মেয়েদের নিয়ে টানাটানি করে, তারা বামুন হ'লেও শূদ্রের অধম ।  
মুসলমান ! সহস্র ধত্তবাদ তোমার প্রভুকে, লক্ষ নমস্কার তোমার ধর্মকে ।  
কিন্তু তোমাকে আমি ছাড়বো না বামুন ! তোমার আমি চুলের মুঠি  
ধ'রে রাজার কাছে নিয়ে যাবো ।

শ্রীমন্ত । শূদ্রের এখনও এত ক্ষমতা হয় নি যে, ব্রাহ্মণের গায়ে  
হস্তক্ষেপ করে !

বান্দা । শূদ্রের ক্ষমতা না থাকে, মুসলমানের আছে । শোন ঠাকুর !  
তুমি এখন আমার মুঠোর মধ্যে । আমি ইচ্ছা করলে আজীবন তোমায়  
কারারুদ্ধ ক'রে রাখতে পারি ; ইচ্ছা করলে তোমায় মুসলমান ধর্মে  
দীক্ষিত করতে পারি, কিন্তু তা করবো না । তুমি এমন ভীষণ যে, তুমি  
মুসলমান হ'লে মুসলমান ধর্মটাই বিসাক্ত হ'য়ে উঠবে, আর তোমার  
উপর্যুক্ত কারাগারও এ রাজ্যে নেই । আমি তোমায় মুক্তি দেবো ; কিন্তু  
তার পূর্বে তোমার ঐ ভয়ঙ্কর চোখ দু'টো আমি উপড়ে নেবো, যাতে  
কোন দিন আর কারও সর্বনাশ করতে না পার ।

শ্রীমন্ত । কি বললে ? আমার চোখ উপড়ে নেবে ? এসো—এগিয়ে  
এসো, দেখি আমার গায়ে একটা কাঁটার আঁচড় দেবার সঙ্গে সঙ্গে  
তোমার হাত দু'টো দগ্ধ হ'য়ে যায় কি না !

বান্দা । ভাল, পরীক্ষাই হোক তবে—[ শ্রীমন্তকে ধরিতে অগ্রসর  
হইল । ]

কেশরী । [ মধ্যে দাঁড়াইয়া ] খবরদার ! শত্রু আমাদের, শাস্তি দিতে  
হয় আমরা দেবো, তুমি চোখ রাঙাবার কে ?

বান্দা । বন্দী আমাদের ; মুক্তি দিতে হয় আমরা দেবো, তুমি কথা  
বলবার কে ?

কেশরী । আমি পাগলা হাতী ।

বান্দা। আমি বুন্দো বাঘ।

কেশরী। নিজের মাংস ছিঁড়ে খাও। মনে করেছে, আমার সামনে তুমি এই বাঘুনের উপর অত্যাচার করবে? তা হয় না মুসলমান! সত্য এ আমাদের পরম শত্রু, তা হ'লেও একদিন এ আমাদের গুরু ছিল, এর পায়ে গোটা রাজ্যটা মাথা নোয়াতো। তোমার হাতে এর অপমান আমি সহিবো না। চোখ উপড়ে নিতে হয়, আমরা নেবো; গলা টিপে মারতে হয়, আমরা মারবো। তুমি পর—তুমি শত্রু, তোমার সাহায্য নিয়ে ঘরের শত্রুকে দমন করবো না। চাঁদ রায় সহস্র দুঃখে জর্জরিত হ'লেও চাঁদ রায়।

শ্রীমন্ত। আর এই ব্রাহ্মণ এই দুর্দিনেও ব্রাহ্মণ। [প্রস্থান।

বান্দা। এই দর্পেই হিন্দু রসাতলে গেল। অসহায় আর্তনাদে আকাশ বিদীর্ণ করবে তোমরা, তবু পরের সাহায্য নেবে না। গৃহ-শত্রুর হাতে ঘরের মেয়ের লাঞ্ছনা তোমরা সহিতে পার, তবু পরে তাকে স্পর্শ করলে তোমাদের জাত যায়। মনে কবেছ কি হিন্দু, এই ব্রাহ্মণ এইখানেই নিরস্ত হবে? না—সে সোনাকে হয় তো আবার নির্যাতন করবে!

কেশরী। চাঁদ রায়ের কবল থেকে টেনে এনে?

বান্দা। চাঁদ রায়ের আশ্রয়ে সে আর নেই হিন্দু! চাঁদ রায় অপছন্দতা কতাকে গ্রহণ করেন নি।

কেশরী। সে কি? সোনা তা হ'লে এখন—

বান্দা। পথে পথে বিচরণ করছে, অরক্ষিত—অসহায়—[প্রস্থান।

কেশরী। মহারাজ চাঁদ রায়! তুমি এমন নিষ্ঠুর? অসার সমাজের জন্তু অভাগা মেয়েটাকে ডালি দিলে? [প্রস্থান।

## দ্বিতীয় দৃশ্য :

শ্রীপুর-রাজপ্রাসাদ—মন্দিরসম্মুখ ।

চাঁদ রায় একাকী ।

[ চাঁদ রায়ের সে স্নগঠিত দেহ আব নেই, জরা আসিয়া স্বে দেহের  
সবটুকু লাভণ্য হরণ করিয়া লইয়াছে ; চক্ষু কোটরগত,  
মুখে কালিমা, ললাটে চিন্তার রেখা । ]

চাঁদ । আস্ছে—আস্ছে, ধীর পাদক্ষেপে মৃত্যু এগিয়ে আস্ছে ।  
এসো বন্ধু ! এসো দয়াল ! এসো সর্বসম্বাপহাবী বম্ ! আমি বাহ  
বাড়িয়েছি, আমার আলিঙ্গন কর । আস্তে—আস্তে ! এত জোরে পা  
ফেলো না বন্ধু ! আমার সোনা অনেক কৈঁদে কৈঁদে ঘুমিয়েছে, ডুক্রে  
কৈঁদে উঠবে । ওহো-হো, আমার সোনা—আমার কোটীশ্বর—

ভবানীর প্রবেশ ।

ভবানী । রাজা ! রাজা ! এ কি, আবার তুমি বেরিয়ে এসেছ ?  
নাঃ—আর তোমায় বাঁচাতে পারলুম না !

চাঁদ । চুপ্—চুপ্ ! সোনা ঘুমুচ্ছে, জেগে উঠবে ।

ভবানী । আবার সোনা, আবার কোটীশ্বর ? এসো—এসো—

চাঁদ । আরে দূর, টানে দেখ না ! র'সো, আমি একটা মৎসব  
ঠাউরেছি । সোনার সঙ্গে কোটীশ্বরের বিয়ে দেবো, তা হ'লে আর  
সোনা বিধবা হবে না, আর কেউ তাকে চুরি ক'রে নিয়ে পালাতে  
পারবে না ।



ভবানী । ওঃ—কোটিশ্বর ! এতখানি ভালবাসার কোন প্রতিদান দিলে না ঠাকুর ? অভিমানে পালিয়ে গেলে ? [ চাঁদ রায়ের প্রতি ] কোটিশ্বরকে দেখবে ?

চাঁদ । এ্যা ! কই—কই, কই আমার কোটিশ্বর ?

ভবানী । যদি দেখতে পাও, আর পাগল হবে না ? বল ; তা হ'লে যেখান থেকে পারি, কোটিশ্বরকে এনে দেবো ।

চাঁদ । দাও—এনে দাও । না, আমি পাগল হবো না । কোটিশ্বর ! আমায় পাগল ক'রো না । কই—কই কোটিশ্বর ?

## গীতকণ্ঠে চম্পকের প্রবেশ ।

চম্পক ।—

### গীত ।

পালিয়ে গেছে নিষ্ঠুর কালা আঁধার ক'রে বৃন্দাবনে,  
মিছে তারে খুঁজে ফেরে খেলার সাথী বনে বনে ।  
বাজে না আর যোহন বেণু, চরে না আর গোষ্ঠে ধেনু,  
যমুনা আর বয় না উজান পাগল করা বাঁশীর স্বরে ।  
আয় রে ফিরে আয় রে কালা, শুকিয়ে গেল ফুলের মালা,  
কৈদে কৈদে অমানিশা নাম্‌লো যে হায় দু'নয়নে ।

চাঁদ । কে গো ? তুমি কে ? তুমি কি আমার কোটিশ্বর ?

চম্পক । জ্যাঠামশায়—[ কাঁদিয়া ফেলিল । ]

ভবানী । কাঁদিস্‌নে বাবা, কাঁদিস্‌নে । এখনও যে অনেক দেখতে হবে—অনেক সহিতে হবে ; এই তো সবে আরম্ভ ! এত বড় বংশ দেশের চক্ষে আজ কলঙ্কিত, এমন সপ্তপুরুষের বিগ্রহ অকারণে আমাদের ছেড়ে চ'লে গেছে, বাঙ্গলার গৌরব-মুকুট—যার নামে গোটা দেশটা

সসম্মুখে শির নত করে, তার আজ এই অবস্থা ! বাইরে শত্রু যুদ্ধমুহুর্তে ছকার দিচ্ছে, তবু নির্বিকার ! সৈন্য নেই—রসদ নেই—নগর জুড়ে অভাবের আর্তনাদ ! কোথায় দাঁড়িয়ে আছি, জানিস্ না বালক ? সব যাবে—কেউ থাকবে না । কাঁদবার সময় অনেক পাবি চম্পক ! যদি পারিস্, কোটীশ্বরকে সন্ধান ক’রে নিয়ে আয়, এই মৃত্যুপথযাত্রীর অন্তর্বেদনা একটু শীতল হোক ।

চম্পক । কোথা থেকে আনবো মা ?

ভবানী । জানি না ; তুই পুরুষ, এ কথা আমার জিজ্ঞাসা করছিস্ ? সন্ধান কর—আকুলস্বরে ডাক ; যেথান থেকে হোক—যেমন ক’রে হোক, আনতে পারবি নে বাবা ?

চম্পক । পারবো । ই্যা মা, তা হ’লে জ্যাঠামশায় ভাল হবে ? আচ্ছা, আমি তবে যাই মা ! কোটীশ্বরকে না নিয়ে আমি ফিরবো না ।

ভবানী । চম্পক ! না, থাক ; সোনা গেছে, কাঞ্চন গেছে, তুই আমার কাছে থাক, নইলে বুকটা ফেটে যাবে । আয়—কাছে আয়—

চম্পক । না মা, আমি কোটীশ্বরকে না এনে আর তোমার কোলে উঠবো না । [ প্রস্থান ।

ভবানী । চম্পক—চম্পক,—

চাঁদ । চুপ্—চুপ্, সোনা ঘুমুচ্ছে—

ভবানী । ওমা, আমার কি হ’লো ? আমার বুকটা এমন ক’রে উঠলো কেন ? ভগবান ! সব ছিনিয়ে নিলে—সব ছিনিয়ে নিলে ?

কেদার রায়ের প্রবেশ ।

কেদার । মহারাজ—

চাঁদ । কে, কেদার ? সমাজটা এমন মানুষের বৃকের উপর পাহাড়ের

## টাদের মেয়ে

[ চতুর্থ অঙ্ক ।

মত চেপে ব'সে থাকে কেন কেদার ? টেনে সরিয়ে দিতে পারিস্ ?  
নিঃশ্বাস ফেলতে পারি নি যে ! উঃ—উঃ, আমার সোনা—আমার  
কোটিশ্বর—

কেদার । দাদা ! যদি অনুমতি কর, সোনাকে ফিরিয়ে আনি—  
টাদ । না-না-না ; ওই দেখ্, সমাজটা কট্‌মট্‌ ক'রে তাকাচ্ছে ; কি  
ভীষণ ওর চোখ ছটো ! পালিয়ে আয় কেদার—পালিয়ে আয়—  
[ প্রস্থান ।

কেদার । মহারাণী ! অনুমতি দাও, সোনাকে ফিরিয়ে আনি—  
ভবানী । না ।

কেদার । না ? এখনও তুমি আমায় অনুমতি দেবে না ? দেখ্‌ছো  
রাজার অবস্থা ? সোনা যদি না আসে, রাজাকে কেউ বাঁচাতে পারবে  
না ।

ভবানী । জানি ; তবু তার ফেরা হবে না ।

কেদার । স্বামীর মরামুখ দেখ্‌বে, তবু সমাজের মোহ ঘুচবে না ?  
কেন তুমি এমন পাষণ হ'লে মহারাণী ?

ভবানী । আমি যে সহধর্মিণী ; পাপ পুণ্য জানি না, স্বামীর বিধানই  
আমার ধর্ম ।

কেদার । থাকো তুমি তোমার ধর্ম নিয়ে ; আমি যেমন ক'রে হোক,  
সোনাকে ফিরিয়ে আনবো । অমন সহস্র সমাজের চেয়ে আমার ভাই  
অনেক বড় । আমি চল্লুম মহারাণী—

ভবানী । তার পূর্বে আমাদের বিদায় দিয়ে যাও ; স্বামীর বিধান  
যেখানে পদদলিত, সে গৃহ আমার জন্ত নয় ।

কেদার । ওঃ—এই নারীই সংসারে যত অনর্থের মূল । তবে আর  
কি ? বৈধব্যের জন্ত প্রস্তুত হ'য়ে থাকো । সাবধান ! তখন যদি এক

কোঁটা চোখের জল পড়ে, আমি অভিশাপ দেবো ; রসনা যদি আর্তনাদ করে, কর্ত্তে বিষ ঢেলে দেবো । রাজা ! তোমায় বাঁচতে দিলে না তোমারই সহধর্ম্মিণী ।

### কেশার মার প্রবেশ ।

কেশার মা । ও কেদার ! শীগ্গিরি আয়, মুখপোড়ারা রাজবাড়ী ঘিরেছে যে !

কেদার । কি ? কি ? কারা ?

কেশার মা । ঐ ঈশা খাঁর সৈন্ত ।

কেদার । রাজপ্রাসাদ বেঁঠন করেছে ? বল কি মা ? আমাদের সৈন্তগুলো কি সব মরেছে ?

### আলেক্সার প্রবেশ ।

আলেক্সা । মরে নি, তবে তাদের মরাই ভাল ছিল । সবাই মিলে তারা শত্রুপক্ষে যোগ দিয়েছে ।

কেদার । ওঃ, রাজা—রাজা ! তোমার চোখে আজ আর অগ্নি-বুষ্টি হয় না—তোমার কণ্ঠ আর সিংহের মত হুঙ্কার দেয় না, তাই আজ সব শত্রু হ'য়ে দাঁড়িয়েছে । ভালই হয়েছে—তুমি উন্মাদ হয়েছে, নইলে এই বিশ্বাসঘাতকতা তুমি সহ করতে পারতে না । মা ! আমায় দেখিয়ে দিতে পার, কোন্ দিকে আছে তারা ? আমি তাদের অস্ত্র ধরতে শিখিয়েছি, একবার তাদের সাম্নে গিয়ে আমি দাঁড়াবো, দেখি কেমন ক'রে তারা আমার কাঁধের উপর তরবারি তোলে !

কেশার মা । না—না কেদার ! ওদের সাম্নে গিয়ে তোমায় আমি দাঁড়াতে দেবো না । কাঞ্চন গেছে, সোনা গেছে, চাঁদও যাবার পথে ;

তার উপর তোমাকে আর আমি যমের মুখে এগিয়ে দিতে পারবো না। তার চেয়ে আমার একটা লাঠি দে, ফটক খুলে বাইরে গিয়ে দেখি, কে কত বড় বীর!

আলোয়া। তুমি যাবে?

কেশার মা। যাবো না? আমার চোখের উপর ছ' ছ'টো ছেলে শত্রুর হাতে প্রাণ দেবে, আর আমি দাঁড়িয়ে দেখবো? ভাবিস্‌নে কেদার! আমার এই বুড়ো হাড়ে এখনও এমন শক্তি আছে যে, ঈশা খাঁর মত চারটে মরদকে আমি এক লাঠিতেই শুইয়ে দেবো। আর যদি মরি, বুড়ো মানুষ, ছুঃখ করিস্‌নে, হাড় ক'খানা টেনে কালীগঙ্গার জলে ফেলে দিস্‌।

কেদার। মা! বাদেবর হাতে ধ'রে শিখিয়েছি, তারা আজ আমার পর; আর তুমি এই জীর্ণ দেহটা দিয়ে আমার ঘিরে রাখতে চাও?

কেশার মা। আমি যে মা!

ভবানী। সত্যি তুমি মা; এতখানি স্নেহ গর্ভধারিণী মায়েরও বুঝি থাকে না!

কেদার। কিন্তু তোমাকে তো যেতে দেবো না মা! তুমি চাঁদ রায় কেদার রায়ের ধাত্রী—তাদের মা। তারা বেঁচে থাকতে তুমি কেন শত্রুর সম্মুখে দাঁড়াবে? না—তা হয় না। জানি, সবাই মরবে, তবু আমি যতক্ষণ আছি, একটু নিঃশ্বাস ফেলে নাও; তারপর কে কোথায় থাকবে, বলতে পারি না। জয় মহারাজ চাঁদ রায়ের জয়—জয় মহারাজ চাঁদ রায়ের জয়! [প্রস্থানোত্তত]

আলোয়া। একটা কথা; আমি কি এমনি ক'রেই প্রাসাদে রুদ্ধ হ'য়ে থাকবো? আমার উপর কি কারও কোন আদেশ নেই? হয় মুক্তি, না হয় দণ্ড?

কেদার । ঠিক বলেছ, তোমার একটা কিছু ক'রে যেতে হবে ।  
মা ! কি করবো বল তো ?

কেশার মা । কি করবি, তা আবার ব'লে দিতে হবে ? এ ঈশা  
খাঁর ভাই নয় ? সেই ঈশা খাঁ, যে তোদের স্নেহের সংসারে আগুন  
ধরিয়ে দিয়েছে । গলা টিপে মার, না হয় জ্যান্ত পুঁতে ফেল !

কেদার । না, অতটা নৃশংস মৃত্যু তোমায় দেবো না । তবে মুক্তি  
তোমায় দেবো বালক । এমন মুক্তি, যার পরে আর বন্ধন থাকে  
না । ঈশা খাঁর চোখের উপরে তোমায় প্রাসাদের চূড়ায় দাড়া করিয়ে  
তোমার মাথাটা দেহচ্যুত ক'বে ঈশা খাঁর সামনে ফেলে দেবো ।  
আমরা তো ম'বেইছি, ঈশা খাঁও বুকটা ভেঙ্গে চৌচির ক'রে দিয়ে যাবো ।

আলিয়া । তাই কর হিন্দু ! আমার মৃত্যুতে ঈশা খাঁর অপরাধের  
প্রায়শ্চিত্ত হোক ।

কেদার । এসো তবে বালক, মুক্তি নেবে এসো—

ভবানী । না—আমি যেতে দেবো না । আমার বুকে যতই দুঃখ  
জমা থাক, যত অপরাধই করুক ঈশা খাঁ, এই নিষ্পাপ বালককে আমি  
কিছুতেই হত্যা করতে দেবো না । আয় তো বাবা—আয় তো, দেখি  
কে আমার বুক থেকে তোকে ছিনিয়ে নেয় ? ঈশা খাঁ আমার শত্রু  
হ'লেও তুমি আমার পরম বান্ধব ।

আলিয়া । মহারানী ! আমার মা নেই, আজ হ'তে তুমিই আমার  
মা—[ জড়াইয়া ধরিল । ]

ভবানী । জয় করেছি—জয় করেছি । দেবর ! ঈশা খাঁকে ডাকো,  
দেখে যাক সে, তার সব শত্রুতার কণ্ঠরোধ ক'রে দিয়েছি ।

কেদার । এ উচ্ছ্বাসের সময় নয় মহারানী ! বাইরে অসংখ্য শত্রু,  
আমরা নিঃসহায়—সৈন্য নেই—রসদ নেই ; ঈশা খাঁর বাহু ভেঙ্গে দেবার

## চাঁদের মেয়ে

[ চতুর্থ অঙ্ক ।

এই একমাত্র সুযোগ। সে আমাদের সর্বস্বাস্ত করেছে, প্রতারণায় আমার সৈন্যদের আয়ত্ত করেছে; কিসের মিত্রতা তার সঙ্গে?

কেশার মা। ছাড়ো বোমা! আয় ছোঁড়া—আয়—[ আলেয়ার কেশাকর্ষণ করিলে, আলেয়ার স্বরূপ বাহির হইয়া পড়িল। ]

সকলে। এ কি?

ভবানী। কে তুমি?

আলেয়া। ছিলুম ঈশা খাঁর বোন, এখন তোমার কন্যা। মা! আমিই তোমার সোনা।

ভবানী। আঃ, এমনি ছিল সে।

কেশার মা। গ'লে গেলি কেদার?

কেদার। মা! হিন্দু মুসলমানের এমন তীর্থ দেখেছ? দেখ—দেখ, বিষাদের ঘন মেঘে কি বিদ্যুতের রেখা, দুঃখের মরুভূমিতে কি শান্তির প্রস্রবণ! এই তো জয়! কে বলে আমরা নিঃস্ব? এত বড় জয় ঈশা খাঁ স্বপ্নেও দেখে নি।

আলেয়া। আমার হত্যা করবে না বীর?

কেদার। না মা, ভুল বলেছি। তুমি তো শত্রু নও; তুমি অতিথি—হিন্দুর নারায়ণ। এসো মা, এস হিন্দুর জাগ্রত দেবতা, মরার পূর্বে চোখের জলে তোমায় অভ্যর্থনা ক'রে যাচ্ছি। যে দিন এই প্রাসাদের সঙ্গে আমাদের অস্তিত্ব লোপ পেয়ে যাবে, সে দিন তোমার ভাইকে গিয়ে ব'লো—হিন্দু এমনি ছিল। [ কেশার মার প্রতি ] এসো মা, তোরগদ্বারে আমি কামান নিয়ে থাকবো, তুমি থাকবে অন্দরের দ্বারে।

আলেয়া। আর আমি রইলুম প্রাসাদের চূড়ায়; যাও বীর, নির্ভয়!

কেদার। জয় চাঁদ রায়ের জয়! জয় চাঁদ রায়ের জয়!

[ প্রস্থান।

তৃতীয় দৃশ্য । ]

চাঁদের মেয়ে

নেপথ্যে । আল্লা—আল্লা—আল্লা হো—

ভবানী । এসো মা—

[ আলিয়া সহ প্রস্থান ।

কেশব মা । হাতোব গোষ্ঠীব পিণ্ডি !

[ প্রস্থান ।

## তৃতীয় দৃশ্য :

শ্রীপুত্র—প্রাসাদসম্মুখ ।

চম্পকের প্রবেশ ।

চম্পক । কোটীশ্বর । কোটীশ্বর ! কই তুমি কোটীশ্বর ? ফিবে এসো , তোমায না পেলো জ্যাঠামশায় যে বাঁচবে না ! আমি যে মাকে ব'লে এসেছি, তোমায নিয়ে ফিবে যাবো । এত ডাকছি, তবু তুমি ফিবে আসলে না ? তবে আব আমি ফিববো না, এইখানে অনাহাবে অনিদ্রায শুকিয়ে মববো

## গীত :

আর খেলিতে পারি না একা ।

চরণে অরণে জীবন দানিব, যদি নাহি পাই দেখা ।

আকুল আমার আবাহনে যদি আসন নাহিক টলে,

আঁধিনীয়ে মোর সাগর সজ্জিয়া ডুবিয়া মরিব জলে,

কলঙ্কে তোমার ভরিবে ধরণী, কেহ ডাকিবে না গুণে গুণমণি,

মুছে যাবে তব ধরাবুক হ'তে দয়াল নাগের রেখা ।



কোটিশ্বরকে লইয়া গীতকণ্ঠে রাখালবালকের  
প্রবেশ ।

রাখালবালক ।—

গীত ।

ধুলো ঝেড়ে বুকে নে বে খেলার সাথী এলো ফিরে ।

অভিমানে ফেরাস্ নে মুখ, ভাসিস্ নে আর অশ্রুণীয়ে ।

চম্পক । এই তো—এই তো কোটিশ্বর ! কোথায় পেলে তুমি ভাই ?

রাখালবালক ।—

পূর্ব গীতাংশ ।

অবহেলাব নদীর কূলে কাঁদছিল নে আপন ভূলে,

পথের যত ধুলো কান্না লেগেছে ওর কালো চুলে,

যা নিয়ে যা আপন ঘরে, বিরহে ওর অশ্রু ঝরে,

ধুয়ে দে ওর গায়ের মাটি আপনারি বক্ষ চিরে ।

[ কোটিশ্বরকে দিয়া প্রস্থান ।

চম্পক । কেন পালিয়েছিলে ছুটু ? না খেয়ে মরছিলে তো ? ধ'রে  
খুব ঠেঙ্গিয়েছে ? খুব করেছে । যেমনি পাজী তুমি, তেমনি সাজা  
পেয়েছ । এলে কেন ? কে পায়ে ধ'রে সেধেছিল ? ওঃ, আবার চোখ  
ছল্-ছল্ করছে ! দিই ফেলে ? দিই ? না—না, ফেলবো না—ফেলবো  
না ; চল—ঘরে যাই ! একি, কারা ও কালো কালো মানুষ রাজবাড়ী ঘিরে  
দাঁড়িয়ে আছে ? তাই তো, কি ক'রে ভিতরে যাই ? উপায় কর—  
উপায় কর কোটিশ্বর !

## শ্রীমন্তের প্রবেশ ।

শ্রীমন্ত । কে তুমি বালক, কোটীশ্বরকে ডাকছো? কে—চম্পক?  
কেদার রায়ের ছেলে? থোকা—থোকা! পেয়েছি—

চম্পক । গুরুদেব!

শ্রীমন্ত । চুপ! কে কার গুরুদেব? তোরা শিকার—আমি ব্যাধ,  
তোদের সঙ্গে আমার খাণ্ড-খাদকের সম্পর্ক। বলি, তোর হাতে ও কি?

চম্পক । কোটীশ্বর।

শ্রীমন্ত । এঁ্যা—কোটীশ্বরের বিগ্রহ! সেই কোটীশ্বর, যে আমার  
স্বর্গে তুলে দিয়ে নরকের গহবরে নিক্ষেপ করেছে, আমায় সোনার  
সিংহাসনে বসিয়ে আজ বৃক্ষতলে দাঁড় করিয়েছে? কত নিশীথের  
স্বপ্ন, কত দিবসের চিন্তা আমার ঐ দারুমূর্তির সঙ্গে জড়িয়ে আছে।  
ও আমার দুর্জয় শত্রু! আমি ওকে টুকবো-টুকবো ক'রে ধুলোয়  
মিশিয়ে দেবো। দে—দে, তোদের ঐ স্বার্থপর দেবতার মাথাটা আমি  
গুঁড়ো ক'রে ফেলি—

চম্পক । না-না-না, আমি কিছুতেই দেবো না। কোটীশ্বরের শোকে  
জ্যাঠামশায় পাগল হয়েছে, ওকে না পেলে কেঁদে কেঁদে ম'রে যাবে।

শ্রীমন্ত । মরুক, তার মরাই আমি চাই!

চম্পক । কেন পাষণ, কেন? তুমি আমার দিদিকে ঘরছাড়া  
করেছ—দাদাকে পর ক'রে দিয়েছ—জ্যাঠামশায়কে পাগল ক'রে তুলেছ,  
তার উপর আবার তার মৃত্যু চাও? গিয়ে দেখে এসো তার অবস্থা,  
চোখ ফেটে রক্ত বেরবে। এত দুঃখ দিয়েও তোমার শান্তি হবে না?

শ্রীমন্ত । না, হবে না; আমার অভাগা ছেলেটা যে পথে গেছে,  
তোদের সবাইকে সে পথে ঠেলে দিতে না পারলে আমার শান্তি হবে না।

চম্পক । কেন ? আমরা কি তোমার কাছে এতই অপরাধ করেছি ?  
তুমিই কি সারাজীবন আমাদের হুঁহাত ভ'রে দিয়েছ, আমরা কি তোমার  
কিছুই করি নি ?

শ্রীমন্ত । চম্পক !

চম্পক । স'রে যাও—স'রে যাও, তোমার নিঃশ্বাসে কোটীশ্বরের  
মুখখানা শুকিয়ে গেছে ।

শ্রীমন্ত । আমার ছেলেটা যখন না খেয়ে ম'রে গেল, তখন তো  
ওর মুখটা শুকিয়ে যায় নি ? অথচ আমি সারা জীবন ওর পায়ে ফুল  
জল দিয়েছি। দে—দে, আমিই ওর মধ্যে প্রাণপ্রতিষ্ঠা করেছিলুম,  
আমিই আজ ওকে চূর্ণ করবো—

চম্পক । না—না, দোহাই তোমার ! আমাকে মার, ওর গায়ে  
হাত দিও না—[ শ্রীমন্ত তাহার হাত হইতে বিগ্রহ ছিনাইয়া লইল । ]  
উঃ, তও—পশু—জল্লাদ—

শ্রীমন্ত । বটে, আমি জল্লাদ ? তবে তোকেই আগে শেষ করি  
আয়—[ চম্পকের মস্তকে দারুমূর্তি দ্বারা আঘাত করিল । ]

চম্পক । উঃ, মাগো—[ পড়িয়া গেল ও মাথা ফাটিয়া রক্তের ধারা  
বহিতে লাগিল । ]

শ্রীমন্ত । হাঃ-হাঃ-হাঃ ! প্রতিশোধ—প্রতিশোধ ! থোকা ! তৃপ্ত হ' !

চম্পক । গুরু ! আমার মেরেছে—মেরেছ, কোটীশ্বরের অপমান  
ক'রো না ; তাকে রাজবাড়ীতে পৌছে দিও । আমি মার কাছে শপথ  
ক'রে এসেছিলুম, হ'লো না—হ'লো না—

শ্রীমন্ত । চম্পক !

চম্পক । কি করলে গুরু ? আমার মরার খবর যে মুহূর্ত্তে রাজ-  
বাড়ীতে পৌছাবে, সেই মুহূর্ত্তে তোমার মাথা নিতে দেশে দেশে লোক

ছুটবে; কেউ তোমায় বাঁচাতে পারবে না। উঃ—মাগো, মা আমার! জন্ম-জন্মান্তরের আরাধ্যা দেবী! বিদায়—বিদায়! কোটীশ্বর! আমি যাই, তোমার মান তুমি বেথো—[মৃত্যু]

শ্রীমন্ত। প্রতিশোধ—চূড়ান্ত প্রতিশোধ! কেদার রায়! এইবার দেখবো তুমি কত বড় বীর! হ্যাঁ, এইবার তোমার পালা কোটীশ্বর—

### কুঠারহস্তে দেবলের প্রবেশ।

দেবল। কই কোটীশ্বর? চালা করবো, চ্যা—একি, দাদা? তুমি এখানে! শ্রীপবে ফিরে আসতে সাহস হ'লো? বৃকের পাটা তো খুব!

শ্রীমন্ত। যাও—যাও, বিবরু ক'রো না মুর্থ!

দেবল। সত্যি দাদা, আমি মুর্থ, কিন্তু তোমার মত পশু নই।

শ্রীমন্ত। কি? কি বললি?

দেবল। আমি কি একা বলছি? রাজ্যি শুদ্ধু সবাই এ কথা বলছে। করলে কি দাদা? বামুনের মুখ পুড়িয়ে দিলে! আমি তো মুখ্য, তোমাকে দাদা ব'লে ডাকতে আমারও লজ্জা হ'চ্ছে।

শ্রীমন্ত। ডাকিস্ নে—ডাকিস্ নে, যা—

দেবল। যাচ্ছি; কিন্তু যাবার আগে আমার ইচ্ছে হ'চ্ছে, তোমার মাথাটা গুঁড়িয়ে দিয়ে চ'লে যাই।

শ্রীমন্ত। দে—সাধ্য থাকে দে!

দেবল। সাধ্য ছিল, বাধা দিচ্ছে শুধু ঐ “ভাই” সম্বোধনটা।

শ্রীমন্ত। ভুলে যা ও সম্বন্ধ।

দেবল। তুমি ভুলে যেতে পার। তুমি যখন অমন চাঁদ রায়েরই শত্রু হ'য়ে দাঁড়িয়েছ, তখন আমাকে ভুলবে, সে আর বেশী কি? কিন্তু

## চাঁদের মেয়ে

[ চতুর্থ অঙ্ক ।

আমি যে ভুলতে পারছি না যে, তুমি আমার জ্ঞাতি । লোক যতবারই তোমায় গালাগাল দেয়, ততবারই আমার বুকটা ভেঙ্গে যায় । দাদা—

শ্রীমন্ত । চুপ, কথা বলিস্ নে, তা হ'লে তোকেও ঐ চম্পকের পথে যেতে হবে ।

দেবল । কে—কে ও ? চম্পক ? এ্যা ! এ যে রক্তের নদী ব'য়ে যাচ্ছে ! কি হয়েছে যাছ ? কেন গোপাল, এমন ধূলোয় শুয়ে আছ ? ওঠ—ওঠ ! এ কি, এ যে অসাড়—নিঃশ্বাস পড়ছে না ! আহা-হা, কে মারলে তোমায় মাণিক ?

শ্রীমন্ত । আমি ।

দেবল । তুমি ? দাদা ! সত্যি তুমি এই শিশুকে মেবে ফেলেছ ? কেন ? ও তোমার পায়ে কি দোষ করেছিল ?

শ্রীমন্ত । আমার ছেলে কেদার রায়ের কাছে কি দোষ করেছিল ?

দেবল । তোমার ছেলে আর কেদার রায়ের ছেলেতে অনেক তফাৎ । তোমার ছেলের মত ছাগলছানা লাখে লাখে জন্মায়, কিন্তু এ যে আর হবে না দাদা !

শ্রীমন্ত । তবে আর কি ? বুক চাপড়ে কাঁদ, চাঁদ রায় কেদার রায়ের পায়ের ধূলা অঙ্গে মেখে বিশ্বময় তাদের গুণগান ক'রে বেড়াও !

দেবল । তাই যাবো ; কিন্তু তার আগে এ পাপের শাস্তি দিয়ে যাবো । তুমি ওর মাথাটা যেমন ক'রে ভেঙ্গেছ, তোমার মাথাটা আমি তেমনি ক'রে ভাঙবো—[ কুঠার উত্তোলন । ]

শ্রীমন্ত । যা—যা, রাজবংশের পদলেহন করুগে যা । প্রতিশোধ—  
প্রতিশোধ ! হাঃ-হাঃ-হাঃ !

[ প্রস্থান ।

দেবল । ওঃ, বায়ুনের ঘরে এমন পণ্ডও জন্মায় ! ওঠ যাছ ! ওঠ মাণিক !

ঘর ছেড়ে কেন রাস্তার ধূলোয় গড়াগড়ি দিচ্ছ দন? এসো—এসো, আমার ভাই তোমার মাথা ভেঙ্গে রক্তের নদী বইয়েছে, আমি চোখের জলে সে রক্ত ধুয়ে দিই। [মৃতদেহ স্বন্ধে তুলিয়া লইল।] ওরে আকাশ! একটু জল ঢেলে দে, এত রক্ত যে চোখের জলে ধুয়ে যায় না। ওরে, কে তোরা ডাকাতের দল! পথ ছেড়ে দে—হাতের অস্ত্র ছুঁড়ে ফেল; কেদার রায়ের ছেলে মরেছে, আজ পৃথিবীর ভূমিকম্প—

[প্রস্থান।

### ঈশা খাঁ ও এনায়েতের প্রবেশ।

ঈশা খাঁ। শুনেছ এনায়েৎ, বাহার আমার বেগম হ'তে এসেছিল?

এনায়েৎ। কেন?

ঈশা খাঁ। বড় সুন্দরী কি না, গরীব খসমকে আর পছন্দ হ'চ্ছে না।

এনায়েৎ। তারপর?

ঈশা খাঁ। আমি তার সৌন্দর্যটা একটু কমিয়ে দিয়ে ছেড়ে দিয়েছি। তার সুন্দর নাকটা একটু ছোট ক'রে দিয়েছি। কি বল, এবার বোধ হয় সে স্বামীর ঘর করতে পারবে? কিন্তু এত গোলা কোথা থেকে আসছে? তাই তো এনায়েৎ! শ্রীপুরের সমস্ত সৈন্ত আমাদের সঙ্গে যোগ দিয়েছে, প্রাসাদে যোদ্ধা নেই, তবু তারা মুহুমুহঃ গোলাবর্ষণ করছে? চাঁদ রায় কেদার রায় কি সমস্ত প্রাসাদটা জুড়ে ব'সে আছে? ওঃ—এই সাত দিনে আমি আমার অর্দ্ধেক সৈন্ত হারিয়েছি। কোথায় কাঞ্চন, কোথায় আলেয়া?

এনায়েৎ। কাঞ্চন প্রাসাদে নেই।

ঈশা খাঁ। নেই? বল কি এনায়েৎ? তা হ'লে রাজপ্রাসাদ

সমভূমি করলেও আলোয়াকে ফিবে পাবো না? কোথায় গেছে তারা, বলতে পার?

এনায়েৎ । না ।

ঈশা খাঁ । এ কথা আমার এতদিন বল নি কেন?

এনায়েৎ । বললে তুমি হয় তো আব অগ্রসর হ'তে না ।

ঈশা খাঁ । আলেয়া আগে, না যুদ্ধ আগে? কি ফল আমার সৈন্যসংগ্রাম ক'বে, যদি আলেয়াকেই ফিরে না পাই?

এনায়েৎ । প্রতিশোধ নেবে না হিন্দুব উপর?

ঈশা খাঁ । কেন বল তো এনায়েৎ, হিন্দুব উপর তোমার এ বিদ্বেষ?

এনায়েৎ । কেন, তুমি তা বুঝবে না ঈশা খাঁ! এই হিন্দুসমাজ আমার জীবনটা বিষময় করেছে । আমিও একদিন হিন্দু ছিলাম, আমার ধমনীতে এখনও রাজপুতের বক্ত বইছে ।

ঈশা খাঁ । [ সবিম্বয়ে ] রাজপুত? হিন্দু? বল কি এনায়েৎ? কোথায় তোমার জন্মভূমি?

এনায়েৎ । মিবাব ।

ঈশা খাঁ । মিবাব? মিবাবের রাজপুত তুমি—এইখানে এইভাবে!

এনায়েৎ । হ্যাঁ ঈশা খাঁ! যার জন্ত জীবনের মধুময় বসন্তে আমার আশা-আকাঙ্ক্ষার রঙিন গোলাপের দল শুকিয়ে ঝরে পড়েছে, আমার সেই নিরুদ্দিষ্টা স্ত্রীকে খুঁজতে খুঁজতে বাঙলায় এসে পড়েছি ।

ঈশা খাঁ । এনায়েৎ! তুমি কি—তুমি কি তবে—কি নাম ছিল তোমার?

এনায়েৎ । জয়সিংহ ।

ঈশা খাঁ । জয়সিংহ? তোমার স্ত্রীর নাম সত্যবতী না?

এনায়েৎ । হ্যাঁ—হ্যাঁ; তাকে জান? কোথায় সে—কোথায় সত্যবতী?

তৃতীয় দৃশ্য । ]

টাদেব মেব

ঈশা খাঁ । হারিয়ে ফেলেছি, খুঁজে নাও বন্ধু ! তোমার স্ত্রী আমারই ভগ্নী আলেয়া ।

এনায়েৎ । খোদা ! খোদা ! তবে আমার চেষ্টা নিষ্ফল কর নি ।  
ঈশা খাঁ ! এ কি আনন্দ—এ কি বেদনা, তোমার ভগ্নী আলেয়া আমার স্ত্রী ? কাঞ্চন তবে আমাবি ঘবে আগুন লাগিয়েছে ? কি করবো—কি করবো ঈশা খাঁ ?

ঈশা খাঁ । সন্ধান কর ; বাছাই বাছাই সৈন্ত চারিদিকে পাঠিয়ে দাও । যেখান থেকে হোক, আলেয়াকে খুঁজে আনা চাই ; তাতে যদি কাঞ্চনকে হত্যা করতে হয়, তবু পশ্চাৎপদ হবে না ।

এনায়েৎ । উত্তম, তবে তাই হোক । আলেয়াকে চাই—কাঞ্চনকে চাই—

শ্রীমন্তের প্রবেশ ।

শ্রীমন্ত । কাঞ্চনকে চাই ? আমি জানি তার সন্ধান ।

ঈশা খাঁ । কে ? শ্রীমন্ত ?

এনায়েৎ । তুমি জান ? তবে এস তো ঠাকুর ; তোমার সঙ্গে সৈন্ত দিচ্ছি, তাদের গুপ্ত দেখিয়ে দেবে—বাস্ ! কাঞ্চন ! কাঞ্চন ! অপেক্ষা কর ; এস—এস ঠাকুর !

[ প্রস্থান ।

ঈশা খাঁ । তোমার হাতে ও কি ঠাকুর ?

শ্রীমন্ত । কোটীশ্বরের বিগ্রহ ।

ঈশা খাঁ । টাদরায়ের কোটীশ্বর ? চুরি ক'রে এনেছ ?

শ্রীমন্ত । হ্যাঁ ঈশা খাঁ, তোমার জ্ঞত । এই বিগ্রহ সম্মুখে রেখে গোলাবর্ষণ কর, কেউ আর প্রতিরোধ করবে না ।



ঈশা খাঁ। ঠাকুর! তুমি ঈশা খাঁকে চেনো না। ঈশা খাঁ দাঁড়িয়ে মরবে, তবু ছলনায় যুদ্ধ জয় করবে না।

শ্রীমন্ত। ভেবে দেখ ঈশা খাঁ—

ঈশা খাঁ। তুমি না হিন্দু? তুমি না ব্রাহ্মণ? এই বিগ্রহ তুমিই না পূজা করেছ? আমি মুসলমান, আমারই ইচ্ছে হ'চ্ছে, তোমার হাত ছুটো মুচড়ে ভেঙ্গে দিয়ে ঐ বিগ্রহ চাঁদরায়ের কাছে পাঠিয়ে দিই; আর তুমি হিন্দুধর্মের রক্ষক হ'য়ে হিন্দুর বিগ্রহ নিয়ে এমনি ছিনিমিনি খেলছো?

শ্রীমন্ত। এ কাঠের পুতুল, এতে প্রাণ নেই ঈশা খাঁ!

ঈশা খাঁ। সে কথা বলবো আমি, তুমি কেন বলবে ঠাকুর? যাও—যাও, ফিরিয়ে নিয়ে যাও; আমার কাছে ওর কোন মূল্য নেই বটে, কিন্তু চাঁদরায়ের কাছে ঐ কাঠের পুতুল অমূল্য রত্ন। সে আমার অনেক ক্ষতি করলেও, আমার ধর্মের উপর হস্তক্ষেপ করে নি। আমিও তার ধর্মকে সসম্মানে সেলাম করি।

শ্রীমন্ত। ভুল বুঝলে ঈশা খাঁ! এতে একদিনে জয়।

ঈশা খাঁ। চাই না জয়, পরাজয়ের কালিমা মুখে মেখে নিয়েই ফিরে যাবো, তবু অপরের ধর্ম আঘাত করবো না। ঠাকুর! তোমার মত ঘরভেদী বিভীষণ হিন্দুধর্মের আর কটা আছে বলতে পার? যে পাপ করেছ তুমি, তার ফলে সর্বাসঙ্গে কুষ্ঠব্যাধির জয়ডঙ্কা বেজে উঠেছে। আর কেন শ্রীমন্ত? ক্ষান্ত হও—ক্ষান্ত হও, পৃথিবী শীতল হোক—হিন্দুধর্ম নিষ্কণ্টক হোক।

[ প্রস্থান।

শ্রীমন্ত। মুর্থ! [কোটিশ্বর বিগ্রহের প্রতি] তা হ'লে আর তোমায় নিয়ে কি করবো? এইখানেই তোমার দেবলীলা শেষ হোক। [আছাড় মারিতে উত্তত হইল।]

## গীতকণ্ঠে সনাতনের প্রবেশ ।

সনাতন ।—

গীত ।

ও যে অশেষ লীলাব খনি ।

বিষধর-বিষে অলিবি বে শুধু, নাবিবি হরিতে মণি ।

বাজের আঘাতে ভাঙ্গে না ও, কভু মবে না অনলে জলে,

প্রলয়-আঁধাবে ধ্বংসলীলায় ওই আঁধাদীপ জলে ;

নিরে আয় ওবে কুহুনেব ভার,

বাস্তা পায়ে ওর দে বে উপহাব,

সুশীতল হবে তাপিত এ দেশ উঠিবে মঙ্গল ধনি ।

[ বিগ্রহ কাড়িয়া লইয়া প্রস্থান ।

শ্রীমন্ত । এই—এই, খবরদার—

[ প্রস্থান ।

## চতুর্থ দৃশ্য ।

কৃষকপত্নী—কুটিরসম্মুখ ।

স্বর্ণময়ী ।

স্বর্ণময়ী । ছিলুম প্রাসাদে, এসেছি পর্ণকুটীরে ; রাজভোগে যাদের  
তৃপ্তি হ'তো না, তাদের আহাৰ্য্য আজ ভিক্ষালব্ধ ফল-মূল, প্রতিবেশী  
বর্কর চাষা । অদৃষ্টে আরও কি আছে, কে জানে !

## গীতকণ্ঠে কৃষকবালকগণের প্রবেশ ।

কৃষকবালকগণ ।—

গীত ।

ওরে চাচা, আপন বাঁচা ।

বাগানে আগল দে বে, ছাগল এল, সামলে রাখ তোর পুঁইমাচা ।

ওদের মেয়েছেলের দাড়ী গজায় পুরুষগুলো মাকুন্দ,

পুরুষের নাম কমলিলতা মেয়েব নামটী মুকুন্দ,

সামাল সামাল আসছে তেড়ে, দল বেঁধে ওই ভেড়ের ভেড়ে,

যা পাবে তাই খাবে রে, পাকা হোক আর হদ্দ কাঁচা ।

স্বর্ণময়ী । তোরা আজ সকাল সকাল ফিরলি যে ?

১ম বালক । আরে কও কথা দিদিমণি ! ক্ষেতে কাজ ক'ছি, কতকগুলো দুধমণের মত চেহারা হৈ-চৈ ক'রে এসে এর নাম সুধোয়, ওর নাম সুধোয় । ওকে তো একটা তলোয়ারের খোঁচাই দিয়ে দিলে । আমাকে যদি কিছু বলতো, মারতুম্ শালাকে এক ঘুষি । যাক্ দিদিমণি, তুমি আর এখানে দাঁড়িও না, ঘরে যাও—ঘরে যাও ।

[ বালকগণের প্রস্থান ।

স্বর্ণময়ী । দাদা এখনও আসছে না কেন ? সেই ভোর বেলা বেরিয়েছে, পেটে এখনও দানাটী পড়ে নি । বোধ হয় আজ ভিক্ষায় কিছু পায় নি, বুঝি কাউকে বলতে পারে নি—আমায় হুটী ভিক্ষা দাও । কোটীশ্বর ! আমায় হুঃখ দিয়েছ, সে জন্ত অভিযোগ করি না ; কিন্তু রাজার ছেলেকে ভিক্ষুক সাজালে ?

সহসা গুপ্ত সৈনিকগণের প্রবেশ ।

স্বর্ণময়ী । কে তোমরা ? কোথা থেকে আসছো ?

১ম সৈনিক । আমরা সুলতান ঈশা খাঁর সৈনিক, আসছি আপাততঃ  
শ্রীপুর থেকে ।

স্বর্ণময়ী । তা এখানে কি ? কাকে চাও ?

১ম সৈনিক । সাহাজাদীকে ।

স্বর্ণময়ী । কে সাহাজাদী ?

১ম সৈনিক । হজুরাইন আমাদের সম্মুখে ।

স্বর্ণময়ী । আমি ? মিথ্যা কথা ।

১ম সৈনিক । তবে আপনি কে ?

স্বর্ণময়ী । আমি—আমি এক ভিখারিণী ।

[ সৈন্তগণ পরস্পর দৃষ্টি বিনিময় করিয়া হাসিয়া উঠিল । ]

১ম সৈনিক । কেদার রায়ের পুত্রের সঙ্গে এক ভিখারিণী !

স্বর্ণময়ী । কেদার রায়ের পুত্র ? কে সে ?

১ম সৈনিক । কাঞ্চন রায়—এই ঘরের মধ্যে । এর পরও কি  
সুন্দরী বলতে চান যে, তিনি শাহাজাদী নন ?

স্বর্ণময়ী । হ্যাঁ, এর পরও বলতে চাই, আমি শাহাজাদী নই—তাকে  
আমি চিনি না—কখনও তার নামও শুনি নি ।

১ম সৈনিক । তা হ'লে ক্ষমা করবেন হজুরাইন্ ! সুলতান ঈশা  
খাঁর আদেশে আপনাকে জোর ক'রেই নিয়ে যেতে হবে । তাতে যদি  
প্রয়োজন হয়, কাঞ্চন রায়কে হত্যা করতেও আমরা কুণ্ঠিত হবো না ।

স্বর্ণময়ী । ঈশা খাঁর আদেশ ? যদি জানতুম তোমরা ঈশা খাঁর  
অনুচর, আমি দ্বিধাক্রি না ক'রেই তোমাদের অনুসরণ করতুম । কিন্তু  
তা তো নয় ; ঈশা খাঁর অনুচর এমন চোরের মত ছঃখিনীর কুটীরে  
হানা দেয় না । তোমরা বোধ হয় সেই ব্রাহ্মণের গুপ্তচর !

১ম সৈনিক । ক্ষমা করবেন শাহাজাদী ! অত কথার সময় আমাদের

নেই। আমরা আপনাকে নিয়ে যাবোই ! স্বচ্ছায় যান, সসম্মানে নিয়ে যাবো ; আর যদি জোর করেন, হাত ধ'রে টেনে নিয়ে যেতেও আমাদের বাধ্বে না।

### উন্মুক্ত তরবারিহস্তে কাঞ্চনের প্রবেশ ।

কাঞ্চন । আমার হাতে তরবারি থাকতে ? [ স্বর্ণময়ীর পার্শ্বে আসিয়া দাড়াইল । ]

১ম সৈনিক । হুঁসিয়ার হিন্দু ! তুমি আমাদের যা করেছ, তোমার মাথাটা ছাতু ক'রে মাটিতে মিশিয়ে দিলেও তার শোধ হয় না। তবু আপাততঃ আমরা তোমাকে রেহাই দিয়ে যাচ্ছি। আমরা এসেছি শাহাজাদীকে নিয়ে যেতে। খবরদার ! যদি বাধা দাও, আমরা জাঁহাপনার হুকুমের অপেক্ষা রাখবো না, তোমাকে এইখানেই শুইয়ে দিয়ে যাবো। এস শাহাজাদী—

কাঞ্চন । কে শাহাজাদী ? এ ভ্রান্ত ধারণা কে দিলে তোমাদের ? আমার কুটীরে শাহাজাদী আসবেন কি ক'রে ?

১ম সৈনিক । কি ক'রে, তা তুমিই ভাল জান। লম্পট—

কাঞ্চন । অসভ্য বর্বর ! সব বিসর্জন দিয়ে জগতের এক নিভৃত কোণে আশ্রয় নিয়েছি, এখানেও আমাদের উপর নির্যাতন ? তোমরা কি মনে করেছ, সিংহ জালবন্ধ ব'লে এতই ছর্ব্বল যে, শৃগালের জ্রুটি সহ্য করবে ? এস, আমাকে হত্যা না ক'রে কেউ ওর কেশম্পর্শ করতে পারবে না।

[ সকলে মিলিয়া কাঞ্চনকে আক্রমণ করিল । ]

স্বর্ণময়ী । দাদা ! ক্ষান্ত হও—ক্ষান্ত হও ; আমি যাই ওদের সঙ্গে, দেখি অদৃষ্টে আরও কি আছে ! ওগো, তোমরাই না হয় ক্ষান্ত হও। কি করি ? ভগবান ! তুমি আছ না মরেছ ?

কাঞ্চন । মবেছে—মবেছে । উঃ আব পার্লুম না বোন্ তোকে । রক্ষা করতে ; যদি পারিস্, রণচণ্ডীর মুক্তি ধ'রে নিজেকে রক্ষা কর । কর—আঘাত কর, আরও—আরও, এক দিনে সব জ্বালায় অবসান হ'য়ে যাক্ । ভগবান ! এত দুঃখও মানুষকে দিতে পার ! উঃ—[ পতন ]

১ম সৈনিক । এস শাহাজাদী—

স্বর্ণময়ী । চল যাচ্ছি ; দেখি, ঈশা খাঁ তোদের পুৰস্কার দেয়, না মাথা-  
গুলো কেটে নেয় । দাদা ! যদি বেঁচে ওঠ, আমাব সন্ধান ক'রো না—  
আমার ছায়া মাড়িয়ে না, আমায় নিঃশ্বাসে বিষ আছে । মনে ক'রো,  
আমি মবেছি—আমি মবেছি— [ সৈনিকগণ সহ প্রস্থান ।

কাঞ্চন । সোনা—সোনা—

### কেশরীর প্রবেশ ।

কেশরী । কই সোনা, কোথা সোনা ? এ কে, কাঞ্চন ? সোনা কই ?

কাঞ্চন । ঈশা খাঁর সৈন্তরা তাকে ছিনিয়ে নিয়ে চ'লে গেছে ।  
কেশরী কাকা ! ঈশা খাঁ কোথায় আছে, বলতে পার ?

কেশরী । তাবা শ্রীপুৰ অবরোধ করেছে কুমার ! শত্রু যদি প্রাসাদ  
অবরোধ করে, পরিণামটা কি হবে, ভেবে দেখেছ ? তোমার পিতাকে  
বন্দী করবে, চম্পককে হত্যা করবে, মহারাণীকে সোনারগাঁয় নিয়ে গিয়ে  
বেগমের বাদী করবে ।

কাঞ্চন । এ্যা—আমার মাকে বাদী করবে ? তবে আর মরা  
হ'লো না । কাকা ! আমায় একটু তুলে ধর ; র'সো—একটু জল খেয়ে  
নিই, তারপর ছুটে গিয়ে শত্রুসেনার উপর লাফিয়ে পড়বো । চল—চল—  
[ কেশরীর সাহায্যে প্রস্থান ।

## পঞ্চম দৃশ্য :

শ্রীপুর-রাজপ্রাসাদ ।

### চাঁদ রায় ও ভবানীর প্রবেশ ।

চাঁদ । রাণী—রাণী ! শাখ বাজাও—উলু দাও ! কোটীশ্বর আস্ছে—  
সোনার বর আস্ছে । শুন্ছো না নুপুরের ধ্বনি ? পদ্মগন্ধ টের পাচ্ছো  
না ? দেখ—দেখ, শিরে শিখিচূড়া, গলে বনমালা, পরিধানে পীতবাস,  
আহা কেমন সেজেছে, বল তো ?

ভবানী । কোটীশ্বর ! এতখানি ব্যাকুলতার এই পরিণাম ?

চাঁদ । হ্যাঁ গা, তুমি কঁাদছো কেন ?

ভবানী । কেন কাদি, যদি বুঝতে ! হায় রাজা, কি ছিলে তুমি,  
আজ কি হয়েছ ! ওগো বাঙলার সিংহ, তোমার দ্বারে আজ শত্রু এসে  
ছক্কার দিচ্ছে ; রাজ্য যেতে বসেছে, প্রাসাদটা অধিকার ক'রে তারা  
তোমাকে শৃঙ্খলিত করবে—আমাকে লুণ্ঠিত দ্রব্যের সঙ্গে জয়ডঙ্কা বাজিয়ে  
নিয়ে যাবে । এখনও তুমি প্রকৃতিস্থ হবে না ? তবে তোমার সাধের  
রাজ্য ধ্বংস হোক !

### কেদার রায়ের প্রবেশ ।

কেদার । ধ্বংসের আর বিলম্ব নেই মহারাণী ! প্রাসাদের মধ্যে  
বারুদ বা ছিল, সব নিঃশেষিতপ্রায় । যতক্ষণ পেরেছি, প্রতিরোধ করেছি ;  
আর কিছুক্ষণের মধ্যেই শত্রু এসে প্রাসাদে প্রবেশ করবে । কি করবো  
মহারাজ ?

চাঁদ । শঙ্কধ্বনি কর, বর আস্ছে !

কেদার । হায় মহারাজ, মৃত্যু এসে শিয়রে দাঁড়িয়েছে, তবু তোমার প্রলাপেব শেষ হবে না? দাদা! আমার মাথায় হাত দাও, একটী-বার আমায় আশীর্বাদ কর। তোমার আশীর্বাদ পেলে আমি একা ঐ বিশাল বাহিনী ধ্বংস ক'রে ফিরে আসবো।

ভবানী । না দেবর, থাক; কেন যাবে এ নিশ্চিত মৃত্যুর মুখে? তার চেয়ে চম্পককে যদি খুঁজে আনতে পার, চেষ্টা ক'রে দেখ। কাঞ্চন তো গেছেই, চম্পকেব হাত ধ'বে আমরা দেশান্তরী হ'য়ে চ'লে যাই।

কেদার । মহাবাণী! দুর্ভাগ্য একা আসে না। সবই গেছে যখন, তোমাব চম্পকও থাকবে না। যেতে দাও—সব যেতে দাও, জগতেব বুকে প'ড়ে থাক শুধু চাঁদ বায়েব গৌববময় ইতিহাস। [ প্রস্থানোত্তত ]

চম্পকের মৃতদেহস্কন্ধে দেববলের প্রবেশ ।

কেদার । একি?

ভবানী । কে? কে?

দেবল । [ মৃতদেহ মাটিতে রক্ষা করিল। ]

কেদার ও ভবানী । চম্পক!—

ভবানী । ওঃ! কোটীশ্বর—কোটীশ্বর! [ চম্পকের বুকের উপব লুটাইয়া পড়িলেন। ]

কেদার । এই নিষ্পাপ শিশু কার কাছে কি অপরাধ করেছিল ব্রাহ্মণ? কে এমন নিষ্ঠুর যে, এই কুসুমকোমল শিশুর গায়ে অস্ত্রাঘাত করলে?

ভবানী । আমার যাহ—আমার মাণিক—আমার সাগরসৈঁচা ধন! কথা কও—কথা কও! ওরে, আমার যে আর কেউ নেই! একা একা কেন পালালে যাহ? তুমি যে আমায় ছেড়ে থাকতে পার না! কোটীশ্বর! নিষ্ঠুর! তোমার রাজ্যে এত অবিচার!



কেদার । অবিচার—অবিচার ! আমি এ অবিচারের মূলে বজ্র-  
ঘাত করবো । বল ব্রাহ্মণ ! কার হাতে এ শিশু প্রাণ দিয়েছে ?

দেবল । আমার হাতে ।

কেদার । তোমার হাতে ?

ভবানী । ঠাকুর ! তুমিও বিশ্বাসঘাতক ? তবে আর কি দেবর ?  
সংসার মিথ্যা ; সংসারে আগুন ধরিয়ে দাও, তারপর আমরাও চম্পকের  
পথে চ'লে যাই । হা চম্পক ! আমার চম্পক—

কেদার । ব্রাহ্মণ ! তোমার ভাই আমাদের সোনার সংসার ছিন্ন-  
ভিন্ন করেছে ; তোমাকে মনে-প্রাণে বিশ্বাস করেছিলুম, তুমিও এই  
ষড়যন্ত্রের মধ্যে ? যাক, ভালই হয়েছে । সোনা গেছে, কাঞ্চন গেছে ;  
এই একটা বন্ধন ছিল, তাও তুমি ছিন্ন কবেছ । এইবার সহজে মরতে  
পারবো ; কিন্তু তোমাদের আমি বাঁচিয়ে রেখে যাবো না । কে আছ ?

### প্রতিহারীর প্রবেশ ।

কেদার । এই পাষণ্ডের ছিন্ন মুণ্ড নিয়ে এসো—এখনি ।

ভবানী । ব্রহ্মহত্যা ?

কেদার । যাও—নিয়ে যাও !

দেবল । [ স্বগত ] দাদা ! তোমার দণ্ড আমি নিলুম ; আমার  
মৃত্যুতে তোমার অনন্ত পাপ ধোত হোক ।

[ প্রতিহারী সহ প্রস্থান ।

ভবানী । ব্রহ্মহত্যা ! মহারাজ চাঁদ রায়ের বংশে ব্রহ্মহত্যা ! হা  
চম্পক—আমার চম্পক ! ওরে জেগে ওঠ, নইলে ধর্ম যে রসাতলে যায় !

কেদার । বৎস ! প্রাণাধিক ! যাও—অমর ধামে যাও, আমরাও  
তোমার সঙ্গে যাচ্ছি । জন্মাবধি মাতৃসুত পান কর নি, পিতার সাদর

সন্ধ্যাণ কোন দিন পাও নি ; তাই যদি অভিমানে চোখ বুজে থাক,  
তবে জেনে যাও—তোমার বিরহে তোমার পিতা আর বাঁচতে চায় না ।

### চাঁদ রায়ের প্রবেশ ।

চাঁদ । কে ? কেদার ? যুদ্ধ জয় ক'রে এসেছ ? তবে কাঁদছো কেন ?  
একটা মানিক হারিয়েছে, নয় ? হারাবে না ? কোটীশ্বর পালিয়ে গেছে—

ভবানী । মহারাজ ! চম্পক নেই—তোমার চম্পক নেই—

চাঁদ । চম্পক নেই ! মরেছে ? বটে ! ও আমি জানি । কোটীশ্বর  
পালিয়েছে, চম্পক পালাবে না ? এই যে, মরেছে—না ? মরবে বৈ কি ?  
তুমি কি থাকতে পার ? তুমি যে চাঁদের বংশধর !

কেদার । দাদা ! ওকি, অমন ক'রে চাইছো কেন ? মহারাণী !  
দেখ্ছে কি ? সরিয়ে ফেল—

চাঁদ । এই—খুন করবো । রাখ্—রাখ্ বল্ছি ! ও আমাকে গান  
শোনাবে, আমার মাথায় হাত বুলিয়ে দেবে । স'রে যা সব—স'রে যা  
বল্ছি ; তোরা কাছে থাক্লে ও গান গাইবে না ।

ভবানী । মহারাজ ! দোহাই মহারাজ ! তুমি যাও—

চাঁদ । চুপ্ ! ঘুমুচ্ছে, ঘুম ভাঙ্গিও না । এসো তো—বুকে এসো  
তো—[ মৃতদেহ বুকে লইয়া ] উঃ—বড় গরম, জ্বর হয়েছে । জল নিয়ে  
আয় কেদার, শীগ্গির যা ! ওকে স্নান করিয়ে দিতে হবে, নইলে ম'রে  
যাবে যে ! আন্লি না ? আয় তবে, দীঘির জলে তোকে লুকিয়ে  
রাখি—

[ প্রস্থান ।

ভবানী । রাজা !—রাজা !

[ প্রস্থান ।

কেদার । সব গেল—সব গেল ! [ প্রস্থানোত্তত ]

### কেশার মার প্রবেশ ।

কেশার মা । ও কেদার ! শত্রুরা ফটক ভাঙছে যে ! বারুদ নেই,  
কি করি বল ?

কেদার । মরবে এস, সবাই মিলে এক সঙ্গে তোপের মুখে ঝাপিয়ে  
পড়বো । কিসের ভাবনা মা ? আজ আমাদের মুক্তি—মুক্তি ।

[ নেপথ্যে কামানগর্জ্জন । ]

কেশার মা । ও আবাব কি ?

কেদার । বিধাতার খেলাল । এসো—এসো, যে যেখানে আছ, ছুটে  
এসো—আজ আমাদের মুক্তি—মুক্তি ।

কেশার মা । থাম্ কেদার ! আগে আমি বাবো, তুই আস্বে  
আমাব পেছনে—

[ প্রস্থান ।

[ নেপথ্যে কামানগর্জ্জন ও চাঁদ রায়ের জয়ধ্বনি । ]

কেদার । জয় মহারাজ চাঁদ রায়ের জয় !

### দৌবারিকের প্রবেশ ।

কেদার । কি ? তুমি আবার কি চাও ?

দৌবারিক । মহারাজ মৃতদেহ বুকে ক'রে দীঘির জলে ঝাঁপ দিয়ে-  
ছেন ।

কেদার । তার অর্থ, মহারাজ চাঁদ রায়ও নেই ! বা রে ভাগ্য !  
বা রে বিধাতা ! সবাইকে ছিনিয়ে নিয়েছে । মুক্তি—মুক্তি—মহামুক্তি !

[ প্রস্থান, পশ্চাৎ দৌবারিকের প্রস্থান ।

## পঞ্চম অঙ্ক ।

### প্রথম দৃশ্য :

রণস্থল ।

ঈশা খাঁ ও এনায়েৎ ।

ঈশা খাঁ। সহসা এ কি হ'লো এনায়েৎ? সামনে কামান, পেছনে কামান। আমাদের সৈন্তগুলো সব দলে দলে তোপেব মুখে উড়ে যাচ্ছে। দেখ—দেখ এনায়েৎ, কি ভয়াল মরণোৎসব! মুহূর্তের মধ্যে পাশা উল্টে গেছে। কি হ'লো—কি হ'লো এনায়েৎ?

এনায়েৎ। জাঁহাপানা! আমরা যখন প্রাসাদ অধিকার করতে যাচ্ছিলুম, ঠিক সেই সময় পেছনে দু'জন হিন্দু আমাদেরই কামান অধিকার ক'রে আমাদের গতি ফিরিয়ে দিয়েছে। এদিকে কেদার রায় মরিয়্য হ'য়ে প্রাসাদের বাইবে বেরিয়ে এসেছে, তাকে দেখে সমস্ত হিন্দু সৈন্ত চাঁদ রায়ের জয়ধ্বনি দিয়ে উঠেছে।

ঈশা খাঁ। আমি বলেছিলুম এনায়েৎ, যারা অন্নদাতা প্রতিপালককে পরিত্যাগ করতে পার, তাদের বিশ্বাস ক'রো না। তুমি আমার ভুল বোঝালে। এখন এসো, সবাই মিলে হাত পা গুটিয়ে মরি।

এনায়েৎ। হতাশ হ'য়ো না ঈশা খাঁ!

ঈশা। হতাশ হবো না? প্রাণের আশা এখনও আছে তোমার এনায়েৎ? সন্মুখে কামান, পশ্চাতে কামান, মাঝখানে আমরা মুষ্টিমেয় সৈন্ত নিয়ে কি করবো এনায়েৎ? আমরা মরি, তাতে দ্ব্যর্থ ছিল না;

## চাঁদের মেয়ে

[ পঞ্চম অঙ্ক ।

কিন্তু এতগুলো সৈন্তকে নদীর পারে টেনে এনে এইভাবে হত্যা করা—ওঃ, এনায়েৎ ! এ যে পৈশাচিক নিষ্ঠুরতা !

এনায়েৎ । আমি যাচ্ছি বন্ধু ! যেমন ক'রে হোক, পেছনের কামান শত্রুর হাত হ'তে ছিনিয়ে আনবো ।

ঈশা খাঁ । যাও এনায়েৎ ! যদি পার, তবু একটা পথ খোলা থাকবে । আমি যাচ্ছি কেদার রায়কে সম্ভাষণ করতে । যদি মরি, তোমার উপর আমার এই আদেশ রইলো এনায়েৎ, সোনার সম্বন্ধে কোন ভ্রুভিসন্ধি মনের কোণেও স্থান দিও না ।

এনায়েৎ । সৈন্তদের কি করেছে ?

ঈশা খাঁ । যারা সোনাকে নিয়ে এসেছে ? তোমার সেই বন্ধুদের আমি চাবুক মেরে তাড়িয়ে দিয়েছি ।

এনায়েৎ । জাঁহাপনা—

ঈশা খাঁ ! হুঃখিত হ'লে কি করবো বন্ধু ? ঈশা খাঁ মরবে, তবু লম্পট নাম নেবে না ।

[ প্রস্থান ।

এনায়েৎ । আমিও দেখবো ঈশা খাঁ, কেমন তুমি সাধু !

## রুধিরাক্ত অবসন্নদেহে কাঞ্চনের প্রবেশ ।

কাঞ্চন । সোনা--সোনা ! নাঃ—আর দেখা হ'লো না । এই তো শেষ ! এই তো শেষ ! চোখে অমাবস্তার অন্ধকার, মাথায় বিশ্বের ভার নেমে আসছে । ভগবান ! তোমায় কখনো ডাঁকি নি ; আজ মরণের তীরে দাঁড়িয়ে মনে হ'চ্ছে, তুমি আছ । 'দয়াল ! দীনবন্ধু ! তোমারি অফুরন্ত করুণার দ্বারে আমার অভাগিনী বোনটীকে রেখে গেলুম ; সংসারে ওর কেউ নেই, তুমি ওকে দেখো !

এনায়েৎ । কে ? কে ?

কাঞ্চন । আমি মবণপণেব যাত্রী । দেখ, পিপাসায় আমার ছাতি ফেটে যাচ্ছে ; আমায় একটু জল দিতে পাব ? বড় তৃষ্ণা—বড় তৃষ্ণা !

এনায়েৎ । জল দেবো ? হুঁ, দিচ্ছি ! বলি কাঞ্চন ! আলেয়া কোথায় ?

কাঞ্চন । কে আলেয়া ?

এনায়েৎ । চেনো না ? শাহাজাদী আলেয়া—

কাঞ্চন । জানি না ।

এনায়েৎ । মিথ্যা কথা

কাঞ্চন । মিথ্যা কথা বলবে তুমি এনায়েৎ ! কেদার রায়েব পুল্ল মবতে জানে, মিথ্যা বলতে জানে না ।

এনায়েৎ । বাচালতা রাখ বালক ! তোমাকে এতক্ষণ বাচিয়ে বেখেছি, শুধু শাহাজাদীব সংবাদেব জ্ঞাত । বল, সে কোথায় ? নইলে এই দণ্ডেই তোমাব শিরশ্ছেদ কববো ।

আলেয়ার প্রবেশ ।

আলেয়া । খববদার !

এনায়েৎ । কে ?

আলেয়া । আমি—শাহাজাদী, যার জ্ঞাত তোমাবা বিশাল বাহিনী নিয়ে শ্রীপুরের বৃকেব উপব কাঁপিয়ে পড়েছ, যার জ্ঞাত সোনাকে তার স্ত্রের বিবর থেকে টেনে এনেছ, আর এই বীর যুবককে এমনি ক'রে মৃত্যুর পথে এনে দাঁড় কবিয়েছ । ছিঃ এনায়েৎ থা ! মুমূর্ুর কাঁধের উপর তরবারি তুলতে লজ্জা করে না ? তুমি না বীর ব'লে অহঙ্কার কর ? এই বুঝি তোমার বীরত্বের পরিচয় ?

এনায়েৎ । আলেয়া !

আলেয়া । হুঁসিয়ার বেয়াদব ! শাহাজাদী বল—

কাঞ্চন । শাহাজাদী—

আলেয়া । ভাই ! ভাই ! মরতে চলেছ ? তাই ভাল—তাই ভাল ;  
এ সংসারে অনেক জ্বালা । আমাদের জগ্ন অনেক দুঃখ পেয়েছ ভাই !  
মৃত্যুর শীতল কোলে তোমার সকল জ্বালার শান্তি হোক ।

কাঞ্চন ! ভগিনী ! মরার পূর্বে আমার সকল অভিযোগ প্রত্যাহার  
ক'রে যাচ্ছি । আর কোন দুঃখ নেই আমার, শুধু একটা কামনা আমার  
পূর্ণ কর বোন !

আলেয়া । বল ভাই, কি চাও তুমি ?

কাঞ্চন । দিদি ! আমার অভাগী বোনটির জগ্নই আমার প্রাণ  
বেকতে চায় না । কি যে দুঃসহ যন্ত্রণা এই দেহের প্রতি রোমে, তোমায়  
বোঝাতে পারছি না । সোনা আমার একা রইলো ; ভগবানের হাতে  
তাকে সঁপে দিয়েও আমি নিশ্চিত হ'তে পারছি না । দিদি ! তুমি  
যদি তার ভার নাও, আমি শান্তিতে মরতে পারি ।

আলেয়া । তোমার ভগবানের চেয়েও তুমি আমায় বিশ্বাস কর ?  
তবে তাই হোক ভাই ! আমি এ বিশ্বাসের অমর্যাদা করবো না ।  
যতদিন আমি জীবিত আছি, ততদিন সোনা নিষ্কণ্টক ।

কাঞ্চন । তোমার মঙ্গল হোক । ওই যে সোনা—ওই যে সোনা  
বাতায়নপথে আমার দিকে চেয়ে আছে । সোনা—সোনা—

[ স্থলিতচরণে প্রস্থান ।

আলেয়া । কুমার !—[ প্রস্থানোত্ততা ]

এনায়েৎ । দাঁড়াও ।

আলেয়া । কি ?

এনায়েৎ । আমি তোমাব উপব অত্যায সন্দেহ করেছিলুম ; আমার ক্ষমা কর আলেয়া !

আলেয়া । তোমার মত জানোয়াবকে ক্ষমা করলেই বা কি, আং না কব্লেই বা কি ? ক্ষমা তোমাকে চিরকালই ক'বে আস্ছি । তুমি এত হীন যে, সে ক্ষমাব মর্যাদা না বুঝে আবাব আমাদের দংশন কবতে ছুটে আস । আমাব দেবতাব মত ভাই, তাব মাথাটা তুমিই চিবিযে থেয়েছ । সে চায় বেহেশ্তেব পথে হাত বাড়াতে, তুমিই তাকে দোজাকেব পথে টেনে আন । তুমিই তাকে বুঝিয়েছ, কাঞ্চন আমাকে ফুলে এনেছে ; তাই এত সৈন্তক্ষয় । কেন ? কিসেব এত গায়েব জালা তোমার ? কি চাও তুমি ?

এনায়েৎ । আমি চাই তোমাকে ।

আলেয়া । কি ? তুমি আমাকে চাও ? কামান্ন পণ্ড—

এনায়েৎ । দীবে শাহাজাদী—দীরে । এই কামান্ন পণ্ডকেই তোমায় আলিঙ্গন করতে হবে ।

আলেয়া । এনায়েৎ খাঁ ! তোমার সাহস তো খুব ? তুমি আমাকে চেনো না ? ঈশা খাঁকে চেনো না ?

এনায়েৎ । চিনেছি ব'লেই তোমাব এত কাছে এগিয়েছি বন্ধু ! নইলে এনায়েৎ খাঁ পরনারীর দিকে স্বপ্নেও লুক্ক দৃষ্টি নিক্ষেপ করে না । এসো আলেয়া, আমি তোমার সব অভিযোগ মেনে নিচ্ছি । আমার বিশ্বাস কর ! একদিন আমি যেমন মানুষ ছিলাম, আবাব তেমনি মানুষ হ'তে চাই । এসো—তুমি আমার ভার নাও—[ হস্তধারণ ]

আলেয়া । হাত ছাড় লম্পট ! ঈশা খাঁ ! দেখে যাও, তোমার বিশ্বস্ত বন্ধুর ব্যবহার !

এনায়েৎ । কোন ফল নেই শাহাজাদী ! ঈশা খাঁ এখানে এলে



## চাঁদের মেয়ে

[ পঞ্চম অঙ্ক ।

তোমাকে আমার হাতের মুঠোর মধ্যে তুলে দেবে। নারী! তুমি দীর্ঘকাল আমাকে পশুর আসনে বসিয়ে আমার উপর অবজ্ঞার নিষ্ঠীবন ত্যাগ করেছ, আমি প্রতিবাদ করি নি। আজও তোমার এই সহস্র ব্যঙ্গোক্তি প্রতিদানে আমি তোমায় একটু অভিযোগও করবো না। শুধু একটা কথা শুনে যাও শাহাজাদী! যতই হেয় হোক, এই কামান্ধ লম্পট পশুই তোমার স্বামী।

আলোয়া। কি? কি? কে তুমি?

এনায়েৎ। আমি জয়সিংহ, আর তুমি আমার স্ত্রী সত্যবতী।

আলোয়া। উঃ! খোদা—খোদা! এব চেয়ে আমার স্বামীর মৃত্যু-সংবাদ দিলে না কেন? সারা জীবন আশাপথ চেয়ে ব'সে আছি কি এই স্বামী পাবার জন্য? ফিরিয়ে নাও—তোমার বর ফিরিয়ে নাও ঈশ্বর!

[ প্রস্থান ।

এনায়েৎ। বা রে নারীচরিত্র—বাঃ!

[ প্রস্থান ।

## দ্বিতীয় দৃশ্য :

বগম্বলের অপবাংশ ।

### শ্রীমন্তের প্রবেশ ।

শ্রীমন্ত । সংসাবটা প্রহেলিকা হ'য়ে দাঁড়িয়েছে । ঈশা খাঁ সোনাকে হাতে পেয়ে ছেড়ে দিলে, ঈশা খাঁব বোন্ আলিয়া—সেও আজ শত্রুকে আপনাব ব'লে গ্রহণ করেছে ; মুখ দেবল, সংসাবেব আবর্জনা ব'লে যাকে ছ'পায়ে মাড়িয়েছি, সে আজ আমাবই জন্য প্রাণ দিলে ! দেবল ! দেবল ! তুই আজ কত উর্দ্ধে, আব আমি কত নিম্নে ! ভাই ! ভাই ! যদি তোব দৃষ্টি থাকে, চেয়ে দেখ—তোব জন্য আজ আমাব চোখের জল বাধা মানেন না । কোথা যাই—কোথায় পালাই ? কুষ্ঠব্যাধির চেয়েও এ অন্তর্দাহ যে ভঃসহ !

### কেশরীর প্রবেশ ।

কেশবী । কে ? শুক শ্রীমন্ত নয় ? ঠিক হয়েছে, তোমাকে আজ আমাব বিশেষ প্রয়োজন ঠাকুর ! সেদিন বিধর্মীব হাত থেকে তোমায় রক্ষা কবেছিলুম ব'লে মনে ক'বো না যে তোমাব ক্ষমা করেছে । আজ আমাদের মবণেব দিন ; কিন্তু মরবার আগে তোমার ভবলীলা শেষ ক'বে যাবো ।

শ্রীমন্ত । তাই কর ; বাঁচবার সাধ আর আমার নেই ।

কেশবী । কেন ? ঈশা খাঁর মোসাহেবী ক'রে ইমারৎ গড়বে না ?

শ্রীমন্ত । ভুল কেশরী ! সব ভুল । দেবল আমায় বুঝিয়ে দিয়ে

গেছে, ত্যাগেই প্রকৃত শান্তি। যে চাঁদ রায়কে অবলম্বন ক'রে আমার অন্তরের বহি-জ্বালা এতখানি পরিপুষ্ট হ'য়ে উঠেছিল, সে চাঁদ রায় আজ আর নেই।

কেশরী। চাঁদ রায় নেই ?

শ্রীমন্ত। না ; আমারই অত্যাচারে সে তিলে তিলে শুকিয়ে মরেছে, তবু মৃত্যুর পূর্বে একটা অভিশাপও আমায় দিয়ে যায় নি। আমি গোথ্রো সাপের মত সবাইকে দংশন করেছি, তবু তারা আমার মুখে ছধের বাটি তুলে পরেছে। এ কি সয় কেশরী ? তার উপর এই নিদারুণ কুষ্ঠব্যাধি—নাঃ, এর চেয়ে মৃত্যুই বাঞ্ছনীয়। কর—হত্যা কর !

কেশরী। তবে সোজা হ'য়ে দাঁড়াও। ব্রাহ্মণ ! তোমার সব অত্যাচার হয় তো ক্ষমা করতে পারতুম, কিন্তু তুমি আমাদের প্রজাবংশল দয়ালু রাজাকে তিলে তিলে মৃত্যুর পথে এগিয়ে দিয়েছ, তোমার এ অপরাধ আমি কিছুতেই ক্ষমা করবো না।

শ্রীমন্ত। তার উপর আরও একটা আছে, আমি রাজকুমার চম্পককে হত্যা করেছি—

### কেদার রায়ের প্রবেশ ।

কেদার। কে ? কে ? চম্পককে হত্যা করেছে কে ?

শ্রীমন্ত। আমি।

কেদার। এঁ্যা—সে কি ? আমি যে দেবলের শিরশ্ছেদ ক'রে এসেছি ! তুমি—তুমি কে ? ব্যাধিজর্জরিত ধূলিধূসরিত—ও, তুমি শ্রীমন্ত না ? পেয়েছি—পেয়েছি ! ব্রাহ্মণ ! তোমারই জঘ্ন আমি ভাই হারিয়েছি—পুত্র হারিয়েছি—রাজ্য ধন মান সব ডালি দিতে বসেছি। 'আমরা তো মরবোই, কিন্তু তোমাকেও জীবিত রেখে যাবো না। তুমি শুধু

আমাদেবই সৰ্বস্বাস্তু কব নি নিজের ভাইকেও যমালয়ে পাঠিয়েছ। সেই সবল ব্রাহ্মণ—ওঃ, কি কবেছি—কি কবেছি।

শ্রীমন্তু। কেদাব।

কেদাব। দাঁডাও, কি শাস্তি তোমায় দেবো, ঠিক ভেবে উঠতে পাবছি না। এমন শাস্তি তোমায় দিতে হবে, যেন তোমাব এক ফোটা বক্ত একটা অস্থিও পৃথিবীর মাটি স্পর্শ না কবে।

শ্রীমন্তু। দাও—শাস্তি দাও কেদাব, আজ আব আমাব কোন অভিযোগ নেই।

কেশবী। অভিযোগ? এতখানি পাপ ক'বেও আবাব অভিযোগেব কথা তুলছো ঠাকুর? দাদা। কেন বিলম্ব কবছো? দৈ দেখ, আমাব হাত থেকে কামান অধিকাব ক'বে ঈশা খাব সৈন্য আবাব কথো দাঁড়িয়েছে। যা হব, শাস্ত্র কব, যম আসছে—যম আসছে—

কেদাব। যম আসছে, একটা কিছু কবতে হবে। কি কববো, ভেবে উঠতে পাবছি না। তোমাব জন্য দাদা গেছে, সোনা গেছে, চম্পক পালিয়েছে—

### দূতের প্রবেশ।

কেদাব। কি দূত, তুমি আবাব কাব মৃত্যুসংবাদ এনেছ? মহাবাণীব? বল—বল, একটুও বিস্মিত হবো না। এ যে আমি জানি! বল দূত, কে মবেছে আব?

দূত। কুমাব কাঞ্চন।

কেশবী। ওঃ! কাঞ্চন—কাঞ্চন! দাদা! এব জন্ত আমি দারী। আমিই তাকে রক্ষিতরাক্ত অবসন্নদেহে যুদ্ধে টেনে এনেছিলুম, সেই অবসন্নদেহেই সে শত্রুর হাত থেকে কামান কেড়ে নিয়ে এত বড় বাহিনীব

গতি ফিরিয়ে দিয়েছিল। ওঃ—সে কি যুদ্ধ দাদা! যদি দেখতে, বিশ্বস্বে অবাক হ'য়ে থাকতে।

কেদার। যাও দূত, মহারাণীকে সংবাদ দাও; আনন্দ কব—আনন্দ কর! কেদার বায়ের ছেলে বীরের মত প্রাণ দিয়েছে। বিষ খেয়ে মরে নি, অসংখ্য শত্রুর মৃতদেহের উপর পুষ্পশয্যা পেতেছে। কি আনন্দ—কি আনন্দ কেশরী! এক দিনে সব শেষ!

কেশরী। দাদা! এই সব অনর্থের মূল এই ব্রাহ্মণ।

কেদার। হত্যা কর—নির্মম হত্যা! আগে চোখ দুটো উপড়ে ফেল, তারপর গায়ের চামড়া তুলে নিয়ে গোথরো সাপ দিয়ে দংশন করাও।

কেশরী। এস ঠাকুর—[ শ্রীমন্তকে লইয়া প্রস্থানোত্ত। ]

কেদার। না, দাঁড়াও; এত বড় পাপের এতটুকু শাস্তি তোমায় দেবো না। এর চেয়ে কঠিন শাস্তি চাই, যাতে সারা জীবন তোমার অন্তরাগ্না নিত্য হাহাকার ক'রে ওঠে। টাঁদ চায় বেঁচে থাকলে তোমায় যে দণ্ড দিতেন, আমিও তোমায় সেই দণ্ড দেবো। যাও ব্রাহ্মণ! এতখানি অত্যাচারের যিনিময়ে আমি দিলুম তোমায় ক্ষমা।

[ প্রস্থান।

কিশোরী ও শ্রীমন্ত। ক্ষমা?

কিশোরী। কিন্তু আমি তোমায় ক্ষমা করবো না। এসো ঠাকুর, আমারই বিধানে তোমার ভবলীলা শেষ হোক।

শ্রীমন্ত। কোটীশ্বর! তোমারই ইচ্ছা পূর্ণ হোক।

[ শ্রীমন্তকে লইয়া কেশরীর প্রস্থান।

## তৃতীয় দৃশ্য :

প্রাসাদতোরণ ।

### ভবানীর প্রবেশ ।

ভবানী । কাঞ্চন ! কাঞ্চন !

### কেশার মার প্রবেশ ।

কেশার মা । কোথায় যাচ্ছ বৌমা ?

ভবানী । ছাড় মা—ছাড়, কাঞ্চনকে নিয়ে আসি । অভিমানী ছেলে  
দুর্জয় অভিমানে ধূলিশযায় প’ড়ে আছে । ও মা, দোহাই তোমাব !  
আমায় ছেড়ে দাও, আমি ছুটে গিয়ে তাকে নিয়ে আসি—

কেশাব মা । কাকে আনবে মা ? হাজাব ডাকলেও সে আর সাড়া  
দেবে না ।

ভবানী । না—না, তুমি জান না । সে কি আমার তেমন ছেলে ?  
অর্দ্ধদগ্ধ অবসন্নদেহে সে আমার ডাকে ছুটে এসেছিল । ছাড়ো মা—  
ছাড়ো, কেন বাধা দিচ্ছ ?

কেশার মা । আর যে কোন উপায় নেই মা !

ভবানী । কে বলে উপায় নেই ? আমি যাবো, দেখি কার সাধ্য  
আমার গতিরোধ করে ।

### কেশরীর প্রবেশ ।

কেশরী । রাণী-মা—রাণী-মা ! এই নাও তোমাদের পরম শত্রুর  
ছিন্ন শির ! [ শ্রীমন্তের ছিন্ন শির ফেলিয়া দিল । ]

ভবানী । সরে যাও !

কেশরী । কোথায় চলেছ রাণী মা ?

ভবানী । কাঞ্চনকে নিয়ে আসছি, সর—সর !

কেশরী । কাঞ্চনকে নিয়ে আসবে ? হায় মা ! যম থাকে নেয়,  
তাকে যে আর ছেড়ে দেয় না ।

নেপথ্যে । জয় সুলতান ঈশা খাঁর জয় !

কিশোরী । জয় মহারাজ টাদ রায়ের জয় !

### কেদার রায়ের প্রবেশ ।

কেদার । আবার বল্—আবার বল্, জয় মহারাজ টাদ রায়ের জয় !  
কেশা ! মরতে পারবি ?

কেশা । কেন পারবো না দাদা ?

কেদার । তবে আর, দুজনে তোরণদ্বার আগলে দাড়াই ; দেখি,  
কে এমন শক্তিমান যে আমাদের হঠিয়ে প্রাসাদে প্রবেশ করে !

### ঈশা খাঁ ও এনায়েতের প্রবেশ ।

ঈশা খাঁ । আমি ।

কেদার । ঈশা খাঁ ! কেদার রায়ের শক্তির পরিচয় পাও নি ?

ঈশা খাঁ । পেয়েছি ; তুমিও পাবে আজ ঈশা খাঁর শক্তির পরিচয় ।  
সহজে দ্বার খুলে দাও কেদার রায় ! নইলে তুমি আমার বন্দী ।

কেদার । দস্তে তৃণ ধারণ ক'রে ফিরে যাও ঈশা খাঁ, নইলে তুমি  
আমার বধ্য ।

এনায়েৎ । তবে চলুক অস্ত্র—

কেশরী । চলুক লাঠি—

ঈশা খাঁ। কেদার রায়!

কেদার। ঈশা খাঁ!

দুই পক্ষ যুদ্ধোন্মুখ হইয়া দাঁড়াইল, সহসা

আলিয়া আসিয়া মধ্যে দাঁড়াইল।

আলিয়া। সন্ধি।

ঈশা খাঁ ও এনারেৎ। আলিয়া!

কেদার ও কিশোরী। শাহাজাদি!

আলিয়া। সন্ধি কব, না হয় দুই পক্ষের সংঘর্ষে আমি আগে প্রাণ দিই, আমার মৃতদেহ মাঝখানে বেথে তোমাদের জয়-পরাজয় নির্ণীত হোক।

ঈশা খাঁ। তুমি যে ভয়ী—আদবেব ছালালী আমার!

কেদার। তুমি যে মা—অতিথির বেশে নারায়ণ।

আলিয়া। তবে ফেলে দাও অস্ত্র! [ দুই পক্ষ মন্ত্রমুগ্ধের মত অস্ত্রশস্ত্র ফেলিয়া দিল। ] ছিঃ-ছিঃ-ছিঃ, একই অক্ষয় বটের দুটি শাখা তোমরা, একই বাঙলা মায়ের দুটি সন্তান তোমরা হিন্দু-মুসলমান, একজনের গায়ে বিস্ফোটক হ'লে আর একজনকে বিষের জালা সহিতে হয়, একেব ঘরে আনন্দের শ্রোত এলে অপরকে ভাসিয়ে নিয়ে চ'লে যায়,—তোমরা এমনি ক'রে নিজের মাংস নিজে কামড়ে খাবে? তোমরা তো বনের পশু নও, তোমরা তো কৃমিকীট নও! তোমরা মানুষ, তোমরা বীর, তোমাদের ভ্রাতৃস্নেহের অমৃতধারায় বাঙলার মাটি সরস হ'য়ে উঠুক—হিন্দু-মুসলমানের সম্মিলিত শক্তিতে বাঙলায় একটা মহা-মানবের জাতি গড়ে উঠুক!

ঈশা খাঁ। তাই হোক ভয়ী! তোমার জন্তই আমার এ অভিযান। তোমাকে যখন পেয়েছি, আর আমি যুদ্ধ করবো না।



কেশরী। জয় রাজা কেদার রায়ের জয় !

এনায়েৎ। জয় সুলতান ঈশা খাঁর জয় !

আলেয়া। না—না, বল জয় বাঙলা মায়ের জয় !

কেশরী ও এনায়েৎ। জয় বাঙলা মায়ের জয় !

### স্বর্ণময়ীর প্রবেশ ।

স্বর্ণময়ী। দেখতে এলুম, আশানের বহির্জালায় উৎসবের বাণী কেমন বেজে উঠেছে !

ভবানী। সোনা—সোনা—

আলেয়া। না মা, আর মায়া বাড়িও না ; ও আর তোমাদের নয়, আজ হ'তে ও আমার। এসো বোন্ আমার সঙ্গে ; আমরা দুই জনে মিলে ছুনিয়ার মঙ্গলের জন্ত অগ্রর দরিয়া বইয়ে দিই এসো ! আমি ডাকুবো খোদাকে, তুমি ডাকবে তোমার ভগবানকে, দেখি খোদা আর ভগবান হাত ধরাধরি ক'রে এসে আমাদের প্রাঙ্গণে দাঁড়ায় কি না !  
[ স্বর্ণময়ীর হাত ধরিয়া অগ্রসর হইল । ]

এনায়েৎ। আলেয়া !

আলেয়া। এ জন্মে আর নয় স্বামী ! ফিরে যাও তুমি আরাবল্লীর পাদদেশে। তোমার এ হিংস্র স্বভাব এ জন্মের সাধনায় দূর কর, পরজন্মে আমি তোমার ক্রীতদাসী হ'য়ে থাকুবো।

[ স্বর্ণময়ী সহ প্রস্থান ।

এনায়েৎ। পরজন্মে নয়, এ জন্মেই আমি তোমাকে চাই ! বিদায় জাঁহাপনা ! আমার পৃথিবী এক দিকে, আর আলেয়া এক দিকে—

[ তরবারি রাখিয়া প্রস্থান ।

ঈশা খাঁ। কেদার রায় ! সোনাকে তোমাদের বুক থেকে ছিনিয়ে

তৃতীয় দৃশ্য । ]

চাঁদের মেয়ে

নিয়ে ঘরছাড়া করেছি, তার প্রতিদানে আমার ভগ্নীকে বিসর্জন দিলাম ;  
এইবার আমার বন্ধু ব'লে গ্রহণ কর—

কেদার । তাই হোক ঈশা খাঁ ! আজ হ'তে আবার আমরা  
পরস্পরের বন্ধু । এস বন্ধু, আমার পুত্রের শবদাতার অনুগমন করতে  
আমি তোমায় নিমন্ত্রণ করছি—

[ ঈশা খাঁ ও কিশোরীসহ প্রস্থান ।

ভবানী । সোনা—সোনা—

কোটিশ্বরের বিগ্রহ লইয়া সনাতনের প্রবেশ ।

সনাতন । এই নাও মহারাণী ! তোমাদের কোটিশ্বর—

গীত ।

ওমা, প্রণাম কর—প্রণাম কর ।

সকল দাগা জুড়িয়ে যাবে, এই রতনে জড়িয়ে ধর ।

ষতই দুঃখ পেয়ে থাকিস্, সবই আছে গোণা,

সওয়ার গুণে সেই ধূলো তোর হবেই হবে সোনা,

মাগো তোমার চোপের খাবায় বিশ্বজগৎ আপন হারায়,

ওমা, মরবে যদি সবাই মিলে এই সাগরে ডুবে মর ॥

[ প্রস্থান ।

ভবানী । কোটিশ্বর ! কোটিশ্বর ! এসেছ তুমি ? আমার সর্বস্বাস্ত  
ক'রে ফিরে এসেছ ? এসো—এসো দয়াল ! তোমার ইচ্ছাই পূর্ণ হোক ।

[ কোটিশ্বরের বিগ্রহ বুকে করিয়া প্রস্থান ।

শান্তি ! শান্তি ! শান্তি !

সমাপ্ত ।